



R. BIBL. NAZ.
Vitt. Emanuele III.

RACCOLTA
VILLAROSA

B

38

NAPOLI

B. 14.08

Rac. Villarosa B. 38.

of the

IO. GOTTLIEB
HEINECCIUS,
IC. ET ANTECESSORIS,
PRAELECTIONES
ACADEMICAЕ
IN
SAM. PVFENDORFFII
DE
OFFICIO
HOMINIS ET CIVIS-
LIBROS II.

EDITIO SECVNDA AVCTIOR.



GENEVAE,
Impensis FRATRVM CRAMER, ET CL. PHILIBERT.

c1616ccxxxviii.

THE
JOURNAL
OF
THE
ROYAL ANTHROPOLOGICAL INSTITUTE
VOLUME 10
PART 1
1880
LONDON
PUBLISHED BY THE
EDUCATION OFFICE
1880



PROLEGOMENA.



Prolegomenorum loco paucis dispiciendum erit:

I. an detur ius naturae?

II. quid sit?

III. quam utilitatem in vita christiana et civili praestet?

IIII. quae eius ab antiquissimis temporibus fata fuerint? quique praeter

ceteris hanc disciplinam libris suis illustrarint?

I. Dari ius naturae, haud pauci negarunt, veluti EPICURVS apud DIOG. LAERT. *Lib. VIII. Segm. 150.* cuius sententiam ita expressit HORAT. *Satir. I, 3.*

Nec natura potest iusto secernere iniquum:

Atque ipsa utilitas iusti prope mater et aequi.

E. g. furari ex eorum sententia non natura et moraliter turpe

pe est; prohiberi tamen illud suasit utilitas generis humani.

Eiusdem sententiae fuit ARISTIPPVS apud DIOG. LAERT. *libr. II.* 97. qui, uti omne virtutis studium euerit, voluptatemque pro summo hominis bono habuit: ita et statuit, *nihil sua natura iustum, iniustum, honestum, inhonestum esse, sed sola lege et consuetudine; furto quoque et sacrilegio, quum tempestivum fuerit, operam daturum esse sapientem, neque enim quidquam horum sua natura turpe esse, si auferatur vulgaris opinio, ad continendos in officio stultos constata.*

Nec minus delirauit CARNEADES Platonicus, sed in sceptin quam maxime procliuis, qui Romae legationis causa commoratus aliquando pro iustitia, postridie contra eandem, iurisque naturalis existentiam disseruit, vrbe ideo pulsus auctore Catone. Vid. PLUTARCH. in *Caton. maior. pag.* 349. Argumenta, quibus iustitiam impugnauit, seruauit LACTANT. *Instr. diuin. V, 16.* Ea huc redeunt. *

1. *Omnia animalia suae utilitati studere, e. g. propulsare iniurias, verbera, mortem, nec tamen ideo iustitiam illis tribui, aut iniustitiam?* Resp. brutis animantibus, quae facultate rationali voluntatem diuinam cognoscendi destituuntur, ad hominem ratione et conscientia praeditum non valet consequentia. Potius argumentum inuertimus: quaecumque creaturae facultate voluntatem Dei cognoscendi, adeoque sana ratione praeditae sunt, eae quoque actiones secundum Dei voluntatem, non vero proprium commodum, dirigere tenentur: iam homines, non vero animalia, cet. ergo, cet.

2. *Omne ius nascitur ex utilitate, ergo non sua natura quidquam iustum est.* Resp.

a) Va-

* Ex recentioribus et HONNORIUS de ciue *cap. 1. §. 10.* dixit in statu naturali fuisse ius omnium in omnes, adeoque sum mensuram iuris fuisse cuiusque utilitatem.

a) Vacillat consequentia, siquidem aliquid ex utilitate nasci, at iustum tamen esse potest; Deus enim ens benignissimus vere nostram utilitatem intendit, nec quidquam nobis tamquam legem praescripsit, nisi quod nobis vere utile, sic e. g. pacta esse seruanda, et rectae rationi consentaneum est.

b) Inde ius est, unde obligatio: at obligatio nostra non est ab utilitate, (nam huic quisque renuntiare potest,) sed a voluntate Dei, quae nobis per rectam rationem innotescit; ergo ius non est ex utilitate, sed ex voluntate Dei, quae per rectam rationem innotescit, adeoque aliquid natura iustum est.

3. *At leges inter gentes variant, et hinc nihil est natura iustum, alioquin enim unum omnibus ius esset?* Resp. Distinguendum esse inter ius naturae et civile; prius apud nos idem, e. g. neminem esse occidendum, pacta esse seruanda, cet. posterius ad rei publicae cuiusque utilitatem adtemperatum. Vid. XENOPH. *de re publ. Athen.* Ratio diuersitatis in eo posita, quod ius civile versetur circa actiones in se indifferentes, e. g. ius retractus, prohibitio alienationum, iura dotium.

Nos itaque existentiam iuris naturae sic probamus: quicumque in natura sua deprehendunt rectam rationem, quae aliquid iustum esse cognoscat, et conscientiam, quae nos obligationi satis fecisse vel non satis fecisse monet, illi habent ius naturae: atqui homines, cet. ergo, cet. Est hoc argumentum, quo utitur PAVLLVS, *Epist. ad Rom. II, 14. 15.*

II. *Quid vero est ius naturae?* Considerari illud potest vel tamquam ius, vel tamquam disciplina seu scientia; hic priori sensu accipimus. Iam definitiones sunt vel nominales, vel reales: nominales nobis tantum modo subministrant no-

tas aliquas, quibus res nobis obuias ab aliis omnibus semper discernere possumus, e. g. circulus est figura, cuius peripheria a centro vbique aequaliter distat; *reales* contra ostendunt modum, quomodo illa res oriatur, vel quomodo possibile sit, e. g. circulus est figura, quae radio circa punctum circumactio describitur; hic vero tantum quaeritur definitio nominalis.

Igitur *ius naturae* est ius a Deo toti generi humano per rectam rationem promulgatum: Dicimus

1. *Ius*, quia ex parte nostra est obligatio, teste conscientia.

2. *A Deo*, vt distinguatur a iure humano et ciuili, quod ab hominibus est.

3. *Toti generi humano*, ita distinguitur a iure diuino particulari, e. g. lege de circumcisione, de sacrificiis.

4. *Per rectam rationem*, ita distinguitur a iure positiuo vniuersali, e. g. sabbathum non est iuris naturae, quia ex recta ratione non innotescit.

(Vocamus vero *rectam rationem*, quae principia actionum ex finibus ratiocinando colligit; *peruersam*, quae insuper habito fine et scopo Dei de principiis actionum suarum ex praeiudicio suo statuit, WEIDLER. *Ius nat. et gent. cap. 1. §. 9. n. 7.*)

5. *Promulgatum*; sine promulgatione enim nulla lex obligat; *lex* est norma, ad quam actiones nostras componere debemus: atqui norma debet esse nota, alias enim non possemus actiones nostras componere; ergo promulganda est. Absurdum facinus Caligulae apud SVETON. in eius *vit. cap. 41.*

At quid est *ius gentium*? Sunt, qui diuersum aliquod *ius gentium* statuunt a iure naturae.

VLR. HYBER. *de iure ciuit, libr. I. sect. I. cap. 5. et Eunom.*

nom. Rom. pag. 12. per illud intelligit ius, quod voluntate omnium, aut sane cultiorum gentium vim obligandi accepit.

Contra VITRIAR. *Inst. iur. nat. cap. 1. §. 28.* illud definit, quod Deus per rectam rationem inter omnes gentes propter communem necessitatem et utilitatem constituit.

Sed utrumque falsum; si recipias definitionem HUBERI, cultiores gentes aut per modum legis id introduxerunt, aut per modum pacti: si prius, lex illa nullam obligabit gentem, quia gens ratione gentis non est superior, adeoque et nulla alteri legem praescribere potest; sin posterius, nullum erit ius, sed pactum; ius est complexus legum, non pactorum. Accedit, quod quaestio sit facti, an unquam inter gentes ita conuenerit, id vero ex historia demonstrari nequit.

Si VITRARI definitionem recipias, inde probari contra ipsum poterit, unum idemque ius naturae et gentium.

Si enim eadem est legislatoris voluntas, idemque modus eam promulgandi tum in gentibus, tum in singulis hominibus, utrisque quoque idem erit ius: prius verum ob definitionem VITRIARI; ergo et posterius.

Dicendum itaque, *unum esse ius naturae et gentium*, quia 1. ab eodem legislatore est, 2. eisdem obligationis, 3. eodem modo promulgatum, iisdemque legibus et regulis constat; e. g. pacta sunt seruanda, nemo laedendus, ius solum cuique tribuendum.

Itaque *ius gentium* nobis est ipsum ius naturae, negotiis ciuitatum et liberarum gentium adplicatum. Ita PUFENDORFIVS, THOMASIVS, CACCIVS, et recentiores tantum non omnes.

III. At quam utilitatem praestat ius naturae et gentium? Sane in disciplinis quoque valet illud Cassianum, cui bono? frustra

frustra ergo sudaremus in explicando addiscendoque iure naturae et gentium, si nulla esset eius utilitas.

Oppugnauit hoc indirecte Io. LVDOV. PRASCRIUS tribus dissertationibus de lege caritatis ad Hugon. Grot. de iur. bell. et pac. *Designatio iuris naturalis ex disciplina Christianorum, et de iure gent. maxime Christianorum. Ratisbon. 1688. et 1689. sed iis satisfactum a CHRIST. THOMASIO in Cogitat. menslr. Germ. 1689. pag. 79. 206. et 295.*

Directe vero id fecit a. 1704. auctor anonymus in *der ersten Entdeckung des Lichts und Rechts*, cap. 2. Rationes eorum sunt :

1. *Quod ius naturae nullius usus sit in vita Christiana, Christiano enim pro norma esse debere Scripturam sacram ?* Resp. a) At multi sunt et inter Christianos, qui Sacram Scripturam parum curant, ii, vt sint inexcusabiles, iure naturae conuincuntur, *Epist. ad Rom. I, 20. 21.* b) Deinde nihil est utilius ad confirmationem in Christianismo, quam harmonia rationis et Sacrae Scripturae; c) Multa in iure naturae explicantur, quae Sacra Scriptura non exposuit, tamquam ad vitam aeternam non comparata, e. g. de contractibus, vltimis voluntatibus, successionibus ab intestato, aliisque humanis negotiis.

2. *Nullam esse eius utilitatem in vita civili, quia in legibus civilibus deciduntur controuersiae, non ex iure naturae et gentium ?* Resp. a) Falsum est, nullam controuersiam civilem decidi ex iure naturae et gentium, ius enim ipsum constaturum est ex legibus naturalibus, praeceptis gentium et civilibus, §. *ult. Inst. de iustit. et iur.* b) Ius civile valet tantum inter ciues eiusdem rei publicae; quid vero si controuersia intercedit inter diuersas gentes? quid si inter ciues diuersarum rerum publicarum, e. g. inter Hollandum et Indum? hic non alia potest esse norma, quam ius naturae et gentium.

3. *Ese*

3. *Esse ius naturae cordibus hominum inscriptum, ergo non opus esse tanto molimine in illo in scripturam redigendo explicandae?* Resp. a) Homo natura cantat, numerat, ratiocinatur, et tamen ideo nemo reiicit musicam, arithmeticam, vel logicam; ars enim perficere debet naturam: b) In omni iure dantur principia; conclusiones proximae et remotiores; illa unusquisque nouit, cui est recta ratio, conclusiones quoque proximae ex illis principiis facile cognoscit etiam vulgus, non autem statim habet omnes conclusiones remotiores; sic e. g. pacta esse seruanda facile quis intelligit; fluit enim hoc immediate et proxime et principio: *quod tibi non vis fieri*, cet. at, num etiam pactum errore initum seruandum sit, non statim unusquisque intelligit, nisi qui plura iuris naturalis principia connectit.

(Inprimis studioso iuris plane necessaria est iuris naturae et gentium cognitio, 1. propter controuersias illustres, 2. propter ius publicum, uniuersale enim ex ipso iure naturae est; 3. propter fontem et originem iuris ciuilib, qui non alius est, quam ius naturae et gentium. Conf. Io. ESSENHAR. Harmonia Inst. iuris nat. et ciuilib. Helmst. 1699. 8.)

III. iam ad historiam iuris naturae, qualem ex instituto scripserunt Io. FRANC. BYDDEVS, quae habetur inter *Selecta iuris naturae et gentium*, Hal. 1704. Io. FRID. LVDOVICI *Delineatio historiae iuris diuini*, edita Halae 1701. et 1714. CHRIST. THOMASII *Historia iuris naturae paullo plenior*, Hal. 1719.

Tacemus quae IAC. FRID. REIMMANNVS, GOTTL. STOLIVS, et alii, de historia et scriptis iuris naturae commentati sunt in historia literaria. Quatuor constituimus periodos:

Heinrici Prael. Pfendorff.

**

1. ab

1711. a

1. *ab initio mundi ad Christum natum.*
2. *a natiuitate Christi usque ad originem Academicarum et sibalaurum,*
3. *ab hoc tempore ad Grotium, et denique*
4. *ab hoc ad nostra tempora.*

Periodus prima.

Ius naturae tam antiquum est, ac ipsum genus humanum, sed non ita statim exulta est disciplina iuris naturae.

1. Ante legem Moisaicam multi viri pii vixerunt, Enoch, Noah, Abraham, Isaac; quum ergo hi leges Dei posituas nondum habuerint, consequens est, ut vixerint secundum ius naturae.

Iudaei quidam tradunt, Noacho Deum dedisse septem praecepta, ex quibus illi ius naturae deriuare solent, ceu docuit Io. SEIDENVS, *de iure nat. et gent. secundum disciplinam Hebraeorum*, cap. 10. sed parum fidei meretur haec Iudaeorum traditio.

a) quia Iudaei historica cognitione plane destituuntur;

b) quia nullum de re tam antiqua habent testimonium vel Scripturae, vel antiquitatis.

Interim certum, tum nondum in systematis formam reductum fuisse ius naturae, hominesque magis studuisse secundum ius naturae viuere, quam illud in artem redigere.

2. Inter gentiles soli fere Stoici ius naturae excoluerunt, quod vocarunt partem de officiis; de iis enim scripsere ZENO, PANAETIUS, et alii, sed eorum libri omnes perierunt, solius exstant CICERONIS *libri de officiis*, in quibus ius naturae explicat secundum disciplinam Stoicorum. Sed multis tamen naevis laborat hoc systema.

1. Confudit CICERO ethicam et ius naturae, et hinc multus est in describendis virtutibus cardinalibus.

2. Non

2. Non semper doctrinas connectit adcurate ; sed fucum saepe facit eloquentia sua.

Interim multa habet laude digna, ut dici possit, CICERONEM solum post Stoicos hac prima epocha praeclare meritum esse de iuris prudentia naturali.

Periodus secunda.

Post Christum natum neminem decuisset magis hanc disciplinam emendare, quam Patres Ecclesiae.

Et sane habemus etiam AMBROSII libellum *de officiis*, separatione editum a IO. HENR. BOECLERO ; sed multa hic desideres :

1. Ambrosius confudit ius naturae et scripturae ;
2. Magis intruxit clericum, quam virum bonum ; unde et DV PIN *Biblioth. eccles. Tom. I.* observat, librum hunc in codicibus MSS. intēribi *de officiis clericorum* ;
3. Commune id habuit cum reliquis Patribus, quod fuerit Platonice, multaque erroneas doctrinas Platonis immiscent Christianae ethicae, et
4. Magis homiletice vel oratorie ius naturae tractarit, quam philosophice. Vid. BARBEYRAC. *Praefat. ad Pufendorf. §. 9. sequ.*

Periodus tertia.

Patribus successit turba scholasticorum, qui neglectis rectae rationis principiis scripsere *casus conscientiae*, opera *de iustitia et iure*, hisque libris totum ius naturae et gentium completi voluerunt. Sed

1. Mirifice probant, aliquid iuris naturae et gentium esse, modo ex Scriptura Sacra, modo ex iure civili et canonico, modo ex Aristotele, Lombardo, cet.
2. Multa misceverunt falsa principia probabilissimi, metho-

* * *

di

di dirigendi intentionem, de peccato philosophico, de quibus
 LVD. MONTALIVS in *Epistolis ad Provinciales*,
 ARNALDV'S in *Denuntiatione nouae haereses de peccato
 philosophico*,
 TRIBBECHOVIUS de *doctoribus scholasticis*.

Periodus quarta.

Ius naturae ergo primus emendauit

HVGGO GROTIVS qui libros *de iure belli et pacis* edidit
Parif. 1626. Cur illud non vocarit ius naturae et gentium,
 vid. GELONES. *Epist. clar. viror.* 3. Commentarii in hos libros
 exstant multi, sed plerique parum utiles: alii enim eius er-
 rores contra orthodoxiam admissos refellunt, vt IO. ADAM.
 OSIANDER, et IO. WOLFG. IAEGERVS; alii eum ex philoso-
 phia Aristotelica refellere voluerunt, vt VALENT. VELTHE-
 MIVS, IO. A. FELDEN, IO. GE. SIMON; alii ex auctoribus clas-
 sicis potius, quam ex recta ratione illustrarunt, imprimis IO.
 HENR. BOECLERVS, et IO. FRID. GRONOVIVS. Soli laudandi
 CASP. ZIEGLERVS, KVLPIII Collegium Grotianum, HEN-
 NINGES, BARBEYRACIVS.

Ceterum obseruati in Grotio defectus sunt:

1. Quod scholasticos nimis sequatur.

2. Quod nimium tribuerit consensui gentium, quum ta-
 men

a) gentes consenserint saepe in rebus turpissimis, e. g.
 πολυθιότητι;

b) hoc principium sit obscurissimum, et hinc inde con-
 uinci non possit indoctus.

Sed haesit adhuc GROTIVS in errore, quod ius gentium
 consensu vel pactis gentium nitatur.

THOMAS HOBBIUS vel HOBBSIVS, eiusdem cum Grotio
 aetatis; eius liber de *iure* prodit 1646. post 21. annos a li-
 bro

bro Grotii, et tamen hanc laudem sibi tribuit HOBBEIVS in *præfat. philosoph.* quod ius naturæ primus excoluerit.

Occasio huius libelli status Angliæ turbulentissimus, vereque ἀνταρξικὸς; hinc sibi finxit ideam status naturalis, cumque posuit in bello omnium in omnes; inde collegit ius omnium in omnes: inde victori tribuit ius in victum, adeoque omnia ex vi et potentia victoris deducit.

Fuit philosophus profanus, et Machiavellissimum inculcavit; multis tamen mirifice placuit.

Adscelas habuit LAMB. VELTHVYSEN, qui edidit *Disser-
tat. epistolæ. de principiis iusti atque decori*, Amstel. 1651.
et BENED. SPINOZAM, cuius hypothesin examinat PVFEN-
DORFFIVS, *de iur. nat. et gent. libr. II. cap. 23.*

Aduersarios contra nactus est Io. BRAMBALLVM, ROB.
FILMERVM, ROB. SCHARROCKIVM, *recusum a Reihero in*
12. Goth. 1667. GISB. COCQVIVM, SAM. STRIMESIVM, et
omnium optimum RICH. CYMBERLANDVM.

Io. SELDENVS, de cuius *iure naturæ et gentium secun-
dum disciplinam Hebraeorum* iam supra diximus.

SAMVEL PVFENDORFFIVS, postea Liber Baro, quum vi-
deret, Grotium in multis ius priuatum neglexisse, aliquan-
do etiam minus diligenter cauissè ab erroribus scholastico-
rum, de emendando iure naturæ cogitare coepit: quum-
que Heidelbergæ priuatim doceret, *Hagæ Comitum* 1660.
edidit *Elementa iuris naturalis* methodo vsus mathematica.

Quum ita placeret Carolo Ludouico, Palatino Electori,
et eum primum constitueret Professore iuris naturæ et
gentium, maius opus molitus est. At euocatus interea Lon-
dinum Scaniae, ubi Rex Sueciae nouam academiam crexe-
rat, ibi demum illud edidit 1672.

Male id habebat collegas, IOSVAM SCHWART-
ZIVM, theologum, et NICOLAVM BECMANNVM, Ictum,

**

qui e plagellis furtim subtractis excerpterunt indicem nouitatum, eumque publici iuris fecerunt. Et quamuis res male cederet Becmanno, ideo publice relegato : magnam tamen hoc inuidiam etiam conflauit Pufendorffio ; vnde nulla erat fere Germaniae academia, in qua id opus Pufendorffianum non exagitaretur. Specimen harum controuerfiarum edidit ipse PUFENDORFFIUS in *Eride Scandinica*, quae cum lure Naturae et Gentium saepissime prodiit.

At triumphauit demum Pufendorffius, et hostes eius non sine aegritudine animi viderunt, eius libros vbique praelegi in academiis.

Contraxit ergo ipse hoc opus, indeque edidit libellum *de officio hominis et ciuis* ; et haec eius fata.

CHRISTIANVS THOMASIVS primum Pufendorffii partibus accessit, ediditque ad eius principia primum *Iuris prudentiam diuinam*, vbi simul iunxit doctrinam *de legibus posituiis vniuersalibus diuinis*.

Sed a. 1705. ipse haec principia sua destruxit, editis *Fundamentis iuris naturae et gentium*, in quibus eliminauit principium de legibus diuinis posituiis vniuersalibus, et loco principii socialitatis totum ius naturae ex regulis *iusti, honesti, et decori* deriuauit ; qua de re infra erit dicendi locus.

Hi auctores veluti familiam ducunt : postea plures calamum arripuerunt, et iuris naturae ac gentium compendia quaedam ediderunt, quae partim vix plausum meruerunt, partim ita sunt comparata, vt sua laude non sint defraudanda.

Prioris generis sunt

I. HENR. BODINI *Diff. de iure mundi*, quae primum *Rimelii* prodiit, recusa dein *Halae* 1698. In ea principium ponit voluntatem Dei secundum ordinem creaturarum : sed
refellit

refellit hoc opusculum CHRIS. THOMASIVS, *de fundamentorum definiendi causas matrimoniales hactenus receptorum insufficientia*, Halae 1698.

2. VAL. ALBERTI, theologi Lips. *ius naturae orthodoxiae conformatum*, ubi hoc ius deducere vult ex statu paradisiaco.

Posterioris generis plures prodire libelli, ex quibus omnibus fructum capere potest, qui iam solida huius scientiae cognitione est imbutus. Halae prodire 1. IO. FRANCISCI BVDDEI, 2. NIC. HIERON. GYNDLINGII, 3. WOLFFII utriusque, 4. FLEISCHERI varia scripta. Marburgi prodire HOMBERGII Z'YM VACH; Francofurti ad Viadrum HENR. et SAM. de COCCII varia scripta. Vitembergae 1. WEIDLERI liber elegantissimus, 2. GRIBNERI, et 3. WERNHERI scripta.

Taceo alia compendia eius generis fere innumera, quae in omnibus fere Germaniae academiis prodierunt, et iam tantum commendo ill. LEIBNITII praefationem, *Codici iuris gentium diplomatico* praemissam, in qua haud paucae egregiae occurrunt.



IO. GOTTL.
H E I N E C C I I
 PRAELECTIONES
 IN
SAM. PUFENDORFFII
 DE OFFICIO
 HOMINIS ET CIVIS
 LIBROS II.

LIBER PRIMVS.

* * * * *

CAPVT I.
 DE ACTIONE HVMANA.



Quum traditurus sit Auctor officia hominis et ciuis;
 officia vero sese exserant per actiones: primo om-
 nium agitur de actionibus humanis; et quidem
 quaerit hoc capite auctor,

1. Quid sit officium? §. 1.

2. Quid sit actio humana? §. 2.

3. Quae actionum humanarum principia? §. 3-16.

4. Quae actiones homini imputentur, vel non imputentur? §. 17. seqq.

Heineccii Prael. Pufendorf,

A

§. 1.

§. 1.

I. *Officium* Germanice vocamus *eine Pflicht*, eaque notio vocabuli est ex philosophia Stoica; primi omnium enim Stoici de officiis scripserunt, uti in *Prolegomenis* dictum.

Est vero *officium* actio, ex obligatione siue perfecta, siue imperfecta, legibus conformanda. Ergo reuera actio bona vel iusta et officium sunt synonyma. Praecipue vero observandum, officia semper respicere ad legem, eaque cessante et officium cessare, e.g. quamdiu lex vigeat de circumcisione, de sacrificiis, tamdiu Israelitae faciebant officium, dum circumcidebantur, sacrificiaque offerebant; cessante hac lege, nemo hodie faceret officium, qui bouem offerret.

Stoici officia diuidebant in *perfecta*, quae a sapiente proficiuntur; et *media* vel *communia*, quae a quocumque. Rident vulgo hanc distinctionem Stoicam, inprimis BYNDÉVS, *Dissert. III. de errorib. Stoicor.* §. 1. verum praeter rem, quum non poenitenda veritas hic lateat. Officia adtemperanda sunt legi: legi aliquid adtemperatur vel *materialiter* tantum, quando sit, quod ex lege praecipitur; vel *formaliter*, quando id sit eo animo et eo consilio, quod lex exigit: prius Stoici vocabant officium *commune*; posterius *perfectum*. Elegans exemplum habemus in muliere, quae duos obolos iniecit aerario ecclesiastico, *Marc. XII, 42.*

§. 2.

II. Quum itaque officium sese exerat per actiones, quaeritur, quid actio humana sit?

Observamus in homine varios motus, qui vel ex principio interno oriuntur, vel externo: si ex interno, vocantur *actiones*; si ex externo, *passiones*.

Actiones ergo sunt motus ex principio interno subiecti agentis orti: *passiones* sunt motus ex principio externo, quod non est in agente, orti. E. g. sponsia mouetur, dum comprimitur: quum vero non comprimatur ex principio aliquo interno, sed externo, nempe manu mea, patitur aliquid; contra dum spongiam comprimo, ago aliquid.

Iam actiones hominum sunt duorum generum: quaedam enim directioni voluntatis subiectae sunt, e.g. pacisci, iurare, occidere, beneficium dare; quaedam huic directioni non subiacent, e.g. mo-

tus

tus sanguinis, motus peristalticus, ventriculi et intestinorum, digestio et concoctio cibi. Priores vocantur *humanae* vel *morales*; posteriores *naturales*. Hae communes sunt hominibus cum brutis; illae hominibus propriae.

Quaeritur iam, *quaenam actiones sint obiectum iuris naturae?*

Resp. humanae; ius naturae enim praescribit leges, ad leges voluntas debet dirigere actiones. Quum vero voluntas dirigere actiones naturales non possit, (per definit.) sequitur, ut nec obiectum sit iuris naturae.

Quamuis vero has actiones ipsas non dirigat ius naturae; potest tamen praescribere regulas decori omnino non negligendas. Sic e. g. sternutare est actus naturalis; at potest tamen et debet circa eum observari decorum.

§. 3.

III. Iam ergo quaeritur, *quaenam sint actionum humanarum principia?*

Id non rectius cognoscemus, quam si inquiramus, quid homo prae brutis habeat proprium; diximus enim, humanas actiones homines proprias habere.

1. Primo omnium in nobis animadvertimus corpus, id est, substantiam in longum, latum, et profundum extensam, certae figurae, quantitatis, et qualitatis: at hoc idem animadvertimus in arboribus. Vid. MALPIGH. et NEHEM. GREW, *Anatom. plantarum*.

2. Prae arboribus id quidem habemus praecipuum, quod loco mouere possimus, et quaedam extra nos visu, auditu, aliisque sensibus percipiamus; sed id in brutis quoque deprehendimus.

3. Prae brutis ne id quidem habemus praecipuum, quod aliquid cogitamus, cognoscimus, volumus, auerſamur; nam et brutis eandem virtutem esse observamus. Vid. RORAR. *quod animalia bruta ratione videntur melius homine*. Falsa quidem eius est hypothesis; sed collegit tamen quamplurima exempla, quae non sine stupore animadvertimus.

4. Itaque hoc praecellimus brutis α), quod haec tantum res singulares et materiales cognoscant; nos inde abstrahere possumus, etiam ad ideas vniuersales et immateriales β); quod bruta ideas aliquot comparent, sed non nouas incognitasque inde veritates eliciant: at homines cognita vna veritate abstracta, mille alias incognitas ratiocinando inde elicere possunt.

A 2

Itaque

Itaque praeter corpus nobis est mens rationalis; hanc spiritualis esse naturae certo nouimus, quia cogitationum suarum sibi conscia est, quod numquam a materia praestari potest; quidquid enim materia agit, id agit ex figura, situ, dispositione partium. At si materiam siue in hanc, siue in illam figuram formes, siue hoc, siue alio modo sita dispositaque sit, numquam cogitabit, numquam cogitationum suarum sibi conscia erit. *Mens* itaque erit spiritus de rebus etiam immaterialibus cogitans, suarumque cogitationum sibi conscius.

Facultates ergo huius mentis sunt principia actionum humanarum.

Si ergo actio quaedam oritur ex spiritu illo cogitante, et suarum cogitationum sibi conscio, erit *humana*; si non, *naturalis*.

§. 4.

Principia actionum humanarum sunt

Intellectus, de quo §. 4--8.

Voluntas, de qua §. 9--16.

Quod ad primum, agitur

1. de intellectus *natura* §. 4.

2. de praecipua eius operatione, *conscientia* §. 5. 6.

3. de quibusdam intellectus vitiis, *errore et ignorantia* §. 7. &

Iam quaeritur, *quaenam sint illae facultates mentis, ex quibus actiones humanae proficiuntur?*

Resp. *intellectus*, et *voluntas*.

Existimat equidem *TITIVS*, *Obseru. XIII. §. 3. n. 3.* supersedere nos potuisse hac diuisione; eandem enim mentem et intelligere, et velle: sed philosophi est ea distinguere, quae distinctos habent effectus. Quemadmodum ergo recte distinguimus lumen et calorem in sole, quum tamen idem sol et calidus sit, et luceat: ita nec male distinguimus intellectum et voluntatem, quamuis eadem mens et intelligat, et velit.

Iam ergo primum de *intellectu*, qui est facultas mentis, quae percipimus, iudicamus, ratiocinamur.

In prima operatione mens se habet passivae, in reliquis activae. In prima mens occupata est circa veram ideam; in secunda circa duas; in tertia circa tres ideas.

Iam auctor habet regulam: *Cuiilibet homini, matura aetate et mente integra, tantum superesse naturalis velut luminis, ut adbibita cultura,*

cultura, ac debita meditatione, possit recte comprehendere, saltem generalia illa praecepta et principia, quae ad vitam hanc honeste et tranquille exigendam faciunt, simulque indicare, ista vtiq; indoli humanae congruere.

Et recte quidem: nam 1. alias non esset ius naturae cordi humano inscriptum; 2. alias cessaret imputatio, poena.

Varias tamen auctor addit limitationes:

1. *maturae aetatis*; ergo non quaerendum in infantibus;

2. *mente integra*; ergo excipiuntur furiosi, morbo insanientes;

3. *Adbibita cultura*; hinc excipiuntur homines barbari, inter bestias educati, sordi, muti, aliisque sensibus orbi; casus tristis in Marchia, de quo KRESSIVS singularem tractatum scripsit;

4. id intelligendum esse non de actu, sed de potentia; potest homo, si vult, id cognoscere; et hinc, si non vult, nihilo minus est *φύσιολογία*:

§. 5.

Intellectus tres esse operationes diximus, perceptionem, iudicium, etque ratiocinationem. Ratiocinatio quoties circa res morales versatur, vocatur *conscientia*; ergo iam hic de ea agitur.

Conscientiam aliquam existere, negant athei ac deistae, in primis TOLANDVS in *Adeisidæm. sive Tuo Liuii a superfluitate vindicta*. Nam quamvis experientia doceat, eum, qui contra rationem peccauit, angores animi perferentem: negat tamen eas oriri ex sensu legis diuinæ, sed putat, illas non nisi ex metu poenae temporalis proficisci.

At falsum hoc esse, patet exemplo Neronis apud SVETON. in eius vit. cap. 34. qui sceleris conscientiam, quamvis et militum, et senatus, populiq; gratulatione confirmaretur, nec statim, nec umquam ferre potuit, saepe confessus, exagitari se *materna specie, verberibus furiarum, ac laedis ardentibus*.

Sed solidum est negare existentiam conscientiae contra ipsam conscientiam: sane, si in nobis deprehendimus aliquid, cui quadrat definitio conscientiae, satis conuicti erimus, dari in nobis et definitum, nempe conscientiam.

Est vero *conscientia* ratiocinatio de actionibus nostris, instituta cum in finem, ut liqueat, iustae, an iniustae sint.

Est ratiocinatio: hinc videmus

1. quando conscientia dicatur dormire, quando expurgare:

A 3

nam

nam quamdiu non ratiocinamur, dormire quodammodo videtur conscientia; expurgare autem, simul ac data occasione ratiocinari incipimus.

2. Totidem esse propositiones in ratiocinatione conscientiae, quot in syllogismo; maior vocari potest LEX, minor FACTVM, conclusio SENTENTIA, e. g. Dauides, qui homicidium et adulterium committit, est morte dignus; ego id feci; ergo morte sum dignus.

De actionibus nostris. Alienae scandalum quidem praebent, aut tristitiam vel commiserationem in nobis excitant, non vero pertinent ad conscientiam nostram; e. g. si legimus, tyrannum multa hominum innocentum millia obruncasse.

Obici posset, saepe etiam nos ob aliena facta conscientiae angores persentiscere, quoties nos iniurimus, vel alio modo in culpa fuimus? Resp. tunc sumus causa moralis, adeoque actiones hae non sunt alienae, sed actiones nostrae. Ita Ahabus et Isebel factum eorum, qui Nabodum innocentem damnant, occiderantque, suum reputare debebant. Hoc et illa pertinent Ioann. XVIII. 11. qui me tibi tradidit, in maiore culpa est.

Iustae, an iniustae sint. Hinc patet, quo modo conscientia differat 1. a pudore; hic enim oritur, quoties de decoro actionis ratiocinamur; 2. a poenitentia, quae sequitur, quoties persuasi sumus, nos contra utilitatem nostram fecisse.

Quotuplex vero conscientia? Auctor tradit vnicam, quae tamen re ipsa quidem haud accurata est: nam opponit sibi inuicem rectam ac probabilem conscientiam, quum tamen probabilis et recta esse possit; supplenda ergo hic erunt multa.

Conscientia est vel *antecedens*, quando ratiocinamur de facto futuro; e. g. Naëman; vel *consequens*, quoties ratiocinamur de facto praeterito. Illa nobilior, quia virtute praeditis propria; haec etiam in sceleratis deprehenditur. Illa, nempe antecedens, est certa, si liquido ratiocinando comperimus, iustane, an iniusta sit actio: vel dubia, quoties in utramque partem ratiocinamur, e. g. an sanguine vesci liceat; vel probabilis, quando non suppetit principium certum, sed ex hypothesi tantum ratiocinor; e. g. quia hoc ex ministro ecclesiae audiui.

Porro conscientia est vel RECTA, quando nec in materia, nec in forma, vitium est vitium, adeoque utraque praemissarum vera est, ex eaque fluit conclusio; vel ERRONEA, quoties alterutra praemissarum falsa, vel forma vitiosa est. Sic e. g. in Caini syllogismo.

Qui fratrem occidit, eius peccatum est maius, quam ut ferri possit.

fit, cet. maior est falsa, si versionem hanc admittamus. Potest vero et minor falsa esse, si e. g. in turba homo occisus sit, et vnusquisque putet, se auctorem esse homicidii.

Denique conscientia vel BONA est, vbi conclusio absolutoria; vel MALA, vbi condemnatoria.

Quaeritur iam, num conscientia sit norma actionum? quod negatur, quia et potest esse erronea; at dicitur norma actionum ob propositionem maiorem, quatenus est lex.

§. 6.

Quid si conscientia dubia? Tunc actio est intermittenda; contra conscientiam dubiam enim nihil agendum.

Negat hanc regulam TITIVS, *Obseru.* 18. ea ratione, quod aequae bonam, ac malam actionem, omittere tunc possit dubitans.

Sed 1. si etiam bonam actionem edit quis contra dubitationem, tamen non habet intentionem bene agendi. BARBEYRAC. *ad Pufendorf.* 1, 3, 8.

2. Qui contra conscientiam dubiam agit, non potest aliter ratiocinari, quam hoc modo: nescio quidem, iustane sit actio, an iniusta, sed, siue iusta sit, siue iniusta, eam tamen perpetrabo. Quid vero est contemptus Dei, diuinaeque legis, si hoc non est.

Id tamen certum, hominem obligatum esse, vt de euellenda animo hac dubitatione quam maxime laboret; ne actionem forte bonam diutius intermittat. Potest ergo aliquis et intermittendo peccare, quia media non adhibet, quibus dubio liberari posset, modo vellet.

§. 7.

Haecenus de intellectus operationibus; proxima sunt eius vitia, error, de quo §. 7. et ignorantia, de qua §. 8.

Differunt error et ignorantia, quod haec sit priuatiuum quid, puta priuatio cognitionis; illa positium, falsitas idearum.

Itaque errorem definimus, quod sit disconuenientia idearum nostrarum cum obiecto. Is vero multipliciter committitur: modo in ipsa *perceptione*, quoties nobis falsam ideam formamus, turrim putantes rotundam, quum sit quadrata; modo in *iudicio*, affirmantes aliquid, quod negandum, et vice versa; vel vniuersale formantes iudicium, quum sit particulare, et vice versa; modo in *ratiocinatione*, siue in materia, siue in forma perperam ratiocinemur. Sed ita logice consideramus errorem.

In moralibus diuidimus errorem in *vincibilem*, et *inuincibilem*; quae diuisio et in ignorantia locum habet. *Vincibilis* est, qui debita adhibita diligentia poterat euitari; *inuincibilis*, ad quem euitandum nulla sufficebat diligentia atque attentio. E. g. si quis aurum putat; quod inauratum tantum, errat, sed error est uincibilis; si quis vero hominem inter bestias educatum obruncasset, errasset inuincibiliter.

Deinde error est vel *facti*, si quis in facto; vel *iuris*, si in iure quis errat. E. g. si quis putat, se vxorem posse ducere amitam, errat, et quidem in iure; si quis exislimaret, virginem ex captiuitate liberatam esse extraneam, eamque vxorem ducat, quae postea appareat amita, errauit, et quidem in facto. Iam obseruandae regulae:

I. *Error iuris semper est vincibilis*; α) quia ius naturae cordi inscriptum; ius posituum promulgatum; β) quia ciuis est obligatus ad inquirendum in iura ciuitatis, adque consulendos petitores.

II. *Error facti potest vel vincibilis esse, vel inuincibilis*: factum enim non discimus ex recta ratione, sed ex circumstantiis, quarum multae tam occultae esse possunt, vt et sapientissimum fallant.

Vsum haec doctrina habet, quoties de imputatione actionum humanarum quaeritur, eamque ostendemus infra §. 20. 21.

§. 8.

Ignorantia est simplex scientiae priuatio; vel defectus cognitionis. Sic e. g. olim ignorabat apostolus, cupiditatem esse peccatum; ignorabant patres, existere quartam partem orbis, Americam; quia omni idea earum rerum destituebantur.

Ea, quoad actiones, est vel *efficax*, vel *concomitans*; *Efficax*, si quid ex ignorantia egi, quod acturus non fuisset, si vere habuisset perspectum; exemplum Abimelechi, *Genes. XX. 4. 5.*

Concomitans, si quid ex ignorantia facio, quod facturus fuisset, etiam si melius rem sciuisset. Sic puer apud PLVTARCHVM lapide petens coruum, oculum nouercae excutit, eoque comperto, ait: *ne sic quidem male; fors melius consilium cepit, quam nos.* Signum ergo est poenitentiae vel gaudium super eius modi actione.

Deinde quod ad causam et originem, ignorantia est vel *voluntaria*, vel *involuntaria*.

Voluntaria, vbi culpa mea sit, vt rem ignorem, e. g. si quis non adhibet debitam diligentiam et attentionem, eaque non est excusabilis.

Involuntaria.

Inuoluntaria, vbi reuera ignorantiam in praesenti euitare non potui; eaque duplex est.

1. *Vel in se et in sua causa simul*, si in eo statu sum, vt rem scire non possim, nec in culpa tamen sim, quod in eum statum incidim; talis est ignorantia inuoluntaria furiosi, morbo insanientis, infantis.

2. *Vel in se, et non in sua causa*, vbi quis in eo statu est, vt ignorantiam euitare nequeat, sed sua tamen culpa in eius modi statum incidit. In tali ignorantia inuoluntaria versatur ebrius; et haec non est excusabilis, poterat enim quis cauere eius modi ignorantiam.

Zaleucus legislator crimen ab ebrio commissum duplici poena dignum iudicauit; primo quod crimen commississet; deinde quod inebriatus esset. Simile fere edictum pater regis nostri prodidit.

At in foro humano tamen, quia res publica consistere non potest ex mere piis, plerumque summa ebrietas pertinet ad causas poenam ordinariam mitigantes.

Vsus etiam huius doctrinae sese exserit in quaestione, *an alii homini imputanda sit, nec ne?*

§. 9.

Progredimur ad alterum principium actionum humanarum, *voluntatem*, de qua quaeritur

1. *quid sit?* §. 9.

2. *an libertatem habeat?* §. 10.

3. *cur tam variae sint eius inclinationes?* §. 11-15.

4. *quatenam actiones sint voluntariae et inuoluntariae?* §. 16.

Voluntatem existere plane negauit BENED. SPINOZA; *Epist. II. ad Oldenburger. pag. 399.* hominem enim habet pro parte magnae istius machinae, quae mundas vocatur. Inde concludit: in machina nihil se mouet voluntarie, sed ex necessitate; ergo et homo.

Enim vero repugnat conscientia: nos non mouemur, ita vt nobis actionum et motuum nostrorum non conscii simus, quemadmodum machina; sed scimus, quod nos mouere velimus, nouimus etiam rationem, cur moueri velimus, quia scilicet rem vel pro bona, vel mala agnoscimus; quae omnia in machinam minime cadunt.

Ceterum quemadmodum intellectum versari circa verum dixi-
Heineccii Prael. Pufendorf.

B

mus:

mus: ita *voluntas* versatur circa bonum, adeoque definitur; quod sit facultas mentis, qua bonum adpetimus, malum auersamur.

Operationes intellectus erant perceptio, iudicium, ratiocinatio: operationes voluntatis, adpetere et auersari.

Hic tamen operationes sese exerunt diuersis actibus, quorum alii vocantur

Imperati, quia voluntas imperium exercet in alias facultates: ita voluntas excitare potest intellectum, vt rem accuratius contempletur, voluntas mouere potest membra corporis: saltem experientia docet, praeuia voluntate membra moueri, nec opus est, vt iam de causa sumus solliciti. Hi omnes actus sunt imperati.

Eliciti contra sunt, qui immanent voluntati, in qua oriuntur et hi ideo ordine disponuntur.

Volitio est primus motus voluntatis.

Intentio est decretum voluntatis de actione suscipienda.

Consensus est consilium de medijs eligendis.

Electio est electio mediorum.

Vsus est ipse vsus mediorum.

Fruitio est, quando quis per media finem suum obtinet.

Exemplum furis furtum committentis hos sex actus optime illustrat.

f. 10.

Iam quaeritur, an *voluntas libertate aliqua gaudeat*? LOCKIUS equidem de intellectu humano, libr. II. cap. 21. absurdam putat hanc quaestionem, perinde ac si quis quaereret, an virtus sit quadrata: libertatem enim esse singularem et separatam mentis facultatem: sed magna inter has quaestiones est differentia, quum priorem quaestionem ne concipere quidem possimus, posterioris bonus sensus sit.

Ita potius de statu quaestionis nos decet esse sollicitos. Primo ergo non quaerimus de spontaneitate, sed de libertate. Spontaneitas opponitur necessitati internae, qualis est in machina; libertas opponitur coactioni; spontaneitatem voluntatis supra contra SPINOZAM vindicauimus.

Deinde libertas in duplici sensu accipitur: aut enim opponitur coactioni physicae, et tunc consistit in indifferentia ad opposita, vt homo possit agere, vel non agere, hoc vel illo modo agere; vel

moralis.

moralis, et tunc quaeritur, an non intra hominem sint quaedam impedimenta, quae efficiunt, vt non semper agat, quae velit.

Primo sensu accepta libertas omnino competit hominis voluntati; experientia enim docet, eum physice posse pro lubitu flere, federe, surgere, tardius vel citius moueri, furari et non furari, si morbo non impediatur.

At posteriori sensu si accipiatur libertas, distinguendum inter virtute praeditos, et vitis adhuc obrutos.

Priores liberrimam voluntatem habent, liberat illos virtus, vt cum voluntate legi diuinae pareant, et, quoties obnitiatur natura, pugnant contra prauas cupiditates, nec prius quiescunt, donec eas vicerint.

Contra vitiosi homines impedimenta in se habent vitia sua, quibus ad nefanda scelera impelluntur, vt ea ne possint quidem data occasione intermittere; e. g. homo avarus et alieni cupidus non potest non furari, vbi occasionem sibi fauere videt, quin si vel maxime furtum malum esse scit, tamen ipsi ob cupiditatis illecebras eueniat, quod ait poeta:

Video meliora proboque,

Deteriora sequor.

At sunt tamen et hic media, quibus, si vti velit sceleratus, haec impedimenta superare possit; puta representatio maioris boni vel mali sistit et impedit cupiditatem boni vel mali minoris, e. g. si fur sibi representet patibulum, virgas, laqueum.

Et sic sceleratissimi etiam homines in libertatem se vindicare possunt, partim si animum emendare velint; partim si sibi representent maius vel minus malum.

Et hanc libertatem statuere necesse est; quia

1. alias frustra essent leges;
2. iniquae poenae legibus sancitae.

§. II.

Sequitur tertia quaestio, *cur tam diuersae sint hominum inclinationes*; quum tamen omnes natura appetant bonum, malumque auerlentur? vt inde colligi posse videatur, omnes homines sibi similes fore, quum tamen repugnet experientia.

Causas ergo recenset auctor, 1. *varios respectus boni*, §. 11. 2.

B 2

varia

varia hominum temperamenta, §. 12. 3. consuetudinem, §. 13. 4. affectus, §. 14. 5. ebrietatem, §. 15.

Quod ad respectus varios בְּרִנּוֹ attinet, sciendum est, in vero bono diuersos respectus non esse separatos. Bonum enim consideratur tamquam *iucundum, honestum*, et *utile*; at hi respectus *in vero bono* semper coniuncti sunt; idem enim bonum verum et honestum, et utile est, e. g. virtus; quam doctrinam et CICERO in libris de officiis tuetur.

At *in bono apparente* haec seiuncti sunt, et talia bona adparentia vel se repraesentant vt *honesti*, quum non sint vitia et iucunda; vel vt *iucunda*, quum non sint honesta et vitia; vel vt *vitia*, quum nec honesta, nec iucunda sint.

Quum ergo homines plerique, immo natura omnes, in apparentia magis bona, quam in vera ferantur: inde nascuntur diuersa vitia, diuersae inclinationes.

Si enim voluntas fertur in bona apparentia tamquam honesta, nascitur ambitio; si in iucunda, oritur voluptas; si denique in vitia, auaritia.

AMBITIO est inclinatio in bona apparentia, quae se repraesentant tamquam honesta, adeoque homini praerogatiuam tantam dare videntur. Quum vero alii alia in re quaerant praerogatiuam; varia quoque est ambitio. Alia enim est

RIDICULA vel STOLIDA, quae praerogatiuam quaerit in re nihili; e. g. in eo, quod versiculos emendicat; quod nomen in nouellis publicis legatur; hic magna mixtura stultitiae, vt iam veteres dixerint:

*Stolidus und Stolz
Wachsen auf einem Holz.*

THRASONICA vel BRUTA, quae praerogatiuam quaerit in rebus turpibus, e. g. in frequentibus digladiationibus, facultate bibendi, astutia furandi.

SPECTIOSA, quae praerogatiuam quaerit in aliqua perfectione; et haec est vel

1. *aulica*. Huic qui dediti sunt, honeste vivunt, gravitatem adfectantur, simulare et dissimulare commode sciunt, magnam religionis speciem ostendunt tam diu, quam ipsis expedit; alias neque haec, neque conscientia ipsis curae cordique esse solent, in primis decore student; vel

2. *mi-*

2. *militaris*. Huius characteres fere iidem sunt, nisi quod plerumque accedat inhumanitas, iurgia quaerant, execrationes euomant, minoremque decori curam habeant; vel

3. *erudita*, cuius characteres, diligentia, nouitatis studium, controuertendi libido, inuidia, aliquando et pedantismus, et decori neglectus; vel

4. *pharisaica*, cuius characteres, adfectata humilitas, decori neglectus, peruicacia, contemptus aliorum; tale quid in Cynicisprehendimus.

VOLVPTAS est inclinatio in bona adparentia, quae sese repraesentant tamquam iucunda; *iucundum* autem vocamus, quidquid oblectat sensus siue internos, siue externos. Quam vero aliud alium oblectet, voluptas est

1. *bacchica*, cuius characteres consistunt in ingluvie, varietate deliciarum, otio, conuersatione cum hominibus similibus, contemptu religionis, decori neglectu;

2. *venerea*, cuius characteres, fabularum Romanensium lectio, lusus, ornatus, frequens ad hominum conuentum accessus, nimia comitas atque decori cura;

3. *amica*, cuius characteres, conuentus, lusus, hilariores sermones, curiosorum studiorum sectatio, nouitatis studium; officiosi tamen sunt et benefici.

AUARITIA est inclinatio in bona adparentia, quae se repraesentant tamquam vtilia. Ea est vel

1. *splendida*, quae de acquirenda pretiosa suppellectili laborat;

2. *rustica*, quae de fundis et agris sollicita;

3. *mercatoria*, quae possessionem pecuniae paratae anhelat.

4. *Sordidus* est extremus auaritiae gradus, ubi quis ipse genium defraudat.

Ceterum omnes auari sunt. superstitiosi, inuidi, nemini boni; decori negligentissimi.

Quaeritur *quem effectum habeant* 1. *cholericus*? Resp. iudicio et ambitione noti;

2. *melancholicus*? memoria et auaritia;

3. *sanguineus*? ingenio et voluptate;

4. *phlegmaticus*? ad vitia et virtutes tardiores et somnolenti.

Solent tamen haec temperamenta mixta esse. Solent aetate variare.

An exiguæ? Negatur,

α) cultura virtutis omnia superare potest, et ad eam quisque obligatus est.

β) Vitari debent occasiones, quibus temperamenta incitantur.

γ) Pugnandum, corpusque ad obsequium reducendum.

§. 12.

Causa tot diuersarum inclinationum altera est *temperamentum*, vbi quaeritur

Vnde illa temperamentorum diuersitas? Resp.

α) Sanguis noster per venam cauiam transit in dextrum cordis ventriculum, inde per arteriam pulmonarem in pulmones, ex his per venam pulmonarem in sinistrum ventriculum cordis, et ex hoc denique per aortam in reliquas corporis partes.

β) Particulæ sanguinis non apud omnes eadem proportionem mixtae.

γ) Vasa quaedam et pulsus variant.

δ) Ergo nec motus sanguinis idem.

Cholerici ergo sunt, quorum in sanguine plus particularum sulphurearum.

Sanguinei, quorum in sanguine plus particularum salinarum,

Melancholici, quorum in sanguine plus particularum terrestrium,

Phlegmatici denique, quorum in sanguine plurimum feri.

§. 13.

Tertia causa diuersarum inclinationum est *consuetudo*, quae est habitus frequente repetitione vnius eiusdemque generis acquisitus, e. g. consuetudine fidibus canere discimus.

Ea vero non modo in corpore sese exserit, e. g. in saltando, luctando, aliisque exercitiis; sed et in animo, in specie,

In intellectu, consuetudo bene ratiocinandi.

In voluntate vtramque paginam facit: hoc docet educatio, conuersatio, immo hoc in ipsis brutis adparet.

Praecipua quaestio est, *an actio ex consuetudine orta possit impu-*

sari? e. g. execrationes.

Ratio dubitandi est, quia non est voluntaria. Ratio decidendi,

α) Il-

α) Illud est procul dubio voluntarium, quod nobis actibus toties repetitis adquirimus.

β) Actio ex consuetudine etiam praeter voluntatem suscepta vitiosa est, propter antecedentem culpam; GROT. *de iur. bell. et pac.* II, 10, 29, 2.

γ) Nulla est consuetudo, quae non possit contraria desuetudine minui, si homo eandem diligentiam adhibere vellet. Eleganter ARISTOPH. in *Vesp.*

*Vsus, quo fueris diu
Mutare ingenium graue, est
Multos inuenias tamen,
Qui mores, moniti, suos
Mutarunt melioribus.*

§. 14.

Quarta causa sunt *adfectus*; his enim si quis indulgeat, facile degenerant in mores.

AFFECTVS sunt motus voluntatis ex repraesentatione boni vel mali orti, et cum extraordinaria commotione sanguinis et floris nervosi coniuncti. Dicimus esse

Motus, quia, quamdiu adfectus mentem non perturbat, is dicitur quiescere.

Voluntatis; Omnis enim adfectus vel adpetitus est, vel auersatio, atque hae sunt operationes voluntatis.

Ex repraesentatione; siue sensu fiat, siue imaginatione, quamvis haec sit debiliior, quam illa. Vnde regula: *aus den Augen, aus dem Sinn.*

Boni vel mali. Hic varii respectus, et innumerae adfectuum species, e. g. si bonum se repraesentat tamquam praesens, nascitur laetitia; si tamquam futurum, *spes*; si tamquam certum, *fiducia*; si in amico, *congratulatio*; si in inimico, *invidia*.

Extraordinaria commotione sanguinis. Quod adparet ex rubore et pallore, quin et sentitur iste motus in ira et tristitia, et in hac quidem maxime per anxietatem cordis.

Et floris nervosi. Inde varii gellus, firmitas eorum membrorum, quae exerendo adfectui inferuiunt.

Notandum 1. non omnia in adfectu esse inuoluntaria; eius va-

rii

rii gradus, commotio animi, adprobatio, et impetus; primum impedire non possumus, reliquos possumus.

2. Suspendendam esse actionem.

3. Pugnandum; affectus enim sunt momentanei quid: Plato iubebat recitare alphabetum Graecum.

§. 15.

Ultima causa est *ebrietas*: haec quid sit, quomodo contrahatur, quantum mentem perturbet, quotidiana experientia docet. Iam observandum:

1. Eam varios habere effectus pro diversitate temperamentorum;

2. Eam aliquando esse involuntariam; e. g. si quis potui non adfectus sit, si alterius dolo inebrietur;

3. Eam vel *modicam* esse, vel *summam*; hancque in eo consistere, quod ea inebriatus homo suarum actionum sibi plane conscius non sit.

Quoties ergo quaeritur, an actio in ebrietate suscepta excusabilis sit, vel imputari possit: tunc semper distinguendum inter ebrietatem modicam et summam. Modica numquam excusat; quia homo tunc scit, quid agat; e. g. si quis ideo contractum reuocare velit, quod contrahentes modice biberint.

In summa ebrietate distinguendum porro, sitne *voluntaria*, an *involuntaria*: quae posterior excusat. Denique in voluntaria distinguendum, sitne actus indifferens, i. e. legibus nec praeceptus, nec prohibitus, tunc actus est nullus; e. g. si ebrius domum vendiderit; si vero criminofus, tunc non excusat ebrietas. Conf. BYNDEN Dissert. II. de septem sapient. Graec. dict. §. 6. et 9.

§. 16.

Ultima quaestio de voluntate humana est de actionibus voluntariis et involuntariis, ubi

1. Doctrina auctoris explicanda. Distinguit ille actiones in

a) *Voluntarias*, quae a voluntate proficiuntur et diriguntur, e. g. pacisci, iurare, circumstantiis omnibus perspectis;

β) *Inuitas*, quas duplici sensu dici existimat, vel late, vel stricte; *stricte*, quae reluctante voluntate suscipiuntur, e. g. iactus mercium ad evitandum naufragium; *late*, quae per ignorantiam patrantur, e. g. Hercules in furore occidit liberos.

Ad-

Addit auctor, inuitum se accipere pro coacto.

II. Sed haec omnia nihili sunt: nam

α) Inuitum dici non potest, vbi ignorantia est, quia ignorantia est in intellectu; inuitum vero respectum habet ad voluntatem;

β) Falsum, inuitum et coactum esse synonyma; in inuitis enim actionibus voluntas plane abest, in coactis adest, sed vi et metu extorta, e. g. si quis ex scala truditur et aliquem laedit, actio est inuita; si pater cogit filium, vt alterum laedat, actio est coacta.

III. Hinc ita proeedendum: actio omnis est vel *spontanea*, vbi voluntas concurrit, e. g. furari; vel *inuita*, vbi voluntas non concurrit, e. g. si ceruum petens pater filium occidit.

Spontaneae actiones itidem sunt vel

1. *Liberae* quando voluntas nulla vi extorta est, e. g. si quis sponte furatur; vel

2. *Coactae*, quando voluntas quidem concurrit, sed vi alterius extorta, e. g. si quis latroni promittit centum aureos.

Statuit auctor etiam actiones *mixtas*, quas et volumus, et, si nostri res arbitrii esset, magis nollemus; sed reuera hae eadem sunt cum coactis, e. g. iactus mercium.

Iam quaeritur, an actiones *involuntariae ratae sint*? Resp.

α) Inuitae plane non imputantur, quia homo non earum auctor est;

β) coactae imputantur, si alteri ius cogendi est: non imputantur, si alteri tale ius non est.

Demonstratio haec est. Vbi alteri non est ius, ibi nec ex mea parte obligatio, ius enim et obligatio sunt correlata; sed de hoc infra suo loco, e. g. promissit quis iudici ob minas carceris et ex sequeutionis, se soluturum; obligatur sane, quamuis coactus, quia iudici ius cogendi est: contra si quis promiserit latroni centum aureos, non obligatur. Elegans epigramma MARTIALIS: XL. 59. §. seqq.

Quid si me tonsor, dum curua nouacula supra est,

Tunc libertatem diuitiasque roget?

Promittam, nec enim rogat illo tempore tonsor,

Latro rogat: res est imperiosa timor.

Sed fuerit curua quum tuta nouacula theca:

Frangam tonsori crura, manusque simul.

Heineccii Prael. Pufendorff.

C

§. 17:

§. 17.

Superest postrema pars capituli. Vidimus, quid officium, quae actio humana, quanam eius principia? Superest, ut videamus, quid *imputatio actionum*, et quanam actiones imputentur vel non imputentur?

Imputare proprie est aliquid in alterius rationes, vel expenti tabulas referre. Quemadmodum ergo in ratiociniis quaeritur, quid quis debeat, vel quid ei debeatur: ita in moralibus quaeritur, quid quis ob actiones suas debeat, quidue ei debeatur? ac proinde vocatur imputatio.

Ergo *imputare* nihil aliud est, quam declarare effectum, quem lex actioni adsignat, huic actioni competere: e. g. furem debere poenam furti sustinere, huic victori deberi praemium.

Iam quum effectus ponat causam, consequens est, ut effectum actionis nemo ferre possit, nisi qui eiusdem causa vel auctor sit: ac inde fluunt axiomata:

1. *Qui est auctor actionis, illi potest imputari;*

2. *Qui auctor non est, ei nec imputari potest.*

Obiici posset, aliquando etiam imputari solere casus fortuitos; e. g. conductori. Resp. 1. id fieri ex pacto, 2. regulariter casum nemini imputari, nisi culpa concurrat.

§. 18.

Ex generalibus illis axiomatibus fluunt regulae et canones speciales, quorum primus:

Actiones ab alio patratae, ut et operationes quarumvis aliarum rerum, nec non quiniis euentus, non possunt alteri imputari, nisi quatenus ille potest et teneat istas moderari.

Ratio est quia, quod alius patrat, eius non sum auctor, nisi quatenus directionem habere potui et debui;

2. Quia euentum, qui a providentia diuina pendent, non magis auctores sunt. Sic

Patri non imputantur actiones filii, nec filio patris, nisi quatenus hoc iussit, vel alio modo causa moralis fuit. Idem dicendum de seru's. Obiiciuntur actiones de peculio noxales. Resp. hic non iniuste imputatur actio domino vel patri, sed ideo tenetur, quia, dum peculium dedit, consensit in contractum, et dum omnes res per seru'um acquirit, etiam damna ferre debet.

Quod sit ex necessitate physica, nemini imputatur. Sic, absur-

de

de obligabant Mexicani reges suos, vt iurarent, effecturos se, vt sol cursum splendoremque suum teneret, nubes pluerent, riuus curreret, et terra produceret omne genus frugum. Sic nemo adeo iniquus, vt sceleri assignet, quod venti et fluctus deliquerunt, vti ait TACIT. *Annal. XIII. 3.*

Si tamen factum alicuius concurrat, ob hoc et eius modicuentus imputari possunt. Sic Eliae imputatur pluvia, nauarchae imputatur aliquando naufragium, hominibus imputantur bellum, pestis, fames publica, quia haec iudicia diuina peccatis suis prouocantur.

§. 19.

Sequitur alter canon specialis:

Quaecumque in quolibet homine sunt, vel non sunt, quae penes ipsum non sunt; vt aessent vel non aessent, non possunt ipsi imputari, nisi quatenus per industriam naturalem defectum non suppleuit, aut nativas vires non adiunxit.

Si enim penes ipsam non fuit, vt aessent, vel non aessent; non est causa vel auctor illius rei; ergo non imputatur, (per axioma 2.) Sin vero industriam debitam omisit, causa et auctor est defectus, adeoque recte illi imputatur, (per axioma 1.) Itaque nemini imputantur vitia corporis et animi, e. g. caecitas, surditates, deformitas. Inde PHAEDR. *Fabul. III, 11, 6. 7.*

Sed quid fortunae, stulte, delictum arguis?

Id demum est homini turpe, quod meruit pati.

Ita et simplicitas, ignorantia. Imputantur tamen et huius modi defectus, si culpa hominis contracti sunt, e. g. si quis per delictum aures, nasum amiserit, si deformitas a stigmate sit scelere merito, si quis occasionem culturae habuit, eamque neglexit.

§. 20.

Tertius canon:

Quae per ignorantiam inuincibilem patrantur, imputari non possunt.

Quae enim per ignorantiam inuincibilem patrantur, ea non progrediuntur ex principio actionum humanarum; ergo non sunt actiones humanae, adeoque nec homo earum auctor est.

Sed iam supra obseruatum,

1. Hic non intelligendam ignorantiam iuris, sed facti; iam vero addendum.

2. Ignorantiam etiam facti, licet invincibilem, etiam imputari, si quis

a) versetur in re illicita, e. g. si philtum detur adolescenti. Areopagitae apud ARISTOT. *Moral. magn. I. 17.* feminam, quae philtum dederat, absoluerunt, sed male; melior ratio in *L. 38. §. 5. D. de poen. Qui abortivis aut amatorum poculum dant, etsi dolo non faciant, tamen quia mali exempli res est, humiliores in metallum, bonestiores in insulam amissa parte bonorum, relegantur: quodsi eo mulier aut homo perierit, summo supplicio adficiuntur;*

β) si quis non versetur in loco licito, tempore licito, modo consueto et licito, e. g. si quis iaculatur in urbe interdiu, feriens hominem punitur, etiam ignoravit, hominem alicubi latitare; si in publica, palastra iusto tempore, excusatur.

§. 21.

Quartus canon:

Ignorantia, vi et error, circa leges et officium cuique iniunctum, ab imputatione non liberat.

Ratio eius rei est, eius modi error et ignorantia sunt vincibiles, ergo poterant caueri; qui ergo non cauit, est in culpa. adeoque auctor huius status, ergo possunt imputari, e. g. si quis iudici offerat libellum chartae non signatae inscriptum.

Sed tamen leges benignius agunt, et, si non nimis supina est negligentia, aliquid indulgent feminis, militibus, minoribus, rusticis; sed non aliter, quam si de damno vitando certent, et peritiores consulere non potuerint.

§. 22.

Quintus canon:

Cui occasio agendi citra suam culpam deest, illi non imputatur, quod non egerit.

Demonstrari hoc potest, si sciamus, quid sit occasio; per quam intelligimus praesentiam circumstantiarum, sine quibus actio suscipi non potest. Tales circumstantiae sunt: 1. obiectum actionis; e. g. praecepto de honorandis parentibus satisfacere non possunt, ubi defuncti parentes; Medicus non culpandus, si neminem curet, quum nemo aegrotet; 2. tempus opportunum, e. g. salutare amicos non possum, dum officio fungor; 3. impedimentum nullum obstans; quod

quod insuperabile sit, e. g. Iudaei non erant obstricti ad sabbathum celebrandum, quando Pompeius erat ante portas. Vid. CARTES, de pass. art. 144. 145. 146.

Si ergo occasio est praesentia circumstantiarum, sine quibus actio suscipi non potest: sequitur, actionem sine occasione esse impossibilem, impossibilia vero nemo possibilia facere potest; ergo qui haec non facit, non est auctor huius impossibilitatis, adeoque nec imputari potest.

§. 23.

Sextus canon agit de impossibilibus:

Non potest alicui imputari, quod non praestiterit ea, quae vires ipsius excedunt, neque per eas prohiberi, aut effici possunt.

Demonstratio. Omissio non imputatur, ubi nulla est agendi occasio. (per can. 5.) ; ubi quid impossibile, ibi nulla est agendi occasio ; omissio ergo impossibilem nemini potest imputari.

Est vero impossibile aliquid vel

ABSOLVTE, quod à nemine mortalium fieri potest, e. g. factum facere infectum, caelum attingere digito; vel

RESPECTIVE, quod ab alio per vires eius fieri non potest, quamvis ab aliis facilius, praestetur, e. g. problema algebraicum solvere.

Iam loquimur in canone de prioris generis factis; quod enim ad posteriora attinet, etiam impossibilia ita possunt imputari,

1. Si promiserit quis, se praestitutum, nec praestiterit, e. g. alchymista; vel si quis metallodinas reperturum promiserit;

2. Si vires habuerit, easque detruierit; si e. g. ab obacrato exigitur debitum, quamvis non sit soluendo; hinc et Deus ab hominibus perfectum legis obsequium exigit, quamvis eam implere nequeant;

3. Si occasio fuerit vires acquirendi, eamque neglexerit homo; e. g. dedit quis operam mathesi, vel dare debuit, nec umquam vllum problema solvere didicit.

§. 24.

Septimus canon agit de obligatione vi et metu extorta:

Imputari non possunt, quae quis coacte patitur, aut agit.

Sed hanc regulam falsam esse, iam supra vidimus; dedimus enim instantias: coactus a iudice solvere obligatur; coacti a principe sub-

diti rebelles obligantur; coactus iusto bello ad pacis conditiones admittenda obligatur. Hinc regula limitanda erit sic:

Imputari non possunt, quae quis coacte agit, aut patitur, si alteri nullum ius cogendi sit.

Iam demonstratio erit facilis: ubi cogentis nullum est ius, ibi coacti nulla obligatio.

Fraudi auctori fuit, quod inuitum confuderit cum coacto; de illo enim absolute vera est regula:

Imputari non possunt, quae quis inuitus agit aut patitur.

Itaque hic animaduertimus, quam necessarium sit, si solidam eruditionem anhelemus, veras atque accuratas definitiones perfectas habere.

§. 25.

Octauus canon facillimus est;

Eorum, qui rationis usu destituuntur, actiones non imputantur.

Demonstratio. Non imputatur, cuius non sum auctor. Non sum auctor ubi intellectus vel voluntas non concurrunt; nec intellectus vel voluntas concurrunt, ubi ratione destituimur; ergo, quae hi agunt, non imputantur.

Sed intelligendus est casus, ubi sine culpa et facto suo quis rationis usum amisit, vel numquam habuit, e. g. furiosus, intans.

Aliud, si quis culpa sua ratione priuatus est, e. g. propter ebrietatem; et tunc aliter formanda regula:

Ebrio actiones imputantur, nisi vel ebrietas inuoluntaria sit, vel actio indifferens suscepta sit a summe ebrio.

§. 26.

Nonus canon agit de actionibus in somno susceptis:

Imputari non possunt, quae quis in somniis agere sibi videtur.

Duplicis sunt generis actiones, quae in somno patrantur:

1. Per somnium, ubi imaginatio dormienti fingit aliquid fieri; quod non fit, e. g. si Titius in somnio sibi videtur fratrem occidere;

2. Per somnum, ubi noctambulus vel lunaticus aliquid agit, quod in se alias vetitum est, e. g. Titius noctu surgens vere hominem occidit; qualis casus est in *Clement. vn. de homicid.*

De utroque verus est canon ab auctore propositus.

Demonstratio. Quae quis somnians vel dormiens agit, eorum directio

ctio non est penes intellectum; quae actiones ex intellectu non pro-
ueniunt, eae non sunt humanae; ergo non sumus earum auctores;
ergo non imputantur, (*per axiom. 2.*) Elegans casus de piscatore
per somnium iurante, se numquam pedem allaturum in cymbam ap-
ud THEOCRIT. *Idyll. 22.*

At id quidem de imputatione in foro humano verum est: quod
ad forum diuinum attinet, somnia quoque praua peccata sunt,

1. Quia sunt effectus peccati originalis;

2. Quia homo malis cogitationibus et actionibus indulgendo ta-
lia somnia ipse excitat. Itaque PLUTARCH. in libello de *profectibus*
virtutis sentientis eleganter obseruat, virtutis incrementum etiam ex
somnia animaduerti posse;

3. Quia saepe homo eius modi somniis oblectatur, quin iis excitat-
ur ad male agendum, e. g. eques Romanus in somnio sibi vide-
batur Imperator; somnium hoc cum voluptate vbique narrabat,
quin non obscure prae se ferebat; se huic somnio aliquid tribuere,
ac proinde a Tiberio capitis damnabatur.

§. 27.

Sub finem subiunxit Auctor tractationem de causa physica et
moralis, et quatenus vtrique actio imputetur.

CAVSSA est, quae effectum producit; effectum producimus vel
actu physico, et motu corporis nostri, e. g. quando fur fortunam com-
mittit; vel actu morali, quando ipse motus corporis non concurrat,
sed tamen actus mentis vel voluntatis; e. g. si pater filium furari iu-
bet: prior vocatur *causa physica*, posterior *moralis*.

Iam quomodo moraliter quis magis minusve concurrere possit ad a-
ctionem; obseruandae regulae:

I. Quoties alter alterum cogit, cui in obsequio gloria relicta est,
vel permittit alteri quid, quod impedire poterat, et debebat, toties
causa moralis pro principali, physica pro minus principali habetur;
adeoque in illum maior, quam in hunc, poena statuitur, e. g. pater fi-
lium iubet occidere; paedagogus praefens permittit tironi, ut fu-
retur.

II. Quoties alter conducit, alter locat operam male agendi, vel al-
ter alteri opem fert, toties par viriisque reatus est, e. g. sicarius,
congraffator.

III. Quoties alter alterum tantum consilio vel prauo exemplo ad
male agendum instigauit, toties ipse pro causa minus principali, insti-
gatus

gatus pro principali habetur, e. g. si quis pauperi suasisit furari, et hic furatus est; si quis execrationibus vsus alii exemplo fuit, vt eodem se scelere pollueret.

At hoc quoque de foro humano intelligendum; Deus enim grauitur imputat postremi generis scelus propter scandalum. *Matth. XVIII. 7. vae mundo, ob pessima, quae dat, exempla.*

CAPVT II.

DE NORMA ACTIONVM HVMANARVM,
SEV DE LEGE IN GENERE.

§. 1.

HAftenus de ACTIONIBVS HVMANIS: iam de NORMA, ad quam actiones componendae, quae est LEX; ex complexu enim legum naturalium ius oritur. Itaque auctor noster agit primum de LEGE IN GENERE hoc capite, deinde de lege naturae, cap. 3. De lege in genere ostendit,

1. Non conuenire homini, vt viuat exlex. §. 1.
2. Quid sit lex? §. 2-8.
3. Varia legis adiuncta. §. 9. 10.
4. Actiones ad legem consideratae quotuplices sint? §. 11-15.
5. Ipsa lex quotuplex? §. 16. *

Non conuenire homini, vt exlex viuat, variis demonstrari potest argumentis.

Primum hoc est: qui iis facultatibus instructus est, vt actiones aequae bonas, ac malas edere possit, ei opus est norma, ad quam actiones componat; iam homo instructus est iis facultatibus, ergo homini opus est norma.

Minor est clara, vbi enim periculum est in extremum aberrandi, ibi opus est norma, e. g. quia manus aequae rectam, ac curuam, lineam ducere potest, opus ei est regula; quia fallere potest in longitudine, capacitate, ideo opus est vlna, mensura, ac pondere.

2. A voluntatum humanarum diuersitate. *Si innumeratae hominum sunt inclinationes, aequae rectae omnes ac bonae esse non possunt, opus est*

est norma, ad quam iudicentur; atqui prius est verum, ergo est posterius. Consequentia clara est, vbi confusa sunt bona et mala, ibi opus est illa distinguendi, e. g. boni vel falsi adamantes.

3. Ab insigni hominis prauitate; homo peior omnibus animalibus, homo vitia multa habet, quorum ne vestigium quidem in animali est; quaeque cum animalibus communia habet, ea multo maiori gradu possidet; praeterea maiore facultate pollet aliis nocendi. CHARRON, de la Sagesse, libr. I. cap. 34. §. 12. et cap. 39. §. 11. Itaque argumentamur: cuius indomita est prauitas, ei opus est fraeno et coercitione; hominis indomita est prauitas, opus ergo ei est fraeno, seu coercitione, quae alia esse non potest, quam lex.

4. A praestantia facultatum humanarum; RICH. CUMBERLANDVS de legibus natur. Sine quo praestantissimae illae hominis facultates homini parum utiles, immo noxae essent futurae, illud est necessarium; atqui sine norma et lege cet. ergo cet. Maior probatur ab intentione benignissimi creatoris, qui, quum nos velit esse felices, procul dubio etiam voluit facultates, quas dedit, nobilissimas nobis non esse noxias, adeoque id dedit, sine quo essent noxae. Minorem probat experientia; nobilissimae hominis facultates sunt intellectus et voluntas, eiusque libertas. Is quam maxime abutuntur, e. g. fures intellectu, vt tanto ingeniosius furentur; voluntatis libertate, vt per omne scelus ruant.

Opponi posset, supra nos demonstrasse, Deum homini dedisse libertatem voluntatis, immo natura omnes sumus liberi, ergo locum habere non potest lex. Resp. definienda est libertas. Libertas est facultas agendi omnia in meam vtilitatem; quemadmodum seruitus est status, in quo omnia agere cogor in alterius vtilitatem. Non itaque liberum dico hominem, quod possit deuorare venenum, quod se praecipitare possit in puteum, sed quod omnia agere possit, quae vtilia sibi sunt, nec alius inde capit vtilitatem, quam agens, et qui ipse vtilitatem vult capere.

Si ergo libertas est facultas omnia agendi in vtilitatem nostram; lex non obstat libertati; nam et ipsa iubet, quae nobis vtilia sunt; prius verum, ergo et posterius; legi ergo parere, haec demum summa libertas.

§. 2.

Quid ergo est lex? Auctor definit: decretum superioris, quo sibi subiectum obligat, vt ad istius praescriptum actiones suas componat. Heineccii Prael. Pufendorf. D Ego

Ego malim: praeceptum superioris, quo subditi poena vel praemio obligantur, ut ad eius praescriptum actiones suas componant.

Est praeceptum.) Decretum enim proprie in mente latet, et subditos non obligat, nisi promulgatum; decretum autem promulgatum vocatur *praeceptum*.

Superioris.) Fuere qui legem definiunt per communem spon- sionem, *L. 1. §. 2. D. de leg.* sed sponso non est lex, sed pa- ctum; qui conceptus maxime differunt. Ob oculos quidem habue- runt quidam ICI statum democraticum, sed in eo quoque lex fer- tur non in modum pacti, sed praecepti. Per pactum lex decerni- tur, per modum praecepti promulgatur: totus populus est supe- rior; singuli ciues subditi.

Poena vel praemio.) Sunt enim pars essentialis legis, ut infra dicemus, ergo debent ingredi definitionem; lex sine poena est imperfecta.

Subditi.) Sive perpetui, sive temporarii; ergo leges non prae- scribuntur superiori vel pari; ergo capitulationes aliaeque leges fundamentales imperii sunt pacta.

Ut ad eius normam actiones.) GROT. *de iur. bell. et pac. lib. I. cap. 9.* dicit, legem obligare ad id, quod rectum est; falso: non ideo lex obligat, quia actio iam tum recta est, sed ideo actio recta est, quia lex ad eam me obligat. Praeterea parere teneor legi, etiamsi quid praescribat, quod in se nec rectum, nec prauum sit; e. g. si prin- ceptus iubeat, ut peregrino calendario non utar, ut contractus in- scribam chartae typario principis notatae.

Hac obseruata definitione distinguere possum legem

a) *a consilio*; lex enim 1. a superiore; consilium a quouis mihi bene cupiente; 2. lex est praeceptum, quod a volun- tate legislatoris pendet; consilium valet propter rationes; 3. lex obligat; consilium non est obligatorium; 4. lex habet coniunctam poenam et praemium, tale non coniunctum est cum consilio;

b) *a pacto*; lex enim 1. est actus, qui intercedit inter supe- riorem et inferiorem; pactum inter pares; 2. lex exigit vo- luntatem vnius imperantis; pactum vtriusque consensum; 3. in lege obligatio antecedit; in pacto obligatio sequitur.

γ) *a iure*, quatenus est facultas personae competens; lex enim necessitatem imponit subditis; ius libertatem indulget. Vnde legi renuntiare non possum, iuri quisque suo renun- tiare

tiare potest. THOMAS. *Fundam. iur. nat. et gent. lib. I. cap. 5.* Lex est vel praeceptiua, quae aliquid fieri iubet vel prohibet; vel permissiua, quae quid fieri permittit; e. g. ne occidito; cuique patrifamilias ius condendi testamentum esto.

Hanc diuisionem quidam non admittunt, quia lex permissoria non obliget, adeoque legis definitio ei non quadret. Sed obligat omnino lex etiam permissiua, non quidem eum, cui quid permittitur, quippe qui iuri suo potest renuntiare, sed reliquos subditos, ne eum turbent in usu et exercitio istius iuris.

§. 3.

Quum legis praecipua virtus sit obligatio; hinc de natura legis auctor acturus praecipue etiam quaerit, quid sit obligatio.

Nota est vulgaris definitio in *pr. Inst. de obligat.* *Obligatio est vinculum iuris, quo necessitate adstringimur alicuius rei faciendae, vel praestandae.* Quae definitio tolerabilis est, quamvis a multis vapulet: Nam

1. Obligationem distinguit ab omnibus aliis rebus similibus; quod sufficit in definitione nominali;

2. Genus, *vinculum iuris*, est quidem metaphoricum, sed non ideo ineptum, quia res morales plerumque metaphorice eloquimur, ob defectum vocabulorum propriorum, quippe ad corpora fere pertinentium, e. g. obligatio, contractus.

Accuratio tamen si cui placeat definitio, dicimus, *obligationem* esse necessitatem moralem, qua homines ad dandum, faciendum, patiendumque adstringuntur.

Eius correlatum est ius, per quod intelligimus facultatem moralem aliquid agendi habendique siue iusta cuiusquam contradictione; e. g. si mihi ius est eundi, ambulandi per alterius fundum, alteri est obligatio seu necessitas moralis id patiendi.

Iam duplex nobis imponitur necessitas, vel ex consideratione naturalis commodi, vel incommodi, quod ex violatione legis oritur, et tunc *obligatio* vocatur INTERNA; vel ex metu poenae, vel ex spe praemii a legislatore propositi, et tunc vocatur *obligatio* EXTERNA, e. g. alius paret edicto de aduenis sine testimonio tempore pestis non admittendis ex consideratione proprii periculi, cui se suosque expositurus esset, si hospites eo tempore promiscue acciperet; alius paret quidem edicto, sed ex metu poenae, quam minatus est princeps.

Obligatio interna oritur, quoties id, quod a nobis exigitur, tamquam dictamen rectae rationis, vel consilium aliquod est nobis saluberrimum; *externa* vero, quoties idem consideramus tamquam legem propriam, et sanctione poenali munitam. Sic princeps paret praecepto archiatri ob obligationem internam; medicus praecepto principis ob obligationem externam. THOMAS. *Fundam. iur. nat. et gent. lib. I. cap. 4. §. 61.*

Vfus huius doctrinae est in diiudicanda quaestione, *an ius naturae futurum esset*, etiam si non esset Deus? Scholastici id affirmarunt, itemque GROTIUS in *Proleg. de iur. bell. et pac.* Contra PFENDORFFIUS hanc thesin acriter impugnauit: 1. quia nullum ius sit sine lege, nulla lex sine legislatore; 2. quia peccatum sit *iniquitas*, adeoque sine lege proprie sic dicta nullum possit esse peccatum, nulla obligatio.

At dici posset, si homo atheus esset, eum quidem se obligatum putare posse obligatione interna, quia praecepta iuris naturalis sunt rationi consentanea, non obligatione externa: ergo ipsi haec praecepta non erunt ius naturae, sed praecepta salubria a se ipso reperta, quibus parebit tamquam praeceptis et consiliis medicorum.

§. 4.

Quis vero proprie obligari potest? hoc ex definitione patet. Quum enim obligatio sit necessitas moralis, qua adstringimur ad aliquid faciendum, dandum, vel patiendum; necesse est 1. ut intelligat, quid sibi dandum, faciendum, vel patiendum sit; 2. ut in eius arbitrio sit, hoc dare, facere, pati; impossibilia enim neminem obligant, (per §. 23. cap. 1.) 3. ut quis de iure a me exigere possit; ius enim et obligatio sunt correlata, hinc e. g. par parem praecepto non potest obligare, quia ipsi nullum ius est alteri imponendi necessitatem.

Ex hoc sequuntur requisita tria, si quis obligari debeat:

1. ut ipsi sana sit ratio, qua legem intelligat;
2. ut habeat voluntatem, qua se ad legem possit determinare;
3. ut aliquem agnoscamus pro superiore, cui ius sit imponendi nobis obligationem.

Obiici posset, etiam externos tamen obligari legibus principis, si veniant in ciuitates alias. Resp. tunc sunt ciues temporarii, et per accessum illum sponte se legibus subiiciunt.

Hinc

Hinc solui potest quaestio, *an princeps sit solutus legibus?* HOB-
BESII dura est philosophia, quidquid princeps agit, rectum esse.
Si solutus dicitur, qui antea vinculo adstrictus, negamus quae-
stionem; numquam enim princeps legibus fuit adstrictus: si vero
sensus quaestionis est, sitne princeps immunis a legibus? tunc di-
stinguimus inter

1. pacta, quales sunt leges fundamentales, capitulationes, pa-
cta conuenta, quibus omnino obligatur princeps, in eaque ple-
rumque iurare debet;

2. inter *leges proprie sic dictas*; eae sunt vel

a) *diuinae*; quibus obligari principem patet ex tribus rei-
quitis;

β) vel *humanae*, quibus non obligatur ob defectum re-
quisiti tertii. Vid. BUNDEI *Diss. de principe legibus huma-
nis, non diuinis, soluto.*

Obiicitur 1. *legislatores aliquando se sponte obstringere, se legem
non mutaturum.* Resp. id fit vel per modum pacti, vel per mo-
dum propositi: prius seruari tenetur, non posterius. THUCIDI-
DES *Hist. libr. II.* refert, Athenienses 2000. talenta reposuisse in ar-
ce, non prius promenda, nisi si contingeret urbem obsideri; quae-
rebatur, an id mutare possent bello Peloponensiaco? Resp.
quod sic.

2. *L. 1. et 2. C. si ex rescript. nupt. pet. rescriptis propriis pa-
rere vetat Imperator.* Resp. α) leges istas Imperator pro diuinis
habuit; β) parere vetat ob praesumptionem sub- et obreptionis.

§. 5.

Quaeritur, *quis obligare possit alterum?* Hic HOBBSIVS *de ciue,*
cap. 15. et in *Leuiath. cap. 22. pag. 167.* delirat, dum solam prae-
cipientis potentiam pro iusta obligandi causa habet, atque, iis,
*quorum potentiae resisti nequit, ius dominandi, leges ferendi, obligan-
di, ab ipsa potentia derivari.* Sed ita et latrones ius haberent nos
obligandi, nobis dominandi, et leges ferendi.

Alii solam praestantiam pro iusta causa habent nos obligandi,
vti MOSES AMYRALDVS, in *Diss. de iure Dei in res creatas*; sed prae-
stantia quidem illa dat facultatem seu ius imperfectum ad imperan-
dum, non ideo actu quis est imperans. Hinc vtrumque coniunxit
PVEENDORFFIVS, et pro requisitis exigit,

1. Ut quis habeat iustam causam a me obsequium exigendi ;
 2. Ut ipsi etiam potentia sit, malum repraesentandi illis, qui obsequium denegant, cui assentit BYDDEVS, dict. *Dissert. axiom.* 2.
- Vnum est, quod obiciri posset : principem nempe iure obligare rebelles, quamuis vere hi sint potentiores. Resp. distingue inter obligationem internam, quae omnino adest, et externam, quae tum apud rebelles cessat, si ipsi victores sint ; quia princeps ipsis non potest repraesentare malum, quod contumacia sua merentur.

Sed quanam sunt illae iustae causae, ob quas quis obsequium exigere possit ? Auctor eo refert

1. Extraordinaria beneficia ; sed ea obligant ad gratitudinem, non ad obsequium ; e. g. Cyrus Harpagum non ideo tenebatur pro imperante agnoscere, quia Cyrus sustulerat expositum ;
 2. prudentia eminens ; sed haec tantum ius imperfectum, vel praetensionem tribuit, non ius perfectum, ut ipse quis sit imperans.
- Hinc non nisi tres sunt causae verae ac proprie sic dictae :
1. *Dependuntia* ratione essentiae vel consecrationis ;
 2. *Spontanea subiectio* ;
 3. *Pactum inter imperantes et subditos.*

§. 6.

Ex his principiis de obligatione fluunt iam aliquot consecraria :

1. *Legislatorem debere esse notum*, non quoad personam, sed quoad potestatem legislatorem, i. e. certos esse debere subditos, hunc esse legislatorem, alias deesset requisitum (§. 4.).
2. *Legem debere esse promulgatam* ; quum enim intelligi debeat (per requisitum 1. §. 4.) intelligi autem non possit, quod in mente latet legislatoris ; sane debet promulgari. Deberent ergo subditi informari in legibus, exemplo Hebraeorum, Lacedaemoniorum, Germanorum, Romanorum, qui leges ediscere iuebant ciues : hinc apud quasdam gentes in versus redigebantur, ut eo facilius ediscerentur ; apud nos eadem de causa dicuntur *Geferze* ; eodem pertinent paroemiae iuris.
3. *Legem non obligare in praeteritum, sed in futurum* ; quum enim lex obliget ciues ad actiones normae legum adtemperandas, sequitur, ut lex prior sit actionibus : si prior est actionibus, non potest applicari actionibus praeteritis. At aliquando tamen leges profertur ad casus praeteritos etiam, *L. 7. C. de pact. pign. Nouell. XVIII.* Resp. tunc vel lex antiquior reuocatur in vium, vel aliquid

liquid disponitur, quod iam tum iure naturali notum est.

4. *Legem debere esse perspicuam*; obscuritas nascitur vel ex stilo: uti legg. XII. tabb. vel ex ambiguitate, vel ex re ipsa, veluti ex collisione, de qua suo loco; hinc *interpretatio authentica, usualis*, (de qua ZIEGL. in *Dicastic. concl.* 36. et *Art. tabulifst.*) et *doctrinalis*, de qua infra.

Quaeritur, an et *consensus requiratur populi*? Affirmant aliqui, uti PETR. DE MARCA, *de concord. sacerdot. et imper.* cap. 16. §. 2. seqq. alii negant, et recte; lex enim non est pactum, sed iussus. Confundunt consensum tacitum generalem et antecedentem in imperium, cum expressio specialis et consequente in legem; ille adesse debet, non autem hic requiritur.

§. 7.

Quaeritur porro *de partibus legis*? de his patet ex fine.

Quum enim pro norma esse debeat (§. 2.) subditis, requiritur *praeceptum*, ut scire possint subditi, quid facere, vel omittere debeant.

Quumque etiam obligationem *externam producere* debeat, ea vero ex metu poenae nascatur praecipue (§. 3.): opus quoque est SANCTIONE POENALI.

Illa sanctio poenalis duplex est; 1. *generalis*, ut actus contra leges susceptus nullus sit, *L. 5. de legib.* 2. *specialis*, ut et poena maneat positiva illum, qui legem violet, e. g. si quis sine consensu parentum nuptias fecerit, nuptiae erunt nullae, et coniuges carceris poena plebentur.

Si his partibus lex constet, vocatur *perfecta*; si sanctio poenalis deest, *imperfecta*; si et haec addita, sed actus non declaratur nullus, *minus quam perfecta* vocatur. Vid. VLP. *Fragment. tit. 1. §. 1. 2.* CUMBERLAND. *Proleg. §. 14. et cap. 5. §. 40.* Praemiorum potius promissionem facit partem legum: sed distinguendum inter leges

1. *Negativas* seu *prohibitivas*, quae semper cum poena coniunctae;

2. *Affirmativas*; hae vero aliquid praecipunt, vel

α) quod ius naturale praecipit;

β) quod iure naturali non praeeceptum; tunc vel *generalis* est, et poena requiritur, vel *specialis*, et opus est praemio.

§. 8.

Materia legum ex fine iudicanda; finis est tranquillitas rei publicae; ergo princeps non alias ferre debet leges, quam quae ad finem hunc comparatae. Hinc leges

1. De-

1. Debent esse possibiles; frustra ergo feruntur leges, ut aurum fiat; absurda quoque erat lex Nebucadnezaris Chaldaeis scripta, ut somnium, sibi non relatum, interpretarentur;

2. Debent respicere utilitatem et tranquillitatem rei publicae; alias frustra restringeretur libertas naturalis. Absurda ergo lex regis Babylon, ut nemo aliquid petat intra certos dies vel a Deo, vel ab homine.

At quod ad posterius attinet, id caute accipiendum: Nam

1. Utilitas legis non semper in oculos incurrit; ipsae leges Dei caerimoniales sunt eius generis;

2. Imprudens quidem legislator est, qui leges inutiles fert, sed subditi ideo non obligatione liberantur.

§. 9.

Tertia pars agit de legis adiunctis, quorum duo sunt: *dispensatio*, §. 9. *aequitas*, §. 10. DISPENSARE vocabulum minus Latinum; veteres dixeret, gratiam legis facere, indulgere, et hinc GROTIVS scripsit de aequitate, facilitate, et indulgentia.

DISPENSATIO est declaratio Legislatoris, legem aliquo casu non obligaturam, quamvis iste casus vere lege comprehendatur.

Hinc differt

1. ab *aggratiatione*; nam tum peccavit aliquis, sed poena remittitur, quum, qui impetrata dispensatione agit, non peccet;

2. ab *aequitate*; tunc enim declaratur, casum ad legem non pertinere.

Sic dum Agesilaus obtenta victoria desertoribus civibus veniam daret, acclamaretque: Dormiant hodie leges, erat aggratatio; dum Christus in interpretatione praecepti de sabbatho eximit operam necessitatis et charitatis, est aequitas; dum princeps alicui veniam aetatis indulget, vel matrimonium in gradu quodam prohibito permittit, est *dispensatio*.

Dispensare vero potest princeps;

1. quia leges tulit; nam earum dominus est;

2. quia eas plane tollere potest.

Sed observandum,

a) *dispensationem non fieri debere circa leges divinas*; tum naturales, tum positivas. Quaeritur, an Deus dispensare possit contra ius naturae? Resp. absurda quaestio: Deus potest, quicquid vult, contra ius naturale dispensare non vult, ergo non potest. Ad obiectionem;

nem; quod Deus *Exod. XI. 2. 3.* dispensauerit contra septimum praeceptum, respondetur negando, non enim furtum permisit Israelitis, sed eos immisit in bona Aegyptiorum, qui operas debebant.

β) *Dispensationem fieri non debere sine iusta et praegnantia causa*; sic Scipioni ante iustam aetatem venia aetatis concessa, teste APPIANO.

§. 10.

Alterum legis adiunctum est *aequitas*, quam multi in ore habent, quum rei ipsius satis ignari sint. Nimirum

1. *Aequitas generaliter* accipitur pro iustitia, et tum aequum est, quicquid legi consentaneum; hoc sensu etiam datur aequitas scripta.

2. *Specialiter* vero aequitas est interpretatio legum restrictiua, qua opus est, quoties lex aliquid paullo durius inculcare videtur. Ne enim summum ius fiat summa iniuria, ex aequitate subueniendum uest, e. g. lex est, praedium vsucaptum vindicari non potest; casus occurrit, ubi praedium minoris vel absentis rei publicae causa vsucapitur: hic sane aequitas adhuc vindicationem admittit. Ceterum facile patet, aequitatem debere habere aliquod fundamentum; quare aliud esse non potest, quam regula interpretandi. Si ergo hoc fundamentum adest, aequitas est vera; sin absque fundamento hoc aequitatem crepat, est cerebrina, de qua *L. 91. §. 4. D. de verbor. obligat.* Plerumque sub auctoritate iuris scientiae perniciose erratur.

Ex hoc iam discimus, *quomodo aequitas differat a dispensatione.*

Differunt 1. *caussa efficiente*; dispensatio ab imperante est, aequitas a quolibet iudice exigitur.

2. *forma*; illa est arbitraria, haec necessaria, ac proinde illa precibus impetranda, haec vltro concedenda.

3. *effectu*; dispensatio legem suspendit, aequitas interpretatur; ibi permittitur aliquid contra legem, hic declaratur, actum non repugnare legi. Vid. *Disl. GROTI. de aequitat. indulgent. et fac illi.*

§. 11.

Iam sequitur quarta pars capituli; Quotuplices sint actiones ad legem consideratae?

Heinacii Frach. Pufendorf.

E

1. vol

1. *vel necessariae, vel permissae, vel licitae*, §. 11. 2. *vel bonae, vel malae*, §. ead. 3. *vel iustae, vel iniustae*, §. 12--15.

Primae diuisionis auctor bina membra facit, adeoque actiones ipsae sunt vel necessariae, vel licitae seu permissae; sed postremae differunt.

1. *Necessariae*, quae in lege vel prohibentur, vel praecipiuntur, immo et quae honestati, aequitati, decoro repugnant. Vnde recte PAPINIANVS L. 15. *D. de condit. instit. quae facta laedunt pietatem, existimationem, verecundiam nostram, et ut generaliter dixerim, quae contra bonos mores sunt, ea nec facere nos posse credendum est*, e. g. honorare parentes, verum dicere, a mendaciis abstinere, erranti monstrare viam, sunt actiones necessariae.

2. *Licitae*, de quibus leges nihil disponunt, adeoque eas nec praecipiunt, nec prohibent, e. g. quo colore vestium vtendum sit? Haec *vel*

a) *perfecte licitae*, quae moraliter in differentes, e. g. fusco, an flauo colore uti malim in vestibus.

β) *vel imperfecte licitae*; haec quidem legibus, nec praecipuntur, nec prohibentur, tamen vel honestati, vel decoro repugnant, e. g. nudis incedere pedibus. Vid. STRYK II *Diff. de iure liciti, sed non honesti*. Eleganter PAVLLVS I. Cor. VI. 12. *quiduis mihi licet, tamen si non quiduis conduci*; et CLAUDIANVS:

Non tibi quid liceat, sed quid fecisse decebat Occurrat.

3. *Permissae*, quas lex expresse permittit, e. g. ut quis versus semisses accipiat; hinc iuri quisque potest renuntiare, e. g. pater condit testamentum in forma illegitima, possem illud impugnare, sed nolo, quia pater est.

Altera diuisionis.

ACTIONES BONAE, quae legi ex instituto conformantur secundum omnes circumstantias.

MALAE, quae legi disconueniunt.

Dico: actiones bonas conformari debere legibus ex institutio; inde sequitur

a) Actionem non esse bonam, quae casu legibus consentanea est, e. g. vult quis verberare inimicum, et per errorem verberat seruum vagabundum;

b) Nec statim bonam esse actionem, cuius effectus bonus, id enim casu vel potius dirigente diuina prouidentia fieri potest; e. g. pars
Lace-

Lacedaemoniorum exercitum defecerat, montemque occuparat, ut se cum hostibus coniungeret, Agesilaus persuaserat ciuibus, illud suo iussu factum esse: hostes rerum ignari metuebant insidias, ac facta ab Agesilao impressione fugiebant; an ideo bene egerunt illi transfugae?

c) Nec actionem bonam esse, quae non secundum omnes circumstantias legi sit consentanea; e. g. eleemosynas dare, cultui diuino interesse ostentationis gratia.

§. 12. 13.

Tertia diuisio est, quod actiones sint vel IUSTAE, vel INIUSTAE, ubi quaeritur, 1. quid iustitia? §. 12. 13. 14. 2. quid iniustitia? §. 15.

Iustitia attribuitur vel

1. *Personae*, et tunc est virtus, qua suum cuique tribuimus; vel

2. *Actionibus*, et tunc est conformitas actionis cum lege. Conformitas illa est vel

a) *In omnibus circumstantiis*, et tunc actio bona et iusta sunt synonyma;

b) *In facto externo*, et tunc actio ciuilitur iusta esse potest; quae in se bona non est, e. g. si rusticus tributa soluit, sed reluctantem voluntate.

§. 14.

Iustitia est vel *expletrix*, quae tribuit suum cuique; quod iure perfecto debetur; vel *attributrix*, quae tribuit, quod iure imperfecto debetur.

Nobilius procul dubio attributrix; magis necessaria est expletrix.

§. 15.

Iniustitia est vitium, quo suum alicui denegamus; vel si iniustitiam tribuam actionibus, est discrepantia actionis a lege.

Eius varii gradus:

1. *Culpa*, eaque vel latior, vel leuior.

2. *Dolus*, qui in proposito consistit.

Hinc inculcari solent regulae:

a) *Qui iure suo vitur, nemini facit iniuriam*; modo inde

E 2

1. pro-

1. propositum ablit;
2. res in se non sit insolita; e. g. veneno incidere flores;
- ß) *Volenti non fit iniuria*; modo
 1. res licita;
 2. alter ius volendi habuerit;
 3. iustae aetatis fuerit.

§. 16.

Ultima pars capitis explicat varias species vel diuisiones legis:

1. Lex est vel a Deo, vel ab homine; ergo vel *diuina*, vel *humana*.

2. Lex diuina vel innotescit per rectam rationem, vel per reuelationem tantum; ergo est vel *naturalis*, e. g. neminem occide; vel *positiua*, e. g. sabbathum sanctifica.

3. Lex positiua vel omne humanum genus obligat, vel aliquam tantum gentem; illa est *vniversalis*, haec vero *particularis*. Earum ratio praecipue typica, quod contra IO. MARSHAM. *Canon. chronica*. et SPENCER. *de legib. ritualib. Hebraeor.* tenendum.

De vniversalibus positiuis legibus quaeritur, *an dentur*? Affirmarunt initio post Theologos, et GROTIUM *de iur. bell. et pac.* II. §. 8. THOMASIVS, *Iuris prud. diuin.* I. 2. 63. et BYDDEVS in *Elem. philos. pract. part. II. cap. 2. et 13.* Probarunt id exemplis legum de vetita arbore in paradiso, legum matrimonialium, *Leuit. XVIII. et XX.* de poena homicidii, *Genes. VIII. 6.* sabbathi.

Addunt characteres: 1. repetitionem eiusmodi legis in Nouo Testamento; 2. comminationem poenae et gentilibus irrogandae.

Sed easdem leges iterum negauit THOMASIVS in *Fundam. iur. nat. et gent.* quem sequuti BYDDEVS, in *Instit. theol. moral. part. II. cap. 1. §. 9.* WEIDLERVS, et alii. Rationes dubitandi praecipuae;

1. Quod excogitari non possit ratio promulgandi has leges; non promulgatae sunt illae leges per rationem, quia haec illas ignorat; nec per reuelationem, quia Sacra Scriptura tum soli populo Dei tradita, *Psal. CXXXV. 11. 19. 20. Deus sua diuina iacobaeis, sua placita et sententias Israelitis indicauit: id quod non fecit ulli ceterarum gentium.* Septuaginta viralis versio vero multo post captiuitatem Babylonicam curata est.

Possit quidem promulgatio statim per traditionem, perque Adamum, Noachum, atque Christum esse facta: sed Adamo istae leges nondum notae fuerunt omnes, e. g. non matrimoniales, quia fratres

fratres et sorores, nempe Adami liberi, inierunt matrimonium ; nec de poena homicidii, quia Cainus hanc poenam non luit. *An eae Noacho reuelatae omnes, iidem non constat.* Statuunt id Iudaei, idque probabile visum *Buddeo in Inrod. ad Hist. Philos. Hebraeorum pag. 14. et 15.* sed certis argumentis non constat. Si per Christum demum innotuissent, toto tempore Veteris Testamenti gentiles fuissent excusabiles, et tamen eos ideo punitos praesupponunt.

2. Quod characteres isti non sunt vniuersales, e. g. lex de vetita arbore non est repetita in Nouo Testamento, sed fuit tantum temporaria. *Leuit. XVIII.* dicitur quidem, Cananeos ob violationem legum eiectionis terris suis ; sed immediate praecedunt eiusmodi leges, quae et ex recta ratione innotescunt. Lex de sabbatho adeo non repetita in Nouo Testamento, vt potius ex libertate Christiana mutata, et loco sabbathi ipsa Apostolorum aetate sit substitutus dies solis.

3. Nec necessarium quidem est, has leges statuere ; a) quaedam enim harum legum sunt temporariae ; b) quaedam ex naturalibus rationibus innotescunt, e. g. lex de poena homicidii ; c) quaedam ex regulis decori et honesti possunt deduci, veluti leges matrimoniales, et de sabbatho, vt adeo his legibus vniuersalibus posituius facile careamus.

CAPVT III.

DE LEGE NATVRALI.

HAtenus de lege in genere ; iam in specie de lege naturali, vbi quaeritur, 1. *quodnam sit principium iuris naturae ? §. 1-9.* 2. *quis eius auctor ? §. 10. 11.* 3. *quis modus promulgandi ? §. 12.* 4. *quaenam eius obiecta ? §. 13.*

De principio iuris naturae agitur.

Non ergo hic intelligimus principium essendi ; quod vocant ; sed cognoscendi. Per PRINCIPIVM intelligimus propositionem vniuersalem, ex qua omnes iuris naturalis conclusiones deriuari possunt. Quod est in vita communi cynosura, lapis lydius, statera, id in moralibus est principium.

Iam mirus est in re tam necessaria dissensus ; ergo opus est ; ut sciamus , quae sint principii boni requisita.

1. Debet esse *principium cognoscendi* , id est , ut simul conclusionum inde reddi possit ratio ; ergo non sufficit illud scholasticum : *quod est in se iustum* , illud est *iuris naturalis* ; perinde est , ac si dicerent : quod in se iustum , est iustum.

2. Debet esse *verum* ; quia ex vno falso sequuntur plura ; itaque et fictiones excluduntur , qualia sunt Iudaeorum *praecepta* Noachica , HOBBSII bellum omnium in omnes.

3. Debet esse *evidens* ; omnes enim homines inde colligere debent , quod quid iuris naturalis sit , tam indocti , quam docti.

4. *Adaequatum* denique ; quia qui legem unicam violat , omnes violasse videtur ; debet ergo homo habere principium , ex quo omnes leges cognoscat : si tale habet , vocatur *adaequatum* ; ergo et

5. *Vnicum* ; nam si plura ; aut nexum inter se habent , aut non : si posterius , sunt sibi contraria ; sin prius , reduci possunt ad vnam communem propositionem. Iam hunc ordinem tenemus , ut

1. Dispicimus qua methodo inuestigandum sit hoc principium. §. 1-6.

2. Ostendamus , quodnam sit principium auctoris , et quid de eo sentiendum , §. 7-9.

3. Consideremus aliorum auctorum principia ; ac demum

4. Quodnam verissimum sit , dispicimus.

§. 1.

Quod ad methodum attinet , commendat auctor considerationem status naturalis : eo cognito perspectum esse debere putat iuris naturalis principium.

Supponit , prudentem Legislatorem leges suas adtemperare statui rei publicae , adeoque non easdem leges quadrare statui rei publicae monarchico , democratico , aristocratico , rebus publicis militaribus et commerciorum causis institutis. Ex instituto hoc ostenderunt ARISTOTELES , *Ethic. ad Nicom. I. 7.* et CONRING. in *Diff. de legib. §. 27.*

Demonstratio. Quoties diuersae sunt rei publicae formae , toties diuersi sunt fines speciales ; diuersi fines speciales requirunt diuersa media ; talia diuersa media sunt leges ; ergo in diuersis rebus publicis sunt diuersae leges.

Iam Deus est Legislator prudentissimus , qui nihil sine ratione et

et sufficiente fundamento sancire potest; ergo Deus adtemperauit ius naturale statui naturali hominum.

Itaque si quis cognoscere velit legem naturae primariam, vel iuris naturalis principium, debet considerare statum naturalem.

Enim vero 1. Status naturalis hominis, seu ipse auctor agnoscit, est corruptissimus: at procul dubio aliquid iustum fuit et ante naturae corruptionem.

2. Prudens legislator non modo ad statum rei publicae et subditorum respicit, sed ad finem suum, quem paene neglexit PVENDORFFIUS. Ita quum Deus populum Iudaicum vellet ad regnum Christi praeparare, omnes leges huic fini adtemperauit, non soligenio populi Iudaici, vt visum est SPENCERO et MARSHAMO.

§. 2.

Sed semel posita hac methodo iam inquirat in statum hominis naturalem: per hunc itaque intelligimus

1. Statum conditioni brutorum oppositum;
2. Statum hominum extra societatem viuentium;
3. Statum oppositum statui civili.

Quoad primam acceptationem obseruat homini inesse naturalem *Philantiam*, vel sui amorem. Docet experientia

a) Hominem facere omnia ad sui conseruationem;

β) Hominem suae felicitatis cupidissimum esse; eius causa omnia facit, et quamuis tum in conceptu felicitatis erret, tum in mediis, finem tamen hunc semper habet. Hoc omne Dei intentioni non aduersatur; qui enim nobis dedit existentiam, is et vult, vt simus, adeoque in esse nostro conseruemur; atqui Deus dedit nobis existentiam; ergo voluit vt in esse nostro conseruemur. Qui vult vt conseruemur, vult etiam, vt mediis vtamur ad conseruationem nostram necessariis. Itaque philantia illa in se non est praua, sed fit talis, si ordo amoris turbetur, e. g. si homo sui conseruationem maioris facit, quam ipsum Deum.

§. 3.

In sensu secundo homo in statu naturali est ad sui conseruationem ineptissimus. Hoc probatur

1. Ex natiuitate; homo in hoc mundi theatrum prodit nudus, rerum omnium indigus, sine rationis vsu, nec edere, nec bibere.

bibere, nec frigus, nec aestum repellere potest, quod pleraque bruta possunt.

2. Ex educatione; homo degenerat in brutum, si deest educatio; docent hoc exempla barbararum gentium, inprimis Hottentottorum. 3. Ex vitae visibus; nemo sibi ipsi sufficit; quam misera sit hominis conditio in statu naturali, consideret tantum hominem in deserto viventem, vel in insulam incultam proiectum. Commendari meretur GRACIANI *Criticon animorum*.

§. 4. 5.

In tertio significato, status naturalis hominis coniunctus est cum insigni hominis prauitate, qua omnia bruta superat. Nam

α) Homo habet plus malitiae, quam bestiae, e. g. ex voluptate, et alios laedit. Exemplum Lutatii Neratii apud GELLIVM, *Noct. Attic. XX. 1.* Hoc non faciunt bestiae. Praeterea multas in homine deprehendimus passiones, quibus vel carent bestiae, vel non tam prauis et validis vtuntur, e. g. auaritiam, dominandi libidinem, cet.

β) Habet plus potentiae male faciendi, ingenium promptum, arma nocentissima, quum bruta tantum naturalibus vtantur.

γ) Nullum in hoc statu naturali fraenum est, quemadmodum cohiberi possit; tale enim fraenum est poena et praemium, at his caremus in statu naturali. Obseruari quidem ab homine potest iustitia Dei vindictiua, sed quia 1. Deus non semper statim punit; nec 2. certam poenam determinauit; 3. saepe etiam poenitentibus eam remittit; hinc homines hoc parum curant. δ) Homines ne in statu quidem ciuili ab insigni prauitate possunt cohiberi, quum grauissima immineant supplicia; quid ergo de statu naturali sperandum?

§. 6.

Denique in statu naturali auctor deprehendit insignem ingeniorum varietatem, dum supra ex diuersis respectibus boni et mali, ex varietate temperamentorum, et eorum mixtura, consuetudine, affectibus eam deriuauimus, hinc quot capita, tot sensus.

Ea ingeniorum diuersitas non potest non innumeras lites procreare: aut enim duo vel plures idem volunt, aut diuersa; si idem,
liti-

litigabunt, quia omnes idem concupiscunt; si diuersa litigabunt, quia nec in fine, nec in mediis conuenient, ergo semper in statu naturali hominibus male conueniet.

§. 7.

Iam inde auctor colligit; hominem natum esse ad societatem. Eius argumentum, quod hac paragrapho profert, resolui potest in sequentes ratiocinationes:

1. Quicumque est animal sui conseruandi studiosissimum, illud viuere debet socialiter; homo est animal sui conseruandi studiosissimum (per §. 2.) ergo homo debet viuere socialiter. Maior certa, quia se conseruare homo non posset, si extra societatem viveret.

2. Quicumque est animal extra societatem miserrimum, illud viuere tenetur socialiter; homo est extra societatem animal miserrimum (per §. 3. ergo homo viuere tenetur socialiter.

3. Si homo est animal pessimum extra societatem, et nocentissimum, sequitur, ut socialiter viuere debeat ex intentione Dei; atque verum est prius; ergo et posterius.

4. Si homines diuersissima habent ingenia, adeoque extra societatem se inuicem necessario destruerent, necessarium est, ut socialiter viuant; atque prius verum est, ergo et posterius.

§. 8. 9.

Hinc ergo colligit auctor, principium iuris naturae esse socialitatem, eaque in re conuenit ille cum veteribus. CIC. de legib. I. 5. de offi. I. 16. sequi. de finib. III. SENEC. de benef. III. 18. IAMBlich. in Protrept. cap. 20.

Quin et HOBBSIVS atque GROTIVS idem principium substraerunt iuri naturae, quamuis dissentiant in medio termino, vel fundamento socialitatis: Nam

1. GROTIVS socialiter putat viuendum, quia id per se iustum sit etiam ante leges

2. HOBBSIVS, quia alias nasceretur bellum omnium in omnes.

3. PVFENDORFFIVS, quia naturalis hominis status, Deique intentio id exigit.

Iam quum PVFENDORFFIVS demonstrauerit, socialiter esse viuendum, idque existimet esse principium iuris naturalis, inde colligit axiomata.

Heineccii Praeh. Pufendorff.

E

1. Quid

1. *Quidquid socialitatem inter homines conservat, eique consentaneum est, id esse iuris naturalis.*

2. *Quidquid eandem destruit, aut ei aduersatur, id contra ius naturae esse.*

Quaeritur ergo, an illud principium PVENDORFFII recte se habeat? Hoc ostendunt characteres sub initium capitis explicati. Primo itaque fatemur

1. Principium hoc PVENDORFFII esse principium cognoscendi; nam facile subsumere possum, hoc vel illud esse societati consentaneum vel contrarium. At quomuis hodie in statu sociali inde conclusiones petere possimus, id tamen non potuisset Adamus, qui solus in mundo vivebat.

2. Est etiam verum, hominem debere vivere socialiter; nam obligatos nos esse ex intentione Dei ad sociale vitam, auctor satis liquide demonstravit; ergo hoc ipsum esse principium iuris naturae. Sane potest aliquod praeceptum iuris naturae esse verissimum, quamuis ideo id non statim sit principium vnicum.

3. Non est evidens; evidens quidem est, hominem vivere debere socialiter, sed non statim expeditum est, qualem esse oporteat socialitatem; nam et latrones viuunt socialiter: societas ergo est terminus aequiuocus; quod aequiuocum est, non potest evidens esse.

4. Est quidem hoc principium vnicum, sed tamen

5. Non adaequatum, quia non omnia officia iuris naturae; quatenus conscientia dicitur, inde possunt derivari, e. g. officia erga Deum et se ipsum. Auctor quidem ea inde derivat, Deum colendum, quia religio sit vinculum societatis; hominem obligatum esse ad sui conservationem, quia alias socialiter vivere non posset: sed utrumque officiorum genus locum habiturum esset, etiam si soli viveremus inter homines, ceterum iam demonstratum est.

Sed age: examinemus aliorum principia, et, an firmiore talo subnitantur, dispiciamus.

1. *Idem quidem supposuerunt: quidquid natura omnia animalia docuit, est iuris naturae, e. g. procreare sobolem, eandem educare, se aduersus aliorum iniurias defendere.* Sed hoc 1. non est verum (per §. 4. cap. 2.) quia obligari nemo potest, nisi qui et ratione instructus, et libertate voluntatis; 2. non evidens, quia natura omnium animalium nobis non satis nota est; 3. non adaequatum, quia impos-

impossibile est, vt inde deducantur officia erga Deum, et officia imperantium et subditorum; vnde et Icti §. vii. *Inst. de iustit. et iur.* dicunt, ius tantum priuatum triperitum esse, compositum quippe ex naturalibus praeceptis, gentium, et ciuilibus, quia statum ciuitatis natura omnia animantia non docuit.

II. Scholastici quidam: quod sua natura est iustum, est faciendum; et quidquid turpe, fugiendum; sed hoc principium non est 1. cognoscendi principium; explicat enim idem per idem, nec scire inde possum, quid sua natura iustum vel turpe; 2. nec est verum; nititur enim hypothese, ius naturae fore, etiamsi ponatur, non esse Deum; sed tum non futurum esse ius proprie dictum supra demonstrauimus.

III. Alii scholasticorum adsumunt principium: quod sanctitati Dei conuenit, id est iuris naturae; quod postea et ZENTGRAVIUS Argentoratensis recoxit; sed et hoc principium non est euident; quis enim accurate nouit, quid sit sanctitati Dei consentaneum; 2. non adaequatum; multi actus iustitiae sunt, quorum nullum archetypum in Deo reperimus, e. g. debita soluere, emere, vendere, Vid. PVFEND. *Specim. controuerf. cap. 4. §. 4.*

III. VAL. ALBERTI, theologus et philosophus Lipsiensis, in *Compendio iuris naturae, orthodoxae theologiae conformato*, quum animaduertetet, PVFENDORFFIUM ius naturae ex natura corrupta deducere, vt emendaret id, ponebat principium: quidquid conuenit flammis integritatis, illud est iuris naturae. Enim verò 1. non est principium cognoscendi; nam Ethnici illud ignorant; 2. non est euident; nam ipsi quidem generatim nouimus, hominem creatum esse ad imaginem Dei, nouimus etiam imaginem constituisse in iustitia et sanctitate, sed specialia ignoramus; 3. non adaequatum, quia hodie de multis officiis quaeritur, quibus ne locus quidem futurus in statu integritatis; e. g. de officiis erga pauperes, belligerantium, magistratum, subditorum, cet.

V. SELDENVS, vel Hebraei, quorum hypotheses proponit, pro principio adsumunt septem praecepta Noachica; sed 1. haec non sunt principium cognoscendi; Ethnici enim Noachum et praecepta illa data ignorant; 2. non est verum; desunt enim testimonia historicorum; 3. non adaequatum, non enim sine coactione omnes conclusiones iuris naturae inde deriuari possunt.

VI. GROTIVS duplex habet principium, *socialitatem*, de qua quid sentiendum, iam supra sub Pufendorffiano vidimus, et *consensum omnium gentium*; sed hoc 1. non est verum; nam gentes etiam in actibus

actibus turpibus consenserunt, nec consensus gentium est lex; e. g. in idololatria *ἰδωλολατρία*; 2. *non evidens*; est enim ille consensus gentium ex innumeris auctoribus petendus, quod quis ab Indis, laponenſibus, Americanis, aliisque barbaris desideret? 3. *non adaequatum*; nam non in omnibus conclusionibus iuris naturae gentes consenserunt; e. g. Lacedaemonii furtum pro licito habuere; Germani latrocinia, duella; aliae gentes scortationem negarunt esse peccatum.

VII. HOBBSIVS quidem etiam statuit, *socialiter esse viuendum*; sed eius principium resoluitur in *bellum omnium in omnes*; id vero 1. *non est verum*; est hypothesis ex historia non demonstrabilis; 2. *non principium cognoscendi*; nam sic ante ciuitates et res publicas nullum plane fuisset ius naturae; 3. *non adaequatum*; inde enim non fluunt officia erga Deum et nie ipsum.

VIII. LAMB. VELTHVYSEN *pudorem naturalem*; sed 1. *non est evidens*; multarum enim rerum pudet hominem, quae sunt iusta; multorum non pudet, quae sunt turpia; 2. *non adaequatum*; inde quidem deriuari possunt officia honesti et decori, sed non iusti; 3. *nec absolute verum* est; pudor quidem est naturalis, sed non omnium turpium naturam pudet.

VIII. BODINVS, *ordo naturae*; sed id 1. *nec evidens* est, 2. *nec principium cognoscendi*.

X. THOMASIVS; *homo a Deo accepit esse, ergo et Deus vult, vt conseruemur*; inde regula: *omnia agenda, quae durationem et conseruationem nostram promouent; omnia contra fugienda, quae conseruationem nostram destruunt*. Ad hominis conseruationem pertinent 1. *existimatio bona*; 2. *indolentia*; 3. *sufficiencia*. Primum adsequimur honeste viuendo; alterum, iuste; tertium, decore.

Principium iusti: *quod tibi non vis fieri, alteri ne feceris*.

Principium honesti: *fac tibi, quae vis vt alii tibi faciant*.

Principium decori: *quae tibi fieri vis, alijs fac*.

Iam quidem principalis propositio est principium cognoscendi: est vera, evidens, sed sunt tamen quae desideres; 1. si ad solam nostram conseruationem respicimus, nulla est ratio, cur ius naturae violare non possimus, si aliter conseruari non possemus; e. g. tyrannus mihi minatur supplicium, nisi Deum abnegem; 2. decorum non recte videtur definitum, nam vere et regula iusti est: *quod tibi vis fieri, alteri feceris*; 3. inde non fluunt officia erga Deum. THOMASIVS quidem putat, ex principio honesti illa fluere; sed non collendus est Deus ob solam conseruationem nostram.

XI. Itaque facilius principium inuestigabimus ita; si ad finem Dei in

in condendis hominibus respiciamus; scilicet supponimus,

a) Nos existentiae nostrae causam non esse; antequam eramus, eramus nihil, nihil aliquid producere non potest.

b) Si nos existentiae nostrae causae non sumus, oportet sane nos conditos ab ente alio, et perfectissimo quidem; quin omnipotentiae est, ex nihilo substantiam viuam, suiue consciam producere; sapientiae, eam ita condere, vt nihil in nobis sine summa ratione factum sit, id est, a Deo.

c) Qui a Deo conditus est, ab eo pendet in esse suo, ergo ei obligatus est, id est, eius voluntati vel fini, quem in creatione nostra habuit, satisfacere debet; itaque propositio primaria:

Fac ea omnia, quae fini Dei in creatione hominis conueniunt, et contraria omite.

d) Iam si finem Dei investigare velimus, respiciendum erit ad media, quae nobis dedit, vel facultates; quum ergo dederit nobis a) corpus mobile; vult, vt illo varias actiones agamus; β) voluntatem, quae bonum adperit, et malum auersatur; vult, vt bona tantum sectemur, mala fugiamus; γ) intellectum, vult vt bona vera, non apparentia sectemur. Ergo vult, vt actiones edamus, quae ex veri boni adpetentia proficiuntur. Veri boni adpetentia est amor. Vult ergo, vt *amenius*, omnesque actiones nostrae ex vero amore proficiantur.

e) Amor tendit vel in Deum, vel in nos, vel in proximum, vel in alias creaturas; quae obiecta quum non sint eiusdem dignitatis perfectionisque, amorem quoque non eiusdem generis esse oportet.

f) Amor, si tendit in obiectum perfectius, vocatur *reuerentia*; si in tale, a quo pendemus, *obsequium*, quod est amor, quo obiectum aliquod ob perfectionem maximi facimus, eique libentissime obsequimur; ergo prima propositio specialis:

Deus tamquam ens perfectissimum submissa veneratione colendus, eique per omnia parendum est.

g) Si tendit in nos ipsos, *philautia*, eaque est amor, quo quis veram sui perfectionem conseruationemque intendit. Ne tamen illa philautia sit praua, ordo seruandus, ne nostram conseruationem Dei voluntati praeferramus; hinc altera propositio specialis:

Homo ad suam perfectionem et conseruationem promouendam tenetur, quatenus illa sine violatione maiestatis diuinae obtineri potest.

h) Si tendit in obiectum extra nos, illud nobis vel aequale est,

est, ut proximus, vel inferius ac imperfectius; ut reliquae creaturae; si prius, amorem quoque oportet esse aequalem amori, quo nos ipsos prosequimur; ergo regula specialis tertia:

Homo hominem tenetur eodem prosequi amore, quo se ipsum prosequitur.

Sin posterius, amor est *benivolentiae*, eaque est amor, quo substantia nobis imperfectiore non abutimur; ergo regula quarta:

Non abutendum est creaturis nobis imperfectioribus.

Ex his totum ius naturae prono alueo fluit; consentit etiam Scriptura pulcherrime. *Matth. XXII. 37. Dominum Deum tuum toto corde, toto animo, tota mente amare: hoc est primum et maximum praeceptum. Alterum autem est huic simile: alterum, ut te ipsum amare. Luc. X. 27. Epist. ad Roman. XIII. 9. 1. Tim. I. 5. Matth. VII. 12. quidquid vultis, ut vobis faciant alii, idem vos etiam eis facite.* Est hoc principium 1. *verum*; fluit enim ex veris definitionibus, 2. *adequatum*; quia omnia officia erga Deum, nos, et proximum, quin et erga creaturas inde fluunt; 3. *evidens*; omnia enim prius definiuimus; 4. *cognoscendi*; hoc enim et Ethnicus quilibet cognoscit.

§. 10.

Quaeritur iam; *quis sit iuris naturae auctor?* Resp. Deus.

Auctor a) ostendit, supponendam esse Dei existentiam §. 10. b) demonstrat, Deum esse auctorem iuris naturae. Prius monet contra scholasticos, quos statuisse diximus, ius naturae fore, etiam si ponamus, non esse Deum; sed hoc falsum: nam 1. ius est complexus legum; lex ponit legislatorem, legislatore non existente, non existit lex; 2. obligatio externa et ius sunt correlata; obligatio externa oritur ex poenis et praemiis, talia non sunt, ubi non est legislator, ergo et ius naturae non erit. Ad obiectionem, atheos etiam, quae iuris naturae sunt, facere posse, iam supra respondimus, atheos tum his legibus non parere tamquam iuri, sed tamquam dictatis rationi consentaneis, quemadmodum princeps paret medico.

Itaque facile intelligendum est, quid respondendum sit ad quaestionem, *an atheismus hominem necessario impellat ad impietatem?* Negat BAEIVS, quem postea alii sequuti, his vti argumentis: 1. quod homines vivunt secundum passiones voluntatis, non secundum principia intellectus; e. g. ideo homo non statim est pius, quia accuratior Dei rerumque diuinarum cognitione imbutus est; ergo non ideo quis impius, quia ea cognitione destituitur; 2. quod homo ad suam utilitatem respiciat, ideoque et atheus ius naturae

turæ observaturus sit, quia id sibi vtile fore animaduertat. Sed resp. α) homo. quidem vivit secundum passionē voluntatis; at hae semper malae; deinde passionēs voluntatis non excitantur ad bonum, nisi boni ideam intellectu comprehenderint; β) negatur hominē semper agere, quae vtilia sunt; aliud videmus in voluptuosīs. Nos distinguimus atheos practicos, et theoreticos; illi semper improbi, quia vel ideo notitiā Dei in se extinguunt; ut tanto minus a peccatis abhorreant; hi, si rationem sequuntur, abstinēbunt a sceleribus, sed quamdiu sua interesse putant; alias enim nihil est, quod eos a peccato coercere possit; non metus numinis, cuius quippe existentiam negant; non poenae et praemia, quae negant cet. CICERO de nat. Deor. l. 2. atque haud scio, an pietate adversus Deos sublata, fides etiam, et societas humani generis et una excellentissima virinum iustitia tollatur. Conf. BARBEYRAC. ad PUFENDORF. II. 4. 2.

§. 11.

Iam ergo auctor demonstrat, ius naturae auctorem habere Deum: supponit nimirum, 1. Deum hominem creasse; 2. Deum non cura sua creaturas deservire, sed providentia sua omnia complecti; 3. qui creaverit hominem, et omnia provideat, eum intendere eius conservationem; 4. qui hominis conservationem intendat, eum et media conservationis velle; 5. atqui supra probatum esse, hominem conservari non posse sine lege naturae; 6. Deum ergo legem naturae dedisse.

Sed non opus est tot ambagibus; Nos paucis rem demonstramus ita:

Qui auctor est iuris naturae, is debet potentia pollere, talia principia cordi inscribendi;

Atqui tali potentia principia iuris naturae cordi inscribendi poller Deus;

Ergo solus Deus est auctor iuris naturae.

Maior clara est ex definitione iuris naturae; minor vero ita probatur: qui cordi quid inscribit, debet auctor fuisse mentis humanae; auctor mentis humanae solus est Deus; ergo Deus solus principia iuris naturae cordi inscribere potest.

§. 12.

§. 12.

Sequitur tertia pars capituli, *de modo promulgandi ius naturae*. Ad id facile respondetur: 1. ius naturae est ius vniuersale totius humani generis; ergo talis debet esse modus promulgandi, vt omnibus hominibus innotescat; 2. ius naturae est immutabile, ergo modus promulgandi debet esse talis, qui sit immutabilis, et apud omnes homines semper idem; atqui nullum est principium commune toti generi humano, et semper idem, quam RATIO; itaque ius naturae promulgatum esse debet per rationem. Et hoc ipsum sibi vult phrasis: *ius naturae inscriptum est cordibus*, qua non modo vtitur Apostolus *Rom. II, 14. 15.* sed et CICERO *pro Milon. cap. 4.*

Quaeritur tantum; *an actu nobis insit, an vero potentia?* Resp. potentia; nam quid iustum sit, ratiocinando demum adsequimur; illud non iam actu inest cordibus hominum. Demonstratur id etiam 1. exemplo infantum, qui nesciunt, quid iustum iniustumue sit, *Ion. III, 11.* 2. experientia, hominem obbrutescere posse, si non diligenter ratiocinetur, e. g. barbaros, inter feras educatos. Demonstrant hoc ex instituto LOCKIUS; *de intellectu human. I, 2.* et 3. BVDDEVS *Instit. theol. moral. pag. 544.* CYMBERLAND. *de legib. natur. prolegom. §. 5.*

§. 13.

Vltima pars capituli agit de obiecto iuris naturae, vel quotuplicia sint officia? Consideranda sunt entia, quae nos circumstant; supra nos est DEVS, proximi sumus NOS IPSI, et aequalis nobis PROXIMVS. Hinc et nemo vmquam dubitauit, officia alia deberi Deo, alia nobis ipsis, alia proximo. Atque ita etiam auctor distribuit libellum; agit enim 1. *de officiis erga Deum, cap. 4.* 2. *de officiis erga nos ipsos, cap. 5.* 3. *de officiis erga proximum, cap. 6. seqq.*

Sed praeter haec tria obiecta et alia nobis obseruantur in hoc mundi theatro: 1. Angeli; 2. Bruta, et creaturae inanimatae. Quaer. *an non his quoque certa officia debeamus?* (*) Resp. a) agimus de iure naturae, quod per rationem innotescit; Angelorum autem existentia nobis per rectam rationem non innotescit. Habuerunt quidem Chaldaei, Pythagoraei, et Platonici, quamvis gentiles, notitiam Angelorum, Archangelorum, Daemonum, cet. Vid. *oracula Zoroastri*;

(*) PORPHYRIUS *μετα ἀσχυρίε* de abstinentia ab animalibus.

ROASTRIS: sed id hi per traditiones acceperunt ab Hebraeis. Itaque officia erga Angelos cessant iure naturae. β) Bruta et creaturae inanimatae ratione destituuntur, adeoque nobis nulla officia praestare possunt, ergo nec ipsis vlla debemus. Bruta nobis neque superiora sunt, neque aequalia, sed inferiora, haec autem maiora nobis debent, quam nos ipsis, nec vlla tamen praestare possunt. Deus in summa legis positivae omittit bruta.

Sed obiciunt, 1. brutis etiam fieri posse iniuriam, e. g. torquendo sine ratione; hinc *Prouerb. XII, 10. habet rationem iustus vel iumenti sui.* 2. *Rom. VIII, 21. dicitur omnem rerum naturam congemiscere ac condolere?* Resp. posterior locus dubiae est interpretationis; quocumque vero modo intelligatur, gemitus iste improprie talis; itaque inde officia erga bruta non inferuntur. Prius negamus; iniuriam fieri brutis et creaturis inanimatis; qui enim nullum ius habent certa officia a nobis exigendi, illis nulla fit iniuria.

At non tamen recte agunt, qui bruta excruciantur sine ratione, fateor, sed tunc iniuriam non faciunt brutis et creaturis inanimatis, verum Deo, eorum conditori. Res declaratur exemplo eius, qui artificis officinam inuadens, eius horologia destruit; is sane horologiis non facit iniuriam, sed artifici. Hinc nos supra, ubi principium iuris naturae inuestigauimus, meditatione inuenimus regulam specialem: *non abutendum est creaturis*; cuius conclusiones suo loco videbimus.

CAPVT III.

DE OFFICIIS HOMINIS ERGA DEVM,
SEV DE RELIGIONE NATVRALI.

§. I.

IAm de primo OBJECTO iuris naturae; puta DEO. Quum per Deum nihil aliud intelligere possimus, quam ens perfectissimum; de eo supra inuenimus regulam specialem.

Deus tanquam ens perfectissimus submissa veneratione colendus, eique per omnia parendum est.

Cultus ille et obsequium, quod Deo debetur, dicitur RELIGIO;
Heineccii Prael. Pufendorff.

G

ergo

ergo de hac agendum, et quidem quatenus ex recta ratione potest cognosci.

Haec officia non possunt deduci ex principio socialitatis; nam cultum Deo debemus et extra societatem; nec ex solis principiis THOMASII, quia sic Deum colemus propter nos, non propter se. Sed ex nostro fluunt aperte: Si enim *Deus tamquam ens perfectissimum submissa veneratione colendus, recte de eo sentire debemus; si ei obsequium praestare velimus, actiones nostras ad eius praescriptum adtemperare debemus.*

Eam auctor duabus partibus constare ait: 1. in eo, vt de Deo recte sentiamus; 2. vt actiones nostras ad eius voluntatem componamus. Prius vocatur RELIGIO stricte; posterius PIETAS. Prius consistit in intellectu, posterius in voluntate: prius est theoreticum, posterius practicum. EPICET. *Enchir. cap. 38. religionis erga Deum immortalem praecipuum illud esse scito, rectas de eo habere opinioniones, et parendum ei esse vltro.*

Sunt, qui prius putant superuacuum, et sufficere existimant; si quis pie viuat, et Dei praeceptis pareat; sed hunc indifferētissimum falsum esse demonstrabimus duplici argumento.

1. Si in me exigitur obsequium erga Deum, debeo ens istud reuereri, id est, metuere, amare; atqui reuereri, metuere, amare nihil possum, nisi cuius perfectionem et praestantiam perspectam habeo; ergo debeo Dei perfectionem et praestantiam perspectam habere. Ignotum hominem reuereri non possum: si quis veromihī eius perfectiones et praestantiam ostendit, statim in me orietur reuerentia.

2. A fine. Deus nobis dedit intellectum, vt cognoscamus eius perfectiones; hoc sane non fecit frustra. Itaque ostendit auctor, 1. quid de Deo sentiendum §. 2-5. 2. quomodo ille colendus, §. 6. ad finem. In qua posteriore parte omnia ex principiis nostris demonstrabimus.

§. 2.

Prima propositio theoretica est:

DEVM EXISTERE.

Frustra enim a nobis exigeretur pietas, nisi certi essemus de existentia Dei. Iam multae demonstrationes huius thesaeos necessariae, sed quaedam nimis subtiles sunt, aliae non satisfaciunt atheis; hinc ita procedimus:

A) Omne

A) Omne ens vel necessarium est, vel contingens. Necessarium est, quod a se ipso est; et hinc non potest non esse.

Contingens, quod causam existentiae extra se habet, adeoque potest esse et non esse; tertium non datur.

B) Quum necessarium sit a se ipso, et non possit non esse: consequens est, ut sit

1. aeternum, et nec principium, nec finem habet:
2. immutabile; si enim mutaretur, non esset necessarium:
3. simplex; quia mutabilia sunt composita:
4. incorporeum.

C) Quumque ens contingens possit esse et non esse: sequitur,

- a) ut principium et finem habeat,
- b) ut variis mutationibus sit obnoxium,
- c) compositum, ac proinde dissolubile, et
- d) corporeum.

D) Iam non modo nos, sed totus mundus est contingens; videmus enim varias eius mutationes; videmus esse ens compositum; videmus denique, nihil aeternum: ergo nos et mundus non sumus a nobis ipsis, sed ab alia causa extra nos.

E) Quum progressus causarum in infinitum sit impossibilis, subsistere debemus in causa prima, quae sit ens necessarium a se subsistens, aeternum, immutabile, simplex.

F) Atqui ens a se subsistens, aeternum, immutabile, simplex, incorporeum vocamus Deum; Deus ergo existit.

Itaque stultum est dogma SPINOZAE, mundum confundentis cum Deo; sic enim mundus esset ens necessarium; ergo incorporeum: simplex, immutabile, quae omnia experientiae repugnant.

Stultum quoque dogma Epicureorum, qui mundum sine causa ab aeterno existere statuerunt; ita enim nihil in mundo corporeum, nihil mutabile esset, quod absurdum.

Stultum est, statuere progressum causarum in infinitum, quia hic rationi repugnat; ubi enim omnes causae ponuntur, necessario etiam ponitur prima.

Stultum denique est oblicere progressum numerorum in infinitum: nam hic est imaginarius quantitas; nos loquimur de progressu vero causarum.

Ex eo colligit auctor, atheos esse detestandos, et gravissimis

poenis cœrendos. Prius concedo, detestandus est atheismus, 1. quia est doctrina pestilentissima, quae omnem tollit fidem et iustitiam; 2. quia est indemonstrabilis, quippe propositio negativa; 3. quia mentem turbat. *PLUTARCHVS* librum scripsit, quod non suauiter viui posset secundum Epicurum. Sed non ideo concedendum posterius: nam 1. atheus potest aliquis esse inuitus ob varias tentationes; hic commiseratione potius dignus, et hinc iuuandus potius; 2. atheismus est defectus intellectus, ac hinc ignorantia vel error, non delictum; distinguendum ergo inter atheum, qui ciuili-ter quiete viuit, et qui turbat rem publicam, alios corrumpendo, secundum atheismum suum viuendo, fidem et iustitiam violando; hic puniendus, non vero ille. Conf. *PETR. FRID. ARPE Apologia pro lul. Caes. Vanino. HOBBSIVS, de ciu. XIII, 19. et XV, 2.* Stulte admodum statuebat, atheum comparandum cum eo, qui quadraturam circuli reperire nequeat.

§. 3.

Secunda propositio theoretica haec est:

DEVM ESSE MVNDI CREATOREM.

Demonstratio. Mundus est ens contingens, quia corporeus, mutabilis, compositus, ceu demonstratum §. 2. Omne contingens existentiae suae causam habet extra se; ergo et mundus.

Causa illa non potest alia esse, quam ens perfectissimum; nempe Deus; ergo Deus est causa huius vniuersi.

Obiiciunt, 1. *Naturam omnia fecisse*; at per hanc intelligunt vel aliquid extra mundum, vel ipsius mundi ordinem ac dispositionem. Si posterius: mundus esset causa mundi, quod absurdum; sin prius, natura est Deus;

2. *Sidera esse mundi causam*; *ARISTOTELES: sol et rana creant ranam.* Resp. mundus est totum, sidera sunt pars; absurdum; partem esse causam totius;

3. *Animam mundi esse causam mundi*; sed per eam quoque intelligunt vel aliquid extra mundum, tunc erit Deus; vel mundi partem, tunc pars constitit totum, quod absurdum.

4. *Mundum esse aeternum.* Resp. quidquid est aeternum, illud est immutabile; mundus est mutabilis; ergo non aeternus. Docet hoc ipsum quoque mundi natura, vrbium historiae; elegans argumentum *LEIBNITII* a montibus desumptum.

Cete-

Ceterum et haec thesis est magni momenti, scitumque maxime necessaria; inde enim sequitur dependentia nostra a Deo, quam esse fundamentum omnis obligationis, iam supra vidimus *cap. II. §. 5.*

§. 4.

Tertia propositio theoretica est:

DEI PROVIDENTIAM AD OMNIA SESE EXTENDERE.

Per providentiam intelligimus actum Dei, quo omnia creata conservat, ac dirigit. Hanc ita demonstramus:

1. Quidquid durationis suae causam in se non habet, id non a se; sed ab alio conservatur; creaturae durationis suae causam non habent in se, sed extra se; nam concludere non possum: sum modo, ergo et sequenti momento ero; ergo conservantur ab alio.

A quonam vero? Qui nos conservat, is existentiam futuram dat; ergo conservatio est continuata creatio: qui nos creavit, et conservat; Deus creavit nos (per §. 3.) ergo et nos conservat. Sic demonstrator conservatio nostri. Elegans observatio ERH. WEIGELII; nos singulis momentis de nouo creari; ipsa namque nostra materia per transpirationem mutatur.

2. Directio omnium ita probatur: Omnia, quae sunt, habent suas causas, cur fiant; earum causarum is est nexus, ut una deficiente res non fieret; nexus iste causarum requirit ens omniscium, omnipotens, sapientissimum; ergo est a Deo; directio ergo omnium rerum est a Deo.

Ceterum magni momenti est haec propositio; quisquis enim Dei providentiam negat, veluti EPICVRVS, vel eandem in fatum mutat, uti Stoici, is non minus tollit omnem moralitatem, ac si Deum plane negaret. Quomodo enim timere, amare, confidere possemus ens, quod nullam mei curam gerit? ex instituto huius doctrinae necessitatem demonstrat ARRIANVS, *Diff. Epist. I. 12.*

§. 5.

Quarta propositio theoretica est:

NIHIL IN DEVM CADERE IMPERFECTIONIS:

Est enim ens perfectissimum, adeoque non esset Deus, si quidquam imperfectionis inesset; cui enim non competit definitio, ei nec competit definitum.

Est ergo Deus

1. INFINITVS; cui enim addi detrahique potest, ille est ens imperfectum;

fectum; si ergo finitus esset Deus, ei aliquid addi detrahique posset; esset ergo tunc ens imperfectum, adeoque non esset Deus.

2. INCOMPREHENSIBILIS; nullum enim finitum comprehendit infinitum; intellectus noster est finitus, (alias essemus omniscii); ergo non comprehendit infinitum; ergo Deus nobis est incomprehensibilis.

3. AETERNVS; est enim causa prima omnium rerum; si vero principium habuisset, non esset causa prima, sed ipse aliam causam haberet; est ergo aeternus, adeoque et

4. A SE IPSO, nec non

5. SIMPLEX; si enim esset compositum, haberet partes, adeoque esset dissolubile in partes, ergo non aeternum: at aeternum esse ante probauimus;

6. OMNIPRAESENS; qui enim fines non habet substantiae suae; ille vbique est; Deus non habet fines substantiae suae, (est enim ens infinitum, vt paulo ante demonstratum); itaque vbique est, et sic omnipraesens;

7. OMNISCIVS; qui enim est omnipraesens, is omnia intuetur ac videt; Deus est omnipraesens, (vt paulo ante vidimus); ergo est omniscius;

8. OMNIPOTENS; qui enim omnia produxit, quae possibilia sunt, is potest omnia producere; Deus omnia produxit (§. 3.); ergo et potest omnia producere. Facultatem omnia producendi vocamus *omnipotentiam*; ergo Deus est omnipotens;

9. IUSTISSIMVS, CLEMENTISSIMVS, SAPIENTISSIMVS; hae similesque adfectiones sunt perfectiones; nulla vero perfectio deesse potest enti perfectissimo;

10. VNVS; quia est infinitus; duo vero infinita concipi non possunt.

Haec omnia fluunt ex naturali lumine; rectaque ratione, ac proinde non mirum, pleraque et gentiles agnouisse, in primis Pythagoraeos et Platonicos.

§. 6.

Iam progredimur ad alteram partem, DE CVLTV DEI, vel PIETATE, quae constat propositionibus practicis.

Deum esse colendum, patet ex principiis nostris; quod est bonum, id est adpetendum, adeoque amandum; ergo Deus est amandus; quod
bonum

bonum est nobis perfectius, id amandum amore reuerentiae et obedientiae; ergo Deus amandus amore reuerentiae et obedientiae. Amorem reuerentiae et obedientiae vocamus CVLTVM; ergo Deus est colendus.

Cultus ergo est complexus omnium officiorum, quae ex amore reuerentiae et obedientiae erga Deum proficiunt.

Estque vel INTERNVS, qui in mente est, vel EXTERNVS, qui actibus externis se exserit; e. g. amare Deum, timere, ei confidere, sunt actus cultus interni; orare, eum laudare, praeceptis eius parere, cultus externus; de interno agitur §. 6. de externo §. 7.

In quo vero consistat *cultus internus*, facile potest ostendi ex consideratione attributorum paullo ante demonstratorum: 1. vidimus Deum esse bonum, ergo amandus, et quidem in gradu eminentissimo; scriptura ait: *tollo corde*; 2. vidimus esse ens perfectissimum, ergo honorandus; 3. vidimus esse iustissimum, simulque omnipotentem, ergo est timendus; 4. vidimus esse omniscium, clementem, potentem, ergo in eo sperandum et fiducia collocanda; 5. vidimus esse vnum, ergo abstinendum a cultu plurium deorum, et idololatria; 6. vidimus esse clementem et sapientem, ergo adquiescendum in eius voluntate; 7. vidimus esse omniscium, ergo integra mente colendus, detestanda hypocrisis.

§. 7.

Quod ad cultum *externum* attinet, primum nonnulli quaesierunt, *an sit necessarius*? Statum controuersiae satis accurate firma-
runt, non quaeri de casu, quando Deus talem cultum exigit, vt exegit a Iudaeis; secundo, nec an Deus eius modi cultu dignus sit? nec tertio, an non laudabilis sit? sed quarto, an ita necessarius, vt omitti sine crimine nequeat? Negarunt hoc nonnulli, 1. quia Deus eius modi cultu non indiget. Sic Demonax apud LVCIANVM in *Demonast. tom. I. Opp. pag. 861.* excusauit omisum Mineruae cultum eo argumento, quod non putarit, Mineruam suo sacrificio indigere. Deus est mens, ergo mente colendus: cogitationes nostras perspicit, ergo non indiget precibus, hymnis, gratiarum actione, cet. 2. quia Deus ipse saepissime eius modi cultum in ipsa Sacra Scriptura reiciat, v. gr. *Psal. LI. 17. non delectaris sacrificio, vt id exhibeam: non tibi acceptae sunt victimae. Diuina sacrificia sunt fructus spiritus; fructum adflictaeque mentem tu, Deus, non despicis*; 3. quia omisso tranquillitatem non turbet; eam enim niti adquiescentia mentis in Dei voluntate, non in externis ritibus ac caerimoniis.

Sed

Sed resp. 1. distinguendum inter necessitatem cultus ex parte Dei, et ex parte hominum; priorem omnino negamus, at posteriorem defendimus. Notum est, Deum etiam non indigere cultu interno, et eius tamen necessitatem ab ipsis dissentientibus admitti; 2. Deus ipse iussit cultum externum, ergo eum non reicit, sed abusum; non placet Deo cultus externus sine interno; non placent sacrificia sine fide, amore, obsequio; inde vero non sequitur, ut non placeant sacrificia cum eo cultu coniuncta; exemplum Abelis, Eliae, Salomonis, contrarium euincunt; 3. tranquillitas consistit in conscientia, quae semper adest, quoties conscii nobis sumus, quod officiis nostris satisfecerimus. Non satisfecimus autem, si cultum Dei externum omittamus.

Obstrictos enim nos esse ad illum, demonstramus sequentibus rationibus: 1. omnes interni adfectus erumpunt in actum externum: 2. cultus internus est internus adfectus; erumpit ergo cultus internus in actum; 3. cultus externus consistit in obsequio, (per propositionem nostram specialem primam,) obsequium se exerit actionibus externis; ergo cultus Dei se exerit actionibus externis.

In quonam vero consistit? Fluit hoc ex cultu interno: diximus §. 6.

a) Deum esse amandum; quod amamus, de eo libenter et cum testificatione adfectus loquimur, et aliorum quoque adfectum excitare studemus; ergo *de Deo honorifice loquendum, ad eiusque amorem alii excitandi.*

b) Diximus, Deum esse honorandum; ergo *Dei nomen honorandum; is hymnis celebrandus, non peierandus*; commendatur locus insignis *ARRIANI Diss. Epiſt. I, 16.*

c) Vidimus Deum timendum, ergo *eius praeceptis obediendum*, *SOCRATES apud XENOPH. non sanctius et castius coles Deum, quam ea, quae iusserit, faciendo. MARC. ANTONIN. ad se ipsum, X, 7. quomodo servus colis Deum.*

d) Vidimus, in Deo collocandam fiduciam; ergo *calamitates patienter et sine obmurmuratione ferendae, ergo precibus et supplicationibus insistendum.*

e) Vidimus, esse vnum; ergo *cauenda omnis idololatria, atque plurium deorum cultus.*

f) Vidimus, esse adquiescendum in eius voluntate; ergo *cultum non ad nostram, sed Dei voluntatem componere debemus.*

g) Vidimus, cauendam esse hypocrisin; ergo *cauendus est cultus externus sine pietate.*

§. 8.

Sub finem quaerit auctor, quem usum haec naturalis religio habeat? idque ostendit, 1. tum *negative*, §. 8. 2. tum *positiue* §. 9. *Negative*: demonstrat enim, religionem hanc naturalem non sufficere ad salutem aeternam consequendam; quod obseruandum contra HERB. CHERBURY, aliosque, qui Naturalistae vocantur, de quibus TRIBBECHOVIUS singulari schediasmate agit.

Argumenta sunt: 1. religio naturalis nobis non ostendit medium propitiandi Deum; ratio enim satis nos conuincit, nec sacrificia, nec preces, nec ieiunia ad id sufficere, vt iustitiae Dei infinitae satisfiat; 2. ea quidem praecipit, quid agendum sit, sed non supeditat vires ad agendum necessarias; perinde est, ac si aegroto diceret, ambulandum esse, cum appetitu coenam capiendam, modice laborandum; 3. ipsam salutem aeternam non potest promittere; an Deus velit probos aeternum beatos reddere, ignoramus sine promissione Dei; ratio enim nos non conuincit, Deum pro breuis temporis obsequio nobis dare velle felicitatem sempiternam.

Hinc sequitur, 1. necessariam esse aliquam reuelationem, quod omnes religiones agnouerunt. Habuerunt enim Ethnici sua oracula; Iudaei suum Talmudem; Mahomedani suum Alcoranum; Christiani sua Biblia; 2. eam diligenter indagandam esse, et ex characteribus suis iudicandam; 3. characteres eius non alios esse, quam vt suppleant, quod rationi deest, modo Deo digno, adeoque ostendat medium proportionatum Deum placandi, vires ad sanctificationem necessarias, et certitudinem salutis aeternae. Hinc apud PLATONEM in *Phaedon. tom. II. pag. 604*. SOCRATES: alterutrum horum fieri debet ab homine sapiente; aut enim discere debebant inuenire, quemadmodum ita se habeant, aut, si hoc fieri nequeat, optimum ac tutissimum humanam rationem eligere. Et haec posterior via omnino eligenda, nisi liceat forte istas procellas firmiore quodam vehiculo: *ἀγαθὸν θεῶν*; verbo quodam diuino tutius ac minore cum periculo tranare.

§. 9.

Positiue huius naturalis religionis vtilitatem ostendere conatur auctor, aitque, vinculum esse societatis humanae; alias enim non potuisset religionem ex principio socialitatis deriuare. Id quidem

Heineccii *Prael. Pufendorf.*

II

verum,

verum, quia cessaret fides, reuerentia subditorum erga principes et summas potestates impotentiores, si cessaret religio: ut iam non dicam, iurandum, cuius religione inprimis societas humana continetur, vanum et sine effectu futurum, nisi esset religio.

Sed 1. nec solus est huius religionis hic naturalis vsus, et 2. ille religioni reuelatae cum naturali, verae cum falsa communis est; sane Graeci, Romani, et pleraeque gentes, quamuis a recta ratione quam maxime discederent, tamen religione sua continuarent societates ciuiles.

Itaque potior vsus consistit 1. in confirmatione reuelatae religionis: Deus non potest reuelare, quod rectae rationi repugnat; est enim vtriusque luminis auctor; ergo insignis certitudo accedit reuelationi, si eam nihil aduersum rationi continere, ostendere possimus. Commendari merentur PETR. DAN. HVETH *Quaest. Alnet.* 2. In conuisione hominum improborum; hi abhorrent ab omni religione sed eam Deus i. m. inscripsit cordi, ut sint inexcusabiles. Hinc Apostolus *Rom. I.* inexcusabiles esse demonstrat Romanos, quod cognouerint, Deum existere, sed eum non coluerint, ut Deum, sed eius maiestatem commutarint in idola, et speciem hominum, animalium, quadrupedum cet. item quod eius praeceptis non paruerint, sed se polluerint nefandis peccatis.

CAPVT V.

DE OFFICIIS HOMINIS ERGA SE IPSVM.

§. I.

HAEC officia PVENDORFFIVS denuo ex principio SOCIALITATIS decucit; ponit enim, nos non nostri tantum, sed et aliorum hominum, causa esse creatos, adeoque societati humanae seruire et prodesse debere; ei autem seruire et prodesse nos non posse, nisi nos ipsos conseruemus; ergo nos iure naturae teneri ad conseruationem nostri.

Sed nos contra argumentamur: quaecumque officia et ante societatem, et extra eandem, nobis incumbunt; illa non deducenda ex socialitate: officia erga nos ipsos; cet. Nos ex principio nostro

fito facilius haec officia deriuamus : finis Dei in creando homine fuit, vt verum bonum, adpeteret, malum auerfaretur ; obligatus ergo hic est ad adpetitionem boni, adeoque ad AMOREM ; amor erga nos ipsos vel philautia non potest in alia re consistere, quam in perfectione et conseruatione nostri ; obligati ergo sumus ad nos perficiendos et conseruandos : quumque amorem nostri oporteat esse ordinatum, ac proinde nos non magis debeamus amare, quam Deum, ens praestantius et perfectius ; hinc addidimus restrictionem, homo tenetur ad se perficiendum conseruandumque ; quatenus id sine violatione diuinæ maiestatis fieri potest. Vid. cap. 3. §. 9.

Ex eo sequitur : α) vt homo se perficiat, quod quum fiat per culturam sui, de ea §. 1--3. β) vt homo se conseruet §. 4. γ) vt se defendat aduersus omnem vim iniustam §. 5--17. δ) denique vt in casibus necessitatis nec sui conseruationem, nec Dei voluntatem violet §. 18. ad finem.

a) Homo tenetur ad SVI CVLTVRAM ; id probamus 1. ex instinctu naturali ; volumus felices et perfectiores esse ; ergo tenemur ad culturam ; 2. ex facultatum nostrarum natura ; Deus dedit nobis facultates praestantissimas, corpus ad varia aptum, intellectum perspicacem, voluntatem ad bonum flexibilem : sed ea omnia parum vtilia ; obbrutesceremus enim sine cultura ; ergo eas facultates excolere, et ad maiorem perfectionem perducere tenemur ; 3. ex breuitate vitae ; ars longa, vita brevis, etiam longissima vita brevis, quia si ad 80. annos peruenerimus, primum detrahendum decennium pueritiae, et postremum decrepitae senectutis, quia tunc vsu rationis paene destituimur ; sic remanebunt anni 60. hos pro parte dimidia vigilando, pro parte dimidia dormiendo exigimus, sic remanebunt 30. Iam si ab his annis deducimus tempus, quo nihil egimus, quo edimus, bibimus ; nugae egimus, quo impediti sumus amicorum congressibus et salutationibus, vix decem anni supererunt. Properandum itaque erit, vt nos perficiamus. Similius, praefectus praetorio Hadriani, abdicato magistratu rus secessit, ibique meditationibus vacauit per quinquennium, moriens sibi potius iussit monumentum :

HIC SITVS EST SIMILIVS ;

QVI QVINQVE ANNOS VIXIT, V

H 2

teste

teste DIONE CASSIO. ELEGANTER EVRIP. in *Supplic.*

*Hæu mihi, quare non licet hoc hominibus
Bis fieri iuvenes, et rursus senes?
Nam in ædibus quidem, si quid non recte se habet
Id posterioribus sententiis emendamus,
Vitam vero non licet. Si autem essemus iuvenes
Bis, et bis senes si quid peccatum, id nos
Duplicis vitæ compotes facti corrigeremus.*

BVDD. *Diff. de cultura ingenii*, quæ exstat in eius *Select. iur. nat. et gentium*, pag. 293. sequ.

§. 2.

Quotuplex vero illa cultura? Id ex consideratione facultatum nostrarum patebit; intuitu earum a) omnes homines aliquatenus sibi æquales deprehendimus, omnes enim habemus corpus, omnes animum, intellectu et voluntate instructum; b) sed ratione gradus tamen permagnam deprehendimus differentiam; alius enim corpore robustiore, alius infirmiore utitur; alii est intellectus perspicacior, alii obtusior; alii voluntas ad vitia proclivior, quam alteri.

Itaque et duplex est sui cultura: ad aliam enim omnes obligati sunt homines, hanc vocabimus *generalem*, e. g. ut homo cognoscat Deum, mentem, immortalitatem; ad aliam quisque pro modulo virium corporis et animi tenetur; hanc vocabimus *specialem*, e. g. ut quis studiis operam navet, opificium addiscat, ad id non omnes peræque obligati.

Cultura generalis et specialis partim ad mentem, partim ad corpus pertinet: de illa hic §. 2. de hac §. 3. agitur.

Ratione mentis cultura nostra consistit a) in *perspicacia intellectus*; inde veterum exercitatio per ænigmata; corrigendi sunt pueri, quoties male ratiocinantur; ß) in *principiis necessariis menti infigendis*, veluti de cognitione Dei, de immortalitate mentis, de virtute et vitiis, officiis ceteris. sine his enim homo non potest non obbrutescere; γ) in *emendatione voluntatis*; stricta ergo opus est puerorum educatione, ne ad ignaviam, voluptatem, alique vitia adfuescant, adeo a teneris adflescere multum est. Elegans demonstratio LVGVRGII per duos canes eiusdem originis diversimode educatos. Quibus educatio defuit, eos crescente iam intellectu se ipsos

ipſos emendare decet; β) *in decore*; homines libertatem in eo quaerunt, vt ſint ruſticae indolis; ſed ii per omnem vitam infelices, quia nemini placent; decorum nobis aliorum hominum conciliat amorem, quia nec ſapientia ſine decori obſervatione cuiquam prodeſt; exemplo ſunt Cynici; γ) *cuius incumbit honeſtae arii ſtudere, qua ſe ſuſtinet*; aut enim mendicandum, aut furandum, aut ex honeſto labore viuendum; primum et ſecundum eſt iniuſtum, ergo eligendum eſt poſtremum; honeſtum autem dico vitae genus eligendum eſſe, nam alioquin a furto parum differt; hinc officio iuris naturae non ſatiſſaciunt praefſtigiatores, ludiones, ſecnici, aſtologi.

Specialis nitiſur regula: α) quiſque in tantum tenetur, vt ad perfectionem adſpiret: in quantum ipſius indoles patitur; β) ergo indaganda indoles; i. e. vires animi et corporis, quod dum facimus, diuinæ vocationi paremus. Quid diuina vocatio? Eleganter PARS. Sat. III. 71. 72. 73.

*quem te Deus eſſe
Inſiſt, et humana qua parte locatus eſ in re
Diſce.*

VID. IANI HVARTI *Scrutin. ingeniorum*, TVLDEN. *de cognitione ſui*, BARCLAI *Icon animorum*. Sed hoc plerique nimium negligunt, et hinc tot homines, quibus infeliciter omnia, electo ſemel vitae genere, procedunt.

§. 3.

Corpus deſtinatum eſt *aſſionibus externis*, caeque quoque duorum ſunt generum: 1. *generales*, ad quas omnes homines adſtricti, e. g. eundum, ſedendum, laborandum, 2. *ſpeciales*, ad quas tantum quidam obligati, e. g. concionandum, docendum, pognandum.

Generalia officia ratione culturae corporis ſunt, α) ne debilitemus corpus voluptatibus, otio, vigiliis, labore; β) vt agile reddamus illud; hinc non plane reiicienda exercitia corporis, ſaltare, pugilandi artem addiſcere, equitare.

Specialia, vt in eum habitum componere ſtudeamus corpus, quo opus eſt ad profeſſionem ſuam acquirendam, e. g. miles aeſtum et frigus ferre diſcat; docens, vt linguam obtemperantem habeat, vocemque ad amoenitatem componat, vt geſtus deformes viſet; opifex, vt corpus robuſtius exercitatione et cultu duriorē reddat.

§. 4.

Alterum officium erga nos ipsos est *nostra conseruatio*; conseruatio quidem dependet a Deo, vt supra demonstratum, sed vsus mediorum nobis incumbit; itaque omnia media, quibus vita conseruatur, adhibenda; ergo

1. Corpori nostro dehemus nutritionem.

2. Abstinentum est a luxu, quod nos ante tempus destruimus.

3. Abstinentum a rebus insalubribus.

4. Quiete et labore moderate vtendum.

5. Cauendi affectus vehementiores, qui nos quam facillime destruunt.

6. Quum vero sui conseruationi quam maxime repugnet propitium, quaestio est,

a) *Cur veteres etiam Philosophi laude dignum putarint hoc facinus*; exemplo Arriae apud PLIN. *Epist. III. 16.* quia 1. existimabant, corpus non esse partem essentialem hominis, sed ergastulum; 2. quia illud credebant originem omnis mali; 3. quia non erat saepe in potestate, perturbationes fugere, tunc putabant portam patere. VALER. MAXIMVS, *VIII. 9.* Praeter Philosophos et Hebraei permittebant hoc propitium, sed eo tantum casu, si vita vergeat in Dei ignominiam, exemplo Samsonis. GROT. *de iur. bell. et pac. II. 19. 5.* Ex recentioribus exstat Anonymi *B'athanatos*, quo libro autochiria defenditur, quod sit etiam in THOMAE MORI *Viopia*, *libr. II.* Hodie non ita philosophantur, qui violentas sibi manus inferunt, sed ex mera desperatione id faciunt, tantoque detriores omnino sunt, vel stupidiore potius.

b) *Qu. an id iure naturae permissum?* Negatur: α) tenetur homo ex fine Dei ad conseruationem sui, non ergo ad destructionem, Deus non potest velle contraria; β) non potest eiusmodi facinus committi sine dissidentia in Deum; at superiore capite demonstrauimus, sperandum in Deo, in eiusque voluntate adquirendum esse, quod contra Hebraeorum doctrinam obseruandum; γ) amare tenemur proximum, vt nos ipsos, ergo nos vt proximum; atqui proximum occidere non licet; ergo nec nos ipsos; δ) absurdum est pro remedio quaerere id, quod fugimus, et perire, ne pereamus; inde MARTIALIS *Epigr. II. 80.*

Hostem dum fugis se Fannius ipse peremit,

Nonne haec stultiia est. ne moriari, mori?

Obiciunt: 1. *volens non sit iniuria?* Resp. supra vidimus; hanc

hanc regulam fallere, si quis a) in re licita non versetur, nec b) facultatem volendi habeat. 2. Obiiciunt *exemplum Samsonis, qui virtute diuina firmatus manus sibi insulerit*? Resp. Samsonis exemplum est typicum, adeoque ad exemplum non trahendum. Non Deus ipsi concessit virtutem ad se occidendum, sed ad hostes Dei prosteruendos; quod simul ipse periit, non magis propitium est, quam si quis in acie pereat. 3. Obiiciunt, *socialitati id non repugnare, si quis e. g. ad horrendum damnatus supplicium morte voluntaria istud anteuertat, societatem enim ei iam renunciatam esse a reliquis*? Resp. inde hoc tantum patet, principium iuris naturae non esse socialitatem, non autem licitam esse autochiriam.

§. 5. 6.

Sequitur officium tertium erga se ipsum, sui defensio, de qua quaeritur

1. an sit iure naturae licita? §. 5. 6.

2. quibus conditionibus sit licita? §. 7--13.

3. pro quibus rebus licita sit? §. 14--17.

1. Negarunt alii primam quaestionem absolute, ob dicta *Matth. V. 39. ego vero vobis dico, non esse resistendum iniuriae: quin si quis tibi colaphum in dextram malam impegit, obuerte ei et alteram. Rom. V. 18. 19. si fieri potest, (quantum in vobis est,) pacem cum omnibus exercete, non vos ipsos vlsciscentes, o mihi carissimi, sed supplicium locum dantes. Exstat enim scriptum: mea est vltio, ego remunerabor.*

2. Alii distinguunt inter defensionem cum laesione, et sine laesione; hanc concedunt, non illam; Sociniani et Arminiani hanc sententiam defendunt.

3. Lacedaemonii eam non modo permissam, sed et praeceptam putabant, ac proinde puniebant eos, qui vel non propulsarunt iniuriam, vel ignauiores ea in re fuerant. Vid. *PLUTARCH. in Laco-nis, LAMB. VELTHVSEN in Principio iusti et decori, pag. 33.*

Sed 4. licitam saltem esse defensionem, siue sine laesione, siue cum ea fiat, recte statuunt *GROTIVS, PVFENDORFFIVS, THOMASIVS*, eaque sententia facile demonstratur a) ex principio nostro, quia tenemur ad nostri conseruationem, tenemur etiam ad illa amolien-da, quae nos destruunt; id vero fit per defensionem sui; ergo ad eam tenemur; b) amare nos iubemur tamquam proximum; at proximum tenemur defendere; ergo et nos ipsos; c) ab absurdo, quod cum contraria sententia coniunctum; si enim me defendere non li-ceret,

ceret, obligatio mihi esset mortem iniustissimam subeundi; magistratus sane nobis vbique et semper auxilio esse non potest.

Huic sententiae non obstant dicta paullo ante allegata, *Matth. V. 39.* hic enim procul dubio agitur de patientia in persecutione, alias enim et iudicia sustulisset Christus, quod absurdum. *Rom. XII. 19.* PAVLLVS loquitur de vindicta periculo iam propulsato, non de sui defensione.

§. 7.

Altera de hac materia quaestio est, quibus conditionibus haec *sua defensio sit licita?*

1. describitur casus §. 7.
2. subiectum se defendens §. 8. 9.
3. subiectum, contra quod se defendere licet §. 10.
4. duratio iuris se defendendi §. 11. 12.
5. modus defensionis §. 13.

Primus casus in statu naturali est, quoties alter nobis vel quaecumque facit iniuriam, vel intentat, nam tunc iudice destituimur: in statu civili vero casus licitae defensionis, quando alterius scelere nos in periculo versamur extremo; idque aliter evadere non possumus, quam eo modo. Hinc patet,

a) Periculum debere alicuius momenti esse, nec ferendos scholasticos, qui ob leuem quoque iniuriam hanc defensionem violentam concedunt; vnde mirum iis adfentiri GROTIUM, de iur. bell. et pac. II. 1. 10. Sane 1. reparatio tunc fieri potest ope iudicis; 2. non imminet destructio; sed de hoc infra §. 14. sequ.

b) Periculum deberet esse praesentissimum, e. g. si quis me aggrediatur armis mortiferis.

c) Vt ab alterius scelere proficiscatur; nam si ipse me illi sponte obieci, nullum ius defendendi esse potest.

d) Vt illud aliter, quam alterius destructione, evitare non possim.

Quaeritur, an quis obligatus sit ad fugam? Resp. distinguendum esse inter perfugium et fugam: in thesi nullum dubium est, quin, si tuto me aliquo recipere possim, ad id obstrictus sim; non enim praesentissimum est periculum, quod evitare possum. At ad fugam nemo obligatus est, ob anceps periculum, quia tergum praebet hosti, et se ipsum facultate defendendi priuat. At in hypothese

potest non omnia tam ad viuum refecanda, quia in tanta conseruatione non omnia accurate circumspicere licet.

§. 8. 9.

Quod ad subiectum se defendens attinet, denuo distinguendum inter statum naturalem. et ciuilem.

1. *In statu naturali* laesus vel iniuria adfectus, etiam si ea satis leuis videatur, modo satisfactio denegetur, ius habet se in infinitum defendendi; nam qui nos laedit in statu naturali, et satisfactio-nem denegat, is hostili in nos animo est; hosti in hostem in statu naturali in infinitum omnia licent; ergo et defendere se in infinitum licet. Aliud *in statu ciuili*, ibi non quilibet laesus habet ius se violenter defendendi, sed in periculo constitutus.

2. *In statu naturali* recte se defendere pergit quis etiam extra periculum constitutus quamdiu alter satisfactionem denegat, quia adhuc durat hostilis animus. Id itidem non licet *in statu ciuili*, quin potius statim cessat ius sese defendendi, ac cessat periculum, GROT. *de iur. bell. et pac. III. 4. seqq.*

Ratio discriminis denuo est, quia in statu naturali non est iudex, quem implorare possem, quum in statu ciuili eius auxilio uti possim.

§. 10.

Iam tertia quaestio oritur, *contra quem me eo modo possim defendere?* Potest quis me laedere vel dolo, vel culpa, vel plane casu. Quod contra primum, e. g. aggressorem, iusta sit defensio, nullum est dubium; at magis ambigi posse videtur, an idem dicendum sit de posterioribus. Inprimis disputant de casibus, a) si quis alium aggressurus per errorem me adgrediatur; b) si furiosus me adgrediatur; c) si similes me hostem putet, et me adgrediatur.

Sed omnibus casibus licita est defensio: ego teneor me conseruare; ergo et impedire, quo minus quis me destruat; hoc quum sine defensione fieri non possit, defendere me teneor. Obiiciunt a) *aggressorem non in me irruere dolo malo, quia vel errat, vel rationis usu destituitur?* Resp. non hic quaestio est de poena, sed de defensione; non quaeritur an alter peccet, sed an non ego ius habeam me defendendi. Eleganter GROT. *de iur. bell. et pac. II. 1. 3. ius defensionis non nascitur ex delicto alterius, sed ex obligatione*

Heineccii Prael. Pufendorf.

I

se

se defendendi; β) Obiiciunt, durum esse, hominem occidere, qui vel erret, vel furiosus sit? Resp. at multo durius, occidi se pati ab homine errante et furioso; quemadmodum ergo mihi ius est me defendendi contra bruta et belluas, quamvis his dolus imputari non possit; ita et contra errantes, furiosos, et similes.

§. 11. 12.

Duratio iuris defendendi se considerata secundum terminum, a quo incipit, et terminum, ad quem porrigitur, et quidem iterum secundum statum naturalem §. 11. et civilem §. 12.

Terminus a quo a) in statu naturali est momentum, quo laesit quis et denegavit satisfactionem; nam ab eo momento ostendit hostilem animum; ergo mihi ab eo tempore ius est illum ut hostem tractandi. *b) In statu civili* contra non a laesione, sed ab initio periculi praesentissimi ius defensionis oritur; nam antea iudicis auxilio uti licet.

Terminus ad quem a) in statu naturali durat tam diu, donec mihi satisfactio data, et de futura securitate cautum est; *b) in statu civili*, donec ex periculo isto me expediui; nam tunc de satisfactione et securitate futura iudicis est statuere.

Quaeri hac occasione solet: *an sola suspicio in statu naturali sufficiat ad defensionem violentam, seu bellum?* e. g. si vicinus arma parat, milites conscribat? HOBBSIVS, de ciue V. 1. hoc adfirmat ex ea ratione: qui et vult, et potest me adgredi, eius adgressionem praecupare possum: in statu naturali viuentes et volunt, et possunt me adgredi; volunt, quia natura mali sunt; possunt, quia arma parant; ergo possum adgressionem praecupare. Sed hic semper ius erit bellum inchoandi sine causa; quis enim princeps non armatus? ergo vult et potest me adgredi.

Sed distinguendum inter *suspicionem iustam*, et *iniustam*; illa est, quando certa argumentandi ratione concludere possum, illum me petere; e. g. 1. si omnia comparat ad futurum bellum necessaria, et neminem tamen habeat vicinum, quem petere possit, quam me: v. c. si Rex Lusitaniae, non mari sed terra arma pararet; 2. si non modo arma parat, sed etiam hostilem animum declararet.

Obiicitur *a) sic non fore defensionem, sed offensionem?* Resp. negando, quia in statu naturali tempus defensionis non incipit a praesens

fenti periculo, sed quam primum alter hostilem animum declarat; ergo nemo tenetur primum ictum expectare; β) ita minus cautos esse, si non nisi ob iustam suspicionem velimus ad defensionem procedere? Resp. negando; nam quis prohibet, se quoque praeparare ad defensionem.

Eadem facilitate deciditur quaestio, *an nimia potentia vicini iusta causa sit defensionis?* Ita philosophantur HOBBSIVS l.c. et A. B. GENTILIS, in libro *de iniustitia armorum Romanorum*; sed causa defensionis in statu naturali est laesio: adquisitio potentiae non semper me laedit; nam qui iure suo utitur, nemini facit iniuriam. At si quis iniuste sese reddit potentior, tunc id pro laesione habendum, adeoque distinguendum inter potentiam *iuste*, et *iniuste* adhibitam. Priore casu sola haec ratio non sufficit, quia alter iure suo utitur; posteriore sufficit, quia facile colligere possum, qui alios opprimit, me quoque oppressurum, si faueat occasio; e. g. superiore bello Hispanico successionis causa gesto, Hollandi breui manifesto causam dicebant, cur arma prehenderent, quia Galliae rex ad nimiam potentiam adspiravit: recte; nam Galli monarchiam Hispanicam cum iniuria domus Austriae occupant. At male hac ratione iam utitur rex Sardiniae, quia Imperator provincias suas non iniuste occupavit, sed fauente iure, et ipsa iuvante domo Sabaudica.

§. 13.

Sequitur quinto *modus defensionis*; hic iudicatur ex fine; *ea omnia pro defensione sui facienda, sine quibus periculum evadere non licet.*

Hinc in thesi certum est, 1. si vulneratione adgressoris depellere periculum possim, eum occidere nefas esse; 2. ne vulnerare quidem licere, si pateat perfugium; 3. si neutrum sufficiat, nos ad ipsam quoque mortem procedere posse.

Sed absurdum est, in hypothese haec praescribere, quia perbreue est spatium defensionis, tantaque animorum perturbatio, ut vix haec omnia ad libellam expendi possint.

Potius itaque disquiremus, *an et duella sint iustus defensionis modus?* Notum est, omnes paene gentes veteres haec ignorasse; itaque 1. quaeritur, *unde illorum origo repetenda sit?* reperimus quidem apud veteres singularia certamina Davidis et Goliathi, Horatorum et Curiatorum, Aeneae et Turni apud VIRGILIUM, aliaque. Sed ea fuere bella repraesentativa, quando duo exercitus hostiles, ut

sanguini hominum parcerent, eligebant utrimque viros fortissimos, qui utrumque populum repraesentarent, quorum victoria patriae prodesset, ignavia noceret. Hoc procul dubio iustum; populi enim vivunt in statu naturali, possunt ergo bellum iustum gerere: quum ergo multa millia inter se pugnare possunt, quidni etiam pauci possint, si ita compromiserint. Sed duella haec, de quibus loquimur, ab illis plane diversa sunt, ad vindicandam quippe priuatam iniuriam comparata. Origo itaque duellorum vera est a Germanis; hi duellis utebantur probationis causa, quemadmodum aliis mediis, quae *ortelia* vocabant, e. g. ferro candente, aqua tum feruida, tum frigida. Vid. DV FRESNE *Glossar. med. et infim. Latinit.* voce *Ortel*. Quoties itaque reus ita quid negabat, deficiente alia probatione cum accusatore manus conferere iubebatur, et vincens absoluebatur, victus damnabatur; dicebatur *Kampf-Recht*, *Kolben-Recht*. Hoc more iam Romanorum tempore Germani vsi sunt. Hinc VELLEI. PATERC. II. 118. observat, miratos Germanos solita armis discerni, iure terminari.

Iam quidem demum legibus publicis hoc prohibebatur, sed manebant tamen semper reliquiae inter nobiles et milites, quos et alii imitati sunt.

Quid vero 2. de duellis sentiendum? Resp. in statu naturali nihil habent iniusti; nam desunt iudices, adeoque ipsi sibi ius dicere debent. Obiicitur, improbari in sacra scriptura duellum Caini et Abelis? Sed resp. α) hi non vivere in statu plane naturali, quia quisque paterfamilias, adeoque et Adam, procul dubio fuit simul princeps familiae suae; β) causa huius certaminis erat iniusta, quia nimirum Deus benigne receperat sacrificium Abels. In statu civili nullo modo defendi possunt, 1. quia non pro defensione suscipiuntur; defensio enim incipit a periculo, quale hic non est; 2. quia vix numquam iuste vitmur. quamdiu in magistratu nobis est praedidium; 3. quia cum maximo magistratus contemptu coniuncta duella; 4. quia medium admodum lubricum decidendi controversias; nec enim certi esse possunt ii, quibus iusta causa est, se victoria potituros, alioque succubituros.

Sed quid si iubeant Imperatores, vel nec per indirectum eum negent se inter suos ministros ferre posse, qui iniuriam hoc modo non vindicet? Resp. tunc quidem homo veluti ad statum naturalem redit, adeoque duellum in se non iniustum est: at in causa sua plerumque iniustissimum. Accedit, Deo placere non posse affectus

irac.

irae, vindictae, cupiditatis, odii, sine quibus vix duellum intelligi potest.

§. 14.

Ultima quaestio est, *pro quibus rebus licita sit defensio eius modi violenta?* Resp. non modo pro vita, sed et pro integritate membrorum; nam a) nemo praevidere potest, an non et hoc coniunctum cum vitae periculo; b) aliquando membra quaedam pari passu ambulant cum vita, e. g. oculi; c) aliquando per omnem vitam infelix est, qui membrum amisit, e. g. manum, qua sibi victum et amicum parat; d) omnis vulneratio et mutilatio coniuncta est cum dolore tali, a quo natura ipsa abhorret. VAL. quidem ALBERTI in *Comp. iur. nat. part. II. cap. 3. §. 15.* distinguit, an periculum vitae subsit, nec ne? sed haec distinctio mere speculativa; quis enim hoc praevideat?

§. 15.

An et pro pudicitia? Adfirmat auctor, et exaggerat iniuriam; negant AVGVSIVS, THOMASIVS, BVDDEVS. Distinguendum inter 1. pudicitiam moralem, quae in animo consistit; haec eripi non potest, adeoque nullo modo defendi; 2. et inter pudicitiam physicam; haec eripi potest; ergo etiam defendi; sed non, ut videtur, violenter, a) quia non subest vitae periculum; b) quia nec infamia sequitur stuprum; c) magistratus satisfactionem potest procurare. Interim si virgo tale admisit facinus, procul dubio impune feret, quia eam excusabit iustus dolor, stupratoris vis et malitia, metus infamiae, incertitudo satisfactionis.

Alia quaestio, *an femina stupri vel declinandi, vel vindicandae causa se ipsam interimere possit?* quo nomine laudant Lucretiam; id vero negandum, 1. quia autochiriam illicitam probauimus; 2. quia punitur ita innocens pro nocente; 3. quia nullum effectum habere potest hoc facinus.

§. 16.

An pro rebus quoque nostris licita defensio violenta? Distinguit auctor inter statum naturalem et civilem; 1. in statu naturali licita; qui enim res meas mihi eripit, animum hostilem declarat; 2. in statu civili non nisi imminente vitae periculo; alias enim si furem aliter amoliri, vel a iudice defendi possum, mihi vim adhibere

re non licet. Hinc leges diuinae, Solonis, XII. tabb. furem nocturnum occidi patiuntur, diurnum vero non, nisi si se telo defendat.

§. 17.

Aliquando is, qui iuste se defendit, iniustam causam habet; aggressor iustam. Hoc fit potissimum in statu naturali inter liberos populos; quoties se, qui laesit, ad satisfactionem offert, laesus vero illam acceptare recusat; e. g. populus bellum iniustissimum infert, et alter victoriis variis potitur, belli priorem poenitet, offert satisfactionem, petit pacem, victor denegat; tunc sane iustitiae causa transit ad adgressorem; ratio, quia in statu naturali non alia est iusta defensionis causa, quam laesio, et satisfactionis denegatio: hac cessante, cessat ius defensionis.

§. 18.

Progredimur ad ultimam capitis partem *de favore necessitatis*, de quo auctor noster ad finem usque ita agit, ut 1. *fundamentum huius doctrinae explicet* §. 18. 2. *ex eo casus varios soluat* §. 19. *ad fin.*

Quaestio est: *si casus incidat, ut me conseruare non possim, nisi violenter alium, virum hunc salua religione violare possim, an mihi potius pereundum sit.*

Fundamentum auctor ponit admodum generale, quod nempe *necessitas non habeat legem*; idque probat, 1. quia legislatores salutem hominum intendere videantur, adeoque iis casibus lege nos intelligantur soluisse, quibus eam sine periculo seruare non possumus, e. g. Christus ipse ait: *homo non est propter sabbatum creatus, verum sabbatum propter hominem*; ergo si sabbatho Hannibal sit ante portas, procul dubio Deus dispensat, ut sepositis sabbathi officiis me aduersus hostem defendam; 2. quia nemo obligatur ad impossibilia, impossibile autem videtur, quod agendum cum mea pernicie. At haec auctoris philosophia est nimis generalis; nam sane si haec regula vera esset, imprudenter egissent martyres, qui mori, quam sacrificari maluerint; imprudenter Iosephus praetulisset captiuitatem amoribus vxoris.

Hinc alii distinctius procedere solent, et TITIVS quidem distinguit inter leges diuinas et humanas; de illis habet regulam: *quoties violatio legis tendit in contumeliam vel abnegationem Dei, toties necessitas non parit exceptionem*; reliquis casibus, ut et in legibus humanis hanc exceptionem admittit.

Iam

Iam quidem haec egregie congruunt cum principio nostro, vbi supra praecluximus, teneri nos ad conseruationem perfectionemque nostram promouendam, quatenus ea re maiestas diuina non laeditur; sed tamen adhuc incertum manet ex regulis TITIVS, quando actio vergat in contemptum et abnegationem Dei? Ait TITIVS, si lex sit diuina naturalis. eam non sine contemptu Dei violari; sin positiua, aliter se rem habere; sed procul dubio, *neminem occide*, Dei lex est naturalis, et tamen eam in casu necessitatis aliquando violari posse adhuc vidimus exemplo moderaminis inculpatae tutelae.

Itaque rem magis perspicue tradidit THOMASIVS, *Iuris prud. diuin. II. 2. 123. seqq.* aut lex est vel diuina, vel humana; diuina vel praescribit

a) Officia erga Deum, vel erga proximum; illa denuo sunt vel a) affirmatiua; haec semper habent exceptionem necessitatis, quia leges affirmatiuae tantum obligant data occasione; non autem occasio est, vbi mihi pereundum est; hinc ipse Christus in lege de sabbatho excipit necessitatem; β) vel negatiua; haec non admittunt exceptionem necessitatis, quia dum prohibuit Deus, maiestatem suam exercuit, ea vero violatur, quoties contra eius prohibitionem agimus, e. g. martyres recte egerunt, dum mori maluerunt, quam idolis supplicare;

b) Officia erga hominem itidem vel affirmatiua, vel negatiua; illa itidem admittunt exceptionem necessitatis 1. ob eandem regulam, quia leges affirmatiuae obligant data occasione; 2. et sic ob necessitatem licet violare officia affirmatiua erga Deum, multo magis erga proximum; *negatiua*; in his distinguendum, an necessitas sit α) a Deo; tunc quaelibet honesta ratio expediendi salutem; e. g. in naufragio suae quisque saluti consulere potest, quamuis alii pereundum sit; nam ex duobus malis physicis minus est eligendum; β) a malitia hominum; tunc, si homines intendunt, idque agant, 1. vt peccem, necessitas non excusat, e. g. si quis carcere adigatur ad Peccatum, veluti Ioseph; nam ita laederetur maiestas diuina; 2. vt peream; tunc quaelibet honesta ratio est expediendi salutem. Ita Iudaei obfessi ab hoste merito comedere potuissent carnem suillam.

§. 19.

Iam varii casus soluantur, 1. *an enle refecari possit membrum, ne pars sincera irabatur?* a) Afirmat auctor recte; lex est: *conserua mem-*

membra tua; ea est affirmatiua; ergo admittit exceptionem necessitatis; sin negatiue legem concipias: ne *corrumpas membra tua*; iam necessitas est a Deo; ergo quaelibet honesta ratio expediendi salutem; b) ex duobus malis physicis minus est eligendum.

§. 20.

Alter casus: in casu naufragii si plures insideant cymbae, quam ferre possit, an aliqui repelli queant? Affirmat auctor; secundum principia nostra haec lex, *ne occide*, est officium erga proximum; necessitas est a Deo; ergo quaelibet honesta ratio expediendi salutem; amare praeterea non magis teneor proximum, quam me ipsum, sed tamquam me ipsum.

Illud modo dubium, *quinam celere debeant*? Resp. in eius modis casibus quidem non locum fore diuturnae deliberationi; in thesi tamen, si dominus cymbae in cymba est, ad eius arbitrium rem redire volunt. Sed in casu necessitatis cessare dominium, ipse auctor paullo post affirmabit; hinc siue dominus adsit, siue non, iis, qui ultimi insilierunt, cedendum erit, quia prioribus iam ius quaesitum fuit per occupationem.

Dubitat TITIVS, *Obseru. 144. n. 2.* an talis casus existere possit, putat homines potius vna perituros, quam alios perdituros; sed quam necessitas omnem misericordiam excludat, stupendo exemplo septem Anglorum ostendit GROTIUS, *de iur. bell. et pac. II. 13.* quod defendit PUFENDORF, in *opere maiore II. 6. 3.*

§. 21.

Casus tertius: an, si duo in praesenti periculo sint, vni liceat sibi consulere alterius interitum? Contingere hoc potest 1. in naufragio, si alter nantem complectatur, vel si alter mecum tabulam adprehendat, quae duos ferre non possit; 2. in fuga, si quosdam excludamus; ne hostis simul in urbem penetret? Resp. in utroque casu quaelibet honesta ratio est expediendi salutem; priori enim casu necessitas est a Deo; posteriori a malitia hominum, iique me occidere intendunt. Sed posteriore casu probe considerandum, an non et hostes quidam admitti sine periculo possent. Apud CURIUM, *III. 16.* Darius fugiens consilio ministrorum pontes dissoluere noluit, dicens: se male insequentibus iter dare, quam auferre fugientibus.

§. 22.

An in fuga proterere possim obstantem? Resp. quaestionem non esse de fuga turpi, e. g. malefici, quem lictores persequuntur, sed de fuga necessaria; e. g. si armatus inermem adgrediatur; tunc qui obstat, 1. aut id facit ex malitia; tunc intendit mortem meam, ergo necessitas excusat; 2. aut obstat mihi ex impotentia, e. g. infans, claudus; tunc necessitas est a Deo, ergo et hoc casu locus est exceptioni necessitatis.

Exceptio est, si talis obstat, pro quo ipse vitam ponere teneor; limitatio quoque addenda, vt, si damnum dederim, illud pro virili refarciam.

§. 23.

An in casu necessitatis liceat alterius bonis inuito domino vti? Negat ALBERTI in *Compend iur. nat. part. II. cap. 2. §. 20-24.* quia sit furtum; sed haec petitio principii; furtum est contrectatio fraudulosa rei alienae, hic non est fraus; furtum sit lucrificandi causa, hic famis causa et ex necessitate.

Casus est, si 1. sine culpa quis 2. in eum statum devenierit, 3. vt pereundum sit, 4. nec aliud supersit medium expellendi famem, nec vllus misereatur famelici, an 5. tantum sumere possit, quantum necessitas praesens adsit, 6. sub proposito restituendi, si ita ferat occasio? e. g. si naufragi in terram peruenierint nudi et famelici, et nemo velit frustum panis dare.

Hoc casu quaestio affirmanda; 1. necessitas est a malitia hominum, ii volunt meum interitum; 2. si in casu necessitatis ne vitae quidem alterius parcere possum, multo minus ergo bonis.

Non ergo hac doctrina se excusare possunt fures, qui 1. sua culpa, 2. etiam sine necessitate, 3. aliis reiectis remediis, quibus famem expellere possent, 4. lucri faciendi causa, 5. sine proposito restituendi aliorum bona contrectant. GROT. II. 11. 6. SELDENVS, VI. 7. THOMAS. II. 2.

§. 24.

Ultimus casus: *an ad me conservandum aliorum res corrumpere possim?* e. g. proicio aliorum merces ex naui, vt leuetur navis; diruo alterius aedes ob incendium, vt mea intacta seruentur? Resp. necessitas vtrobique a Deo est, adeoque illa non habet legem; sed 1. periculum aliter effugi non posse, supponendum; 2. obstri-

Heineccii Prael. Pufendorf.

K

aus

ctus sum ad damnum refarciendum aequissima lege Rhodia de iactu: Ea in incendiis semper seruari nequit, quia incertum est, an illa domo non diruta, et illa fuisset incendio haud liberata.

CAPVT VI.

DE OFFICIO QVORVMLIBET ERGA QVOSLIBET, ET DE NON LAEDENDIS ALIIS.

§. I.

Proxima sunt officia erga alios, seu proximum, de quibus ab hoc sexto capite ad finem huius libelli agitur.

Vt vero de ordine constet, obseruandum, alia officia esse ABSOLUTA, quae cuiuslibet a quolibet debentur, sine respectu ad certum statum, vel institutum humanum; e. g. neminem occide; alia *hypothetica*, ad quae non obstringitur homo, nisi supponatur certus status, vel certum institutum humanum; e. g., Ne furare; haec enim lex non obligaret, nisi homines instituissent dominium; eo vero semel introducto, ius naturae vult, nos a furtis adstinere. Obseruandum hoc contra SALMASIVM, qui negat, furtum esse contra ius naturae, de *usur. libr. II. cap. 9.* et hinc ridet doctrinam ICTORVM §. 1. *Inst. de oblig. quae ex delict. nasc. L. 1. §. 3. D. de furt.*

Eius modi instituta humana potissimum sunt quatuor:

SERMO; verba enim non significant naturaliter, vt sibi persuaferat PLATO, sed ex impositione hominum; si enim naturaliter significarent, non posset vnum vocabulum in diuersis linguis res diuersas notare, quod tamen saepissime contingit: e. g. *Gibbel* Arab. significat *montem*, Germanice *culmen*. *Geber* Hebraice significat *fortis*, Germanice *donatorem*.

DOMINIUM; nam antea omnia erant communia, et dominium introductum est per occupationem tum demum quum res humano generi vniuerso non amplius sufficere viderentur.

REERV PRETIIVM; initio homines ignorabant nummi usum; sed omnia permutatione sibi adquirebant, quod apud antiquissimas gentes diu valuit. Sic Esauus primogeniturae ius Iacobo pro pulte turpiter vendidit, *Genes. XXV, 29. sequ.* Apud HOMER, *Iliad. 7.*

Inde

*Inde capillati sibi vina parare Pelasgi
Aere micantē alii, nitido pars altera ferro,
Pars bubulis tergis, ipsis plerique iuuenis,
Pars quoque mancipiis.*

Similia de veteribus Germanis refert TACITVS, *de moribus Germani*; et obfernatio sane elegans est MURETI, *Lect. var. X.* 3. omnia vocabula; quae Graece significant emere vendere, esse ab animalibus deriuata, c. g. ἔχοντες ἀπὸ τῶ ἄρου; ὀνείδου ἀπὸ τῶ ὄνου; πωλῆς ἀπὸ τῶ πώλης.

CIVITAS vel RES PVBLICA; omnes enim homines natura aequales et liberi; hinc inualuit imperium domesticum; denique integrae institutae sunt res publicae.

Omnia ergo officia, quae ex quatuor his institutis humanis fluunt, vocantur HYPOTHETICA; hinc agitur 1. *de officiis absolutis*, cap. 7. et 8. 2. *de officiis hypotheticis*, cap. 9. seqq. et quidem de iis, quae fluunt α) *ex sermone*, cap. 9-11. β) *dominio*, cap. 12-13. γ) *rerum pretio*, cap. 14. *ad finem libri I.* δ) *ex statu tum familiarum tum ciuitatis*, *toto libro II.*

Primo ergo *de ABSOLVTIS*, quae denuo duorum generum sunt; alia vocamus PERFECTA, quae admittunt coactionem, in statu naturali per bellum, in statu ciuili per iudicem, c. g. pacta seruare, debita soluere; IMPERFECTA, quae talem coactionem non admittunt, quamuis et ipsa omnino iure debeantur, c. g. eleemosynas dare, erranti viam monstrare.

Ratio, cur haec coactionem non admittant, illa admittant, haec est, 1. quia haec ex virtute profiscuntur, illa ex lege; lex gaudet facultate cogendi, virtus si coacta praestatur, virtus esse desinit; 2. quia illa ab vno tantum subiecto debentur, quo non praestante iure meo excido; haec ab omnibus promiscue recte petantur.

Iam agitur ergo primum 1. *de officiis ABSOLVTIS*, α) *de non laedendis aliis*, cap. 6. β) *de agnoscenda hominum aequalitate*, cap. 7. c) *de promiscuis officiis humanitatis exercendis*, cap. 8. 2. *de officiis HYPOTHETICIS*, cap. 9. seqq.

§. 2.

Absolutorum officiorum ergo primum omnium auctor statuit illud *de NON LAEDENDIS ALIIS*, quod denuo resoluitur in duo alia:

K 2

Neminem

Neminem laede, §. 2. 3.

Si laesisti, damnum refarci, §. 4-13.

Neminem esse laedendum, Auctor 1. ex suo principio socialitatis probat: quod eam destrui, est contra ius naturae: atqui societas non potest non destrui, si impune alter alterum laeserit; ergo est contra ius naturae; 2. ex facilitate huius officii; pleraque alia officia praestantur cum aliquo detrimento, hoc sine detrimento; 3. a communi hominum affectione; pauci a nobis quid praetendunt; at ne laedantur, a nobis omnes exigunt.

Sed debentur haec officia illis quoque, quibuscum non vivimus in societate. Itaque ex nostro principio ratiocinamur: homo hominem eodem prosequi tenetur amore, quo se ipsum prosequitur; inde fuit illud CHRISTI: *quod tibi non vis fieri, alteri ne feceris*; laedi ergo quum nolis, neminem laede.

§. 3.

Sed iam porro hoc officium explicandum: *Homo non est laedendus*. Laeditur homo vel

1. In substantia, et quidem a) corpore, per occisionem, vulnerationem; ergo inde fluunt leges: *Neminem occidito, mutilato, vulnerato*. Apud veteres extorres habebantur, qui homicidium admiserant, tamquam indigni societate humana. Cain *vnslætig, slüchtig*: idem apud Graecos; β) quoad animum; hinc leges: *Neminem corrumpito, nemini scandalum praebeto*.

2. In pudicitia; hinc leges: *Ne adulterium, ne stuprum, ne aliud huius modi probum committito*.

3. In honore; hinc leges: *Nemini honorem, quo dignus est, denegato, neminem iniuriis proscindito*.

4. In rebus et iuribus; hinc regulae: *Furtum ne admittito, neminis iura intercipito, suum cuique tribuito, falso testimonio neminem opprimito*; at ita tota tabula posterior decalogi est iuris naturae. Hinc Alexander Seuerus imp. apud LAMPRIDIVM supplicia infligebat cum elogio: *quod tibi non vis fieri, alteri ne feceris*.

§. 4.

Iam alterum officium: *si laeseris, damnum refarci*; hoc auctor probat §. 4. explicat §. 5. seqq. Probatio facilis est. 1. Eo amore prose-

prosequi tenemur proximum, quo nos ipsos; nos volumus nobis damnum ab alio datum refarciri; ergo et aliis refarcire debemus. 2. Sine quo aliud officium iam demonstratum esset frustraneum, illud omnino est necessarium: atqui sine restitutione damni officium, *neminem laedere*, est frustraneum; necessaria ergo est restitutio.

§. 5.

Quam ergo regulam de refarciendo damno antea probauimus, ea iam quoque explicanda erit, quod fit, dum auctor ostendit, *quid sit damnum*, §. 5-7. *quo modo illud refarciendum*, §. 8. *seqq.*

DAMNUM in iure Romano accipitur pro diminutione patrimonii; hinc quidquid non recipit certam aestimationem, non vindicatur lege Aquilia. Possum quidem agere serui vel ancillae occisae nomine, itemque ob pecudem, quadrupedem, omniaque quae in patrimonio sunt corrupta, sed agere non possum ex ea lege ob damnum inaeestimabile; ergo *damnum* ex iure Romano est quaelibet diminutio patrimonii nostri ab altero iniuria facta.

At in iure naturae latius accipitur vocabulum, comprehenditque omnem rei perfectio iure ad nos pertinentis corruptionem, diminutionemque nullo iure factam. Dicimus,

Rei perfectio iure ad nos pertinentis.) Nam si quis intercipit, vel interuertit, quod nobis iure perfectio non debetur, non videtur damnum fecisse; e. g. si quis nobiscum ambit officium idem publicum, et illud accipit, nos vero repulsam ferimus:

Nullo iure facta.) Nam qui suo iure utitur, nemini facit iniuriam; hinc damnum nobis datum vindicare non possumus, si quis hortum suum in horreum conuertit, atque ita indirecte subtrahit flores apibus vicini; iure enim suo usus est.

Ceterum hoc damnum *varii generis* est, tum *ratione NOCENTIS*; dum enim vel datur *dolo malo*, i. e. ex proposito nocendi, e. g. si quis lapidem in praetereuntem proiecerit; *culpa*, id est, ex negligentia et supina inaduertentia, e. g. si propositum quidem non habet, lapide aliquem ferendi, at lapidem tamen e fenestra mittit interdum in locum, ubi vulgo iter sit, et aliquem percutit; *casu*, si nec propositum, nec culpa concurrit, sed sola providentia diuina, cui resisti non potest, e. g. si tegula ex tecto nostro desuit.

Deinde damnum consistit *ratione obiecti* 1. partim in negatione eius, quod nobis iure perfectio debetur, e. g. si quis cui dene-

gat alimenta debita, fructus rerum suarum, vsuras, sortem; 2. partim in illatione detrimenti positiua, de qua §. sequ.

§. 6.

Damnum nobis posuine datur, quoties. quidquam, quod iure perfecto nostrum est, laeditur, siue aestimabile sit, siue inaeestimabile, v. c. si laeditur *animus*; e. g. scandalum; ita diabolus maximum damnum intulit protoplastis, dum iis persuasit esum fructus vetiti; *corpus*, e. g. vulnerando, mutilando; *libertas*, e. g. dum Iosephus a fratribus venditus; *res nostrae*, e. g. dum incenduntur aedes, fruges, arbores furtim caeduntur, siue fructus iam percepti, siue percipiendi sint, e. g. si quis fructus immaturos defecet, vel arboribus excutiat; *fama*, per calumnias, iniuriam; et quidem hic non modo ad factum respicitur, sed ad effectum seu consequentiam, e. g. Ariarathes a Romanis 30. talentis multatus, quod obstrueto Euphrate occasionem dederat, vt Cappadocia inundaretur. STRABO, libr. XII.

§. 7.

Denique *damnum* quis dat vel

1. *Per se*, si ipse actu physico ad id facinus concurrat; e. g. si quis ipse fruges nostras defecet;

2. *Per alios*, quoties actu physico quidem non concurrat, sed tamen simul causa moralis est a) *per iussum, consensum, patientiam*, e. g. si paterfamilias filium quid iubet facere, vel id facturo permittit, vel praefens id fieri patitur; b) *per participationem*, si partem lucri sibi capit, e. g. aliquis occasionem alteri furandi ostendit, sibi quae dimidium furti stipulatur.

Quaeritur, *an et iste ad resarciendum damnum obligatus sit, qui ex post facto demum consentit*; e. g. laudando facinus, vel illud ratum habendo? Resp. negando; obligatio enim resarciendi damnum ex duplici fundamento est, 1. quia aliquis est causa damni, 2. quia particeps est lucri; nemo enim debet cum alterius damno locupletior fieri. At si qui ex post facto demum consentit, is nec causa est, nec lucri factus particeps; ergo nec obligatus est ad resarciendum damnum.

Alia quaestio est, *an non hoc peccatum sit, et poena dignum?* id vero nemo negauerit; nemo enim sine peccato approbabit alterius peccatum; et nouimus, quam grauiter Deus animaduenerit in Eli; pou.

pontificem maximum Iudaeorum, qui sine nec auctor fuerat filiis, ut spoliarent, sacrificantes, nec eius lucri factus fuerat particeps, sed tamen eos non castigat, quum fama eorum scelera annunciet.

Et ita facile intelligimus locum Ciceronis ex *Philipp. II. quid interest inter suasorem facti, et probatorem? aut quid refert, uti voluerim fieri, an gaudeam factum?* id enim verum est, si de peccato quaeritur, non si de damni restitutione.

§. 8.

Haftenus de damno, quod refarciendum, iam regulae ipsae de damno refarciendo:

I. Qui est causa principalis, primo loco tenetur.

Ad poenam omnes tenentur, etiam, qui causa minus principalis fuit; sed ad restitutionem damni causa principalis, altera non nisi in subsidium; e. g. si pater iussit arbores caedere, filius paruit.

II. Plures via damnum dantes tenentur in solidum, vno vero solvente reliqui liberantur.

Ratio, quia laeso nihil debetur, quam quod amisit, hoc si semel recepit, plura frustra petit. Quod aliter se habet in poena, quam singuli debent, qui peccarunt, adeoque vno solvente, reliqui non liberantur. Distinguit auctor, an plures per conspiracyonem, an citra conspiracyonem vnum idemque facinus perpetrarent, additque, prior casu omnes soluere debere pro singulis, et singulos pro omnibus. Sed ad id et illi obstricti sunt, qui citra conspiracyonem damnum dederunt, adeoque haftenus nihil est differentiae; alia vero obseruanda regula:

III. Si plures citra conspiracyonem damnum dederunt, tunc aut diuiduum est factum, aut indiuiduum.

Si prius, quisque damnum a se datum pensat, e. g. Titius fores perfregit, Maevius fenestras. Sempronius fornacem, speculum, mensas, cet. sin postea, singuli tenentur in solidum, ita tamen, ut vno solvente, reliqui liberentur, e. g. si quatuor fregerint noctu fenestras, accurate distingui non potest, quot orbes vel rhombos quisque perfregerit, adeoque actus est indiuiduus. Idem obseruandum, si plures citra conspiracyonem hominem vulnerauerint, vnus gladio, alter fuste, tertius sclopeto vsus; tunc vulnera facile distinguuntur; secus, si singuli iisdem armis vsi sint.

§. 9. 10.

§. 9. 10.

Sed quum supra ostenderimus, non solum dolo, sed et culpa, et casu damnum dari posse, de his quoque obseruandae regulae:

III. Qui culpa sua, siue lata, siue leui, siue lenissima damnum dedit, ad restitutionem tenetur.

Est enim et is causa damni.

Quaeritur, *an haec distinctio culpaе solida sit?* reiecerunt eam aliqui, tamquam somnium Ictorum, et quidem vel ideo maxime, quod culpa mensuram non capiat. Sed resp. vel ideo tres sunt gradus, quia mensuram non recipit. Vid. *TITII Obseru.* 164. Omnes res morales habent duo extrema, et medium inter extrema; e. g. vnum extremum est primo negligentia nimis supina, qualis dissolutorum hominum; alterum est nimia et misera diligentia, qualis est Euclionum; tertium media inter haec extrema est diligentia, qualis est patrumfamilias frugalium; ergo est triplex culpa.

Ceterum & culpa sua datum damnum resarcire debet, 1. si lex prohibet eiusmodi damnum; 2. si obstrictus sit ad diligentiam; ergo non tenetur, qui in vicinia audiens strepitum lecto non surrexit, adeoque furtum non prohibuit; 3. si laesus vel directe, vel indirecte non consenserit; indirecte consentit, qui ipse tale quid agit, ex quo damnum consequi necesse est, e. g. pugnam moues, et plagam accipis. Huc pertinet casus Henrici II. Galliae regis, qui ad pugnam equestrem prouocans Comitem de Montgomery periit in illo hastiludio. *THUANVS, libr. XXII. ad annum 1559.* 4. Si damnum culpa datur in magna animi perturbatione, quae omnem diligentiam excludit, restitutio peti non potest, nisi culpa praecesserit; e. g. iniuste quis alterum adgreditur in alieno cubiculo, hic se defendit, et inter pugnandum frangit speculum aliquod pretiosum; hic nulla praecedente culpa ad resarciendum damnum non tenetur; hic ipse, qui speculum confregit, pugnam mouerit, ob culpam antecedentem tenetur; supra enim diximus, obligationem ad resarciendum damnum oriri vel ex eo, quod quis causa fuerit, vel particeps factus sit lucri; neutrum adest priore casu. Elegans exemplum apud AELIANVM, *Histor. var. III. 44.* adolescens, qui socium defensurus in ipsum socium enssem impulit; consultum ea de re oraculum respondit:

*Defendens socium, verso mucrone, necasti:
Adiutans socium perimis; nil polluit ista*

Purior;

Purior es, manibus nunc, quam prius esse solebas.

Te caedes, manibus mage purum, ac ante solebas.

V. Damnum casu datum nemo reparat,

quia caussa non est. Addunt quidem nonnulli limitationem, *nisi culpa accedat*; sed haec ridicula; culpa enim accedente non amplius est casus.

§. 11.

Paragraphis insequentibus auctor agit tum *de noxali actione* §.

11. tum *de actione*, si quadrupes pauperiem fecisse dicatur §. 12. Quum enim supra monuisset, damnum dare quem posse vel per se, vel per alium; ad hunc pertinet quaestio: *quid iuris sit, si servus animalis nostrum alterum laeserit.*

Hoc casu iure Romano agere possumus aduersus dominum, vt damnum refarciat, aut servum noxae det, quod etiam eo casu ob-
tinebat, si filius familias nocuisset, §. *ult. Inst. de noxal. act.*

Iam quaerit auctor, *an hoc iuris naturae sit?* idque affirmat, quia servus naturaliter debeat damnum refarcire, et tamen nihil habeat proprii; hinc dominum aut pro eo solvere debere, aut corpus noxae dare.

TITIVS, *Off.* 169. aliter rem explicat; servus, inquit, si dominum non haberet, a me posset occupari pro damno, quod refarcire non potest; at dominus non potuit constitui in praedudicium nostrum; ergo etiam occupari potest; aut, si dominus id nolit: pro eo soluat oportet.

Sed frustraneae sunt illae ratiocinationes; si enim quaeritur, *an noxales actiones sint iuris naturae praeceptum?* id quisque negaverit; hinc et apud multas gentes non in usu fuerunt actiones noxales: fin de iure naturae permissu dicitur, et quaeritur, concedimus id permittere, vt servi delinquentes noxae dentur, sed non ob rationes adhuc allatas; verum ideo, quia dominus omnem utilitatem ex servo capit, adeoque merito et incommodum fert, ac proinde aut pro eo soluat, aut eum noxae det.

Ceterum distinguendi casus, 1. si dominus instigavit, ipse directe tenetur; 2. si tertius instigavit, hic itidem directe tenetur; 3. si ipse laesus servum incitavit, satisfactio plane cessat; ideoque vnus su-
permanet casus, 4. si servus proprio motu alicui nocuerit.

§. 12.

Iam ergo facillime etiam deciditur quaestio de *animalium pauperie*; totam hanc quaestionem ex iure Romano esse, argumento est; 1. quod distinguitur iure illo, sitne quadrupes pecus, nec ne? 2. quod quaeratur, an contra naturam sui generis nocuerit? 3. quod non omnes gentes id ius receperint. Hebraei eius modi animal lapidibus obruebant; Saxones expelli iubent a domino, aut noxam sarciri, GROT. de iur. bell. et pac. II. 17. 21. Interim facile largimur, non repugnare hanc dispositionem iuri naturae, ob eandem rationem, quam paragrafo superiore ostendimus, adeoque esse iuris naturae permissui.

Ceterum iidem casus distinguendi, quos superiore paragrafo recensuimus; nec hoc ius pertinet ad casus, si 1. vel dominus, 2. tertius, vel 3. ipse laesus animal irritarit, sed 4. eo tantum casu datur actio de pauperie, si animal motu proprio damnum dederit, e. g. si bos cornu petierit, equus calce quem percusserit, cet.

§. 13.

Denique disquirat auctor, *quousque quis ad damnum resarciendum teneatur*? Resp. 1. si damnum est aestimabile, tantum praestandum, quantum nocitum; e. g. si quis abstulit centum, centum restituit; 2. si damnum est inaeestimabile, tantum restituit, quantum potest; e. g. si quis vulneravit hominem, vel manu mutilavit, non potest quidem manum reddere, sed tamen soluet solstrum, operas cessantes. In Germania etiam pro dolore aliquid adjudicatur. 3. Damnum non resarciendum cum proposito nocendi; e. g. Nicephorus Imperator abduxerat Zoen, alienam vxorem, pro eaque offerebat marito praedia pinguissima; id absurdum; ita enim continuatur damnum; ergo omni momento noua debetur satisfactio; 4. laedentem ergo debet poenitere, et facti veniam petere, si ex malitia damnum datum; contra 5. laesum ad id promptum esse ac paratum; alias enim damnum resarciretur cum proposito peccandi contra regulam tertiam. TITIVS quidem putat, hoc generositatis tantum esse, sed non iuris praeceptiui, ac proinde in foro humano non obseruari; sed erroris is fons est, quod putat, ius naturae tantum dirigere actiones externas, ad interiora non pertinere; quod et PVFENDORFFIVS statuit in praefat.

Sed id falsissimum sequentes ob rationes. 1. Auctor iuris naturae

turae est Deus, qui non respicit ad externa tantum, sed ad animum praecipue ; 2. principium est amor, qui in corde residet, non solum verbis, sed et actionibus sese exserit ; 3. quia ipsi gentiles agnouerunt, per solas actiones externas iuri naturae non satisfieri, sed Deo esse offerendum :

*Compositum ius, fasque animi, sanctosque recessus
Mentis, et incoltum generoso pectus honesto.*

Hoc nomine libellum Pufendorffianum reprehendit inprimis LEIBNITIVS in *Epist. ad virum quemdam doctum*, edita a BOEHMER. in *Programmat. III. disputat. Pufendorff. praemiss. pag. 44.*

C A P V T VII.

DE AGNOSCENDA NATVRALI HOMINVM AEQVALITATE.

§. 1.

QVemadmodum infimus gradus amoris erga proximum est, *ne minem laedere* : ita proximus est, si alios homines nobis aequales agnoscamus.

Esse hoc praeceptum iuris naturae, facile probatur ; eius principium si statuamus 1. societatem humanam ; inter socios sane est aequalitas, habent enim communem finem ; 2. sin amorem pro fundamento ponimus, is aut venerationis est, aut benevolentiae, aut amicitiae : non venerationis, quia homo ab homine non pendet ; nec benevolentiae, ob eandem rationem ; ergo amicitiae ; is vero semper ponit aequalitatem ; 3. hoc etiam ita cordi inscriptum observat auctor, ut statim homo laesus conqueratur : utique non canis sum, sed aequae homo, ac tu.

Iam dispiciendum, 1. *qua in re consistat ea aequalitas* ? §. 2. 2. *quae officia inde consequantur* §. 3. ad fin.

§. 2.

Sed iam explicanda vterius haec aequalitas : videmus, *statum hominis duplicem* esse ; alterum 1. *naturalem*, in quo natura vivimus,

mus, quemque non primum elegimus ; 2. *aduentitium*, quem ipsi adoptauimus, vel qui per legem, aut per pactum nobis est impositus ; e. g. coniugalem, herilem, civilem. In posteriore maxima est inaequalitas ; maritus e. g. superior est vxore, herus seruo, imperans ciue : quin inter ciues magna differentia et inaequalitas, e. g. alii nobiles, alii plebei.

Iam facile patet, nos de posteriore non loqui, sed de priore ; vnde et in rubrica additum : *de naturali hominum aequalitate agnoscenda*. Probandum ergo, talem aequalitatem inter homines esse ; auctor sublesta habet argumenta, 1. *ob aequalitatem virium* ; sed hoc non est aequalitatis fundamentum ; alias et bruta quaedam pro aequalibus agnoscere tenerer, quae est philosophia HOBBSII, *de ciue*, l. 3. 2. *ab inaequalitate dotium naturae et fortunae* ; sed non sequitur, homines intuitu harum sunt inaequales, ergo quoad reliqua aequales ; 3. *ab obligationis aequalitate* ; ego volo viuere socialiter, alii id etiam volunt ; ergo sumus aequales ; nam a) est circulus ; obligationis enim illius et fundamentum, et effectum statuit aequalitatem ; b) probat hoc quidem aequalitatem voluntatis, non vero naturae.

Hinc praecipua argumenta sunt ; 1. quia eadem omnium hominum partes essentiales ; 2. eadem omnium origo ; 3. eadem infirmitates ; 4. eadem fata ; omnes orimur, morimur ; 5. si iungimus historiam, etiam ex eadem nos omnes massa esse cognoscimus, adeoque cognatos, quod et Stoici, et ICI pagani agnouerunt. L. 4. D. *de iustis. et iur.*

§. 3.

Iam 2. de officiis, quae ex hac naturali aequalitate fluunt :

1. *Qui alios sibi utiles fieri cupiunt, et iis vicissim utiles esse studeant.*

Aequalium enim aequalis obligatio est, agimus enim hic de officiis perfectis ; eorum haec natura est, vt retributionem exigant, quum imperfecta non perfecte obligent ad retributionem, sed ad gratitudinem ; e. g. non ideo ab altero exigo elemosynam, quia ipse dedi, sed gratitudinem tantum : attamen et retributio non semper exigit identitatem, sed aequalitatem ; e. g. si faber aedificat aedes meas, non ideo teneor aedificare aedes fabri.

II. *Nemo in pari causa sibi debet praecipuum vindicare.*

Aequalium enim aequalis est dignitas, aequale ius ; hinc e. g. cx

ex duobus fratribus neuter potest plus ex hereditate paterna petere. Interim hoc mutari potest per leges civiles, quae saepe rei publicae causa inaequalitatem inter homines introducunt, qui alias natura aequales sunt; aliquando et ipsi homines pacto aequalitatem tollunt; e. g. legibus Danicis cautum, ut fratres prae sororibus accipiant duplicem portionem hereditatis; in familiis Principum introductum ius primogeniturae.

§. 4.

Maxime in rebus indiuiduis alicui quaedam praerogatiua concedi solet; quamvis enim certissima sit regula:

III. Inter aequales res aequaliter distribuenda est, propter regulam 2.

Haec tamen regula patitur exceptionem in rebus indiuiduis, quae vel a) communes sunt et manent; sic inter Duces Brunsvicenses communes sunt aliquot metallifodinae, sylvae, academia Iulia; in domo Saxonica, archium; in linea Ernestina, academia Ienensis; ß) alternatiue conceduntur, apud Heluetios *die Bevoigtigung der Italienischen und anderer conquestirten Lander*; γ) res sorte diuidendae.

§. 5.

Haec officiorum praestatio constituit certam virtutem, *generositatem*; eorumque omissio incidit in vitium, quod *superbia* vocatur. Auctor prius agit de vitio, tum de virtute, contra naturam bonae methodi; virtutem enim prius cognoscere debemus, quam cognoscamus vitium, quippe quod in declinatione a virtute consistit. Sequor tamen ordinem auctoris; quia Deus vult, ut vera bona sectemur ac amemus, omnes res iusto pretio aestimandae sunt; quumque et nos amare teneamur, sequitur, ut et nos iusto pretio aestimemus, id si facimus, generosi vocamur; est ergo *generositas* iusta sui aestimatio; huic opponitur *superbia*, quae est iniusta et immodica sui aestimatio; haec sese exferit, α) in arrogantiā, si quis se sine ratione aliis praefert, et de facultatibus suis amplius, quam in iis est, sperat; ß) si imperium in aequales affectat; γ) si ex hac imperandi cupiditate sese immiscet rebus alienis. Caesareo-papatus; δ) si omnes alios contemnit, eorum dotes ac merita deprimit, solum se sapere putans, ceteros volitare velut umbras. Characteres superbiorum sunt, i. quod omnium odium in-

currant; 2. quod semper stultitiam prodant; omnis enim superbus est stultus, et omni stultus est superbus; 3. quod litigiosi et iniurii in alios.

§. 6.

Hinc facile intelligitur, qualem se gerat; quales characteres prae se ferat *generosus*; 1. nullam enim praerogativam iniuste prae aliis affectat; 2. veram praerogativam in virtute ponit, et hac sola prae aequalibus excellere studet. Hinc notanda Atheniensium infamia, qui ne eos quidem in ciuitate ferebant, qui virtute excellebant, eosque ostracismo vrbe expellebant; 3. fortuna ac sorte sua contentus, spartam, quam nactus est, ornare laborat. Hinc elegans Epaminondae dictum, qui quum Demarchus fieret, idque officium parum aestimaretur, sese operam daturum dixit, vt hoc in posterum honorabilius habeatur; 4. vt nihil agat, statu suo indignum, neminem contemnat, neminem iniuria adsciat, nemini aduleatur: at omnes beneficiis sibi deuincire studeat; 5. vt aliorum iniquitatem generoso contemtu vindicet. Exemplum generosi principis ostendere voluit XENOPHON in *Cyropaedia*, cuius auctoris finis et scopus ostenditur.

CAPUT VIII.

DE PROMISCVIS OFFICIIS HVMANITATIS.

§. I.

Diximus adhuc de officiis absolutis perfectis; sequuntur IMPERFECTA, quae quidem etiam, vt supra diximus, debentur, sed coactionem tamen minime admittunt.

Ea differunt a perfectis multifariam: nam 1. perfecta possunt esse vel affirmatiua, vel negatiua; e. g. neminem laedere, alios aequales agnosce. Imperfecta omnia ad affirmatiua sunt; 2. perfecta sunt ex lege proprie sic dicta; imperfecta ex virtute; 3. ad illa quis potest cogi, ad haec non potest; 4. qui illa non praestat, est iniustus, qui haec denegat, inhumanus vocatur; 5. illa semper sunt mutua et reciproca; haec non sunt semper; sic princeps dat beneficia, sed talia non exspectat.

Fluere

Fluere haec officia ex principio iuris naturae, ita demonstramus; ex fine Dei tenemur ad amorem proximi; quem amamus, eius commoda pro virili promouere studemus; in commodis alienis promouendis consistunt officia humanitatis; sumus ergo ad ea ex fine Dei obligati.

Vnum addimus: ex officiis imperfectis aliquando fieri posse perfecta; 1. si casus necessitatis incidat; 2. si in statu ciuili Imperantes talia officia legibus praecipiant.

Ceterum ea vel a) INDEFINITA sunt, quae respectu ad certam personam promiscue omnibus praestantur, aut offeruntur saltim, §. 2. 3. b) DEFINITA, quae tantum certis personis, earumque intuitu praestamus, eaque 1. vel *sine detrimento*, quae vocantur officia innoxiae vtilitatis, §. 4. 2. vel *cum detrimento* quodam exhibentur; §. 5. ad fin.

§. 2.

Officia humanitatis in eo consistunt, quod *quilibet teneatur operam dare, ut publico prosit*. Quam enim 1. alios amare debeamus; tamquam nos ipsos, nos vero nobis modis omnibus prodesse studemus, nostrum quoque est, aliis prodesse. 2. In philosophia morali demonstratur, bonum communionis praefendum esse bono proprio: bonum communionis est, quod toti humano generi; vel multis prodest; ergo id bono proprio praefendum, ad illudque sumus obligati.

Peccant ergo contra hoc officium 1. qui data opera obbrutescunt, et nec corpus, nec animam excolunt, qua de re supra cap. 4. diximus; 2. qui nullum vitae genus eligunt, aut 3. si elegerunt, otio torpent, genioque indulgent. Hos recte SALLVST. *Bell. Catilin.* cap. 1. *viam transigere*, ait, *veluti pecora*. Obiiciunt, *se opibus satis instructos esse, ut non necesse sit aliquo officio vel opificio vitam parare?* Resp. non nobis solis nati sumus, sed et proximo; non solos nos amare tenemur, sed et proximum tamquam nos ipsos; 4. qui vitae genus quidem eligunt, sed turpe, et humano generi noxiam, veluti fures, raptores, ludiones, cet. Hinc recte Aegyptii quotannis explorabant, vnde quisque viveret, eumque multabant, qui hoc indicare non posset. DIOD. SICVL. I. 77.

§. 3.

Iam ad officia *indefinita*: haec auctor ex superioribus elicit; si enim publico prodesse teneamur, alii quoque tenentur nos profuturos non impedire, hinc regula:

Nemo alios humano generi profuturos impediat.

At obseruandum tamen, vere utile esse debere institutum, ad quod pertinet regula haecenus explicata, adeoque praetendere neminem posse, 1. vt promoueamus instituta manifesto noxia, e. g. furta, seditiones; 2. vt instituta dubii vsus promoueamus; e. g. alchymiam. Vid. BVDDI *Diss. an alchymistae in re publica sint tolerandi.*

Peccant homines contra hanc regulam saepius: a) *ex superstitione*; si multi alios utilissimas doctrinas proposituros impediunt, quia eas putant religioni contrarias; id priusquam liquido demonstrari possit, neminem mouere decet. Exemplum PVFENDORFFII; eadem obiecta sunt ipsi Seruatori; β) *ex ignorantia*; damnant doctrinam, quia non intelligunt, ac proinde anguem in herba latitare putant; sic Professor quidam refutare volebat Galilaeum a Galilaeis, cuius ipse librum numquam viderat; γ) *ex inuidia*; nihil enim ferre possunt, quo alii prae se excellent; ita inuidia sophistarum Socratem oppressit; δ) *ex auaritia*, quae cum inuidia coniuncta; elegans exemplum Demetrii.

§. 4.

Haec officia indefinita; sequuntur DEFINITA, et primo ea quidem, quae sine detrimento praestantur, vocanturque ideo officia innoxiae utilitatis; de his auctor tradit regulam:

Ille summe inhumanus est, qui alteri denegat officia, quae sine villo detrimento praestantur.

Quum enim aliis prodesse teneamur, etiam cum detrimento ex lege amoris, quanto magis sine detrimento? Vnde etiam Doctores inculcare solent axioma: *Quod tibi non nocet, et alteri prodest, ad id es obligatus*; e. g. lumen a tuo lumine accendere pati; erranti monstrare viam; salutantem comiter resalutare.

Ex eo sequitur, 1. inutilia rei publicae membra esse, qui haec denegant officia; quid enim sperare possum ab iis, qui mihi ne quidem sine detrimento prodesse volunt? 2. non esse perdenda, quibus ipsi non indigemus; e. g. si quis proliceret in flumen, quod

quod prodesse adhuc pauperibus posset; 3. non esse occulta, quae nobis non prosunt, et aliis prodesse possint; absurditas heredum Aristotelis, qui defodiebant eius bibliothecam, ne Attalus eam peteret; tales sunt similes cani incumbenti paleae, et alios eius vsu prohibenti.

Sed addendum, hanc regulam tantum valere 1. in statu ordinario, et in pace; nam hostis ab hoste eius modi officia poscere non potest, quia ita nobis non forent innoxia, e. g. hostis potius flammis absumet commeatum, et tormenta perdet, quam vt ea relinquat hosti; 2. si ipse eius modi rebus non indigeam; e. g. alios aquam patior ex puteo meo haurire; at si ea esset aquae penuria, vt ipse indigeam, merito alios putei vsu excluderem; teneor enim alios amare tamquam me ipsum, non magis quam me ipsum.

Hinc facile iudicari potest de officiis humanitatis inter gentes, quae nimis extendit GROTIUS.

Sic *libr. I. cap. 2. §. 13.* quaerit, an *gens genti teneatur transitum per territorium suum concedere?* idque affirmat, si iusta causa adsit, quarum tres recenset: a) si populus expulsum regione sedes nouas quaerit; b) si gens cum gente externa commercia velit instituere; c) si iustam bellandi causam habeat, et aliter ad hostem peruenire non possit, quam terras nostras transeundo. Sed raro eius modi transitus est innoxius, non modo ob periculum a transeuntibus imminens, sed et ob tertium, qui hoc ipso laeditur. Hinc primo et secundo casu distinguendum, vtrum imbelles transire velint, 1. an armati, e. g. olim Cimbri; 2. an ius quaesitum habeamus, nec ne. Tertio casu vero numquam fere innoxius est transitus, quia eundem etiam hosti denegare non possumus, et prostratis transeuntibus hostis vltionem capiet; quid Holfatiae contigerit, adhuc in recenti memoria est.

Tales etiam sunt reliquae quaestiones a GROTIO motae, an *merces extraneas per territorium nostrum duci pati debeamus? an teneamur suscipere aduenas? an mercibus transitis vestigalia imponere possimus?* semper enim dispiciendum, an eius modi officia vere sint innoxia.

§. 5.

Haec de officiis, quae sine nostro detrimento praestantur: proxima sunt, quae sine detrimento aliquo praestari nequeunt; talia sunt *Beneficentia §. 5. Gratitude §. 6-8.*

Heineccii Prael. Pufendorf,

M

Be:

Beneficentia est virtus, qua opis nostrae indigis beneficia cum ratione adhibemus.

Per *beneficia* autem intelligimus quaevis commoda, quae alteri sine spe restitutionis praestantur. Itaque

1. Beneficia debent ex virtute proficisci; ergo beneficia ex prodigalitate, ambitione, aliisque eius modi causis exhibita, id nomen non merentur.

2. Beneficia debent praestari indigis; ergo hamata sunt, quae opulentis exhibentur. Alexandro Corinthii ius civitatis donabant; ridebat Alexander beneficium; tunc legati: atqui hoc nemini dedimus, praeterquam Herculi, et tibi. *SENEC. de benef. l. 13.*

3. Non ergo sunt beneficia, quae cum alterius indigentia non conveniunt; ita beneficium non foret, si quis ad furcam damnato nobilitatem, famelico gemmam, siti exarescenti vestem pretiosam offerret. Hinc ex hoc quoque capite absurdum erat, Corinthios offerre Regi ius civitatis; beneficia praestanda cum ratione. Itaque

4. Inter pariter indigos parentes cognatis, hi extraneis, inter hos amici aliis praefereendi. Ita Aeneas patrem ex Troia exportabat humeris, quamvis plures procul dubio ea ope indiguissent.

5. Si indigni petant beneficium, ii quidem non praefereendi dignioribus: at nec sic plane deferendi, modo nostris beneficiis eos non reddamus deteriores. Absurdum esset, homini bibaci donare cupam vini. Eleganter philosophus apud *DIOG. LAERTIUM, libr. V.* reprehensus, quod homini improbo stipem dedit; non mores, inquit, sed hominem miseratus sum.

6. Beneficia debent alteri commodum praebere; quidam servatus a Caesaris amico inter proscriptos, at deinde perpetuo circumductus ostentationis causa: *nihil tibi, inquit, debeo, si servasti, ut haberes, quem ostenderes.* *SENEC. de benef. l. 3.*

7. Non debent beneficia, quae proximo praestantur, facultates nostras superare. *PLIN. Panegy. cap. 38. profusio, et quidquid potius, quam liberalitas est, cui ratio non constat.*

8. Quum beneficia sine spe restitutionis praestanda sint; pro beneficiis non habentur hamata, captationes. *THOMAS. de iniusto iure hereditarum.*

9. Beneficia praestanda animo hilari, benevolo, celeri; bis dat, qui cito dat, nec beneficium reputabitur aureus in oculum proiectus,

§. 6.

Alterum officium, quod cum detrimento aliquo coniunctum; est ex mente auctoris GRATITVDO. Sed id non semper verum.

Gratitudo est virtus, qua is, qui beneficia accepit, benefactori fauet, eique quauis occasione paria reddere studet. Ergo 1. praestatur *animo*; quando benefactorem amamus, eique paria reddere studemus, quamuis non semper sit occasio; et hoc fit sine detrimento nostro; 2. *verbis*; quando benefactorem laudamus, eius beneficia celebramus, gratias agimus; id quoque sine detrimento praestamus; 3. *re ipsa*; quando gratias referimus, quin cum foenore; et de hoc dici potest, quod sine detrimento aliquo praestari non possit. Sic gratus erat Aristoteles, quando Nicomachi, a quo educatus erat, filium iterum instituit.

Ex definitione vero patet, 1. gratitudinem praesupponere beneficia, adeoque illum frustra praetendere gratitudinem, qui quid facit, vt aegre alicui faceret; e. g. fratres Iosephi non poterant postulare, vt Iosephus sibi gratiam referret, quia causa fuerint, cur factus sit pro-rex Aegypti. PHAEDR. *Fabul. I. 23.* 2. gratitudinem non requirere identitatem beneficiorum, sed qualicumque praestari possunt, alias non esset beneficium, sed creditum; non gratitudo, sed retributio.

§. 7.

Iam facile demonstratur, obstrictum esse vnumquemque ad hoc officium: nam 1. amantem debemus redamare; ille est hominum humanissimus, qui ne beneficiis quidem conciliari potest; 2. is, qui vobis bene facit, intentionem habet, sibi nos conciliandi; ego; dum accipio, consentio in hanc intentionem benefactoris; teneor ergo re ipsa ostendere, me illi conciliatum esse; 3. ab absurdo; si nulla ad gratitudinem obligatio est, ius naturae me iuberet proicere et temere iactare meum, quod absurdum; 4. quin et effectus admodum tristis futurus esset, si nulla esset ad gratitudinem obligatio; quis enim tam stolidus esset, vt alicui beneficeret? cessaret itaque beneficentia inter homines.

§. 8.

Gratitudo opponitur INGRATITVDINI, quae est vitium; quo quis beneficia male rependit; id fit dupliciter: *negatiue*, quando bene-

factori non benefacimus; ea vocatur *SIMPLEX*; 2. *positivae*; quando ei quasvis iniurias exhibemus, et haec dicitur *ATROX*, vel *PRÆGNANS*; Ciceronem occidebat miles, quem in causa criminali defenderat. Prior ingratitudo repugnat virtuti, posterior ipsis legibus. Quum enim nemini sit aegre faciendum, nemo laedendus: dupliciter procul dubio peccat, qui benefactorem laedit.

Hinc facile solvuntur quaestiones: 1. *An ingratitudo sit iniustitia?* Respondet auctor, in animo ingrato in se nulla est iniuria; ratio eius est, quia ad eam nemo perfecte obligatur; praestantur enim beneficia sine spe retributionis; sed tamen distinguatur inter simplicem et atrocem vel praegnantem; haec omnino iustitiae repugnat, quia repugnaret, si etiam alii, qui nobis nihil boni praestitit, aegre faceremus. Accedit, quod erga quasdam personas etiam leges gratitudinem praecipiant, e. g. erga parentes, patronos; iniustus vero est, qui legibus non pareat.

2. *An deatur actio ingrati?* Multis hanc quaestionem tractant *SENECA. de benef. VII.* *BOECLER. de actione ingrati?* Idque plerique negant; ergo distingue denuo ingratitudinem simplicem, et atrocem: illa non dabit actionem, quia est officium imperfectum, gratum esse; haec dabit, maxime si legibus praecepta. Sic e. g. leges civiles dant actionem adversus liberos alimenta denegantes; ea est ex ingratitudine; eadem dant actionem adversus libertum ingratum, ut reuocetur in servitutem. Quin et simplex, si legibus praecepta, dat actionem, e. g. si quis patrem senem et indigum domum suam recipere nolit. Conf. *THOMAS. Iuris prudent. divin. II. 6. 23.*

CAPUT VIII.

DE OFFICIO PACISCENTIVM.

§. I.

VT de connexionem constet, sciendum est, pertractatis adhuc officiis absolutis, tam perfectis, quam imperfectis, sequi debere officia *HYPOTHETICA*. Sed intermiscuit auctor doctrinam *de pactis*, quia

quia officia hypothetica supponunt instituta humana, sermonem, dominium, rerum pretium, et rem publicam. Haec auctor omnia pactis introducta censet. Negat equidem TITIVS, verum id esse, quia numquam homines conuenerint, ut sermonem, dominium, cet. introducerent, sed haec omnia ex consuetudine esse contendit. Verum haec non repugnant; primi, qui haec inuexerant, mortales non aliter id facere potuerunt, quam per pacta, e. g. conuenire debuit inter protoplastas, quod velint hoc animal bouem, illud felle, istud camelum appellare; conuenire debuit inter familiam, quod quisque occupaturus sit, id in eius dominio fore, cet. id vero postea alii probarunt et imitati sunt, itaque ita res abiit in consuetudinem.

Quidquid sit de connexione, vtilissimum sane est hoc caput, quia pactis fere totum humanum genus conseruatur, quibus sublati et fides, et iustitia collabasceret; de iis itaque dispiciendum. 1. *quam obligationem producant?* §. 2-4. 2. *quotuplicia sint?* §. 5-7. 3. *quodnam requisitum eorum primum?* §. 8-19. 4. *quomodo pacisci possimus?* §. 20-22.

§. 2.

Quaeritur, *quam obligationem pacta producant?* ad id vero respondere non licet, nisi pactorum praemittamus definitionem.

Pactum igitur est duorum pluriumue in idem placitum consensus, obligationis vel introducendae, vel soluendae, vel utriusque causa initus.

Est consensus.) Quidquid agimus, agimus vel imperio legis, vel sponte, seu libere; sponte quod agimus, agimus volentes; ergo si vult alter, ut agamus aliquid, ad id non tenemur, nisi et nos velimus; quod duo volunt, est consensus; ergo pactum est consensus.

Duorum vel plurium.) Possunt enim innumeri pacisci; e. g. tota res publica pacto continetur.

Obligationis vel introducendae.) Omne enim pactum aut est obligatorium, e. g. si quis alteri promittit certum; aut liberatorium, si debitum remittit; aut mixtum, si transigit; adeoque pro vetere obligatione nouam introducit.

Iam facile intelligitur, 1. *cur pacta inter homines necessaria sint;* 2. *quam obligationem producant.*

1. *Necessaria fuerunt;* quia a) officia humanitatis nullam admittunt coactionem, adeoque certus esse non possum, alterum mihi ea

praestitutum; opus ergo est pactis, quibus alter ad ea mihi praestanda deuincitur, e. g. indiget aliquis pecunia, eam pauci praestituri essent ex sola humanitate, itaque eam mihi stipulari cogor; b) saepe indigeo rebus alienis; eas nec lex, nec princeps domino eripere potest; si ergo mihi praestandae sunt, opus mihi est domini consensu, adeoque pacto; c) saepe amicitia et pax inter homines interrumpitur; in bello nihil hostis hosti humanitatis exhibet; opus ergo est pactis, quibus pax et amicitia reparatur.

Eleganter ISOCRATES aduersus Callimachum: *in soderibus et pactis tanta vis est, ut pleraeque res tum Graecorum, tum barbarorum ex pactis et conuentis transigantur. His enim freti conuenimus, et commercia agimus, per haec inter nos contrahimus, per haec cum priuatis inimicitias, tum communia bella deponimus, hoc vno tamquam communi bono homines vii non desistimus.*

§. 3. 4.

Nec difficile iam erit demonstrare,

II. *Pacta obligationem perfectam producere, vel necessario seruanda esse.*

1. Exigit id socialitas, quam auctor pro principio adsumit, nam illa pactis coalescit, et tam diu durat, quamdiu pacta seruantur; dissoluitur vero, simulac a pactis disceditur: hinc CICERO ostendit, etiam latronum societatem consistere non posse, nisi pacta seruentur; 2. sin principium amoris supponamus, illud exigit, ut alios amemus tamquam nos ipsos; ergo, quod nobis fieri volumus, et alteri facere debemus: iam nihil magis dolemus, quam ubi pacta nobis non seruantur; ergo nec nos ea violare debemus.

Notum est, Romanos pactis non tribuere obligationem civilem, indeque prouenientem actionem: vnde quaeri potest, *an idem ius naturae statuat?* CONNANVS *Commentar. iur. civil. libr. V. cap. 1.* id demonstrare conatur, sequentibus vsus argumentis, a) culpam esse, credere promittenti sine causa; promittere cum causa, esse contrahere; culpam ergo esse, non contrahere, sed solo pacto confidere; b) pacta saepe ex ostentatione proficisci:

Regia, crede mihi, res est, promittere multa;

Fortunis ergo hominum imminere periculum, si pactis obligatio perfecta tribuatur; c) nihil relinqui liberalitati, si pacta omnia necessario seruanda.

Sed

Sed respondetur, 1. *CONNANVM* ulterius progredi, quam *ICtos Romanos*; hi enim pactis tantum obligationem civilem negabant, et concedebant, pacta obligare naturaliter; at hic ne naturalem quidem obligationem relinquit; 2. omnia *CONNANI* argumenta esse friuola: a) culpa est, fidere homini sine causa pollicenti, sed multo maior culpa, immo dolus, promittere, quae praestare nolis; illa est imprudentia, haec perfidia. An ius naturae dolo adsistat? hoc contradictionem in adiecto inuolueret; b) ostentationis causa promittere, quae praestare nolis, est dolus, adeoque et hic respondendum, quod ad argumentum primum. Nec obstat, periculum inde imminere fortunis; hoc enim non est ab eo, cui promissum, sed ab ipso promittente; damnum, quod quis sua culpa sentit, sentire non videtur; c) liberalitati tantumdem relinquitur, quantum relinquendum est ex mente *CONNANI*, si pacta non obligarent. Nam 1. etiamsi valida sunt pacta, tamen et sine pacto possum donare, beneficia praestare, et alteri quaevis officia humanitatis exhibere, 2. potius dicendum, liberalitati nihil relictum iri, si pacta non obligarent; nam qui ne ea quidem praestanda praestat, quae promisit, quomodo praestiturus est, ad quae ex promisso non tenetur; 3. hanc doctrinam vere tollere omnem fidem humanam; nam *fides est*, inquit *CICERO*, *quum fit id, quod dicitur*. Iam illa fides nititur aut pacto, aut contractu, quia discrimen inter pacta et contractus ius naturae ignorat, illudque ex mente *CONNANI* iure naturae non obligat; nec contractus, quia discrimen inter pactum et contractus ius naturae ignorat, illudque ex solo iure civili est, ergo iure naturae plane nulla erit fides.

§. 5.

Quotuplicia sint pacta, ostenditur paragraphis sequentibus. Supra vidimus diuisionem in pacta obligatoria, liberatoria, et mixta; sed eam auctor omisit.

Hinc prima diuisio est, quod pacta sint vel *UNILATERALIA*; quae non sunt, quando fidem damus per actum solitarium; (id enim numquam potest fieri) sed quando vnus tantum obligatur; alter nullam obligationem in se suscipit, e. g. donatio, promissio, mutuum; vel *BILATERALIA*, quando duo pluresue se sibi inuicem reciproce obligant, e. g. sponsalia, permutatio, transactio. Simile quid contingit in foederibus: nam ea iniri solent cum oppresso, ita vt potentior promittat subsidia, oppressus nulla promittat; e. g.

Impe-

Imperator cum Republica Ragufensi seu Epidaurica. Aliquando foederati sibi reciproce mutua auxilia promittunt; veluti hodie Galli, Sabaudi, Hispani.

§. 6. 7.

Deinde auctor pacta vel promissiones diuidit in *perfectas*, quibus non solum obligari volumus, sed et alteri ius dāmus, illud, quod promissimus, a nobis exigendi, e. g. debitor promittit se soluturum; et *imperfectas*, quibus quidem obligari volumus, sed alteri tamen non ideo statim ius est, id, quod promissum, exigendi; e. g. sincerationes amicorum, promissa potentum, patronorum. Sed haec doctrina minus est adcurata; nam imperfecta vocantur, aut quia eius modi promissiones non obligant ciuilitur, aut quia exsecutio difficilis est, e. g. in promissis potentum; si postlerius, obligatio tamen est perfecta. Quamuis enim inter homines delict exsequutio, quia iudicem non habent: Deus tamen, tamquam auctor iuris naturae, poenas exigit a legem violantibus.

Priore sensu omnes promissiones producant ius perfectum; est enim officii absoluti perfecti: *pacta sunt seruanda*, iubet hoc lex, iubet regula iusti, quod tibi non vis fieri, alteri ne feceris.

Itaque dicendum potius: *Omnia pacta pure, serio, ex deliberato animo inita, perfectam producant obligationem, quamuis per accidens fieri possit, ut exitum non habeant.* Dicimus:

Pacta pure inita.) Nam si tacitam in se continent conditionem, non existente conditione non obligare possent; tales sunt promissiones amicorum et patronorum, ego te promotum ibo, ego te ex his turbis expediam, scilicet, si Princeps potest persuaderi, si aptus eris officio publico, si potero.

Serio inita.) Alias enim deest consensus: hinc facile patet, si ioco quis polliceatur nuptias, diuitias, cet. nullam inde nasci obligationem.

Deliberato animo.) Ergo supra ostendimus, non obligare promissa ebriorum, quia consensus deest; imputantur quidem ebrii actiones necessariae, non voluntariae; crimina, non pacta et promissiones, cap. I. §. 15.

Per accidens.) E. g. si conueniri promittens non possit, quia non habet superiorem, e. g. si Rex quid promisit; si prudentia eum conuenire dissuadeat, e. g. si potentes, ministri aulici promiserint, si quis ante praestitum promissum non habeat heredem vel

success-

successorem, a quo peti possit. Si rem ita concipimus, plane non opus est diuisione illa in promissa, et pacta perfecta et imperfecta.

§. 8.

Tertia pars capituli agit de primariis pacti requisitis, quae sunt 1. *consensus*, §. 8–16. 2. *rei possibilitas*, §. 17. 18. 3. *libera de re dispositio*, §. 19.

Requitur *Consensus*; ob definitionem, quia est duorum vel plurium in idem placitum consensus.

Rei possibilitas; quia obligationem de dando vel faciendo vel introduco, vel tollo, vel vtrumque facio; dare vero vel facere non possum, quod mihi possibile non est, immo et de quo libere disponere non possum, vnde et tertium requisitum est euidentis.

Per *consensum* intelligimus duorum vel plurium voluntatum conuenientiam in re, de qua agitur: e. g. rem volo emere, alter vult mihi emendam dare, ego pretium consütuo 10. aureorum, ille mihi dare vult pro 10. aureis.

Ex ea definitione patet, *consensum debere esse* 1. *declaratum*, §. 9. 2. *verum*, §. 10–15. 3. *mutuum*, §. 16.

§. 9.

Consensum oportet esse declaratum; quum enim consistat in conuenientia voluntatum, alter autem alterius voluntatem perspicere non possit, consequens est, vt signis quibusdam alteri innotescere, adeoque declarari debeat: iam quum declaratio illa fiat signis, ea vel in verbis, siue scriptis, siue ore prolatis, siue in factis consistunt. Si prius, consensus vocatur *expressus*, e. g. si quis ore interrogat, dabis, alter respondeat, dabo; vel si mercator ad alterum Lipsiensem scribit, rogatque, vt sibi tot pondo optimi cinamomi pro tanto pretio mittere velit, et alter rescribit, se missurum; sin posterius, consensus erit *tacitus*, ergo hic semper praesupponit factum, ex quibus immediate et apodictice colligi possit, alterum consentire.

Talia sunt 1. ex more et consuetudine nutus, quemadmodum conuersio capitis pro declaratione dissensus habetur; itemque consensum indicare dicitur dextra, fidei pignus, nec non silentium; plerumque enim qui tacet, consentit, quia non contradicit; plerumque, inquam; nam saepe quis ex indignatione et contentu

Heineccii Praeh. Pufendorf.

N

tacet.

tacet. In aulis Principes tacent, vbi nec concedere; nec indulgere volunt: vnde frequens in aula proverbium: nulla responsio responsionis loco est; 2. ex conuentione contrahentium, e. g. qui hoc sentitis in hanc, qui alia omnia in illam partem discedite, qua sentitis; talis Athenis et inter Christianos veteres recepta *γυναικα*, apud Cosacos proiectio pileorum; 3. ex praesumptione, e. g. ex redditione chirographi colligitur remissio debiti; *L. 2. D. de pass.* ex redditione pignoris remissio pignoris, ex continuata habitatione et vsu rei tacita reconductio.

Adiiciendae tamen quaedam obseruationes; a) signa debere esse voluntaria; hinc stolide quis colligeret, senem hunc noluisse accipere solutionem, quia caput quassarit, quum caput senio tremuerit. Ludimagister moribundum interrogabat, an filium heredem instituat? addebat, illum annuisse, quum moriens, caput submitteret; b) facta non debere habere aliam rationem; nam si constat de alia ratione, frustra inde elicitur consensus tacitus, e. g. si redderem debitori meo chirographum, vt defectus suppleatur, frustra hic diceret, sibi remissum esse debitum; si debitori pignus commodarem, vt eo die nuptiali vtatur, frustra hic inde probarer, sibi a me remissum esse ius pignoris; denique si quis migrare volentis inquilini vtensilia retineret, frustra diceret, inquilinum relocasse aedes; c) non confundendum esse consensum tacitum et praesumptum, ille est verus, hic contra fictus; ille supponit subiectum habile; qui enim non potest consentire expresse, is nec tacite potest; at praesumptus potest et locum habere in furioso, infante, absente, ignorante, qui nec expresse, nec tacite consentire potest. Errauit hunc errorem PVFENDORFF. *de iur. nat. et gent. libr. III. cap. 6.* vbi tutelam ex consensu tacito pupilli repetit; illum agnoscit ius naturae, hunc ciuile tantum, et quidem in omnibus quasi contractibus.

§. 10.

Consensum oportet esse VERVM; ex definitione autem supra §. 8. data patet, verum illum esse non posse, nisi quis 1. intelligat; qua de re agatur; eiusque distinctam ideam habeat; hinc non consensit Iacobus et Labanus, quum ille de Rahele, hic de Lea sentiret; 2. liberam voluntatem habeat, vt in idem, quod alteri placet, adpetitus ferri possit, adeoque non consentiebat Carolus V. Imperator, et Franciscus I. Rex Galliae, quum hic petens Mediolanum

lanum a Carolo per Galliam iter facienti responderet, quod vult frater meus et ego volo.

Ex hoc principio patet, consensum verum impedire 1. *furorem*, *amentiam*, *infantiam*, *ebrietatem*, §. 10. 11. 2. *errorem*, §. 12. 3. *dolum*, §. 13. 4. *metum*, §. 14. 15.

De furore, amentia, infantia nullum est dubium, quum vsu rationis destituantur; quomodo vero consentiant in id, quod non intelligunt? at de ebriis res altioris indaginis videri posset. Quamuis enim et hi rem non intelligant, adeoque consentire non possint, tamen haec ignorantia est in se quidem, sed non in sua causa inuoluntaria; culpa plerumque sua in hunc statum inciderunt. Sed 1. distinguendum inter ebrietatem inuoluntariam et voluntariam: in illa non obligatur quisquam, quia sine culpa contracta; in hac obligatur. Distinguendum denuo 2. an sit modica, an summa: illa non impedit, quo minus quis sciat, quid agat, adeoque obligatur, si pactus est, quia consensit. Hinc gentium mos de publicis priuatisque negotiis inter pocula agendi; fuit hic mos Germanis quoque, *TACIT. de morib. Germ.* Persis, Atheniensibus, *CVAT. VII, 4.* Contra si summa sit ebrietas, distinguendum, 3. an actio sit necessaria, legibus prohibita, vel praecepta, an arbitraria: priore casu obligatur consentiens e. g. delinquens, posteriore non obligatur. Ratio discriminis est; a) quia posteriore casu agere et non agere potui salua lege, priore non potui; b) priore casu actus fuit solitarius, posteriore alter mecum contraxit. Id vero dum egit, aut ipse sobrius sciuit me ebrium esse, vel ipse quoque ebrius fuit; si prius, ipse in dolo fuit, adeoque fructum ex sua malitia capere non debet; sin posterius, neuter consensit, adeoque nullum initum est pactum. Elegantem Flandrorum consuetudinem refert *NIC. BVRGVNDVS in praefat. consuetudinum Flandrorum* de contractibus in taberna vinaria contractis; recedere nempe iis licere ante meridiem insequentis diei.

§. 11.

Quum ostensum sit, *infantiam* impedire consensum §. 10. quaerit auctor, quo usque ea duret, et quando pubes fiat homo? recte respondet, hoc definiri in iure naturali non posse, hoc enim requirit propositiones mere vniuersales, et quae toti generi humano applicari possint. Talis autem propositio hic inueniri non potest; 1. quia alii citius, alii tardius propter temperamentum corporis ado-

lescunt: 2. quia in quibusdam ingenium praecocius, in quibusdam tardius; 3. quia et climata hic discrimen aliquod faciunt, ac potissimum 4. educatio efficit, ut quidam reliquis sapiant citius.

Antiqui philosophi et mathematici, inprimis genethliaci, ab Aegyptiis didicerunt, singulis septenis annis corpora, octonis mentes quasdam mutationes subire; hinc pleraeque gentes hos annos climactericos pro principio sumserunt.

Hinc Romani annum pubertatis 14. plenam pubertatem anno 18. infantiam anno 7. finiri statuerunt. Saxones quoque anno 21. finiunt minorennitatem, i. e. anno climacterico tertio.

Sed hoc principium quoque, quod latius deduxit CENSORIUS *de die natali*, et indemonstrabile est, et suas patitur in hominibus exceptiones. Itaque nihil superest, quam 1. ut vel ex animo, vel ex mentis acumine ipsoque corporis habitu iudicetur, an quis ad consentiendum habilis sit; (Haec olim sententia Cassianorum. *Vlp. Fragm. XI. 28.*) vel 2. imperantes in statu civili annos definiant, quod et ubique fieri, factumque esse novimus.

Ceterum et hoc fundamentum est, ex quo 1. *tutelam* esse iuris naturalis colligimus; quum enim pleraque expediantur in *vita pactis*, iisque *carere* non possumus (§. 2.), ad pacta requiratur consensus verus (§. 10.), is vero ab impuberibus expectari non possit, consequens est, ut alii consensum suppleant, ac sic fiant pupillorum tutores; 2. ex eodem fundamento colligimus, aequissimam esse siue tutelam, siue curatelan*am* furiosorum, amentium, similiumque personarum miserabilium ob eandem rationem; 3. utroque casu praerogativam merito concedendam esse propinquis, amicis, cognatis. Quum enim aliorum consulere commodis supponat amorem, amor autem quam maxime cadat in propinquos, his praerogativa ceteris paribus merito conceditur; 4. tutores hos merito ea omnia agere, quae ipse pupillus agere nequit, adeoque eorum nomine pacisci, administrare, cet. §. eosdem administrare tamdiu, quamdiu durat causa; cessante vero ea, cessare quoque tutelam; 6. finita tutela merito posci rationem; ad eam enim obstrictus est, quicumque res alienas administrat.

§. 12.

Consensui quoque obstat *error*, quem supra definivimus discrepantiam idearum ab obiecto: si discrepant ideae ab obiecto, de alio obiecto cogito, quam quod reuera adest; ergo non consentio; e. g. Iacobus, dum Leam duxit pro Rahele, non consensisse dici potest.

At facile tamen patet, non omnem errorem pactum vitare: primo enim supra vidimus, errorem esse vel vincibilem, vel invincibilem; *invincibilem* errorem omnem impedire consensum, dubio caret, ergo eiusmodi pactum non valet, e. g. si quis morbosum animal pro sano emerit; *vincibilis* vel *difficilius* deprehenditur, adeoque merito consensum impedit, e. g. si quis rei gemmariae imperitus adamantem occidentalem pro orientali emerit, vel *facile* deprehendi aut evitari potuisset, et tunc consensum non impedit. Reuera enim consentit, qui, dum errorem evitare potuisset, rem diligentius explorare noluit, itaque hic regula est:

Error in dubio nocere debet erranti.

Germani eleganter: *wer die Augen nicht aufbitt, thue den Beutel auf.*

Sed quum dicimus in dubio, ex natura erroris et consensus iudicandum de exceptionibus; tales auctor tres tradit, quum regulas tradere debuisset: a) quoties aliquid tamquam conditionem supponimus, ea deficiente consensisse non videmur, e. g. promitto matrimonium, si doctus fueris; (fama nunciarat militem in praedio occubuisse. Pater mutarat testamentum. *Valer. Max. VII. 7. 1.*) b) si in errorem fuerim impulsus ad contrahendum, re integra poenitere licet; hoc falsum, quia licet errauerim, mea tamen culpa est; in dubio autem error nocere debet erranti; c) ubi circa ipsam rem, eiusque substantiam erratum, error merito consensum impedire videtur, non, si error circa accidentalialia; e. g. si quis aureum putans horologium inauratum emat, non consentit; sin a Titio emerit, quum vellet emere a Caio, consentit, pactumque ratum est. Ita auctor suo more sine fundamento. Nos exceptiones accuratius ita concipere possumus: *Quoties error est efficax, non nocet erranti; quoties concomitans tantum, nocet.*

§. 13.

Impedit porro consensum *dolus*, qui est propositum alterum in errorem inducendi, qui illi detrimentum inferat. Dolus hic vel est a) *a paciscente*, et tunc non obligatur deceptus, 1. quia reuera non consentit, 2. alter versatur in delicto, cui iura non adfiscunt; b) *a tertio*, et tunc etiam quidem non consentio, sed delictum non est penes eum, quocum pactus sum, ergo hic me non laesit, adeoque nulla causa est a pacto vel contractu discedendi:

at possum tertium illum, qui me decepit, convenire in id, quod interest.

Hinc non difficile est iudicare de regulis auctoris. 1. Prima est verissima, dolo enim a tertio adhibitus nemini potest imputari, nisi dolo; 2. secunda itidem rectissime se habet, nam dolo ius naturae non adfuit, nec quisquam debet ex malitia sua fructum capere: 3. distinctionem inter dolum causam contractui dantem et incidentem ius Romanum inuenit, adeoque non est ius naturae, et hinc regula haec superflua est, et ad secundam potest referri; 4. ultima regula plane non pertinet ad dolum, sed ad errorem potius in accidentalibus, interim vera est per ea, quae §. 12. diximus.

§. 14. 15.

Quarta causa impediens consensum est METUS; de quo tamen auctor eodem fere modo philosophatur, ac de dolo, id est, confuse admodum. *

Primo ait, metum accipi dupliciter, vel 1. pro suspitione probabilis, fore, ut ab altero decipiamur, aut 2. pro vehementi animi terrore, orto ex alterius vi et intentato malo; nam e. g. qui non sine insigni suspitione gemmas ab ignoto emit, metuit, et cui vis armis intentatur a latrone, itidem metuit. Deinde de utroque genere metus dat regulas, de primo agit §. 14.

1. *Qui confidit alterius promissis, cui parum fidei est, pactum impugnare nequit.*
2. *Si pactum iam initum, ob solam suspitionem meam ab eo rescilire non possum.*
3. *Si inito pacto emergant indicia, ut mihi, si ex mea parte promissis sciero, illudai, iure exigere possum cautionem.*

Similes regulas dat deinde §. 15. de metu, qui ex alterius vi oritur. Sed multa se hic et in tota hac doctrina male habent; nam 1. suspicio de dolo non est metus, quia suspicio est coniectura vergens in deteriorem partem; coniectura autem ad intellectum, non ad voluntatem pertinet; 2. miscet auctor regulas prudentiae et de iusto; ad solam tamen prudentiam pertinet regula 3. §. 14.

Nos

* HONDESIUS cap. 11. §. 11. cum stoicis plane negat metum pacta vitare. 1. quia alias et pactum viciaretur quo res publicae coaluerunt: 2. quia sic non tenerentur captivi ad . . . solvendum. Similem doctrinam defendit GROTIUS II. 2. 7. refutatus a PUFENDORFIO III. 6. 13.

Nos itaque distinguimus inter metum leuiori et maiori, vi extortum. Terror Panicus neminem ab obligatione liberat, quia vanus est, et ratio ei facile resistere potuisset: at si atrocior vis, talisque sit metus, qui et in virum constantem cadit, distinguendum est, sitne alteri ius cogendi, an non? priori casu pactum validum est, posteriore non.

Rationes sunt a) quia obligatio et ius sunt correlata; vbi ergo ex vna parte ius non fuit cogendi, ibi ex altera parte non est obligatio; b) si praestandum esset latroni; quod coactus promisi, nasceretur inde absurdum, eum praemium exigere posse, quod me non occiderit. Eleganter HORATIVS, *Epist. l. 16. 46. sequ.*

Nec furtum feci, nec fugi, si mihi dicat

Seruus: habes pretium, loris non vreris; aio.

Non hominem occidi: non pasces in cruce cornos.

Hinc facile patet, cur metus reuerentialis secundum *reg. 2. §. 15.* non liberet ab obligatione. At contra non minus intellectu facile est, non obligari quemquam ex promisso latroni, qui illud iniussissima vi extorsit.

Inde etiam solui potest quaestio, an locus exceptioni metus sit *aduersus pacem*? bello sane illa extorta est, adeoque vi et metu; quis ignorat, quantum terrarum pace Vltraiectina et Rastladiensi cesserit Imperatori? sed bellum est medium iustum cogendi liberam gentem; adeoque idem, quod actio in re publica, ergo procul dubio valeret pactum vel transactio, ad quam aduersarium actione iudiciali instituta adegerim; ita valebit etiam pax, ad quam quis bello coactus est.

Obiicitur, posse esse bellum iniussissimum? Resp. at alterum id negare, idque pro iusto habere; iam in mundo non est iudex, qui pro vno vel altero possit pronuntiare, ergo praesumitur bellum iustum fuisse, adeoque et pacem initam valide obligare. Conf. GUNDELING. *de efficient. met.* Aliud ergo, si princeps a subditis carcere cogatur ad aliquid promittendum, e. g. Maria, regina Scotiae, in carcere cesserat filio 13. menses nato regnum; id pactum postea Scotiae proceres irritum pronunciarunt. Vid. CAMDEN. *ad annum 1564.* THYANVS, *Histor. libr. XXXXII. ad eund. ann.*

§. 16.

Diximus; consensum debere esse declaratum et verum: at debet etiam

etiam esse mutuus, quia *pactum* est duorum vel plurium in idem placitum consensus.

Ex eo patet, in omni pacto esse debere PROMISSVM et ACCEPTATIONEM: eorum vtrumque in pactis unilateralibus est simplex, e. g. Titius mihi donat librum, ego accepto; in bilateralibus contra vtrumque et promissum et acceptatio occurrit; e. g. venditor promittit rei traditionem, emptor acceptat; emptor promittit pretium, venditor acceptat.

Praeterea acceptatio etiam tacita sufficit, modo quis non contradicat; e. g. si quis donanti gestu testatur, sibi donationem gratam esse; aliquando etiam praesumitur acceptatio ex antecedente rogatione, e. g. rogat quis centum sibi mutuo dari, ego promitto, nulla hic opus est noua acceptatione, quia illa iam in antecessum facta est.

In iure civili et ecclesiastico quaedam promissa occurrunt, quae sine subsequente acceptatione valere dicuntur, nimirum

POLLICITATIO, si quis rei publicae vel ciuitati aliquid ex iusta causa promittit; ad id enim promittens tenetur, quamuis nemo nomine rei publicae acceptarit; e. g. si quis pollicitus sit, se moenia refecturum suis sumptibus. Vid. *tit. D. de pollicit.*

VOTVM, quando Deo quid promissum, e. g. si quis Deo promiserit ieiunium, legatum ad pias causas.

Enim vero negatur, alterutrum sine acceptatione esse; pollicitationem enim in antecessum pro re publica acceptauit legislator, dum lege cauit, pollicitationem eiusmodi esse adimplendam. Et Deus procul dubio quoque acceptat promissum sibi ab homine factum, adeoque perfidus est, qui votum violat.

Ex eo vero principio facile patet, *quaenam* demum *vota id nomen mereantur*? Resp. quaecumque acceptauit Deus; acceptare autem nec vult, nec potest, quae ipsius legi, rectaeque rationi repugnant; acceptat ergo votum poenitentiae, precum, virtutum; non autem acceptauit procul dubio votum Iephthae de filia mandanda, nec magis acceptare videri potest vota monastica, et alia ad *hypocritarum* pertinentia.

§. 17. 18.

Habuius primum pactorum requisitum: sequitur alterum, REI POSSIBILITAS. Quum enim pactum sit consensus de obligatione introducenda vel tollenda; vtroque vero casu aliquid dandum, faciendum, remittendumue sit, consequens est, vt nasci possit obligatio,

gatio, si quid dari, fieri, remittiue nequeat, e. g. si res, de qua pactus sum, quamque promisi, sit impossibilis.

Impossibile est, quicquid fieri non potest: ut aliquid fieri non possit causa sunt impedimenta: ea vel sunt a natura, vel a lege; si a natura, dicitur esse aliquid impossibile physice, e. g. coelum attingere; si a lege, impossibile aliquid est moraliter, e. g. hominem occidere.

Impedimenta porro obiciuntur vel omnibus sine discrimine; tunc aliquid impossibile est absolute; vel quibusdam tantum, et tunc impossibile quid est respectiue, respectu videlicet eius personae, quae quid praestare debebat, e. g. scriptum Sinicum interpretari mihi est impossibile, at non aliis; alterius scire cogitationes et mihi et aliis impossibile est.

Iam facilis quidem regula:

Impossibilium nulla est obligatio.

At quum impossibilitas sit ab impedimento, distinguendum; utrum illud ab ipso promittente sit, an a tertio, an a natura vel lege.

1. Si a promittente ipso, regula erit: *Impossibilitas praestationis a culpa ipsius promittentis orta ab obligatione non liberat*; e. g. non liberat obtenta impossibilitas debitorem; qui bona abalienauit. 2. Sin a tertio, tunc non quidem tenetur promittens, sed tamen is, qui impediuit, e. g. commodatarius equi non tenetur, si a fure substractus, at fur tenetur. 3. Si denique a natura vel lege, non tenetur promittens, e. g. promittens Salam se ebibiturum, vel hominem occisurum, non tenetur.

Obiici posset, at in culpa esse, qui tale quid promiserit? Resp. in culpa quoque pari esse, qui tale promissum acceptauit. Accedit, quod verè non adest consensus in praestationem, sed in non praestationem; aut insaniuerunt, aut iocati sunt, qui consenserunt in aliquid impossibile.

Ex eo ergo patet, ex promisso quoque impossibili moraliter nullam nasci obligationem, adeoque 1. nec promittentem rem teneri praestare; dupliciter enim peccaret, si fidem seruaret; 2. nec eum posse promissum praemium exigere; 3. nec non praestantem conueniri posse ad praemium repetendam; 4. nec qui promissum praestitit, petere posse indemnitate, sed 5. Deo obligatos esse ad poenam. Contradictio enim est, leges aliquid prohibere, et aliquem tamen cogere ad factum lege prohibitum.

§. 19.

Tertium denique pactorum requisitum est **LIBERA DE RE DISPOSITIO**. Ex eo patet, 1. pupillum vel in patria, vel in dominica potestate constitutum nihil posse promittere; 2. circa rem alienam neminem esse posse liberalem; 3. posse tamen aliquem promittere circa rem alienam, a) *diligentiam*, qua adhibita et probata tunc liberatur; b) *indemnitatem*; c) *ipsam rem*, si persona suae potestati subiecta est, e. g. promittit quis, filium suum alterius causam acturum; 4. non posse me aliquid promittere, in quo alter iam habet ius quaesitum, e. g. non potest noua sponsalia inire, qui iam alii fidem dedit de matrimonio. Conf. HERTII *Diss. de obligatione alium daturum facit*. Et haec tenus vera est regula, *Qui prior tempore, potior iure est*.

Obiici posset, *saepe tamen posterius pactum valere et derogare priori*? Resp. distinguendum, utrum iidem, qui antea pacti sunt, inter se de nouo paciscantur, an de nouo quis paciscatur cum tertio; priore casu pactum posterius est potius priore; posteriore casu qui prior est tempore, potior iure. Deinde distinguendum est inter ius naturae et civile; regulas iuris naturae iam vidimus; iure civili distinguitur inter ius in re, et ad rem; et illud praefertur, hinc e. g. si prior emi, alteri prius traditum, huic ius est potius, quia per traditionem consequitur ius in re.

§. 20.

Superest vltima pars capituli, in qua disquiritur, *quotuplici modo pacisci possumus*? Resp. 1. *vel pure, vel sub conditione*, §. 20. 2. *vel per se, vel per alios*, §. 21. deinde subnectitur transitio ad caput sequens, §. 22.

Paciscimur **PVRE**, quoties nullam circumstantiam futuram adiicimus; **EX DIE**, vel **IN DIEM**, quoties adiicimus circumstantiam temporis; **SVB CONDITIONE**, quoties aliam adiicimus circumstantiam.

Est ergo **CONDITIO** adiectio circumstantiae eum in finem, ut actus imperfectus ab eius eventu suspendatur, perfectus eo resoluitur, e. g. vendam tibi aedes pro 1000. si hac hieme nemo plus obtulerit, est conditio suspensiva; trado tibi aedes pro 1000. sed reddas eas, si quis hac hieme plus obtulerit, est conditio resoluitiva.

Condi-

Conditionem vulgo diuidunt in POSSIBILEM et IMPOSSIBILEM, sed reuera conditio impossibilis ne conditio quidem est, quia actum nec suspendit, nec resoluit.

POSSIBILES de quo sunt vel *potestatiuæ*, quæ in naturali potestate sunt, e. g. dabo 100. si studium iuris elegeris; *casuales*, quæ a prouidentia diuina pendent, e. g. dabo 100. si cras nauis redierit; *mixtæ*, quæ a prouidentia diuina et certo respectu a meo arbitrio pendent, e. g. dabo 100. si Maeciam vxorem duxeris. Ea vera quidem quodam modo sunt, nisi quod vix vlla est potestatiua conditio, quum multa cadant inter calicem supremæque labra. At in iure naturæ non habent vsum, ac ne in iure quidem ciuili habent vsum in doctrina de pactis, sed in vltimis voluntatibus. Regulæ potius obseruandæ:

I. *Promissa para statim obligant, ac proinde statim peti possunt, leges tamen ciuiles plerumque concedunt pusillum laxamentum.*

II. *Promissa ex die vel in diem debentur a certo tempore, vel ad certum tempus; ergo ius naturæ ignorat subtilitates iuris ciuilis, quo promissa in diem perpetuantur, et exceptione excluduntur.*

III. *Promissa sub conditione possibili suspensiuæ non obligant, nisi existente conditione.*

III. *Pacta sub conditione possibili resolutiuæ inita dissoluantur existente conditione.*

V. *Pactum sub conditione impossibili initum irritum est, siue physice impossibilis sit res, siue moraliter. Agnoscit hanc regulam etiam ius ciuile; at in vltimis voluntatibus aliter se res habet, vbi conditio impossibilis pro non adiecta habetur. Ratio discriminis est, quia in conditionem impossibilem heres vel legatarius non consentit, adeoque vel iocatus est, vel non satis sanus fuit.*

VI. *non impletur conditio impossibilis per cauillationem. CORN. NEP. Miltiad. cap. 2.*

§. 21.

Deinde paciscimur vel *per nos ipsos*, vel *per alium*, eumque vel nullo mandato instructum, e. g. si amicus mihi stipuletur 100. hoc pactum non valet iure ciuili, §. 4. *Inst. de inuilit. stipul.* at iure naturæ nulla est ratio, cur valere non debeat, quia alter vtilitatem meam promouit, idque ratum habere possum; vel *mandato instructum*: hoc porro est vel 1. *generale*, vbi omnia relinquo alterius arbitrio, e. g. eme mihi domum; 2. *speciale*, vbi præscribo ipsi

omnes circumstantias, e. g. qualem, in qua plates, quanti emere debeat. Iam regulae faciles:

- I. Quod alii promisi in utilitatem tertii, servandum est.
- II. Quod egit, qui generale mandatum habuit, ratum habendum, modo dolus non accesserit, vel culpa plane enormis.
- III. Quod pactus est is, cui speciale mandatum dedi, ratum habere teneor, si fines mandati non exceaserit.

Quid si minoris emerit? Resp. si res talis, qualem emtam volui, teneor; si nulli mihi usui sit, non teneor. Quid si fines exceaserit, an non teneor ad summam saltem convenientem? Affirmatur, quia sic nullam patior detrimentum, et alter damnum fert, quod sua culpa accidit.

§. 22.

Ultima paragraphus non nisi transitionem ad caput sequens continet. Egimus hactenus de officiis absolutis, in quibus institutum humanum non supponitur; sequi debebant hypothetica; quae tali instituto nituntur. Quum vero pleraque eius modi instituta per pacta introducta sint, auctori visum est, praemittere doctrinam de pactis.

Hoc absolutò iam ad ipsa officia hypothetica progredimur, quorum quum sint quatuor, auctor agit 1. de sermone, cap. 10. 11. 2. de dominio, cap. 12. 13. 3. de rerum pretio, cap. 14. 15. 16.

CAPVT X.

DE OFFICIO SERMOCINANTIVM.

§. 1.

Primum institutum humanum, ex quo officia hypothetica fluunt, est sermo, circa quem auctor duo explicat officia: 1. circa vim significatiuam, §. 1. 2. 2. circa eiusdem usum, §. 3. ad fin. Sed neutrum satis intelligitur, nisi praemittatur definitio.

SERMO est vox articulata ex impositione hominum significans, quo animi sensa distincte cum altero communicamus.

Vox.) Hinc sermo non est, quando inter nos aliquid significamus

mus notu, gestibus, similibusque signis. Sic MOLLERVS, Professor Altdorffius, scripsit *de oculiloquio et pediloquio*.

Articulata) i. e. dentibus, palato, lingua et gutture ita temperata et tracta, vt distincta vocabula prodeant, ergo nudus sonus, qualem edunt vaccae, aliaeque animalia, non est sermo. Atqui et animalia distincta quaedam vocabula seu voces articulatas proferunt; e. g. cuculus, rana, nec is tamen sermo dici potest; hinc additur.

Ex impositione hominem significans.) Nam ranae voces articulae nihil significant, nec ex impositione hominum, nec ex impositione ranae: at notum tamen est, psittacum loqui discere, et alias aves discere certas sententias, e. g. salve Auguste, credo in vnum Deum, cet. at nec is sermo est, quamvis ex impositione hominum significet; additur ergo:

Quo sensu animi cum altero communicamus.) Psittacus vocat aliquam, coquette, sed sine animo inturiandi, nescit, quid loquatur; homines autem eius modi voces articulatas proferunt, vt alii id intelligant, et tamen nullum est dubium, animalia quoque sensu animi sono indicare. Alium enim sonum edit canis iratus, alium ludibundus, alium dolorem sentiens et timidus, alium frigus sentiens. At rem omnem conficit vnum, quod additur, aduerbium:

Distincte.) Canis quidem indicat, se dolorem sentire, sed non narrat, quid dolorem operetur: homo vero distincte per sermonem omnes cogitationes, reique causas et circumstantias indicat.

Vnde dicere possumus, plane parallela esse rationem et sermonem: illa est sermo internus, hic ratio externa seu extrinsecus sese exferens.

Quamvis ergo ita recte sese habeat definitio, vocis tamen istius articulae loco et aliis signis vtimur, quae itidem valent ex impositione hominum, qualia sunt 1. litterae vel scriptura, 2. notus et quassatio capitis, 3. manus, pedes, oculi.

Quum ergo loco sermonis sint: regulae de sermone et his signis recte applicantur.

Iam facile patet, quis finis sit doni huius diuini plane incomparabilis: sane enim Deus nobis sermonem nec sui, nec nostri, nec animalium aliorum causa dedit; *non sui causa*, quia cogitationes nostras scit sine nostro sermone; *non nostri causa*, quia et nos sine sermone intelligimus; denique *non aliorum animalium causa*, quia haec nos non intelligunt; ergo *proximi causa*.

Quum ergo proximum teneamur amare tamquam nos ipsos, necesse est, ut sermone quoque non aliter utamur, quam quemadmodum eo uti volumus erga nos proximum nostrum.

Inde recte auctor colligit regulam: *Neminem sermone aut aliis signis alium decipere debere.*

§. 2.

Iam primum ergo officium CIRCA SIGNIFICATIONEM sermonis facile intelligitur. Verba valent ex impositione hominum: impositio illa facta primum consensu plurium, mox aliorum, qui imitati sunt. Itaque

I. Quisque obligatus est ad eam significationem voci tribuendam, quae consensu hominum vocabulo data est; nam a) ad id tenetur ex pacto; b) exigit et hoc finis sermonis, quippe inutilis futurus, nisi recepta significatione utar. Eleganter MARCELLVS apud SVETONIUM: tu, Caeſar, ciuitatem potes dare hominibus, verbis non potes.

II. Quisquis vocabulo vitur inter homines recepta, ei non fit iniuria, si eo sensu accipiat, qui receptus est, e. g. si quis principem vocet tyrannum, virum in dignitate constitutum barbarum, frustra se excusaret, quod per barbarum intellexerit extra Gracciam natum, per tyrannum regem.

III. Mutatam significationem etiam in sermone esse obseruandam. Verba valent sicut nummi, et in aliam plerumque significationem degenerant, e. g. fur hodie non significat seruum, sed rapacem hominem, olim significabat seruum:

Quid domini faciant, audent quum talia fures?

III. Definitiones quidem nominales esse arbitrarías, sed cum tamen stolidè agere, qui vocabulum plane aliter definit, ac alii homines solent. Sic e. g. Plato ideam vocat exemplar rerum omnium animo obuerſans; alii philosophi obiectum intellectus proprium. Iam si quis diceret, se intelligere per ideam figuram quatuor lineis inclusam, nemini quidem faceret iniuriam, at parum tamen sapere videretur.

V. Neminem alteri illudere debere vocabulis nihil significantibus. Si quis diceret, se vidisse pulcherrimum blitri, illuderet alteri, blitri enim vox nihili est. At re vera tamen homines saepissime vtuntur eius modi vocabulis nihil significantibus, e. g. fatum, fortuna, sympathia, antipathia, vis attractiua.

VI. Si quis inusitata voce vel phrasi utatur, eum teneri, ut eam alteri explicet, et, si explicare non possit, non aegre ferre debere, si vel ignorantiae, vel fraudis arguatur: v. g. Entelechia Aristotelis.

§. 3. 4.

Quod ad usum sermonis attinet, ille quoque ex regula supra allata rectissime intelligitur. Quum enim tenear sermone ita uti erga alium, quemadmodum alium eo, uti volo aduersus me, ego vero nolum, ut quis mihi veritatem vel bona verba denegat, si habeam vel ius perfectum, vel imperfectum talia exigendi, sane nec ego haec alii denegare debeo.

Ex quo patet,

1. Non ad omnia euulganda quem teneri, quae cogitat; sic nemo tenetur dicere, quam diues sit, cet.

2. Tacere aliquando praestare, quam loqui, e. g. si quis arcana amici non prodit; PIND. *Nem. od. 5.* non omnis veritas aperiens faciem est utilis: sed scire tacere est saepe sapientissimum inter homines.

3. Iure perfecto nos ad veritatem dicendam adstringi, a) quoties alter ius ex pacto habet, eam a me exigendi; sic in specula positus dissimulare non potest hostis aduentum; contrahens non debet dissimulare rei, de qua contrahitur, qualitates; b) quoties eam exigit officium, e. g. docens veritatem nec dissimulare, nec corrumpere potest; c) quoties tranquillitas publica silentio laederetur, e. g. coniurationem aduersus principem vel rem publicam nemo tacere potest; d) quoties imperium adest legitimum, vi cuius quis veritatem a me exigere potest, e. g. parentes, magistratus.

4. Iure quoque imperfecto a nobis exigi posse veritatem, et verba bona, quoties id mihi non nocet, et alteri prodest; est enim hoc officium humanitatis et innoxiae utilitatis, ad quod nemo non obligatus est; hinc a) salutans est resalutandus; b) tristis solatio erigendus; c) proximus de imminente damno praemonendus; d) erranti monstranda via; e) ignorans docendus.

§. 5.

Quum ergo appareat ex antecedentibus, non semper nos obstrictos esse ad sensa animi alteri pandenda, quaerit auctor, I. An aliquid liceat dissimulare, §. 5. 2. An aliquando verbis obscuris,
immo

immo quodam modo ambiguus vii liceat, §. 6. Prius hac paragrapho adfirmare non dubitat auctor, sed ex falsa ratione, quia sermo non solum sit inuentus propter alios, sed et propter nos ipsos. Nam si id ita intelligit, quod sermo mihi datus sit, vt verum loquar, id falsum est; sin sensus est, nobis sermonis faciendae facultatem dedisse Deum, vt vtilitatem nostram ea promoueamus, vnusquisque mendax excusare posset mendacium.

Nos ita procedimus: cogitationes nostras signis cum altero communicamus; id fit vel per sermonem, tunc loqui dicimur, vel per alia signa, imprimis ficta, tunc dicimus scribere, innuere pro diuersis factis, quibus sensa animi pandimus: si sermonem omitimus, vocatur id *reticentia*; si facto nullo animum prodimus, erit hoc *disimulatio*.

Iam licet 1. a pari argumentari: reticentia non est illicita, si alter nec ius perfectum nec imperfectum habeat veritatem a me exigendi, (§ 3. 4.) ergo nec dissimulatio illicita, si alter nec ius perfectum, nec imperfectum habeat, vt sensa animi pandam; 2. nulum est dubium, quin dissimulando saepe alterius vtilitas promoueat, et ita quidem, vt aliter promoueri nequeat. Sic non vteretur medicina infans, nisi iMedicus dissimularet eam amaram esse; non respuissent fratres Iosephi, nisi amorem aduersus eos dissimulasset. Iam quum vtilitas proximi sit promouenda tamquam propria, procul dubio et eam dissimulatione promouere possum.

§. 6.

Paullo maioris momenti altera est quaestio; nam 1. obscuritas et ambiguitas ipsi fini orationis repugnat, a) quia loqui, vt non intelligaris, est actus frustraneus; b) ambiguitas autem peccat contra regulam, quam supra de significatione verborum dedimus. Oraculum Delphicum iubeat muris ligneis muniri; quis vmquam audiuit inter homines, muros ligneos vocari naues; 2. quia eius modi ambiguitas et obscuritas plerumque alterum in errorem inducit, in errorem autem alterum inducere est contra amorem proximi.

Enim vero res paullo altius ordienda. Sermo semper ad alterius vtilitatem veram adtemperandus; id enim exigit amor; quum vero saepe aliter non possim vtilitatem proximi promouere, quam si sermone obscuro vel ambiguo utar, prono aluco inde fluit;

Reg. I. Licitum est sermone obscuro, ambiguo, figurato, parabolico vii, quoties vere alterius vtilitatem promoueo. Sic pueris narramus

ramus fabulas, sic iisdem utebatur AESOPVS. PHAEDRVS, *Fab. III. prolog. 34-37.*

Servitus obnoxia,

Quia, quae volebat, non audebat dicere,

Affectus proprios in fabellas transtulit,

Calumniamque fidei elusit iocis.

Christus ipse vsus est parabolis, quia nudam veritatem ferre nondum poterant. Pythagorae symbola eundem habent finem. Deinde si ad me respiciam, non sane sum obligatus ad proximum magis, quam me ipsum amandum, itaque proderet me innocentem nunquam cogor, si alter nec ius perfectum, nec imperfectum habet, mihi innocenti nocendi; hinc

Reg. II. Quoties in periculo versor innocens, et alter nec perfectum, nec imperfectum ius habet mihi nocendi, ego tamen sine periculo tacere non possum, toties vitio verti non potest, si sermone vel obscuro, vel ambiguo viar. Athanasium iniuste persequebatur Iulianus apostata, fugit ergo in nauiculam, mutatis vestibus: missi equites, qui eum e fuga retraherent; illi nauiculam flare iusserunt, et ex Athanasio quaesiverunt, nossetne Athanasium? respondit, se nosse tam bene ac se ipsum. An non hac via fugerit? Resp. fugisse; an procul hinc absit? immo non procul, inquit, Ambigua haec sunt, quis vero vitio vertat viro optimo, quod non candidè dixerit, se esse Athanasium.

§. 7.

Iam facile patet, *quid sit veritas? §. 7. quid mendacium? §. 8. quid falsiloquium? §. 9. 10.*

Veritas accipitur vel in sensu 1. metaphysico, quando in re est essentia, quae rei illi competit, e. g. hoc est verum aurum, hic est verus homo; haec nec virtus est, nec vitium, sed attributum intrinsecum, quod a nobis plane non pendet; 2. vel in sensu logico, et tunc est convenientia ideae cum obiecto; haec est perfectio intellectus, adeoque nec virtus, nec vitium, quia haec semper in voluntate sita; 3. in sensu morali; et tunc est convenientia sermonis, aliorumque signorum externorum cum animi cogitationibus; haec quoque non semper virtus, immò aliquando vitium est; e. g. si amici secreta prodo, vera loquor, at pecco tamē.

Heinacii Prael. Pufendorff.

P

men:

men: contra qui tacet, amici cogitationes non communicat, et tamen plerumque recte et sapienter agit.

Itaque distinguenda veritas a *veracitate*: illa est res indifferens et iam definita; haec semper virtus est, ac ita definiti potest, quod sit virtus, qua quis animi cogitationes sine simulatione ac dissimulatione communicat cum illo, qui ius vel perfectum, vel imperfectum habet, veritatem ab illo exigendi.

§. 8.

Ergo facile patet, quid sit MENDACIVM? Illoc non opponitur veritati, sed veracitati, adeoque est vitium, quo quis animi cogitationes supprimit, vel aliter, ac re ipsa comparatae sunt, enunciat ei, qui ius perfectum, vel imperfectum habet, veritatem ab eo exigendi.

Ergo 1. mendacium semper est iniustum, quia alterius ius perfectum vel imperfectum laedit, adeoque 2. turpe, et 3. poenadignum. Hinc apud PHILOSTRATVM in *vita Apollonii Thyan.* legimus: Indos philosophos eos, qui semel mentiti, et in mendacio deprehensi fuerint, ab omni honorum aditu exclusisse, quia communem hominum societatem mentiando fraudarint; 4. in aestimando tamen mendacio respiciendum esse ad animum, ex quo promanarit; alii enim mentiuntur ex sola leuitate animi, vel consuetudine praua; hi se turpiter prostituunt; alii ex dolo malo, ut alios decipiant, damnoque afficiant; hi grauiore animaduersione digni.

§. 9.

Quid ergo est FALSILQVIVM? Resp. esse sermonem cum cogitatione animi non conuenientem, quo quis vitur aduersus illum, cui nec ius perfectum, nec imperfectum est veritatem exigendi; e. g. si quis curioso sciscitanti, quantum quis pecuniae habeat, respondet, se tam adcurate non scire, vel, se satis diuitem esse; falsum loquitur, nec tamen ideo mendax est, quia alter nec perfectum, nec imperfectum ius habet, id ex illo sciscitandi; contra si quis magistratui censum acturo ita respondeat, mendax erit.

Ergo 1. falsiloquium in se non est iniustum; vbi enim alteri non est ius, ibi nec eius ius laedi potest; 2. illud non in se turpe, sed aliquando laude dignum, e. g. si quis liberos scire nolit diuitias; 3. adeoque nec poenam mereri; 4. illud nec ex dolo malo

pro-

proficisci, nec ex leuitate animi, sed ex prudentia et sagacitate animi, adeoque nec decipiendi, nec nocendi caussa proferri.

§. 10.

Iam ergo facile ostendi poterit differentia inter mendacium et falsiloquium: 1. omne mendacium est falsiloquium, non sed omne falsiloquium est mendacium; 2. mendacium opponitur veracitati, falsiloquium veritati morali; 3. quum ergo veritas sit nec virtus, nec vitium, idem dicendum erit de falsiloquio: contra quum veracitas sit virtus, mendacium vitium esse oportet; 4. mendacium semper est contra amorem, adeoque iniustum, falsiloquium aliquando ipse amor exigit, ergo iustum; 5. mendax amittit omnem fidem; falsiloquio tanto magis creditur, quando apparet, cum non enunciare, quidquid in buccam venit.

CAPVT XI.

DE OFFICIO IVRANTIVM.

§. 1.

Species sermonis est *iusiurandum*, vnde de eo quoque agitur, et quidem consideratur 1. *definitio*, §. 1. 2. *quid iustum sit circa iusiurandum*? §. 2--5. 3. *effectus*, §. 6--9. 4. *variae species et diuisio*, §. 10.

Iusiurandum, quod omnes gentes pro sanctissimo fidei pignore habuerunt, recte definitur ab auctore, quod sit 1. *assertio*; ergo vbi nihil asseritur, vel nihil saltem tanta asseueratione dignum occurrit, nec iusiurandum hoc dici potest, sed leuitas, e. g. accepi litteras plenas, me Hercule, amoris et humanitatis; 2. *religiosa*; ergo leuitas denuo est, non iusiurandum, si quis iurat per res, quas religiose non veneratur, e. g. per oculos, per animam, per coelum; 3. *qua diuinæ misericordiae renuntiamus*; id enim sibi volunt verba: *ita me Deus adiuvet*, id est, Deus misericors me non adiuuabit, si sciens peierauero; 4. *et vindictam diuinam in nos deposcimus*; hoc ex antecedente iam sequitur, non potest enim non sequi vindicta, vbi misericordiae non est locus; 5. *nisi verum dica-*

carnus, ergo conditionalis est haec interpretatio, adeoque in se non mala, si quis salua conscientia iurat.

Oblervat TITIVS ad hanc §. *obs.* 257. minus adcuratam hanc esse definitionem, quia et periurio quadret; sed parum solida est haec oblervatio: nam periurium etiam est iusiurandum, adeoque et illi quod drare debet definitio.

Qu. *an licita sint iurairanda?* saepe dubitatum, 1. quia sint confessio perfidiae humanae; si homines essent virtutis studiosi, sine iureiurando verum dicerent; iam vix vlli etiam iurato credimus; nonne ita confitemur perfidiam humani generis? 2. Christus manifesto prohibuit omne iusiurandum. MATTH. V. 34. *omnino non est iurandum*, quod et repetit IACOBVS Apostolus.

Sed resp. ad 1. hoc argumentum tantum probat, melius sese habituras res humanas, si iureiurando non esset opus, sed inde non sequitur, illud illicitum. Melius sese haberet genus humanum, si non indigeremus iudiciis, poenis, bellis; sunt haec manifesta confessio iniustitiae, scelerum, pravae cupiditatis hominum, inde tamen non sequitur, vt illicita sint. Ad 2. ex aliis scripturae locis patet, iurairanda licita esse. Dicit Psalmista, Ps. XV. 1. *Domine, quis deget in tabernaculo tuo? quis in quo sacro monte habitabit?* et paucis interiectis respondet v. 4. *qui, quod iuravit alteri, non reuocat.* Videmus etiam, ipsum CHRISTVM iurasse: *amen*, quod sanctissimum apud Iudaeos erat iusiurandum. Quin et Apostolus dicit in *Epist. ad Hebr. VI. 16.* *omnium controuersiarum finis est ius iurandum ad rem confirmandam.* Ergo Christus non absolute prohibuit ius iurandum, sed vult, ne temere nullo deferente sponte iuremus.

Nos argumentamur: quidquid nec reuerentiam erga Deum; nec amorem erga proximum, nec amorem erga nos ipsos violat, illud iure naturae est licitum, atqui ius iurandum, cet. ergo, cet. Minorem inde probamus, quia non violat reuerentiam numinis, quin potius illam eo ipso testamur ac profiteamur, dum inuocamus vindicem: nec violat amorem proximi, quia illum potius eo ipso ex incerto certum reddimus, eique scrupulum eximimus; denique nec amori nostri repugnat ius iurandum, quia non prouocamus in nos vindictam pure, sed conditionate, adeoque semper in potestate nostra est, diram hanc vindictam euitare.

Eius finis §. 2. forma §. 3. 4. modus illud praestandi §. 5.

§. 2.

§. 2.

Iam quaeritur, *quid iussum circa ius iurandum?* id vero iudicandum est ex fine iuris iurandi, qui alius est *1. respectu eius, cui iuratur*, nempe ad eo magis obstringendum iurantem, ut vel veritatem dicat, vel promissum praestet. Is finis est iudicis, dum ius iurandum defert testi, is finis Abrahami, dum in verba sua adigit Eleasarum. Ratio est, quia vidimus, iurantem debere renuntiare divinae misericordiae, et in se prouocare vindictam diuinam, si sciens fallat: at quum nemo praesumatur immemor salutis aeternae, merito etiam praesumitur, eum veritatem dicere, fidemque seruatorum; quia ita iurat; 2. ex parte iurantis finis est, ut vel alterum certiore reddat, vel suspicionem a se amoliat, vel liti finem faciat: nam quum iusiurandum vel praestetur de re praeterita, vel futura; illud praestatur, ut alterum certiore faciam, litemque finiam; hoc, ut suspicionem perfidiae a me amoliar, quae de re plura §. *vlt. huius capituli.*

§. 3.

Deinde quaeritur, *per quid iurandum?* Resp. hoc patet ex definitione: est religiosa adseueratio; ergo non iurandum *1. per res*, quas quidem admiramur, sed non religiose colimus; hinc absurda iuramenta Iudaeorum per caelum, terram, templum, urbem Hierosolymae, *Matth. V. 34. XXXIII. 16. seqq.* 2. exemplo Socratis per caput, anserem, canem, arbores. Excusant aliqui haec iuramenta Socratica, exissimantque cum PORPHYRIO, *III. de abstinentia ab anim.* Socratem iurasse per creatorem capitis, anseris: at hoc verbis repugnat, caput enim non significat creatorem capitis; 3. absurda ergo etiam sunt iuramenta per res nobis carissimas concepta, et *8. per animam, per oculos, cet. OVID. Amor. III. 3. 13. seqq.*

Perque suos illum nuper iurasse recorder,

Perque meos oculos; et dolere mei.

Et VIRGILIUS *Aeneid. VIII. 300.*

Per caput hoc iuro, per quod pater anse solebat.

Hinc et Christiani veteres iurare volebant per genium et salutem principum. Vid. TERTULLIAN. *in Apologet.*

Defendit quidem quodam modo haec iuramenta SANDERSON; *de iuram. oblig. pract. I. §. 4.* sed eodem modo, ut PORPHYRIUS

sensum nimirum esse, iurari per capitis creatorem, cet. Sed ad hoc iam respondimus.

PVFENDORFF. in *iur. nat. et gent.* III. 2. 3. alio colore illa diluit, quod nempe homo inuocet Deum, vt, si sciens fallat, Deus se puniat in parte illa alias carissima, anima, capite, oculis. Sed id quoque admitti nequit; quid enim tunc fiat iuriurando per salutem principis? si sciens fallo, puniri principem, sensus erit, Nugae! Eiusmodi impietatem in Regulo caussidico reprehendit PLINIVS, *Epist.* II. 20. 21. Quomodo homo Deo praescribere potest; quam poenam a se exigere debeat supremum numen? superioris est, poenam definire, non delinquentis; 4. per res quoque abstractas frustra iuratur; tale fuit Pythagorae iusiurandum per numerum quaternarium; iusiurandum equitum a Carolo Gonzaga duce Mantuano creatorum per nobilitatem maiorum. GRAMMOND. *Hyst. Gall.* V. Turpe sane est, ludere in re tam seria; 5. vnus ergo superest, DEVS omniscius et iustus, per quem iurandum, eum enim solum colimus, eum veneramur; quod et Ethnici non ignorarunt, quippe iurantes per Iouem, quem verum Deum putabant.

§. 4.

Praeterea quaeritur, *quomodo concipiendum sit iusiurandum?* Denovo id discimus ex definitione; est enim religiosa assertio, adeoque procul dubio adtemperandum, cuiusque religioni; sic absonum esset, Iudaeos adigere, vt iurent per Christum; Christianos, vt iurent per Mahomedem.

Ratio est, quia iuratiuranda inuenta, vt homines metu numinis adigantur ad veritatem dicendam, seruandumque promissum; quomodo vero metu numinis, quod vel non existeret, vel falsum esse putant, adiguntur ad verum dicendum; potius eo audacius mentientur, quo minus sibi ab eo metuunt.

Sed quaeritur, *an periurii reus sit, qui per falsos Deos iurauit?* Adfirmatur, 1. quia religiosa fuit assertio, scilicet secundum persuasionem iurantis; 2. quia, quantum in se fuit, Dei maiestatem violauit, quamuis in persona Dei errarit. Non ideo excusandus erat Scaeuola, quod occisurus Porcennam regem, eius administrum occidit. SENECA, *de benef.* VII. 7. puniuntur, quia tamquam Deo fecit, opinio illum nostra ac sua obligat poenae.

Similiter quæri solet, *an salua conscientia ferre possimus formulam iusiurandi falsae religioni adtemperatam?* id quoque adfirmatur; non

non enim probamus iurantis religionem, sed tantum ea vtimur ad veritatem eruendam. Quemadmodum enim a foeneratore improbo mutuam sumentes pecuniam, non ideo probant improbum foenus, eo tamen vtuntur, vt necessitatibus suis consulant: ita idem statuendum de eiusmodi iuribus iurandis. GROT. *libr. II. cap. 13. §. 12.* et ibi ZIEGLERVS.

§. 5.

Proxima est quaestio, *quomodo iusiurandum praestandum?* Respondet auctor 1. animo deliberato, id est, eo animo, quod velit iurare, est enim adsertio religiosa, quae sine intentione concipi nequit. Hinc facile patet, a) non iurare secretarium iudicii, qui iusiurandum praelegit, b) nec docentem, qui formulam iurisiurandi auditoribus recitat, nec c) lectorem, qui istam scriptam in libro reperit. Hinc quum Acontius inscripsisset iusiurandum pomo, peritumam Cydippen, si alium amaret, quam Acontium, et Cydippe haec verba legisset; primum dubitauerat, an non obstricta sit? sed postea rectius ratiocinatur apud OVID. *Epist. Heroid. XXI. 135. seqq.*

Quae iurat mens est; nil coniurauimus illa.

Verba, suis frustra viribus orba tenes.

Illam fidem dictis addere sola potest.

Et paullo post.

Consilium prudensque animi sententia iurat;

Et nisi iudicii vincula nulla valent.

Si tibi coniugium volui promittere nostrum;

Exige polliciti debita iura tibi:

Sed si nil dedimus, praeter sine pectore vocem;

Verba suis frustra viribus orba tenes.

Non ego iuravi: legi iurantia verba. cet.

2. contra non excusari a periurio, qui iurauit deliberato animo, posteaque causatur, se non id intendisse, vt obligaretur. a) Contradictorium est, velle iurare, et nolle tamen iureiurando obligari; b) ita frustraneum foret omne iusiurandum, nec vmquam illo fretus posset credere, alterum se non decepturum. Apud RADEVICVM in vita Friderici I. imp. II. 25. Mediolanenses: *iurauimus quidem, sed iuramentum adtendere non promissimus.*

§. 6. 7.

Iam ergo de effectu iurisiurandi seu de obligatione iurisiurandi. Primo certum est.

x. Illud

1. Illud obligare ad veritatem dicendam, seruandumque promissum; fuit id *a*) ex principio nostro, ex quo cultum diuinum deduximus, Deum esse amandum amore reuerentiae. Ex quo colligimus, eundem esse honorandum timendumque: an dixeris vero, illum honorare ac timere Deum, qui deliberato animo peierat? *β*) idem fuit ex amore proximi; iubeat ille proximum amare tamquam nos ipsos; ex quo collegimus superiore capite, sermone esse vtendum non ad alterum decipiendum, sed ad vtilitatem eius promouendam. Iam quum sermonis species sit iusiurandum, eo quoque vtendum erit in proximi non detrimentum, sed vtilitatem; id vero non faciunt periuri: periurium ergo repugnat iuri naturae; ergo obligationem producere iusiurandum est certum; illud tantum quaeritur, qualem?

2. Obligatio iusiurandi est accessoria, adeoque semper praesupponit, nos iam ante ad aliquid obstrictos esse; quomodo enim possem in me vindictam diuinam prouocare, si hoc non praestem, nisi ad praestationem obstrictus essem. Poena sane praesupponit delictum, e. g. ciues praestant homagium; tunc sane non obligari primum incipiunt ex homagio, sed iam antea obligati erant, eamque obligationem tantum maiorem efficiebant praestito illo iureiurando. Ex eo vero patet, *a*) iusiurandum non tollere obligationem, accessorium enim non tollit principale; sic absurdum esset, debitorem ideo denegare solutionem, quia iurauit, se non soluturum; *b*) iusiurandum dolo malo elicitum non obligare; errans enim dum iurat, ponit obligationem, quae, dum non adest, nec iusiurandum potest obligare: accessorium sequitur suum principale; exemplum inligne *Iosuae I.* *c*) idem etiam valere, si iusiurandum vi metuue iniusto extortum sit, nam tunc deficiente obligatione principali, itidem cessabit accessorium, e. g. qui latroni cogenti iurauit, se 1000. daturum. Obicit GROTIUS, *iis quidem non nasci latroni, sed nasci tamen Deo?* Resp. id falsum esse, quia Deus eius modi iusiurandum non acceptat, quia nihil iniustum acceptare potest; *d*) rem illicitam non confirmari, vel licitam fieri iureiurando; sic non obligabatur Dauides, quum per iracundiam iurasset, se Nabalis vniuersam familiam euersurum ob denegatum diuinam prouocare *1. Sam. 25.* contradictorium enim est, vindictam diuinam prouocare in eum casum, si ab illicito facto abstineamus. Peccat, qui hoc modo iurat; at non peccat, qui hoc iusiurandum non seruat, sed bis, peccaret, si seruaret. Canonistae hoc concedunt de iureiuran-

do super re iure diuino prohibita praestito ; at quae legitimis humanis prohibentur, ea iureiurando praestito praestanda putant. Sed id falsum, Deus enim etiam humanas leges seruari vult; ergo iusiurandum non immutare naturam pacti, cui accessit ; itaque priora sponsalia praeferenda, licet vel maxime posterioribus iusiurandum accesserit.

§. 8.

Haec de obligatione iurisiurandi : proximum est, vt et de eiusdem interpretatione agamus. Primo ergo tenenda regula :

I. In adimplendo iureiurando omnes cauendae sunt cauillationes,

•) cauillationes enim in iureiurando sunt ad decipiendum comparatae ; decipere vero iureiurando est peierare ; β) iuranti res est cum Deo omniscio, hunc vel fallere velle absurdum ; γ) cauillans verbis inhaeret, Deus autem mentem intuetur. Hinc turpiter egit captiuus, qui dimissus iurauit, se in castra rediturum, et mox aliquot passus progressus in castra remeauit, ac si aliquid oblitus esset, et sic se defunctum iurisiurandi religione putauit. GELL. *Noct. Attic. VII.* 18. Comes de Fontaine quum iurasset, se nec equitem, nec peditem aduersus Gallos pugnaturum, lestica vectatus est. Addit auctor regulam :

II. Quibusdam casibus iusiurandum esse stricte interpretandum,

casusque eius modi recenset : α) si iuratum in alicuius odium ex ira alioque animi impetu, quale exemplum est *Iud. XXI.* Ita apud PLVTARCH. Antigonus Mithridatem occidere constituerat, remque crediderat Demetrio, eumque adegerat iureiurando, quod tacere id velit ; hic amici salutem metuens hasta inscripsit arenae : *fuge Mithridates* ; β) quoties quid iureiurando promissum ex necessitate, quod non seruari rei publicae intersit ; e. g. David, 2. *Sam. XVII* 11. 23. Simei sibi maledicenti promiserat impunitatem, et tamen Salomoni filio mandauit 1. *Reg. II.* 8. ne incruento fato iste nequam defungatur ; γ) si tacita iuriurando insit conditio, aliquem honesti quid petiturum ; hinc stolidi religio Herodis occidentis Ioannem Baptistam, quia priuignae saltatriculae optionem iuratus fecerat quiduis petendi. Haec auctor ; sed pleraque, quae affert, exempla ad cauillationem pertinent.

Potius ita tenendum, aut absurdum, quod vel impossibile, siue physice siue moraliter, promissum, tunc peccatum quidem, sed iusiurandum non seruandum est. Ita recte priuignae potuisset Herodes nega-

Heineccii Prael. Pufendorf.

Q

re

re caput Ioannis ; Ita et Salomo recte matri negavit, quod ipsa petebat, quamvis iurasset, 1. *Reg. II. 20.* Aut iureiurando quid promissum, quod non est impium, absurdum, impossibile, tunc cauillatione non adimpletur, (per *reg. I.*) adeoque peccauit captiuus ille, qui in castra obiter remeavit : nec minus peccauit Timoleon, qui quum Milarcho iuratus promississet, se eum non accusaturum ; prodeunte illo in concionem dixit : *ego illum hominem non accusabo, quia iurato pactus sum, at interfici celerrime iubeo.* POLYAEN. *Stratagem. libr. V.*

§. 9.

Sed praecipue quaeritur, quodnam sit fundamentum interpretationis iurisiurandi? recte respondetur, dispiciendum esse ad sententiam et scopum, non iurantis, sed deferentis ; nam 1. cuius causa praestatur iusiurandum, ad illius mentem iurandum est ; at praestatur praecipue deferentis, non iurantis causa, ergo cet. 2. si ex mente iurantis intelligendum esset iusiurandum, vniuersusque posset reservationibus mentalibus pro lubitu uti, et sic frustraneum foret iusiurandum, e. g. iurauit Vlysses, se pacta, quae cum Antenore iniisset, seruaturum, ac interea cum alio Antenore pactus erat prodicionem Troiae ; 3. omnis delatio et acceptatio iurisiurandi est pactum ; pacto enim vel promisso me obstrinxi ad animi sensu de re, de qua quaerit, reuelanda ; ergo contra pactum ago, si de alia re iuro, quam ille interrogauit. Recte hoc intellexere Romani ; hinc quum Censores ex aliquo quaererent : *ex animi tui sententia ; habesne uxorem?* et hic responderet ; *non sane ex animi sententia* ; Censores eum seuerè notarunt ; respondere enim iuratus debebat ex mente Censorum, qui non interrogabant, an uxorem ex animi sententia duxerit? sed an habeat uxorem?

Aliud 1. si quis proprio motu iurato quid promiserit ; tunc enim iusiurandum est interpretandum ex mente iurantis, quia nemo detulit ; promisit quis iurato, se templo daturum calicem, et prouisoires iam exigunt aureum.

Aliud quoque obtinet, 2. si iurans ex mente deferentis errauit, aliudque intellexit, quam alter scire voluit. Sic si ille cuius Romanus in sensu interrogationis censoriae errasset, non peierasset, dum respondit : *non sane ex animi sententia.*

§. 10.

Supereſt vltima pars huius capitis, in qua quaeritur, *quotuplex ſit inſiurandum*? Praeſtatur 1. aut de re praeterita, et tunc dicitur *aſſertorium*, e. g. iurat reus, ſe nihil debere: aut de re futura, tunc dicitur *promiſſorium*, e. g. homagium, inſiurandum Salomonis, Herodis, Ahaſueri; 2. aſſertorium praeſtatur vel de facto alieno, et tunc eſt *teſtimoniale*, *ein Zeugen-Eyd*; vel de proprio, et tunc eſt *litis deciforium*, de quo PAVLLVS *Epiſt. ad Ebr. VI, 16. inſiurandum terminat omnem liem*; 3. *litis deciforium* vel deſertur a parte parti, et vocatur neceſſarium, vbi aut iurandum, aut reſerendum eſt, e. g. actor deſert reo inſiurandum ſuper deſposito; vel a iudice alterutri parti, et tunc dicitur iudiciale, e. g. Caiphas ad iurabat Ieſum, an ſit Chriſtus? 4. iudiciale aut deſertur ſuper quaestione, quantum debeatur? aut ſuper quaestione, an aliquid factum? priore caſu vocatur inſiurandum *in liem*; poſteriore *purgatorium*, ſi quis indicia contra ſe militantia iureiurando elidit; modo *ſuppletorium*, quoties ſemiplenam probationem ſupplere iubetur iureiurando. At poſtrimum et iuri Romano, et rationi repugnare, docuimus in *Syllog. opuſc. Exerc. XVI. de lubricitate iuriſurandi ſuppletorii*. Nam 1. ita quis ſit teſtis in propria cauſa: et 2. occaſio datur innumeris periuris ob praemium periurii paratiſſimum, nempe victoriam in cauſa.

CAPVT XII.

DE OFFICIO CIRCA ADQVIRENDVM
RERV DOMINIVM.

§. 1.

Alterum inſtitutum humanum, ex quo fluunt officia hypothetica, eſt DOMINIVM. Vnde hoc capite diſquiritur 1. *de domini origine*, §. 1. 2. 2. *de eiſdem natura*, §. 3. 4. 3. *de modis illud adquirendi*, §. 5. *ad fin.*

I. Quod ad domini originem adinet, de ea ſubtiliter philoſophati ſunt veteres et recentiores, imprimis ALBERTI, *Comp. iur.*

Q 2

nat.

nat. part. II. §. 4. dominium deducit ex praecepto diuino *Genes. I. 28.* Sed 1. Deus ibi non distribuit res singulis futuris hominibus, adeoque nec dominium aliquod singulare constituit; 2. locus ille dat facultatem dominium constituendi, non ipsum constituit dominium; 3. versamur hic in iure naturae, cuius origines et conclusiones non ex Sacra Scriptura, sed ex ratione deducendae.

Ceterum recta ratio statim cognoscit, Deum ius dedisse vtendi rebus omnibus, quae ad conseruationem nostram pertinent; nam 1. qui dedit existentiam, voluit vt existeremus, qui vult uos existere, vult vt mediis vtamur, sine quibus conseruari non possemus. Quumque sine rebus naturalibus passim in orbe obuiis conseruari non possemus, sequitur, vt earum vsum nobis ac ius vtendi dederit; 2. idem probat finis Dei; is tamquam ens sapientissimum nihil fecit frustra; quum vero tam multa creauit, quae aliis creaturis vsum non praestant, e. g. aurum, reliqua metalla, materias, ex quibus vestes, cibi lapidiores, aedificia, suppellex cet. confici possunt, procul dubio Deus ea creauit nostro bono, adeoque ius nobis dedit iis vtendi.

Equidem Stoici longius procedunt, omniaque in vniuerso mundo hominis causa condita existimant, quod principium etiam in iure nostro regnat, §. 37. *Inst. de rer. diuis. CICERO de offic. libr. I. cap. 6. de natur. Deor. II. 62. seqq. de finibus III. 20.* Sed multa sane sunt, ad quae nemo mortalium vmquam penetrauit, e. g. in medietullio terrae, in mari, vt taceamus de iis, quae fortassis in corporibus caelestibus occurrunt; hinc satis est, si dicamus, Deum ius nobis dedisse vtendi fruendi omnibus, quae ad conseruationem commoditatemque nostram faciunt. Eleganter SENECA, *de ira, II. 27. nimis nos suspicimus, si digni nobis videmur, propter quas tanta moueantur.*

§. 2.

Posito hoc iure recta ratio facile cognoscet, *quomodo sensim indetatum sit dominium*, nimirum 1. vbi ius nobis datur rebus omnibus vtendi, ibi datum est etiam ius illas res occupandi; occupatio est facti, fuisse ergo oportet statum ante occupationem dominio contrarium; iam antequam res occuparentur, erant nullius, et omnibus tamen ius erat illas occupandi, ceu §. 1. demonstrauimus, ergo ante occupationem erat communio negatiua. Communione hanc negatiua definitimus eum statum, quo res omnes fuere quod ad proprietatem nullius, quod ad ius vero occupandi, omnibus patebant.

2. Occupatio porro fit dupliciter, vt recte obseruauit GROTIUS, vel per vniuersitatem, vel per fundos seu rectius per singulos: *per vniuersitatem*, quando tota multitudo rem occupat, eamque inter se diuidit, e. g. Israelitae terram Canaan; *per singulos*, quando singuli singula sibi occupant, veluti Tartari, aliqui populi Nomades. Itaque multiplicato primum genere humano necesse fuit integras familias, et inde natas gentes totas prouincias communi nomine occupasse, easque communes habuisse: inde nata altera communio, quam positiuam appellamus. Est vero *communio positiua* is status, quo multi simul rem communi nomine occupant, vt sit saltim multitudinis occupantis, et alij ab eius vsu excludantur.

Vnde facile patet differentia communionis negatiuae et positiuae: in illa enim 1. res sunt nullius, in hac ad multitudinem, quae eas occupauit, pertinent; 2. in illa vsus patet promiscue omnibus, in hac tantum illis, qui sunt de ista multitudine; 3. ibi excluditur nemo, hic omnes praeter illam multitudinem. Rebus sic in communionem positiua existentibus, commode uti non potuere gentes integrae, vt illae omnibus suffecerint; itaque non potuerunt non inter se conuenire, cuiuslibet de illa multitudine ius futurum esse, quaedam sibi, quibus opus esset, occupandi; ac proinde singuli sibi occuparunt partem agri, arbores, aliaque necessaria ad sustentationem familiae. Eo facto statim natum est *dominium*; quaecumque enim ex communibus rebus consensu alterius occupo, ea sunt occupantis, adeoque esse in dominio incipiunt.

Iam facile ostendi potest discrimen inter communionem positiuam et dominium. Nam 1. in illa multi sunt domini, hoc introducto vnicus; 2. in illa excluduntur omnes extra illam multitudinem, hoc introducto etiam ii, qui sunt de multitudine illa; 3. in illa nihil est singulorum, hoc introducto singula habent suum dominum, adeoque sunt singulorum, qui occuparunt. Non sine causa addimus, *qui occuparunt*; paullo post enim §. 4. ostendemus, ne hodiernum quidem omnia occupata esse, adeoque multa nondum facta esse singulorum, sed partim in communionem positiua, partim in negatiua permanisse.

Totus ergo ordo, quo introductum dominium, hic est: a) omnia fuisse in communionem negatiua, b) multiplicatis hominibus singulae familiae, et natae inde gentes occuparunt totos terrae tractus, et ibi constituerunt communionem positiuam; c) denique singuli de ista gente consentientibus reliquis occuparunt res singulas sibi necessarias, et sic natum est dominium.

Id quod cum S. S. egregie congruit; dum enim Deus dixit: *crecite et multiplicamini*, cet. constituit *communione negatiua*; dum homines tam posterius Adami, quam filii et posterius Noachi sibi novas sedes quaesiuere, nata est *communio positiua*; dum denique singuli loca quaedam inculta occupare, sibi que colere coeperunt, natum est *dominium*: quin eo modo sese res habitura esset, si gens quaedam hodie immigraret in insulam quamdam incultam.

§. 3.

Haec de domini originē: progredimur II. ad *naturam domini*, quae commodissime explicabitur per definitionem.

Est *dominium* ius rem corporalem sibi ita habendi, ut ea soli utamur, nec quisquam ea sine consensu nostro utatur.

Est ius.) Vbi quique enim ex parte Dei est concessio, ibi ex parte nostra est ius rem concessam vltibus nostris adhibendi; atque ex parte Dei esse concessionem, probauimus §. 1. est ergo ex parte nostra ius.

Rem corporalem habendi.) Res enim incorporeales sunt iura; iura rebus vel personis inhaerent; si rebus inhaerent, sunt consequentia domini, non ipsa in dominio sunt; si personae inhaerent, sunt attributa personae, ergo plane non cadunt sub dominium.

Habendi.) Ergo domini initium est possessio; habere enim dicimus, quae occupauimus, at semel facta occupatione, possessio et animo retinetur, id est, maneo dominus et possessor, quamuis rei non insistant, quia nemini ius est, rem semel occupatam occupandi.

Nec quisquam ea sine consensu nostro vti poterit.) Negat hoc *TITIVS*, *obseru.* 282. sed male; nam ne intelligi quidem potest dominium sine facultate alios ab eius usu excludendi; fatetur hoc *TITIVS*, dum concedit, hanc alios excludendi facultatem dominium consequi, negat tantum, eam ad domini essentiam pertinere.

Sed argumentamur: Sine quocumque non intelligitur dominium, id pertinet ad eius essentiam; sine facultate alios usu rei excludendi non intelligitur dominium; ea ergo ad domini essentiam pertinet. Sed fraudi fuit *TITIO*, quod negauit communionem negatiua, putauitque, statuendum Adamum, quamuis adhuc solus in hoc terrarum orbe esset, verum tamen ac actuale dominium habere; quod paradoxum ipse aliter saluare non potuit, quam ut negaret, ad domini essentiam pertinere ius excludendi alios.

Cete-

Ceterum quamvis hodie dominium varie diuidi soleat, veluti in *plenum* et *minus plenum*, hocque tribuatur domino et vasallo in feudis, domino emphyteuteos et emphyteutae in re emphyteutica, domino superficiei et superficiario in superficie, facile tamen patet, haec omnia legibus pacisque humanis esse introducta, adeoque ex iure naturae deriuari non posse; iure enim naturae per occupationem quisque plenum ius consequitur, adeoque dominium omne est plenum, nullisque circumscriptum limitibus.

§. 4.

Diximus de natura et definitione domini: proximum est, vt et quaestionem soluamus, *quibusnam in rebus dominio locus sit?* Hoc ex superioribus principiis ita eruimus, 1. quia homines a primaeua illa communione negatiua et positiua discesserunt, quod res communes non sufficerent omnibus; hinc consequitur, vt non opus sit dominio rerum inexhausti vsus, quales sunt aer, aqua profluens: 2. quumque ideo in dominium redactae sint res, quia ad conseruationem nostram facere videbantur, sane in dominio habere nemo cupiet res, quae nulli vsui sunt, e. g. muscas, mures, araneas, nec ideo quisquam furti actione pulsatur, quod nobis aliquot mures ex aedibus clam subtraxit; 3. denique quum possessione opus sit ad dominium adquirendum, eaque sine apprehensione ac custodia non intelligitur, non possunt in domino esse, quae custodiri nequeunt, id est, a quorum vsu alter excludi non potest, itaque ex hac quoque ratione aer et aqua profluens non sunt in domino. OVID. *Metam.* VI, 349. *seqq.*

Quid prohibetis aquis? vsus communis aquarum.

Nec solem proprium natura, nec aëra fecit,

Nec tenues undas.

Itaque requisita rerum, quae dominium recipiunt, sunt tria: 1. vt sint exhausti vsus, nam alias dominio non opus est; 2. vt sint utiles, nam alias dominium habere nolumus; 3. vt possint custodiri, nam alias domini esse non possumus.

Iam facile decidi potest quaestio de *dominio maris*, de qua adhuc tanto animorum motu disceptatum. Dominium maris ex Anglis defenderunt IO. SELDENVS, in *mari clauso*, seu de *dominio maris*, IONSTON, *rerum Britannic. libr. XIII.* GVIL. VELWOODVS,

de dominio maris, iuribusque ad dominium spectantibus. Ex Italis PETR. BAPTIST. BYRGVS, de dominio Genuensis rei publicae in mari Ligustico. In gratiam gentis Danicae et Noruegicae IO. ISAAC. PONTANVS scripsit libros duos *discussionum historicarum de mari libero, aduersus Io. Seldeni mare clausum*. Contra hoc dominium maris scripserunt praecipue Belgae, GROTIUS de mari libero, THEOD. GRASWINCKEL in *Vindiciis maris liberi contra Seldenum*, VLR. HYBERVS, *Digress. part. I. libr. III. cap. 14. 15. 16.* et nouissime Vir ill. CORN. VAN BYNKERSHOECK in *Dissert. de dominio maris*, qui modestissimus. Harum gentium intererat de ea re disputare propter nauigationes Indicas, itemque propter capturam haliecum. Sed Bataui vetera principia paulatim deferuerunt, postquam de societate Ostendensi agi coeptum. Nullo partium studio hac de re scripserunt IAC. GOTHOFRED. de dominio maris, IO. STRAVCH. de dominio maris, IO. HENR. BOECLERVS, in *Min. maris domino*; immo et auctor noster alienus a partium studio hanc quaestionem tractasse videtur in *Iur. nat. et gent. libr. III. cap. 5. §. 5.*

Quod ad rem ipsam attinet, 1. formandus est status controversiae, non esse quaestionem de Oceano, qui nec exhausti vsus esse, nec custodiri posset, adeoque non esse potest in dominio; sed de mari quodam prouinciae proximo; itemque non quaeri de iis rebus, quae in mari inexhausti sint vsus, e. g. de nauigatione sola, de aqua marina, cet. sed de mari, quatenus exhausti vsus est, e. g. quoad commercia, vnionum piscaturam, capturam piscium pretiosorum, cet.

Quaestio ergo est, an mare particulare quoad res exhausti vsus ita sit in dominio, vel potius imperio, alicuius gentis, vt haec alios eius vsu excludere possit? Id affirmamus, quia omnia adfunt requisita: 1. est exhausti vsus, 2. illae res summam praestant utilitatem genti alicui, vel rei publicae, 3. potest classibus et nauibus occupari et custodiri.

Agnoscat hoc quoque ill. BYNKERSHOEK. Id tamen sibi persuadet, sic mare non diu posse esse in dominio, quia classibus domum reuersis statim cessat possessio; sed audiuius, possessionem semel adquisitam etiam animo retineri.

Haec demonstrant, mare esse posse in dominio, sed idem aequum esse, vt dominium illud vicinis prouinciis permittatur, ita probatur: amor erga proximum exigit, vt quod nobis denegari nolumus

nolimus, id nec aliis denegemus; nos iam iniquum putamus, si quis nobis negaret vtilitatem ex ea re, ex qua alias omne incommodum sentimus, ergo nec nos iniquitatis absolui poterimus, si provinciae denegamus commodum maris, quae incommoda quotidie sentit.

Obiicitur, 1. mare esse inexhausti usus; ad id iam respondimus; 2. mare non esse in commercio; est petitio principii, de eo enim quaestio est; 3. esse fluidum, adeoque non posse custodiri; Resp. potest omnino per classes, praeterea aqua marina est fluida, non mare; 4. mare lic esse accessorium, terram principale, mare vero plerumque terra maius esse. Resp. quid tam? America Hispanica accessorium est Hispaniae, et ea tamen Hispania multo maior est.

Ceterum effectus huius domini sunt, 1. prohibere nauigantes; piscantes, vias colligentes certis locis; 2. leges maritimas et nauticas dare; 3. piratas persequi, ab iisque supplicium sumere; 4. vectigalia colligere a praeternauigantibus. Signum eius domini Venetis est desponsatio cum mari; alibi demissio veli, cuius vestigium in antiquitate quoqueprehendit LIPSIVS *Elect. I. 23. Conf. LOCCEIVS, de iure maritimo, cap. 4. §. 10.*

§. 5.

Progredimur III. ad *modos acquirendi dominium*, quos auctor recte diuidit cum GROTIUS, *libr. II. cap. 3. §. 1. in originarios*, quibus dominium adquirimus rei in nullius dominio constitutae, e. g. si quis acquirit examen apum; 2. *deriuatiuos*, quibus adquirimus dominium rei in alterius dominio iam constitutae, e. g. si quis praecua emtione vel donatione aluearium a rustico traditum accipit.

Originarios PUFENDORFFIVS subdividit in eos, qui tales sunt a) *in se*, quando ipsam rei substantiam antea in nullius dominio constitutam adquirimus, e. g. examen apum: b) *secundum quid*, quoties adquirimus incrementum, quod ei accedit, e. g. mel.

Obiicit TITIVS, *Obseru. 290.* hanc subdivisionem etiam ad modos deriuatiuos pertinere? sed nego; fructus enim et accessiones non traditos accipimus tamquam fructus, sed tamquam partem substantiae, nos vero loquimur de fructibus futuris.

Iam agitur 1. *de modis originariis a) in se et simpliciter talibus*, §. 6. b) *secundum quid talibus*, §. 7. 8. 2. *de modis deriuatiuis*, §. 9. *ad fin.*

Heineccii Prael. Pufendorf.

R

§. 6.

§. 6.

Modus *in se* et *simpliciter* talis est *occupatio*, quae est apprehensio rerum nullius, animo sibi habendi facta. Requiritur ergo.

1. *Vi res sit nullius*. Quae nullius sunt, cedunt occupanti, quia nemini est ius contradicendi, meque rei usu excludendi; nullius autem potest esse res, partim quod nullum habuit dominum, e. g. piscis mari eiectus; partim quod dominus rem pro relicta habuit, e. g. pecten, quem caluūs apud PHAEDRVM inuenit; et hoc iure thesauros nostros facimus, si vere tales sint, id est, veteres peninae pro derelictis habitae; vtrumque ergo per occupationem cedit occupanti; contra ex hoc patet, res amissas, bona naufragorum, cet. non fieri occupantis, quia neutro sensu sunt nullius.

2. *Animus sibi habendi*; siue illo enim adprehensio est actio mere physica vel naturalis, non humana et moralis, adeoque effectum moralem producere nequit; e. g. si gallina vnionem vel gemmam e sterquilinio eruat, non ideo fit domina, adeoque nec furiosus, mente captus.

3. *Adprehensio*, et quidem tali modo facta, quae vsitata est circa huius modi res; e. g. feras possum adprehendere manu, venabulo, retibus, cet. auiculas telo, laqueo, visco.

Solus animus sine adprehensione non tribuit dominium, e. g. si aureum nummum Titius prior e fenestra viderit, sibiue verbis adseruerit, Maeuius vero eundem prior adprehenderit, Maeuius procul dubio dominium consequetur. Vnde soluenda elegans quaestio de Acantho insula et vrbe deserta, quam Chalcidensium legatus primus introiit, Andriorum legatus prior iaculo petiit, PLVTARCH. *Quaest. Graec.* 29.

4. *Occupatio* quum fiat vel per vniversitatem, vel per fundos, consequens est, vt in prouincia per vniversitatem adquisita nihil sit nullius; cuius enim est tota prouincia, eius sunt omnia, quae illa continentur, e. g. ferae, pisces, flumina, metalla, siluae; hinc omnia haec pertinent ad populum, vocanturque *res publicae*.

At quia commode diuidi non possunt, et facile per communionem plane extinguerentur, e. g. ferae nullae superfuturae essent, si singulis promiscue venari liceret), hinc populus ea principi relinquere maluit, ac proinde hodie referuntur ad regalia.

§. 7.

§. 7.

Hic modus acquirendi originarius in se et simpliciter talis: sequitur alter secundum quid talis, puta *accessio*; Haec nihil aliud est, quam adquisitio incrementi, quod rei nostrae siue naturae, siue operae nostrae, siue utraque accedit. Ea est vel *naturalis*, quam naturae beneficio debemus, e. g. alluio, foetus animalium; *industrialis*, quae industria nostra accedit, e. g. forma annuli ex auro, scriptura vel pictura chartae; *mixta*, quam et naturae, et industriae debemus, e. g. satio, plantatio.

Subtiliter equidem de hac accessione philosophantur Icti Romani; sed generalis regula est iuris naturae: *accessorium sequitur suum principale*, si vel e re nostra est, vel incertae originis, vel separatio commode fieri non potest; si certa est origo, vel rei fungibili accedit, potius restituendum erit priori domino, vel ei, qui industriam habuit.

Regulam hanc probamus: 1. quia, qui semel dominus est, illud dominium sine consensu vel culpa sua amittere nequit; si ergo de domino constat, illi res restituenda; hinc e. g. vi fluminis abrupta terra merito relinquenda priori domino, non est alluio; 2. si res fungibilis est, cui aliquid accedit, non potest admittere pretium affectionis; tantumdem enim tunc est idem, adeoque absurdum; et amor aduersum esset, si retinere vellem accessorium, quod tale pretium admittit: hinc si alienae chartae inscripsi, charta merito cedit scripturae, quia illa pretium adfectionis non admittit, haec admittit; 3. quod commode separari potest, id procul dubio reddendum, quia nulla causa, nullusque titulus est, ob quem ego mihi retinere velim, e. g. si quis capulum alienum ensi meo adferruminarit; 4. si commode separari non potest, tunc res separata domino priori utilitatem non praestet, mihi praestet, ergo merito soluto pretio retineo; *soluto pretio*, inquam, quia nemo debet cum alterius damno locupletior fieri. Ex hac regula iam de omnibus casibus potest iudicari.

Naturales: 1. Partus sequitur ventrem, est enim e re mea.

2. Alluio est mea, quia incertae est originis.

3. Vis fluminis non mutat dominium, quia origo certa.

4. Noua insula est accessorium fluminis.

5. Alueus est pars fluminis, ergo eiusdem est, cuius flumen.

Industriales 1. Adferruminata plerumque commode separantur, aeque ac inclusa, non vero intexta.

2. Tabula et charta procul dubio cedunt scripturae et picturae.

3. Species noua procul dubio pertinet ad specificantem, quia materia pretium adfectionis non admittit.

Mixtae. 1. Satio me reddit dominum, si ager est meus, separari enim res commodè non potest, planta plerumque separari potest, ergo recte vindicatur.

2. Aedificium e lapidibus constans non commodè, nec sine sumtu separatur, ergo manet eius, cuius est solum; at si e lignis, distinguendum, an iam perfectum sit, an tantum ligna iuncta; priore calu itidem separari sine incommodò nequit, posteriore potest.

3. Bonae fidei possessorem fructus lucrari, vel ideo acquisitum, quia eius opera prouenerunt,isque per iustum errorem se pro domino habuit.

Ita facile patet, pleraque, quae statuit circa eam rem ius Romanum, subtilia magis esse, quam aequitati consentanea.

§. 8.

Interferit hic auctor quaestionem, qui fiat, ut non semper dominus, sed aliquando tertius accessiones vel fructus e re nostra capiat? Resp. id fieri per pacta, qualibus complura iura introduci possunt. Nam e. g. si cui concedo 1. partem dominii, ut omnibus fructibus uti possit, id vocatur *dominium utile*; sin concedo creditori 2. possessionem rei meae in securitatem crediti, dicitur *pignus*; et quidem si simul concedo 3. ius utendi fructibus, *anticipresis*; si 4. utilitatem concedo in meo praedio vel personae, vel praedio alterius id vocatur *seruitus*, siue *personalis*, uti ususfructus, usus, et habitatio; siue *realis*, e. g. iter, actus, via.

Sed haec omnia sunt ex iure civili: ius naturae quidem haec non improbat, sed nec introduxit; non praecipit, sed permittit.

§. 9.

Iam sequuntur modi acquirendi derivatiui. Hic ante omnia obseruandum, iure civili aliud esse *titulum*, aliud *modum acquirendi*; illum dare tantum ius ad rem, hunc ius in re. Sed hanc differentiam ius naturae ignorat; iure enim naturae, ut rectè obseruauit GROTIUS, II. 8. 23. ad transferendum dominium sola sufficit domini voluntas, et nec traditio, nec quidquam aliud requiritur.

Op-

Opponit HERTIVS, *ad Pufend. libr. III. cap. 9. §. 8. 1.* dominium a naturali possessione coepisse; 2. esse ius in ipsam rei substantiam; 3. ita nullam fore differentiam inter conventiones, et modos acquirendi; 4. repugnare vsum gentium.

Sed quum 1. Icti concedant dominium in ultimis voluntatibus transferri posse sine traditione; 2. ius in rei substantia habere possim sine traditione, veluti in pignore; 3. differentia inter conventiones et modos acquirendi sit tantum iuris *civiliis*; 4. mores gentium non faciant ius naturae: merito sententiae Grotii subscribimus.

Hinc non mirum, quaedam ab auctore huic referri, quae alios ad titulos potius referri solent in iure civili.

Ceterum auctor agit de *modis acquirendi derivatiuis*, qui descendunt 1. *ex dispositione legis per successionem ab intestato*, §. 10. 11. 2. *facto prioris domini*. Tunc vero transfertur vel a) *universitas bonorum*, §. 12. b) *portio bonorum*, idque a) *vel volente domino*, §. 13. β) *vel eo invito*, §. 14. 15.

§. 10.

Primus acquirendi modus derivatiuis est *ex dispositione legis*; ex hac autem adquirimus *per successionem ab intestato*.

Itaque 1. non difficile est contra Io. A FELDE *ad GROT. libr. II. cap. 7. §. 3.* demonstrare, rectae rationi consentaneum esse, bona defunctorum non fieri *adherora*, sed in iis aliquem succedere: 1. aut enim ea magistratus vindicare deberet, aut cuius cederent occupanti.

Si prius fieret, plane futurum esset, ut nihil amplius esset in privatorum dominio; sin posterius, nascerentur innumerae turbae, et, si cum HOBBSIO loqui liceret, bellum omnium in omnes.

2. Vnusquisque quando acquirit, eum sibi proponit finem, ut non modo sibi, sed et suis bene sit; quin magis quisque pro his laborat, quam pro illis; atqui bene non futurum esset nostris, nisi successio quaedam in bona defunctorum daretur, debet ergo successio quaedam in bona defunctorum dari.

Sed iam quaeritur, *quoniam praesupponi oporteat successionis huius fundamentum?* Veteres duobus habuerunt huius modi fundamenta: primum est, conservatio familiarum; posterius, praesumpta voluntas defuncti.

Si prius recipimus fundamentum, tunc regula erit: *Quicumque pertinent ad familiam, illi succedunt, reliqui excluduntur.*

R 3

- Hinc

Hinc 1. Hebraei filiis plus dabant, quam filiabus; si haec essent heredes ex alie, eas cogebant nubere proximo agnato; 2. Romani veteres ideo tantum admittebant liberos suos, non emancipatos; agnatos, non cognatos; quin ideo inter matrem et liberos nullaerat successio vetere iure; aliquando et feminae excludebantur per legem Voconiam, de qua vid. IAC. PERIZONI Diff. ad leg. Voconiam, nostris auspiciis Halae recusam.

Sin posterius fundamentum ponimus, regula erit: *Quoscumque defunctus ordine naturae praesumitur quam maxime dilexisse, illi succedunt.*

Hunc ordinem sequutus est IVSTINIANVS in *Novella CXVIII.* in qua statuit, vt liberi seu descendentes ante omnes succedant; his non existentibus, ascendentes; ac denique, iis deficientibus, collaterales, sine discrimine suorum ac emancipatorum, agnatorum et cognatorum, masculorum et feminarum.

Vtra ergo ex his sententiis vero similior? procul dubio posterior, quod inde demonstratur: fundamentum omnium officiorum erga proximum est amor; eius haec est indoles, vt quo quis mihi est sanguine propior, eo magis optem ei bene esse; ergo proximis sanguine bene esse prae ceteris volo; ergo et lubentissime illis relicta volo bona, quibus ipse amplius vti nequeo.

§. II.

Iam facile patet, *quis succedendi ordo inde sequatur?* nam 1. experientia docet, neminem nobis esse cariorum liberis, quos ipsa nobis commendat natura; hinc Apostolus PAVLLVS, *Epist. ad Rom. VIII. 17. si liberi, ergo et heredes.* Quemadmodum vero iure naturae nulla est inter masculos et feminas, suos et emancipatos differentia, quos boni parentes pari modo complectuntur, maxime quum hoc discrimen demum ius civile repererit; ita et procul dubio illegitimos admittit.

Negat id auctor, quia ipsa ratio et decorum vitae legitimis pro illegitimis faueat; sed inde non sequitur, vt hi successione iure naturae excludendi sint; ipsi enim nihil aduersus rectam rationem admiserunt, cur priuandi sint hoc commodo, sed parentum culpa est, ob quam eo magis his liberis successione deberi putandum est.

Quid si filius, siue legitimus, siue illegimus, male se aduersus parentem gesserit? tunc aut declarauit parens, filium exclusum esse debere; et
stan-

standum omnino eius voluntati, quia praesumptio cedit veritati; aut non declaravit, et merito creditur, patrem filio ignovisse.

2. Si liberi gradus prioris non supersunt, merito sequuntur nepotes, pronepotes, et quidem aequissimum tunc est ius repraesentationis; qui succedunt in locum, succedunt in ius; nepotes succedunt in locum liberorum, ex quibus nati sunt, succedunt ergo in eorum ius; hinc et eorum portionem merito capiunt. Dico: aequissimum hoc esse; id enim ius naturae praecipere absolute nemo dixerit.

3. Si descendentes non sint, merito successio adscendentibus defertur, idque quia experientia docet, post liberos parentes nobis esse carissimos, exigit etiam id amor et gratus animus, ut, a quibus ab incunabulis alimenta accepimus, iis, deficientibus liberis, bona relinquamus.

4. His quoque non superstitibus, fratres et sorores succedunt, nec iniquum est, hic germanos unilaterales praeferrere.

5. Denique his non exstantibus, quilibet gradu proximi.

Hoc usque ius naturae pertingere potest: at quum haec sola aequitate nitantur, adeoque iuris naturae magis permixti, quam praeceptiui sint, facile largimur, ea omnia mutari posse legibus civilibus; hinc animaduvertimus,

1. In Dania et Sleswicensi Ducatu filios duplam portionem accipere: iure feudali filias solis alimentis et dote contentas esse iuberi.

2. In Austria adscendentes plane excludi.

3. Inter collaterales alibi successionem gradualem, alibi linealem obtinere.

4. In plerisque legibus rationem etiam vel maxime haberi conjugum, quibus saltem portio aliqua statutaria conceditur.

§. 12.

Est hic modus acquirendi derivativus ex dispositione legis; sequitur alter *ex facto prioris domini*. Quumque hoc modo adquiratur vel universitas bonorum, vel res singularis, prius fit *per testamentum*, de quo hac paragrapho agendum.

Praecipua et unica quaestio est, *an testamenta iuri naturae sint consentanea?* Adfirmant GROTIUS, PUFENDORFFIUS, et plerique alii: Negant MERILLIUS, *Obseru. VIII. 25.* THOMASIVS in *Iuris prud. diuin.* alique, idque

1. Ex ea ratione, quod nemo possit velle post mortem; argu-
men-

mentantur: omnis translatio domini fieri debet, quando dominus adhuc velle potest; testamento non transfertur dominium, quando dominus adhuc velle potest; ergo testamento non fit translatio domini. Minor clara est: non enim ad heredem transit dominium, viuo adhuc testatore, sed demum eo mortuo; nam quoad viuit, voluntatem suam pro lubitu mutare potest.

2. Testamento mutantur leges de successione ab intestato, absurdum autem est, leges priuata alicuius voluntate mutari.

3. Plerumque testamenta conduntur ex odio inuidiaeque erga propinquos; his prauis affectibus iura assistere nequeunt. At GROTIUS, *libr. II. cap. 6. §. 14. vt testamenta iuris naturae et gentium esse probaret*, testamentum ita definit: esse *alienationem vniuersi patrimonii in mortis euentum, ante eam reuocabilem, retento interim iure possidendi et fruendi*. Iam colligit, domino licere alienare, licere id facere sub conditione, vel in euentum mortis, licere alienare reuocabiliter, denique licere sibi reseruare possessionem et vsumfructum, ergo licitum iure naturae esse testamentum.

Sed male definiuit GROTIUS: 1. falsum enim est, per testamentum fieri alienationem, quia manet testator dominus; 2. falsum, alienationem factam in euentum mortis; nam sic heres haberet ius quaesitum, quod ei auferri non posset, et tamen testatoris voluntas est ambulatoria vsque ad mortem; 3. falsum ergo etiam, testamento factam alienationem reuocabilem, vbi enim plane facta non est alienatio, ibi et reuocabiliter facta esse dici nequit; 4. falsum denique, testatorem sibi reseruare possessionem et vsumfructum; vere enim retinet dominium, et nullum ius in heredem transfert, sed vult, vt illud tum demum transeat, quando nihil amplius velle potest, id est, post mortem. Quum ergo GROTIUS totam decisionem suam superstruat definitioni falsae, tota quoque demonstratio, quae inde petita, falsa sit oportet. *Testamentum enim potius est voluntas viuientis de bonis suis post mortem in alios transferendis.*

Manet ergo fixum et firmum, testamenta non esse ex iure naturae, quia transire iubent dominium in id tempus, quando amplius velle non potest.

Agnouit hanc difficultatem LEIBNITIUS, sed putauit, eam difficultatem euanituram, si mens statuatur immortalis, quasi vero mens immortalis adhuc de bonis in terrarum orbe relictis sit sollicita.

Quum ergo testamentum non sit ex iure naturae, frustranea futura

futura esset quaestio, quanam sollemnitates requirantur in testamento, et quae alia eius sint requisita; omnia enim haec ex iure ciuili singulorum locorum, non ex iure naturae discenda sunt.

§. 13.

Ita factio prioris domini ex mente auctoris transmittitur dominium vniuersorum bonorum per testamentum.

Iam explicaturus et *translationem rerum singularium*, eam fieri obseruat vel *volente domino*, vel *eo inuito*. Si *volente domino*, id sit vel gratis per donationem, vel titulo oneroso per contractum. Sed de contractibus infra. Iam tantum obseruandum, non omnes contractus rem transferre titulo oneroso, e. g. commodatum, depositum.

Donatio, de qua haec paragrapho, est gratuita domini in alterum acceptantem translatio, vel est pactum de rei dominio in alterum acceptantem gratis transferendo.

Diuidunt eam Icti in eam, quae est *inter viuos*, et *mortis causa*; sed donatio mortis causa iisdem difficultatibus premitur, ac testamentum; nam et hic transfertur dominium ex eo tempore, quo id velle donator non potest, ergo et haec non est ex iure naturae, sed ex solo iure ciuili; iure naturae omnis donatio inter viuos est.

Rectius dicere possumus, donationem esse vel vniuersorum bonorum, vel rei singularis; illa vere erat veterum testamentum. Vide exemplum Cyri apud XENOPHONT. in *Cyropaedia*, lib. VIII. Genes. XXV. 5. 1. Reg. I. 35. SIRACID. X. 25. Conf. PVFENDORFF. *Iur. nat. et gent. lib. III. cap. 10. §. 5.*

Sed in donatione quae sint officia obseruanda facile patet: 1. donatio est pactum, et hinc requirit acceptationem; 2. eadem ex eadem ratione transfert in alterum ius, quod auferri non potest, scilicet dominium, ergo 3. donatio sua natura est irrevocabilis, denique 4. eadem est gratuita, adeoque obligat tantum ad gratitudinem.

§. 14.

Quibusdam casibus et inuito domino in alterum transi dominium?

1. Per modum poenae in ciuitatibus, e. g. quando quis condemnatur in multam, quando bona rediguntur in fiscum, cet. 2. per occupationem bellicam in statu naturali, e. g. quoties hostis hosti oppida, pecunias, tormenta, commeatum eripit.

Heineccii Praef. Pufendorff.

S

Quod

Quod ad prius attinet, nullum dubium est, eius modi poenam locum habere, nam poena est malum passionis, quod infligitur ob malum actionis a superiore: iam iactura pecuniae et bonorum est malum passionis, quin tale malum, quod grauius saepe addigit hominem, quam ipse corporis dolor, ergo a superiore per modum poenae omnino potest infligi.

Obiiciunt quidem, *ita poenam magis ad innocentes coniuges et liberos pertinere, quam ad delinquentem ipsum?* Sed resp. 1. id fieri indirecte, et in nulla poena prorsus id euitari posse, nam et liberi indirecte patiuntur aliquam infamiam et iacturam, si pater ob delictum gladio percutitur, laqueo suffocatur, cet. 2. culpa haec est patris delinquentis non principis vel iudicis punientis; hic iure suo vititur, adeoque nemini facit iniuriam.

Interim laudanda legislatorum Romanorum humanitas, qui his casibus liberis aliquam bonorum partem reliquebant, ne alimentis destituerentur, *L. 1. et 7. D. de bon. damn.* Immanis contra est *L. 5. C. ad leg. Iul. maiest.* quae liberos perduellium ad perpetuam paupertatem damnat.

Quod ad secundum ius attinet, leges Romanae id referunt ad occupationem, adeoque statuunt, bona hostium esse nullius. Quamuis enim hostes dominium habeant ratione aliorum hominum, non tamen domini sunt ratione hostium, quippe quos usu suarum rerum excludere non possunt; hinc argumentantur: Quicumque ab usu rerum nostrarum excludere non possumus, eius contemplatione non sumus domini; atqui hostes ab usu rerum nostrarum excludere non possumus, ergo contemplatione hostium non sumus domini.

Si ergo non sumus domini ratione hostium, res nostrae contemplatione eorum sunt nullius, adeoque cedunt occupanti.

Sed haec subtilia magis, quam vera; nam 1. si non essemus domini contemplatione hostium, res nostras aduersus illos ne defendere quidem possemus; 2. reuera per bellum nulla adhuc est adquisitio: quemadmodum enim hosti ius fuit aliquid nobis eripendi, ita nobis ius est recuperandi; cuius vero futura sit, demum pacis conditionibus determinatur?

Itaque rectius dicimus, ius illud hosti res eripendi esse ex ipso belli iure; hosti in hostem in infinitum ius esse, donec ad pacem sit proclivis, ergo et ipsi quaevis eripere licet; eius autem dominium non statim quis acquirit, sed tum demum, quando pacis legibus ceditur.

§. 15.

Denique inuitis nobis dominium etiam transfertur per *vsucapionem*, quae est acquisitio dominii per possessionem temporis lege definiti.

De ea quaeritur 1. *an sit licita?* idque adfirmandum, *a*) quia, qui res suas non vindicat iusto tempore, ipse in culpa est, adeoque rem veluti pro derelicta habuit; vid. *Iudic. II, 14. b*) quia inter est rei publicae et communis tranquillitatis, dominia esse certa.

Sed alia quaestio est, 2. *an vsucapio sit iuris naturae?* id quod merito negamus: nam *a*) ius naturae nullum tempus definit, quamdiu quis possidere rem debeat, ut dominium consequatur; illud plane ex iure ciuili est; *b*) tempus in se non potest vel dominium dare, vel eripere, quia est idea relatiua, quae nihil operari potest; *c*) non praesumi potest pro derelicta habita, quam postea vindico, quando vindicandi occasio est.

Ergo ita dici potest, non iniquum esse, ut admittatur vel adquiratur dominium a possidente, 1. si quis nesciat, alium dominum esse, adeoque bona fide et iusto titulo possideat; 2. si dominus sciat, alium possidere, et tamen rem non vindicet; 3. si tam diu quiescat, ut iure inde colligi possit, eum pro derelicta rem habuisse. Sed tunc proprie non est praescriptio vel vsucapio, quia tempus certum non est lege definitum, sed erit species occupationis secundum regulam: *Quae nullius sunt, cedunt occupanti*, res enim pro derelictis habitas nullius esse nemo negauerit. Idemque obtinet inter gentes; negabant id Galli apud CAMBDENVM *ad annum 1567.* idemque singulari *diff.* egit PVTEANVS: sed ei vindicias pro Grotio opposuit WERLHOFFVS.

CAPVT XIII.

DE OFFICIIS, QVAE EX DOMINIO RERVM
PER SE RESVLTANT.

§. 1.

EGimus hactenus de dominio in se considerato, eiusque tum origine, tum acquisitione. Quum ergo dominium sit ius, sequitur, vt et effectum suum habere debeat; vbi enim ex mea parte ius, ibi ex altera est obligatio.

Quaeritur ergo, *in quonam consistat obligatio nostra erga dominum?* Auctor noster varios casus considerat, quaeritque *ad quid obligati simus* 1. *si res sit penes verum dominum*, §. 1. 2. *si res in alterius potestate sit*, §. 2. *ad fin.*

Si res est penes verum dominum, tenenda est regula: *Quilibet tenetur alterum (non hostem) pati rebus suis quiete frui, neque vi aut per fraudem illas corrumpere, interuertere, aut ad se trahere sustineat;* a) amandus enim proximus tamquam nos ipsi; itaque quod nobis fieri nolumus, alteri facere non debemus; at nolumus ipsi priuari dominio nostro, ergo nec alios eo priuare debemus; b) fuit idem ex natura domini, dominus enim gaudet iure alios vsu rerum suarum excludendi, ergo obligatus sum, vt res alienas, a quibus iure exclusus sum, non appetam.

Ex eo ergo fuit, 1. contra ius naturae esse furtum, quippe quod est ablatio rei alienae inuito domino facta, adeoque errare SALMASIVM, de *vsuris* cap. 9. qui furtum iuri naturae repugnare negat; 2. non minus eidem repugnare rapinam, ob eandem rationem: differt autem rapina a furto, quia hoc fit fraudulenter, illa vero vi; 3. damnum in rebus alteri illatum, nec non 4. quamlibet defraudationem iuri naturae quam maxime aduersari; 5. crimen termini moti.

§. 2.

Hoc primum officium, cui locus est, quando res penes dominum est. Quid vero *si penes, alium?* tunc obtinet regula: *Quando res peruenit ad nos sine nostro crimine, et bona nostra fide, eamque ad-*
huc

huc in nostra potestate habemus, tenemur efficere, quantum in nobis est, ut illa in potestatem legitimi sui domini redeat, id est, bonae fidei possessor tenetur curare, ut res in potestatem legitimam redeat; 1. hoc iterum exigit amor, nam et ego volo, ut qui rem meam possidet, eam mihi restituat, ergo et ego teneor.

Auctor lib. III. cap. 13. §. 5. id officium deducit ex communi et vniuersali conuentione hominum, quasi pacti sint inter se homines, ut quod in dominium semel redactum domino restituatur, sed eius modi conuentionem vniquam factam esse probari nequit, ideoque illa fingitur; rectius ergo hoc deducimus ex amore, simulque 2. ex natura domini: quum enim illud sit ius, et supra cap. 6. §. 3. demonstratum, nullius ius interuertendum esse, consequens est, ut nec dominum proximo interuertere possimus, adeoque operam dare teneamur, ut dominus rem suam recipiat.

Inde sequitur: 1. neminem debere res sibi comparare, quas scit alienas; 2. res inuentas statim reddendas, simulac verum dominum sciamus, Deuter. XXII. 1. seqq. 3. domino res suas requirenti eas non esse celandas; neque tamen impensis nostris; 4. aequae furem esse, qui res celat, quam qui furripit.

Quaeritur autem, an officium hoc superet alterum, quod ex pacto est; e. g. si fur apud aliquem incium rem furtiuam deposuerit, et dominus verus superueniat, remque suam esse probet, an furi res reddenda, an domino? illi sane ex conuentione, puta deposito, tenetur; huic ex lege naturali? Resp. vero domino res restituenda; pactum enim contra legem non valet; hic autem est lex naturalis, ergo per pactum tolli non potuit.

§. 3.

De eodem casu, quando quis bona fide possidet, est tertia regula: Si res bona fide acquisita consumta, tantum restituendum, in quantum sumus facti locupletiores; quamdiu enim in bona fide sum, puto me dominum, dominus potest rem suam consumere, ergo et eam rem mihi bona fide adquisitam consumere potui; at quum tamen locupletior fieri non debeam cum alterius damno, merito restituo id, quo factus sum locupletior; e. g. emi alienum frumentum et consumsi, tantam restituere teneor, quantum interea lucratus sum, dum frumentum emere non debui.

§. 4.

Pertinet eodem regula quarta: *Possessor bonae fidei non tenetur ad ullam restitutionem, si res casu periit*; nam 1. casum in re aliena nemo praestat, qui in bona fide est, quia ipsi rei interitus non potest imputari; 2. rem restituere nequit, quia illa non exstat; 3. locupletior re pereunte non factus est, ergo nec fructus restituere potest; ergo plane nihil restituit; aliud si quid ex re, quae periit, superest, e. g. equi demortui supersunt ornamenta, haec restituenda, vel domus incendio deletae superest area, haec restituenda, ne cum alterius damno siam locupletior.

§. 5.

Regula quinta: *Bonae fidei possessor tenetur ad restituendos fructus exstantes*; a) cuius enim est res, eius et fructus; b) fieret bonae fidei possessor cum alterius damno locupletior, si hos fructus exstantes sibi retineret. At ob eandem causam, quod nemo debeat cum alterius damno locupletior fieri, recte ab auctore observatum, fructus restitui non debere, nisi restitutis impensis in illos factis.

§. 6.

Regula sexta: *Bonae fidei possessor tenetur ex fructibus consumptis tantum restituere, quantum factus est locupletior*.

Sed quandonam quis factus censetur locupletior? Resp. si rem alienam consumendo suis pepercit, e. g. si alienum frumentum consumendo suum retinuit vel vendidit. Enim vero hic non est vnicus casus: nam etsi suum consumsit, et alienum vendidit, tantumdem lucri fecit.

Itaque magis dispiciendum, 1. vtrum res alienas minus necessarias in vsus suos adhibuerit, alias iis non vsurus, nisi eas habuisset; e. g. comedit aliquis pisces, caneros, poma ex alieno fundo, quem bona fide possedit; 2. an vero res tam sint necessariae, vt eas parata pecunia sibi comparare debuisset, nisi alienis vti potuisset; e. g. consumit quis alienum frumentum; priore casu non est factus locupletior, at posteriore factus est.

Ceterum sine animaduersione hic praetereundus non est error auctoris, quasi bonae fidei possessor tum teneatur ad fructus hos restituendos, si rei euictae pretium possit recuperare; quid enim hoc ad dominum? is rem suam cum fructibus suo iure vindicat, possessoris erit videre, an pretium recuperare possit.

§. 7.

§. 7.

Regula septima : *Bonae fidei possessor non tenetur pensare fructus, quos neglexit*, id est, non tenetur restituere fructus percipiendos, nam 1. quamdiu de vero domino mihi non constitit, mihi visus sum dominus, adeoque et ius mihi esse de re pro lubitu disponendi, merito putavi; iure ergo meo usus sum, ac proinde nemini feci iniuriam; 2. fructibus neglectis non sum factus locupletior, ergo nec cet.

§. 8.

Regula octava : *Bonae fidei possessor ad nihil tenetur, si rem alienam sibi donatam iterum alteri donauit*, ex iisdem rationibus: nam 1. et iure suo usus est, et 2. non factus est locupletior; aliud tamen, si talis sit donatio, quam ex officio, vel urgente existimatione quis facere debuit; e. g. si quis pateram argenteam alienam sibi donatam fratri obtulerit tamquam donum nuptiale; hac enim donatione superfedere non potuit, adeoque suae rei pepercit.

§. 9.

Regula nona : *si bonae fidei possessor rem alienam titulo oneroso partem alienauerit, non tenetur, nisi in quantum lucrum fecit*, nemo enim debet cum alterius damno fieri locupletior: hinc si quis emit equum alienum 100. florenis, eumque iterum vendiderit 150. domino, qui equum non recipit, tenetur restituere 50.

§. 10.

Regula decima. Sed quaeritur, *an dominus rem suam reprensus restituere debeat pretium, quod bonae fidei possessor expendit*? Negatur, 1. quia neque ex conventionione, neque ex delicto obligatur; 2. quia nemo tenetur dominium semel acquisitum titulo oneroso iterum adquirere.

Aliud 1. si rem bonae fidei possessor recuperavit, quam ne dominus quidem sine aliquo pretio fuisset recuperaturus, e. g. a piratis; 2. si honorarium ei promissum, qui rem vero domino restituerit; tunc enim dominus tenetur ex pacto.

§. 11.

§. II.

Regula vndecima. Denique quaerit auctor, *an quis rei inuentae fiat dominus* ? Resp. aut res inuenta est nullius, aut habet dominum : si prius, cedit occupanti, quod et tunc competit, si res derelicta ; sin posterius, res reddenda vero domino.

Quid si quis missilia spargat ? Ea cedunt inuentori vel occupanti, nisi forte ebrius talia iacet, qui sane nescit, quid agat. Id ex persona, qui hanc liberalitatem exercet, et ex occasione, qua id faciat, facile diiudicabitur.

CAPUT XIII.

DE PRETIO.

§. I.

Sequitur tertium institutum humanum, ex quo officia hypothetica fluunt, puta, *rerum PRETIUM*.

Agitur ergo 1. *de pretii origine ac definitione*, §. 1. 2. *de eiusdem diuisione in vulgare et eminens*, §. 2. 3. *de pretio vulgari*, §. 3--5. 4. *de pretio eminente*, §. 6--9.

Pretium rerum originem debuit dominio ; Nam

1. Eo introducto homines coeperunt et carere pluribus rebus ad necessitatem vel vitae commoditatem pertinentibus, et aliis etiam quibusdam abundare.

2. Itaque opus fuit commerciis, rerumque commutationibus.

3. Ad ea initio videbatur sufficere permutatio, quam et antiquissimis gentibus placuisse nouimus, veluti Graecis apud HOMERUM, vid. §. 2. *Inst. de emt. vendit.* veteribus Germanis, apud TACITUM *de morib. German.* et hodiernum barbaris in India et America, qui aurum, gemmas, aliasque res pretiosissimas cum Belgis permutant pro speculis, cultellis, fistulis.

4. Mox tamen apparuit, hoc commerciorum genus permulta habere incommoda : nam a) saepe qui alienis rebus indigebat, plane nihil habebat, quod pro iis daret ; b) saepe, quae alicui supererant, non placebant alteri, vt pro iis suas merces daret ; c) saepe seruari non poterat aequalitas, quando res pro re dabatur ; d) denique res permutandae non sine incommodo in loca remotiora tunc ferri poterant.

§. Hinc

5. Hinc de materia cogitatum, quae pro mensura omnium rerum, earumque pretio haberetur, id est, inuenere pecuniam, qua omnia comparari possent ab omnibus, et sic pro permutatione magis placuit emptio venditio, locatio conductio, similesque contractus, qui interueniente pecunia ineuntur, L. 1. *D. de contrab. emt.*

Est ergo *pretium* quantitas moralis, ad quam res et operae aestimantur ad commodiorem vitae usum.

Dico, esse *quantitatem*) quia et augeri vel intendi, et minui vel remitti, et in quasvis partes aequales et inaequales diuidi, et arithmetico calculo ad liquidum perducere potest.

Moralem.) Nec enim res habent pretium a natura, sed ab aestimatione hominum: nulla esset ratio, cur tantillum frustulum auri tantum valeret, quantum multo maior portio argenti, aeris, plumbi, nisi homines illi hunc valorem imposuissent; hinc et videmus incolae insularum Hesperidum pro pecunia habere conchas conditas vel variegatas, HUGO GROTIUS *Hist. Belg. libr. I. ad annum 1599.* quin meminimus, in Gallia chartas pro pecunia valuisse, quibus sane parum virtualis pretii est.

Ad quam res et operae aestimantur:) pretium enim verum videmus in emptione venditione, operarum in conductione operarum; et quamuis iure Romano artes liberales dicantur operae inaeestimabiles, tamen et illis pretium vel maius vel minus videmus statui.

Ad commodiorem vitae usum.) Necessitatem enim hominibus hanc extorsisse inuentionem diximus.

§. 2:

Iam porro quaeritur, *quotuplex sit pretium?* Auctor illud recte diuidit in *vulgare* et *eminens*: *Vulgare* illud est, quod attribuitur rebus et actionibus, e. g. agro, aedibus, praediis, operis fabrilibus; *eminens*, quod attribuitur pecuniae seu nummo, quo illae res aestimantur.

Differunt hae species, 1. quia vulgare ex rerum qualitate et usu nascitur; eminens ex impositione hominum; 2. quod vulgare est veluti normatum, eminens norma, ad quam vulgare aestimatur; 3. quod illud quidem sit proprium, hoc commune omnibus rebus, quia nummo omnia comparare possumus; et hinc etiam vocatur eminens, quia virtualiter rerum omnium pretium complectitur. OVIDIVS, *Art. am. II. 163.*

Heineccii Prael. Pufendorf,

T

Secum

Secum habet ingenium, qui, quum libet, accipe, dicit.

Videmus pecunia comparari res, operas, iura, honores, titulos, officia, libertatem, aliquando et iustitiam, maritos, et quid non?

Quisquis habet nummos, secura nauigat aura.

§. 3.

Iam ergo primum agitur de pretio vulgari, et quaeritur, *cur non omnes res, omnesque operae sint eiusdem pretii?* Id sane non est 1. ab utilitate, quam praestant; nam quis neget, aërem esse utiliore geminis; et tamen illi nullum pretium, his immensum saepe pretium statuitur; 2. nec a quantitate physica; nam magnam molem frumenti comparare possum pro minima gemma; 3. nec a necessitate; nam aqua carere non possumus, geminis possumus, et hae tamen permagnum pretium habent, aqua nullum.

Potius ergo respiciendum ad alia, nimirum 1. an sint in dominio? res enim in exhausti vsus dominio hominum exentae sunt, et hinc nullum admittunt pretium, e. g. aër, aqua, lumen: at possunt tamen rerum pretium intendere; sic e. g. pretiosius est praedium, quod habet aquam, aërem salubrem et liquidum, apricum lumen; 2. an sint in commercio? hinc pretium non habent templa, aliaeque res sacrae, officia ecclesiastica, administratio iustitiae; (sed id de iure, de facto enim saepe et haec similiaque sunt venalia, quin ipse calamus doctorum saepe venalis est); 3. an homini inferuire possint siue ad utilitatem, siue ad commoditatem, siue ad voluptatem, his omnibus statuitur pretium, quum res inutiles vocare soleamus nullius pretii; sic pretium non statuitur muscis, muribus, gliribus, at statuitur leporibus, vulpibus, auiculis.

Et quidem animaduertere licet insignem Dei providentiam, qua fit, ut res maxime uecessariae et viles viliori pretio consent; ad voluptatem vero comparatae enormi ac saepe immenso; illas enim Deus copiosissimas produxit, has rariores esse voluit; egit ergo Deus veluti legislator prudentissimus, qui subditorum luxuriam cohibiturus rebus ad luxuriam comparatis magnum imponit vestigal.

§. 4.

Haftenus de illis, ad quae respiciendum, si scire velimus, an res in

in se pretium aliquod habeat? Iam porro quaeritur; *quanam sint causae, ob quas in specie huius vel illius rei pretium vel intendatur, vel minuatur?*

Hic in primis vera causa est raritas; quo maior enim est mercium copia, eo vilioris pretii habentur, quo rariores sunt, eo cariores; quo maior enim mercium copia, eo pauciores sunt, qui eas anxie quaerant, adeoque eo viliori pretio a venditore addicuntur.

Rariora autem habentur, 1. quae non adeo copiosa proveniunt, ut gemmae, uniones, frumenta annis sterilibus; 2. quae ex regionibus admodum remotis ad nos deferuntur, e. g. cinnamomum, et alia aromata; 3. quae non nisi magno labore et periculo adquiruntur, e. g. argentum vivum, merces ex terris longinquis aduectae tempore belli, vel piratis maria infestantibus; 4. quae casu facta sunt rariora, e. g. *IOANNIS Scriptores rerum Moguninarum* libri a sisco occupati, atheorum, haereticorum, hostium reipublicae. 5. quando sibi quis monopolium vindicat; e. g. Bataui in cinnamomo, adeo ut superfluum quotannis flammis consumant; 6. quae proficiuntur ab artificibus celeberrimis, quod verum esse deprehendimus in tabulis pictis, sculpturis; 7. quando res vel a natura, vel ab arte singulare quid accepit, e. g. lapis, in quo figura Christi crucifixi; 8. quae admittunt pretium affectionis; *pretium affectionis* est pretium, quod rei statuimus non ob eius praestantiam, sed quia nobis aliquid iucundum in memoriam revocat. Fundamentum eius est associatio idearum, de qua insignem observationem habet LOCKIUS, *de intellectu humano*; experientia enim docet, 1. una idea se se nobis repraesentante, plerumque reviviscere reliquas omnes, quae tum cum illa erant coniunctae, quum eam primum perciperemus; sic e. g. si quis sibi repraesentat absentem patrem, simul etiam reviviscunt ideae vestium eius, actionum, verborum, cet. 2. una idea revocata, in mentem etiam redire gratas et ingratas perceptiones et sensationes, quas tum habuimus; haec perceptio aliquando satis valida est, e. g. iuuenis quidam deliquium animi patiebatur, quoties in conspectum eius veniebat Chirurgus, a quo lithotiam erat passus; quin saepe matris gravidae perceptio reviviscit in liberis iam natis, quoties res, per quam mater talem perceptionem habuit, per sensum repraesentatur; sic e. g. Iacobus I. Rex Angliae deliquium animi patiebatur, quoties videbat gladium euaginatum.

Posita hac idearum associatione, facile explicari potest, unde sit pretium affectionis; saepe enim res quaedam nobis in mentem revo-

cat 1. amicum vel personam amatam; hinc pretium affectionis admittunt donaria amicorum, maiorum nostrorum; 2. insignem honorem; hinc pretium huius modi statuitur donariis principum; 3. periculum feliciter superatum; hinc pretium tale statutum a Petro Imperatore Russiae equo, quo usus fuerat in praelio Pultauensi; 4. prillinae fortunae catastrophae; hinc pretium magnum Stechinelli Baro statuit pileo, quo puer usus fuerat, quum mendicaret; 5. rem admodum antiquam et memorabilem; hinc magni fiebat fictilis Episteti lucerna, magni fiunt nummi antiqui, gemmae, statuae.

Sed obseruandum, affectionem esse personalem, ac proinde hoc pretium a possessore in alterum non transfertur: vnde et ratio patet, cur eius quidem ratio habeatur in delictis, non vero in contractibus.

§. 5. 6.

Hoc erat primarium pretii fundamentum, secundum quod illud intenditur vel remittitur: sed sunt quaedam causae accessoriae, ob quas itidem pretium augetur vel minuitur, et quidem obseruandum, pretium esse vel *conventionale*, quando illud licitando definitur, id est, aliquid addendo vel remittendo, vel *legisimum*, quod a magistratibus definitur. Illud ergo in statu naturali et ciuili locum habet, hoc in statu ciuili tantum; illud latitudinem admittit, hoc consistit in puncto; in illo laesio est occultior, in hoc illa in oculos incurrit.

Iam in utroque variae possunt esse causae, cur vel intendatur, vel remittatur, e. g. in conuentionali ratio habetur 1. laborum et expensarum in rem factarum, sed ordinariorum tantum, non extraordinariorum, e. g. soltri, si mercator in itinere in morbum grauiorem incidit; 2. fori; an merx quaedam anxie quaeratur, an non; 3. pecuniae; an proba afferatur, an suspecta; parata, an fides emtoris sequenda; totum pretium soluatur, an pro parte tantum; 4. temporis; sic tempore belli praediorum pretium vilescit, emtores rerum pretiosarum sunt rariores; 5. a quo contractus incipiat, ab emtore, an a venditore; priore casu res solet maiori pretio venire, quam posteriore.

Ita et in *legitimo* plures esse possunt causae, cur pretium vel remittendum, vel intendendum sit, e. g. 1. si annona dolose flagellatur, 2. si rerum peregrinarum vile pretium ciuium quaestui nocet; hinc tantum pretium statutum cereuisiae Martisburgensi.

§. 7.

§. 7.

Iam ergo ad ultimam progredimur capitis partem, quae agit de pretio eminente seu pecunia, ubi quaeritur 1. quae origo pecuniae? §. 7. 2. cur metalla eum in finem electa? §. 8. 3. quis valorem pecuniae definiat? §. 9.

Pecuniae originem iam ad §. 1. exposuimus; quum enim permutatio non sufficeret, cogitatum de re, quae eminens esset rerum omnium pretium, omnibusque peraeque grata esset, ac denique placuit pecunia. Auctor statuit, id per pactum factum esse, et vniuersale quidem generis humani. Non arridet hoc TITIO, qui in *Obseru.* 347. negat, umquam eius pacti causa in vnum conuenisse genus humanum; Recte: possumus tamen et debemus pactum aliquod supponere, non quidem vniuersale generis humani, sed vnius alicuius gentis. Quae omnium prima tali vsa sit pecunia, nescimus. Orientem tamen ea prius vsam, quam Occidentem, ex historia Abrahami et Iacobi patet. Abrahamus enim pecunia emit agrum cum spelunca, in qua sepeliuit Saaram; Iosephus venditus 30. siclis; Filii Iacobi pecunia instructi ibant in Aegyptum; singamus ergo primos Hebraeos, aut, si mauis, Phoenices gentem nauticam ita inter se conuenisse; tunc nullum erit dubium, quin eorum consuetudinem imitati sint alii. Origo ergo prima est a pacto; ei autem deinde successit consuetudo et imitatio aliarum gentium: ab Orientalibus enim hoc didicerunt Graeci, ab his Romani, ab his Germani, aliaeque gentes.

§. 8.

Sed quaeritur, cur metalla potissimum eum in finem elegerint?

Equidem initio pecudibus vsos esse pro pecunia certum est; hinc 1. ipsa vocabula, pecunia, peculium, peculatus; 2. hinc et antiquissimos nummos non aliud *χρυσῆμα* prae se ferre viderimus, quam boues, sues, agnos, cet. 3. hinc et emere est *πωλῆν*, *ἀρνῆσαι*, *ἰνῆσαι* et similia, quae sunt a *πῶλος* pullus, *ἀρῆς* agnus, *ἴνῆς* asinus.

Postea coeperunt aes, argentum, aurum adhibere, sed rude ac infectum, quod sibi inuicem non adnumerabant, sed adpendebant. Vid. PLINIUS, *Histor. natur.* XXXIII, 3. Hinc et libra adhibita Romae in venditionibus et mancipationibus. Libripens: denique nummi inde habent nomina, talentum, pondo, libra, marca.

Denique res nummaria, paullatim a Graecis in eum statum re-

data, ut nummi certa figura, pondere, et caractere donarentur; ut statim pateret, quales essent, quidque et quantum valerent.

Nimirum eos ratio docuit, 1. pretium eminens debere habere pretium virtuale, quid enim alias potuisset omnium rerum pretium esse, si ipsum fuisset nullius pretii; 2. illud nec nimis rarum, nec nimis vulgare ac obuium esse debere: si enim esset nimis rarum, non sufficeret commerciis; si nimis obuium, amitteret pretium virtuale; quo tamen opus est per requisitum primum; 3. esse debere compactioris substantiae; alias enim attereretur usu, et sic semper tanto pauperior fieret venditor, quo saepius ille nummus per tot manus iuerit; 4. debere commode diuidi posse in quocumque partes; quia enim pretium rerum omnium non est vnum et aequale, debent et nummi in promptu esse diuersae quantitatis et valoris; 5. debere commode custodiri, et de loco in locum transferri posse; nummus enim est propter commercia; haec vero etiam cum gentibus remotissimis instituuntur.

Iam quinque haec requisita in nulla re coniunctim reperta sunt, quam in metallis, maxime nobilioribus; itaque ex his nummos cudere coeperunt.

Iam porro quum intersit generis humani, nummos esse iustae materiae et ponderis; hinc prudentia suasisit gentibus omnibus cultoribus, 1. ne ius monetandi priuatis concederent, sed imperantibus; 2. ut figuram ei darent regularem, ne facile circumcidi et abradi posset; hinc hodie margines adduntur; 3. ut principis *χάραγμα*, effigies, insignia, nomen, annus, locus monetae, in nummo exprimeretur.

Obiici posset, *occurrere pecuniam chartaceam, coriaceam?* Resp. hanc non fuisse pecuniam, sed symbola vel tesseras, postea pecunia luendas.

§. 9.

Denique quaeritur, *quis valorem pecuniae definiat?* Resp. Imperans; nam 1. is uti rebus omnibus praescribit leges, ita et nummis; 2. ipse est auctor nummorum: ergo et de valore curare debet.

At principis hic non est absoluta potestas, nam a) immutato nummi valore, et manente pristino pondere mox euanescent, gentes vicinae eos ad se trahent; b) aucto pretio et valore, et manente eodem pondere, omnes res aucto pretio veniunt; c) nummi vsus

non

non modo est in re publica, sed et inter exterarum gentes, ergo ad aliarum gentium aestimationem est respiciendum.

Hinc Alphonsus alias sapiens, insipientiam prodebat, quum nummis duplum valorem tribuerit, iam enim omnia duplo cariora vendebantur; Quumque cogere vellet subditos, ut res eodem, ac antea, pretio venderent, arma hi corripiebant.

CAPUT XV.

DE CONTRACTIBVS, QVI PRETIA RERVM SVPPONVNT, ET FLVENTIBVS INDE OFFICIIS.

§. 1.

HAtenus de rerum pretio. Ex eo *contractus* nascuntur, quorum consideratio nobis et officia, quae ex pretio rerum resultant, suggerit.

De contractibus vero expedienda erunt 1. *definitio*, §. 1. 2. *divisio in contractus onerosos, et beneficos*, §. 2-4. 3. *doctrina de contractibus beneficis*, §. 5-7. 4. *doctrina de contractibus onerosis*, §. 8. *ad fin.*

Contractum definire in iure naturae non difficile est; vere enim hoc iure inter pacta et contractus nulla est differentia, et potuisset auctor, quae hoc capite dixit, aequè commode exsequi supra, ubi de pactis agit.

Nimirum discrimen inter pacta et contractus est iure Romano: hi, quum animaduertent, paciscentes plerumque tergiversari, et negare, se aliquid serio promississe, de medio cogitarunt, quo hanc exceptionem hominibus eriperent; id non commodius fieri posse putabant, quam si certam formam praescriberent, quae in paciscendo esset observanda; si quis ergo eam observasset, inde dabant actionem; sin minus, negabant. Vide *PLAUTVM, Aulular. act. II. scen. II. v. 81. 82.*

- - - Scio, quo vos soleatis pacto perplexari.

Pactum non pactum est, non pactum pactum est, quod vobis lubet.
Item *GELL. Noct. Attic. XX. 1.* Romani fidem in contractibus sanxerunt.

Conventionem ergo, quae solo consensu inibatur, non observata

uata forma legibus praescripta, vocabant **FACTVM**; illam, in qua forma illa adcurate erat obseruata, **CONTRACTVM** adpellabant; e. g. si quis simpliciter promississet alteri centum, id quidem pactum erat, quod nullam producebat actionem; si quis vero centum promississet per stipulationem, actionem dabant, quia forma a lege praescripta erat obseruata, idque non nudum pactum erat, sed contractus.

Forma vero illa vel consistebat in datione, vel in verbis litterisue sollemnibus, vel in consensu vtriusque praesentis in quinque tantum negotiis, quae contractus consensuales vocabant, emtione, locatione, emphyteusi, societate, et mandato.

Eam formam vocabant **causam**, eamque in omnibus contractibus requirebant; at ex quibusdam contractibus praeterea dabant actionem eiusdem cum contractu nominis, e. g. ex emtione venditione actionem emti venditi, et tunc vocabant hos contractus **nominatos**, reliquos autem **innominatos**.

Iam facile patet, haec omnia esse Romana, et iuris positiui, adeoque in iure naturae nullum reperire praesidium: hoc sane nullam conventionibus formam praescripsit; hoc nescit, quid sit nomen, nescit, quid sit causa, adeoque et nescit differentiam inter pacta et contractus.

Contractus ergo (aeque ac *pactum*) est duorum vel plurium in idem placitum consensus de obligatione vel introducenda, vel tollenda, vel utroque.

Equidem auctor discrimen aliquod commentus est inter pacta et contractus; illa iniri ait de rebus, quae non habent pretium, adeoque nec in commercio sint; hos de rebus certo pretio aestimabilibus, et in commercio constitutis, e. g. sponsalia esse pactum, quia sponsa nec pretio sit aestimabilis, nec in commercio; contra emtionem esse contractum, quia pretium interueniat, et nihil vendi possit, quod non sit in commercio.

Iam potest quidem hoc discrimen admitti; cuiuslibet enim liberum est, vocabula suo arbitrio definire; sed tunc discrimen hoc non est reale; siue enim paciscaris, siue contrahas, siue pretium interueniat, siue non, idem erit effectus, puta, pacta aequae ac contractus seruari oportere; quae vero effectui non differunt, ea plane non differre videntur. Maneat ergo fixum atque firmum, iure naturae inter pacta et contractus nullam esse differentiam.

§. 2.

Iam porro quaeritur, *quotuplices sint contractus vel pacta*? quippe haec in posterum promiscue accipiemus. Respondet auctor, alia esse BENEFICA, alia ONEROSA; BENEFICA, ubi alter alteri aliquid gratis praestat, e. g. commodatum, depositum, mandatum, donatio; ONEROSA, ubi utraque pars ad idem vel simile onus obstringitur, e. g. emptio venditio, locatio, societas, pignus. Haec facilia, et tamen auctor in adplicatione erravit; si enim quaeramus, an mutuum sit contractus beneficus, an onerosus? Respondet esse onerosum, et inter illos contractus de mutuo infra agit §. 11. Sed quis dixerit, in mutuo utrumque ad simile vel idem onus obstringi? creditor sane ad nihil obstringitur. Dixeris, creditorem obstringi ad dandam pecuniam, debitorem ad eandem reddendam; sed sic et commodatum, et depositum erunt contractus onerosi, quos tamen auctor ad beneficos retulit; nam et in his unus se obstringit ad dandum, alter ad reddendum vel restituendum.

Adeuratus distinguas inter *mutuum simplex* et *usurarium*: prius erit contractus beneficus; debitor enim pecunia aliena utitur gratis, nec reddit, nisi quod accepit; posterius erit contractus onerosus, quia non gratis accipit pecuniam, sed veluti pro certa mercede.

§. 3.

Iam quaeritur de beneficorum et onerosorum contractuum differentia. Eam auctor recte in eo statuit, quod in onerosis utrimque requiritur *aequalitas*, in beneficiis non requiritur. *Demonstratio.* Benefici nihil aliud intendunt, quam ut alter mihi praestet officium humanitatis, ut supra vidimus, egoque certus sim, alterum mihi illud praestitutum; officia autem humanitatis, ut supra vidimus, non requirunt compensationem per eadem officia, sed gratitudinem tantum; ergo cui per contractum beneficum aliquid conceditur, tenetur tantum ad gratitudinem, non ad compensationem.

Contra in onerosis contractibus non id agitur, ut alter mihi praestet officium humanitatis, sed aliud, quod ab eo nec iure perfecto, nec imperfecto exigere possum; ergo teneor ad compensationem, adeoque ad praestationem aequalem; quod erat demonstrandum.

Hinc consequitur, 1. ut alter alteri in contractibus onerosis indicare debeat rei qualitates et vitia, quae pretium vel minuire, V
Heineccii Prael. Pufendorff. vel

vel intendere possint, e. g. si quis aedes vendit, debet indicare onera, seruitutes, hypothecas, cet. hinc Athenienses dicebant: *contractus lumen amant*; 2. id tantum intelligendum esse de qualitatibus ad obiectum contractus immediate pertinentibus; non de circumstantiis accessoriis, vel extrinsecus aduenientibus; sic e. g. apud CICERON. *de offic. III. 12.* disputatur, an nauta, qui frumenta Rhodum aduexerat, indicare debuerit, alia quoque nauigia frumento onusta Alexandria soluisse? Nec videmus reprehendi entorem in Euangelio, qui agrum emerat, et dissimulauerat, thesaurum in illo latere.

§. 4.

Porro ex eodem principio sequitur, 3. vt omnis laesio vel inaequalitas sit emendanda, si in contractu oneroso interuenerit; quod fit vel abruptendo contractum, vel praestito damno, vel laesione: 4. perinde esse, siue laesio sit maioris momenti, siue minoris, requiritur enim aequalitas; vbi vero vel minima inaequalitas est, ibi vni maius incumbit onus, quam alteri, adeoque onus est inaequale contra regulam §. 3. explicatam.

Haec quidem ex iure naturae certa sunt, et in theoria facile intelliguntur, sed in re publica et praxi non possunt adcurate obseruari; Nam 1. pretium rerum definitur plerumque non lege, sed conuentione; pretium autem conuentionale non consistit in puro, ceu superiore capite ostendimus; itaque admodum illiquida est illa laesio, de qua contrahentium alteruter conqueritur; 2. interest rei publicae, ne lites in infinitum gliscant; in infinitum autem eas gliscere oporteret, si ob laesionem quamlibet, etiam minimam, actio daretur.

Itaque leges ciuiles, inprimis, *L. 2. C. de rescind. vendit.* definiunt, tunc demum actioni locum fore, si alter laesus sit enormiter, id est, ultra dimidiam; quamuis et haec regula multas patiatur exceptiones, inprimis vero non potest locum habere, si quis se laesum quaeratur enormiter in negotio, quod aleam continet, e. g. in transactione; quin ne aequitate quidem niti illam rescissionem contractuum ob *L. 2. C. de rescind. vendit.* singulari *Dissertatione de aequitate cerebrina remedii ex L. 2. C. de rescind. vendit.* demonstrare voluit THOMASIVS, quamuis eius sententiae me haud suffragari fatear.

§. 5.

Iam speciatim de CONTRACTIBVS BENEFICIS, et quidem 1. de mandato, §. 5. 2. de commodato, §. 6. 3. de deposito, §. 7.

MANDATVM est contractus, quo quis rem alienam gratis expediendam suscipit.

Contractus,) ergo non potest mandatum esse obligatorium de re impossibili, turpi, aliaue, quae non est in commercio.

Rem alienam,) In *Institutionibus* dicitur mandatum etiam posse in nostri gratiam suscipi; sed tunc vere non est mandatum, verum consilium, e. g. si inopi mando, ut operas locet.

Gratis,) Alias enim nihil differret a locatione conductione.

Ceterum haec definitio nobis dat conclusiones.

In hoc mandati contractu omnem fidem et diligentiam esse praestandam; nam a) est contractus beneficus, quem de officiis dumtaxat humanitatis iniri diximus; haec amore nituntur, ut supra demonstratum; amor autem eandem exigit fidem ac diligentiam in rebus proximi, quam nobis praestari volumus; mandabant olim per manus dationem, *cedo dextram, per ego hanc dextram te oro, fidelis ut mihi sis*; unde mandatum quasi manus datio; b) nemo mandat nisi amico, nec mandatum quis suscipit, nisi amicus; hinc turpissimum amici spem in nobis positam desituere; facile ergo patet, cur Romani contractum hunc famosum habuerint.

2. Normam huius contractus esse voluntatem mandantis, nam huius causa mandatum suscipitur. Quum vero illa voluntas sit vel determinata, vel indeterminata, mandatum quoque vel *definitum*, vel *indefinitum* est: DEFINITVM, si mandans mandatario omnes circumstantias definit: INDEFINITVM, si eas non definit, sed rem omnem alterius fidei ac prudentiae relinquit. De illo tenendum.

3. religiose mandatarium sese continere debere intra fines mandati, alias mandantem non teneri gesta rata habere.

Hic magnas tricas nectunt Icti Romani; quaerunt enim, a) an mandatum possit exsequi mandatarius per aequipollens? b) item an teneatur mandans rem ratam habere ad summam concurrentem? Nos respondemus, si vere res sit aequipollens, nullum esse dubium, e. g. si mihi quis conduxerit aedes, easque commodas, speciosas, loco opportuno sitas, non autem easdem, quas mihi conduci volebam; sed raro verè sunt aequipollentia propter affectionis pretium, cuius fundamentum supra datum; altera quaestio absolute affirmanda, quia mandans habet, quod voluit.

V 2

De

De mandato indefinito tenenda regula: 4. omnem fraudem abesse debere; hinc, si talis intercessit, mandans ne sic quidem tenetur ad ratam rem habendam.

Denique quamvis gratuitus sit hic contractus, non tamen vlla aequitatis specie exigere potest mandans, vt mandatarium damnum ex re sua ferat; hinc 5. mandans tenetur mandatarium indemnem praestare, adeoque impensas et damna, si qua ex mandato passus est, refarcire.

§. 6.

COMMODATVM a mutuo pleraeque gentes non distinxerunt; hinc Germani eodem vocabulo *leihen* vtuntur de vtroque contractu; receptum tamen est, vt differentia statuatur 1. *ratione obiecti*, quod hic est res non fungibilis, in mutuo fungibilis; 2. *effectu*, quia in mutuo transit dominium, in commodato non transit; 3. *ratione obligationis*; debitor enim reddere tenetur idem in genere, commodatarius eandem speciem.

Hinc definitio, *commodatum* est contractus, quo quis alteri rem suam non fungibilem gratis vtendam concedit, in eadem specie restituendam; hinc 1. commodatarius tenetur rem alienam summa fide ac diligentia custodire; 2. rem finito vsu restituere; 3. quaevis damna sua culpa data refarcire; 4. commodatarius vero a commodante indemnitas praestandus est, si sumtus facere coactus est in rem commodatam. Quia tamen hoc quodammodo inhumanum videtur, promiscue omnes sumtus repetere, quum commodatarius re aliena gratis vtatur: hinc ius Romanum, insuper habitis modicis, immodicos tantum vult restitui, id est, eos, qui ipsam mercedem locationis transcendunt.

§. 7.

DEPOSITVM est contractus, quo res alias gratis custodiendas suscipimus. Nullus est contractus, quem sanctiorem habuere veteres; hinc a PLINIO, *Epistolar. X. 97.* laudantur primi Christiani, quod sacramento se inuicem obstrinxerint, ne depositum abnegent; contra Glauci vniuersam familiam ideo periisse referunt, quod cogitarit saltem abnegare depositum. IUVENALIS, *Satyr. XIII. 199. seqq.*

*Spartano cuidam respondit Pythia vates:
Haud impunium quondam fore, quod dubitaret
Depositum retinere, et fraudem iure sueri
Iurando. --- --- ---*

Et

Et paullo post, v. 204. seqq.

*Reddidit ergo metu, non moribus, et tamen omnem
Vocem alyti dignam templo, veramque probavit:*

Exstinctus tota pariter cum prole, domoque.

Id sane ratio ipsa dicitur, 1. depositum esse sancte custodiendum; est enim et hoc amicitiae fiducia datum.

2. Omnem culpam praestandam.

3. Deponenti statim restituendum; quod tamen patitur exceptionem, a) si forte appareat, deponentem re abuturum, c. g. si furiosus gladium reposcat; b) si verus dominus superueniat, et rem vindicet.

4. Depositarium quoque indemnem praestandum.

§. 8.

Pergit auctor ad contractus onerosos, in quibus primum locum tenet PERMUTATIO, per quam intelligimus contractum, quo res pro re traditur, et quidem intelligenda res omnis, praeter pecuniam; nam alioquin esset emtio venditio.

Hinc quaeri solet, 1. *an in pecunia quoque locus sit permutationi?* Affirmatur, si consideretur tamquam res non fungibilis, alioquin si pecuniam pro pecunia do, vere est emtio; 2. *an permutatio sit, si pars in pecunia, pars in rebus aliis consistat?* Iure naturae huius quaestionis nullus est usus: at iure civili aliquando magnus est ob ius retractus, cui in emtione venditione, non in permutatione locus est; deceditur ergo iure civili ita, ut primum respiciatur ad maiorem quantitatem, quae si in pecunia consistit, pro emtione habetur contractus; sin in alia re, pro permutatione: deinde si aequalis est quantitas, pro emtione, tamquam contractu frequentiore, maior praesumptio est.

Utilior est distinctio inter *permutationem simplicem* et *cum emtione venditione coniunctam*; simplex est, quando absolute res pro re datur, sine praevia aestimatione, qualem supra inter Batauos et Indos fuisse diximus; talis etiam illa apud Homerum Glauci et Diomedis, qui inter se permutabant arma, apud HOMER. *Iliad.* β. v. 236.

χρυσία χαλκίων εκατομβήϊ ινναβίων,

Aurea aeneis centena novenariis.

Altera cum emtione venditione coniuncta, quando singuli primum res suo pretio aestimant, ac deinde loco pecuniae er-
m

ces commutant, quod facere solent mercatores Bataui, dum ex Ruilia coria pro aromatibus domum referant.

De illa est regula: 1. Permutationem eius modi fieri per auersionem, adeoque neutrum de laesione conqueri posse, modo nihil dolo factum; de hac: 2. In permutatione posterioris generis eadem esse iura, quae in emtione, adeoque quamcumque laesione esse refarciendam.

Quaeri solet, *an locus in hoc contractu sit poenitentiae?* Affirmatur iure Romano, sed ratio non alia est, quam quod qui ex sua parte dedit, alterum non dantem habeat obligatum ex contractu, ille vero, qui non dedit, dantem tantum ex pacto obligatum habet; ibi enim adest causa praesens et civiliter obligans, hic non adest: sed quia hanc subtilitatem ignorat ius naturae, secundum quod potius omnia pacta valide obligant, consequens est, ut ex eius principiis non magis sit locus poenitentiae in contractibus innominatis, quam in aliis.

§. 9.

Alter contractus onerosus est *emtio venditio*. Hic maximum denuo discrimen inter ius naturae et civile; illo procul dubio huius contractus finis est translatio dominii, quia ea intentione emere solemus: at iure civili tantum traditio est finis; siue enim dominium transferatur, siue non, tamen valet contractus; hinc iure naturae verus est iocus MARTIALIS, *Epigramm. II. 18.*

Carmina Paullus emit, recitat sua carmina Paullus.

Nam quod emas, possis dicere iure tuum.

At iure civili res aliter se habet, estque *emtio venditio* contractus de re pro certo pretio tradenda, quum iure naturae sit contractus de rei dominio pro certo pretio transferendo.

Itaque 1. venditor debet esse dominus; 2. Non debet in mora tradendi esse, alias iure naturae merito fert periculum; 3. Emtor iusto tempore soluere pretium tenetur; 4. Alias merito tenetur ad praestandam indemnitate, hodie ad vfuras; 5. venditor tenetur ad euersionem praestandam, si res vendita a tertio euicta sit.

Reliqua omnia sunt iuris positiui, nisi quod, quia iure naturae omnia pacta obligant, inde fuit regula: 6. Quod emtioni qualiacumque pacta tum suspensiuu, tum resolutiuu accedere possint.

Ta-

Talia vero sunt: 1. *Additio in diem*, vbi res pro certo pretio alteri addicenda, si intra certum tempus nemo plus offerat; 2. *Lex commissoria*, vt in casum non soluti pretii res incerta sit; 3. *de retrouendendo*, vt restituto pretio res iterum retradatur, cet. Omnia haec pacta ex intentione et sermone contrahentium interpretanda.

Emtio spei est, quando res incerta emitur, quod sit in emtionibus rerum futurarum, lotariis, olla fortunae, cet. vbi vna regula: neutrum contrahentem conqueri posse de laesione.

§. 10.

Locatio conductio est contractus de rei vsu vel operis pro certa mercede praestandis: 1. mercedem hic denuo in pecunia numerata consistere oportet, quia alias esset contractus, do vt facias, vel facio vt facias, quamvis iure naturae inter haec nihil differentiae sit, et Romani hoc discrimen introduxerint ideo, vt actiones eo rectius discerni possent; 2. qui mercedem dat, vocatur conductor, qui eam accipit; locator, quamvis hoc fallat in conductione operis, si scilicet locator totum opus, veluti pons, agger, turris; tunc enim qui mercedem dat, vocatur locator, qui mercedem accipit, conductor, vel redemptor operis; 3. mercedem oportet esse determinatam, alias non est locatio, nisi sit merces legitima; e. g. quaeri solet, an locatio fuerit illa apud MATTH. XX. 4. *ite vos quoque in vineam meam, et quod aequum erit, dabo vobis*: operariorum enim merces diurna legibus iam definita esse solet in singulis ciuitatibus.

Officia iam facile intelliguntur: 1. locator tenetur vsum rei, vel operas praestare; 2. si impediatur, tenetur ad id, quod interest; 3. si non plene praestari potest rei vsus ob casum fortuitum, remissio mercedis iure petitur; datur enim pro rei vsu; casum etiam non alius ferre potest, quam dominus, nisi conductor eum in se suscepit; 4. non potest locator conductorem ante finitum tempus expellere; si expulerit, tenetur ad id, quod interest; 5. conductor tenetur ad mercedem soluendam; nec non 6. ad diligentiam omnem praestandam, quam ipse dominus in suo praestaret, nam vsum tantum rei alienae habet, remque tenetur restituere non deteriores; 7. non potest rem deferere ante tempus, nisi ob urgentem necessitatem: non enim vult ante tempus expelli; quod sibi fieri non vult, alii ne faciat.

An

An vero meliorem rem reddere potest conductor pro lubitu? Neg. iure naturae, nisi dominus vel locator consentiat: aut enim non sufficit res eius vñbus, non debuit conducere; aut sufficit, non debuit sumtuose aedificare. Non ergo probanda est consuetudo Frisiorum, qui conductori praedii rustici liberam faciunt aedificandi facultatem, nec finito locationis tempore locatori prius restituitur praedium, quam satisfactum sit conductori de meliorationibus; ita saepe contingit, vt locator excidat dominio, si tantum soluere non possit.

§. 11.

Mutuum est contractus, quo pecunia, et alia res fungibilis alteri datur, vt eius fiat, et quandoque tantundem in eodem genere restituatur.

Res fungibilis.) Alias enim esset commodatum.

Vt eius fiat.) Natura enim huius contractus exigit, vt transferatur dominium. Negavit id SALMASIVS de *usuris*, praecipue ideo, quod pecunia credita vocetur aes alienum. Sed resp. vocatur aes alienum, non quatenus a debitore possidetur, sed quatenus restituenda; ob id enim non habetur pars patrimonii, nec hoc intelligitur, nisi deducto aere alieno.

Argumentamur contra SALMASIVM: Penes quem omnes dominii sunt effectus, is est dominus; penes debitorem omnes dominii sunt effectus; ergo penes debitorem est dominium. Minorem inde probamus: 1. libere de pecunia disponit debitor, adeo vt et abicere eam possit; 2. omnem inde vtilitatem percipit; 3. periculum et casum fert; si pecunia perit, perit debitori, et res tamen nemini perit, nisi suo domino; 4. vindicat exstantes, vbicumque inuenit.

Officium ex hoc contractu resultans facile intelligitur: *solve quod debes*; est enim hic finis huius contractus.

Obiici posset, at quomodo meum est, quod reddi debet? Resp. 1. non reddo nummos eosdem in specie, sed in genere; 2. potest et dominus ad reddendum obstrictus esse, e. g. qui possidet cum pacto retrouenditionis; heres item fiduciarius; ita maritus est dotis dominus, quamuis ad restituendam illam finito matrimonio obstrictus.

Praecipua quaestio est, *an usurae peti possint?* Negant id nonnulli, inprimis Canonistae, qui excommunicatione dignos putant
vñ-

vsurarios, 1. quia nummus sit res sterilis; Resp. id negatur, quis contrarium mercatores quotidie ipso facto experiuntur; 2. quia commodatum est gratuitum, ergo et mutuum tale esse debere; Resp. non valere consequentiam, in commodato tantum vsus rei transfertur, res non consumitur, sed in specie est reddenda; non ergo tantum est periculum; 3. quia passim in lege Mosaica prohibentur vsurae, *Exod. XXII. 25. Leuit. XXV. 36.* sed conf. *Deut. XXIII. 19.* Non poterant quidem vsuras capere a contribulibus, poterant autem ab aliis, qui non essent consortes eiusdem religionis. Et quis ignorat, Iudaeos esse foeneratores omnium improbillimos. Argumentamur itaque: quidquid tantum ratione Iudaeorum, non omnium hominum prohibitum est, id non est iuris naturae: vsurae, cet. 4. quia magna detrimenta inde capit res publica; Resp. ergo inde tantum sequitur, coercendam esse vsurariam prauitatem, non autem vsuras in se esse illicitas; abusus non tollit usum. Immo *LYDOVICVS SEPTIMALIS de ratione status* eleganter demonstravit: vtilis esse rei publicae, vt vsurae permittantur, quam vt prohibeantur, quia alioquin nemo lueri pecuniam cum tanto periculo crediturus esset, si nulla sit lucra ex vsuris adfulgeret. Demonstratio optima est, vsuras esse licitas: quod tibi non vis fieri, alteri ne feceris; non vis, vt alter cum tuo damno locupletetur; ergo nec tu debes locupletari cum alterius damno; locupletareris autem, si aliena pecunia lucrum faceres, nec partem lucri communicares; cum domino ergo communicare debes, adeoque vsus solvere.

Officium tamen iuris naturae est, 1. vt modicae sint, nec mordaces; 2. vt solvantur vel ex promisso, vel propter moram, adeoque plane non debeantur, si nec promissae, nec debitor in mora sit; 3. vt non exigendae sint ab eo, qui ex pecunia nullum plane lucrum capere potuit, adeoque creditor iure scire debeat, ad quid debitor vsurus sit pecunia.

§. 12.

SOCIETAS (*die Muscopeny*, fraternitas) est contractus de re vel operis communicandis ob commune lucrum.

Est vel *vniversalis* omnium bonorum, veluti multis in locis inter coniuges, vel *particularis*, si communicatum certum bonorum genus, e. g. adqnaestus; vel *singularis*, si certa summa pecuniae.

Vniuersalis omnium bonorum non requirit aequalitatem, neque in adqnaestum, nec operis, nec impensis.

Heineccii Praef. Pufendorf.

X

Par-

Particularis itidem non requirit aequalitatem; sic adquaestus inter coniuges quibusdam locis diuiditur aequa lance, quamvis nec opes sint parës, et vnus plus lucretur, quam alter.

In *singulari* societate singuli socii participant de lucro et damno pro rata, id quod arithmetice per regulam societatis computatur;

Titius in societatem infert	-	-	-	-	-	10000
Maeuius	-	-	-	-	-	5000
Iauolenus	-	-	-	-	-	3000

Istis 18000 lucrati sunt 12000: quaeritur quomodo hoc lucrum distribuendum? Dico per regulam de tribus,

18000	-	-	-	12000	-	-	-	10000		6666 $\frac{2}{3}$
18000	-	-	-	12000	-	-	-	5000		3333 $\frac{1}{3}$
18000	-	-	-	12000	-	-	-	3000		2000.

Sors 18000. 12000 lucrum.

4. Societas *leonina* plane prohibita; nota est fabula Aesopi de leone societatem venatoriam insituyente.

5. Societas tam diu durat, quamdiu voluerunt contrahentes: iure Romano, quamdiu volunt; discedere enim possunt pro lubitu socii.

6. Soluta societate res quoque communes pro rata diuidendae inter socios.

§. 13.

Ad onerosos contractus auctor etiam refert *contractus aleam continentes*, per quos intelligimus tales contractus, vbi quis nescit, quid, quale, quantum, immo an aliquid accepturus sit; huc pertinent.

1. *Sponsiones*, per quas intelligimus mutuam promissionem in incertum euentum factam; nihil hic iniusti, possum donare pure, ergo et in certum euentum; possum solus, ergo multo magis poterunt plures reciproce donare.

2. Ludi omnes, vbi vel ars, vel fortuna, vel vtraque dominatur; hic quoque nihil, quod in se iniustum sit, ludus enim etiam est donatio reciproca sub ea conditione facta, si quis ex legibus ludi alterum vicerit. At iniustissimi fieri possunt ob temporis iacturam, auaritiam, et cupiditatem, iras, contentiones, fraudes, caedes, cet.

3. Olla;

3. Olla fortunae vel lotaria, quando pretio emitur tessera, per quam sortitio sit de lucris admodum inaequalibus; hic quoque nihil iniusti, modo omnis fraus absit, unde plerisque locis institutum, ut nulli liceat ollam fortunae habere, nisi antea a magistratu fuerit probata, quotidieque obsignata. Utillissimus vero eius generis est

Adsecratio, quando quis promittit, se alterum indemnem praestitutum, si forte navis vel merces perierint, pro certo praemio; 1. promittens vocatur *adsecrator*; 2. is, cui indemnitas promittitur, *adsecratus*; 3. praemium; 4. contractus scriptus *die Polizza*.

Praemium statim solvitur, eoque facto hic contractus hunchabet effectum: 1. si non solvit portu navis, adsecratus de praemio partem recipit, quae vocatur *restorno*; 2. si feliciter in portu adpellet, adsecrator praemium lucratur; 3. si perit, adsecrator indemnitate praestare debet. In omnibus his contractibus observandi officia: a) fraudem abesse debere; non prodest autem, si quis de euentu iam certus est; b) neminem in his contractibus de inaequalitate et laesione conqueri posse, quia quisque debet sibi imputare, quod aleae rem commiserit.

§. 14.

Sunt etiam quidam contractus onerosi accessorii, qui numquam per se subsistunt, sed aliis contractibus accedunt: tales sunt *fideiussio*, et *pignus*.

Fideiussio est contractus, quo quis alienae obligationi in subsidium accedit.

Dico in *subsidium*; nam vel alienam obligationem plane in se suscipit, uti Apostolum PAVLLVM fecisse novimus, vocatur expromissio seu delegatio; differentia est, quod per fideiussionem debitor principalis non liberetur, per expromissionem liberatur.

Dicimus: *alienae obligationi*; ergo talis intelligitur, quae vicariam admittit praestationem; ergo sponsalia non admittunt fideiussorem; multo minus in criminalibus causis, quae capitales sunt, vades dari possunt. Admittebantur vero apud Graecos, ceu docent exempla Damonis et Pythiae, sed absurda erat illa consuetudo, 1. quia nemo est dominus vitae suae, ut se obligare possit pro alio ad supplicium subeundum; 2. quia, si id fieret, re vera illa

non foret poena, quia non adest malum actionis, ob quod aliquid mali patiendum.

Dicimus denique fideiussorem alienae obligationi *accedere*. Ius Romanum addit: *per stipulationem*, ut discernatur fideiussio a constituta pecunia; sed iure naturae nihil inter pacta et contractus interesse, saepe diximus.

Iam ex his facile intelliguntur officia: 1. fideiussor tenetur in subsidium; ergo quamdiu soluendo est debitor principalis, non est deveniendum ad fideiussorem; hinc ipse IUSTINIANVS aequum putavit introducere *beneficium ordinis*, quum antea principaliter tenerentur fideiussores; 2. debitor principalis fideiussori tenetur ad indemnitate, 3. plures fideiussores tenentur pro rata, nisi expresse se obligarint in solidum. 4. non tenentur in maius, quamvis arctius teneri possint; quae omnia ex natura precarii satis luculenter fluunt.

§. 15.

Pignus est contractus accessorius, quo creditori ius in aliqua re constituitur ad securitatem crediti.

Haec res si traditur, *pignoris* nomen retinet; si non traditur, *hypotheca* vocatur.

Sic aliquando sola res traditur, aliquando et fructus creditori relinquuntur in vicem usurarum, et tunc est pignus cum pacto antichretico.

Quum ergo pignus detur in securitatem crediti: sequitur, 1. ut eo non sit utendum, nisi pactum antichreticum accesserit; 2. potius summa fide et diligentia custodiendum; 3. si tamen perijt, non ideo exstinguitur debitum, quia res perijt suo domino; 4. soluto debito pignus est restituendum; 5. debitor non debet vel rem alienam, vel alii potiore iure obnoxiam pignori dare; non enim potest ius ei in re dare, in quam iam alteri ius est.

Quaeritur, *an in pignore locus sit pacto commissorio*, id est, tali pacto, ut pignus commissum sit, simulac iusto tempore non reluatur? Negatur; debitor enim nihil debet, nisi ut tantundem in eodem genere restituat, non autem restitueret tantundem, sed plus, quam deberet, si pignus in commissum caderet, quippe quod plerumque maioris pretii est, quam debitum; ergo pactum commissorium non habet locum.

§. 16.

Quum ipse auctor, quod ad officia contrahentium attinet, se ad superiora referat, nos vero officia ad singulos contractus accuratissime exposuerimus: actum agere, eaque hic omnia repetere nonolumus, sed potius ad caput sequens progredimur.

CAPVT XVI.

QVIBVS MODIS SOLVANTVR OBLIGATIONES,
QVAE EX PACTIS ORIANTVR.

§. 1.

QVum adhuc de contractibus, iurisque inde obligationibus, actum sit: merito iam porro inquiruntur, *quomodo obligationes dissolvantur?* modi autem sunt tot, quot sunt paragraphi, ut nulla opus sit huius capitis partitione.

Primus modus est *expletio contractus* seu *solutio*, per quam intelligimus praestationem eius, quod est in obligatione, e. g. si redidit creditum, si pretium ab emptore solvitur, cet.

Solui tunc obligationem, inde probatur: finis est primum in intentione, at ultimum in executione; in contractibus expletio seu solutio est primum in intentione, et ultimum in executione, contractus ergo, solutione praestita, finitus est.

Inde patet, 1. non interesse, quis solvat promissum vel praestet, nisi promissum ita comparatum sit, ut non admittat vicariam praestationem; hinc si Titius solvit centum, quos Maeuius debet, mihi perinde satis factum est, ac si Maeuius solvisset. At si Titius ducere velit Caiam, cui Maeuius promisit matrimonium, non perinde est, quia personae qualitas electa.

2. Solvendum est, quod in obligatione est; ergo non aliud pro alio, nec particularis solutio ulli obtrudi potest, si summa integra promissa; solvendum etiam eadem moneta, de qua convenit, aut tantundem addendum, quanto moneta est deterior, id quod vocant *agio*.

3. Solvendum iusto tempore, alioquin minus solvitur; hinc non.

iniustum est interesse morae; videmus ergo, cur veteres vsi sint termino metaphorico SOLVERE, quemadmodum et OBLIGARE est metaphoricum. Sicuti contrahendo aliquis veluti obstringitur et ligatur: ita praestando, quod debet, soluitur et liberatur.

§. 2.

Alter modus est *compensatio*, quod vocabulum est stathmicum, usurpaturque, quoties duo pondera sunt in aequilibrio; quemadmodum ergo tunc neutrum praeponderat, ita et neuter melioris vel deterioris conditionis esse dicitur, ubi fit compensatio.

Definimus itaque *compensationem*, quod sit mutui debiti et crediti contributio.

Tolli ea obligationem inde est, quod quae per pauca fieri possunt, per plura fieri non debeant: si enim ordine esset procedendum, primo debitor meus solvere mihi deberet centum, deinde eidem solvere deberem centum, quos ego debeo, brevius id fieri potest, si uterque suos centum retinet.

Iam facile patet, 1. compensationi tantum locum esse, ubi utrimque est debitum certae aestimationis; hinc frustra compensarentur res et facta, nisi haec iam aestimata sint, e. g. Titius Caiae debet centum, haec Titio promissit matrimonium, compensationi non est locus, nisi forte a consistorio pronuntiatum sit, Titium Caiae centum solvere teneri.

2. Compensari non posse, nisi quod utrimque liquidum est; liquidum enim statim debetur, illiquidum tum denum, quando causae cognitio finita; at iniuria fieret creditori, cui statim solvendum, si iuberetur tamdiu expectare, donec alter altercarì desierit.

3. Compensatio fit ad summam concurrentem, id est, si Titius mihi debet centum, ego viginti, solvere mihi tenetur octoginta.

4. Ab eo momento, quo mutuum esse coëpit debitum et creditum, uterque debere statim desit, ergo cessant usurae, pignora, obligationes fideiussorum.

§. 3.

Tertius modus est *remissio* seu *condonatio*, quae est pactum, quo obligatio vnus alterius liberalitate tollitur.

Est vel *expressa*, quae fit verbis, vel *tacita*, quae ex facto colligitur, e. g. ex redditione vel laceratione chirographi.

Ad

Ad expressam Romani requirebant verba sollemnia: *tunc, quod tibi debeo, acceptum habes? acceptum habeo*; id quod vocabant acceptilationem.

Necessarium id videbatur; 1. quia pactum nudum non obligabat civiliter; 2. quia nihil tam naturale videbatur, quam eodem modo quidque dissolui, quo colligatum est: sed quum hae rationes iure naturae cesserent, perinde quoque est, siue condonatio per pactum facta, siue per verba sollemnia.

Officia sunt: 1. qui condonat, debet liberam de rebus suis dispositionem habere; scelerata ergo erat remissio illius nequam apud Lyc. XVI. 6. *accipe tuum scriptum, et sede continuo; et scribe quinquaginta*; sic de alieno iudebat corio; 2. debitor debet hanc remissionem acceptare; sunt, qui eam acceptationem praesumi aunt, sed ego id negauerim; distinguendae personae, si persona sit egena, et quae honeste id beneficium acceptare possit, praesumitur acceptasse, e. g. si quis pauperi condonet: at si iudex debeat litigatori centum, et hic ad corrumpeundum iudicem ei debitum remittat, acceptasse hoc iudex non praesumitur, nisi consensum expresse declararit.

§. 4.

Quartus modus est MUTVVS DISSENSVS: quemadmodum enim contractus et conventiones mutuo consensu ineuntur: ita iidem mutuo dissensu procul dubio dissoluantur; est enim mutua remissio iuris ex contractu quaesiti.

Sed addit auctor limitationes duas: 1. si res sit integra, id est, si contractus non sit adimpletus, non quod postea recedere a contractu non liceat, sed quod, si recedatur, non tam dissolutio contractus adsit, quam novus contractus, e. g. si quis mihi vendidit equum, et tradidit, egoque solui pretium, et postea utrique nostrum placeat, ut venditor equum, ego pecuniam recipiam, re vera haec nova emptio venditio est.

2. Si lex positiva non obstat; haec enim procul dubio prohibere potest, quo minus contrahentes mutuo dissensu a contractu resiliant, quia hoc non est iuris naturalis praeceptum, sed permissum. Exemplum habemus in sponsalibus et nuptiis, quae quidem mutuo consensu ineuntur, at mutuo dissensu tam simpliciter dissolui non possunt, quamvis hoc iuri naturae in se non repugnet.

§. 5.

Quintus modus est *alterutrius perfidia*, qui modus potissimum in contractibus bilateralibus locum habet: in his est mutua obligatio, adeoque unus alteri promittit sub conditione tacita: praestabo, si tu ex tua parte praestiteris; ergo uno non praestante alterius obligatio procul dubio cessat. PHILOSTRATVS laudat Regem, qui foedus cum vicino percussum sancte se custoditurum protellus est, quamvis vicinus contra leges foederis arma moueret; absurda laus, quum magis simplicitatem suam prodiderit bonus ille Rex, quam insignem fidem. Hoc ergo cum grano salis intelligendum; perfidia neminem potest obligatione soluere, quia est factum illicitum; ergo contractus quidem soluitur ex parte eius, qui bona fide illum seruare constituerat, non ex parte perfidi. Reddi hinc potest ratio, cur consistoria diuortio decreto parti innocenti soleant indulgere nouas nuptias, non autem nocenti.

§. 6.

Sextus modus est *status*; sed hic modus non est generalis; immo mutatio status iure naturae neminem obligatione soluit. Ad subtilitates iuris civilis hoc pertinet, quod capitis deminutio minima obligationem perimebat, ceu ex *iii. D. de capit. minut.* nouimus. Subest fictio, eum in imaginariam seruitutem esse deductum, qui emancipatus fuerit; at fictiones eius modi ius naturae plane ignorat, itaque hoc restringendum ad obligationes, quae inuito alicuius status inducuntur; hae demum mutato statu cessant, quia cessante causa effectus cessat, e. g. obligauit se quis tamquam miles ad leges militares; cessat eius obligatio, si miles esse iusto modo desit, sed non ideo cessat obligatio militis debitoris, si miles esse desit.

Hoc ergo intelligendum de mutatione status promittentis, non alterius, nisi incapax factus sit rem acquirendi; hinc quaeritur, *an Latini, reſte ſe liberatos putarint obligatione foederis cum Romanis nulli, quum adhuc eſſent ſub Tarquinio, quia ſtatuſ Romanae rei publicae mutatus?* Negatur, quia ideo non incapax facta foederatum habendi.

§. 7.

§. 7.

Septimus modus est *tempus*; sed nec hic modus est generalis, pertinet enim ad illas tantum obligationes, quae ad certum tempus initae, e. g. solvam tibi quotannis 100 per 10. annos; exacto decennio cessat obligatio.

Aliter ius Romanum, §. 3. *Injl. de verb. oblig.* ad tempus non posse deberi, itaque promissionem in certum tempus conceptam perpetuari, at stipulatorem, si post decennium petere velit, exceptione pacti vel doli mali submoueri. Sed hae tricae iuri naturae incognitae. Tempus Romani considerabant tamquam pactum contractui stricti iuris adiectum; pacta adiecta contractui stricti iuris non valebant, nisi per modum exceptionis, ergo producebat tantum exceptionem.

§. 8.

Octauus modus est *mors*, quae omnia soluit, adeoque et obligationem; at id generaliter non est verum; nam e. g. obligatio debitoris ad solvendum debitum nec debitore nec creditore mortuo soluitur.

Distingue ergo, aut obligatio est solius personae intuitu inita; aut respectu rei praestandae: priore casu cessat morte obligatio, e. g. promissio matrimonii, obligatio officialis, ministri, magistratus; posteriori casu non cessat semper, sed tunc denuo dispiciendum, an quis teneatur ad rem, an ad poenam praestandam; prior enim obligatio ad heredes transit, posterior morte debitoris expirat.

§. 9.

Vltimus modus est *delegatio*; sed auctor hanc confudit cum *cessione*, nam ait: delegari alicui debitorem, quum et non debitor delegari possit; at cessio requirit debitorem. Tu ita dixeris: *delegatio* est actus, quo debitor consentiente creditore alium pro se solviturum substituit; hic tunc vocatur *expromissor*, e. g. Paulus. *Cessio* est actus, quo, quod quis mihi debet, in alterum transfero; ergo 1. in delegatione mutatur persona debitoris, in cessione persona creditoris; 2. delegatio requirit consensum et creditoris et noui debitoris, cessio tantum creditoris; 3. delegatio prioris debitoris obligationem tollit, cessio non tollit.

Heineccii Prael. Pufendorf.

Y

Soluti-

Soluitur ergo delegatione non in vniuersum obligatio, sed tantum obligatio prioris debitoris; Paucis: obligatio delegatione non finitur, nec soluitur, sed transfertur tantum.

CAPVT XVII.

DE INTERPRETATIONE.

§. I.

Sequitur exemplum GROTIJ auctor in *Iure nat. et gens.* egit de interpretatione, eamque doctrinam et in hoc compendio repetit; imitatus postea Puffendorffius THOMASIVS in *Iuris prud. diuin.* At is primus animaduertit, nihil huic doctrinae cum iure naturae commercii esse.

Alii quidem interpretandi artem referunt ad criticam, veluti IO. CLENIVS in *Arte critica*; sed critica magis in emendando et illustrando, quam in interpretando versatur, et si interpretatur, quaerit tantum sensum grammaticum. Alii eam artem vindicarunt theologiae, alii iuris prudentiae, quia eam his disciplinis permultum utilitatis praestare animaduertebant, sed eodem iure etiam ad omnes alias disciplinas referri posset.

GROTIUS primus retulit ad ius naturae, quia eius regulae aequae ex recta ratione fluunt, ac ipsum ius naturae; sed ita et tota philosophia tractanda esset in iure naturae. Vt paucis dicamus: interpretatio non pertinet ad ius naturae, sed ad logicam; haec autem intellectum praeparat ad cognitionem veri; verum autem vel meditando reperire volumus, vel ex aliorum scriptis eruere, vtrumque docere debet sanior logica: vnde et THOMASIVS, alique adcuratiores hanc doctrinam in logicis tradiderunt.

Vt sit, tam utilis est haec doctrina, vt numquam satis inculcari possit: operae pretium ergo fuerit, hoc caput eoluere paullo adcuratius; agit in eo auctor 1. de utilitate regularum interpretandi, §. 1. 2. de interpretatione verborum, §. 2-4. 3. de interpretatione ipsius sensus et voluntatis, §. 5. ad fin.

I. Quaeritur, quam utilitatem interpretatio habeat in iure naturae? Vt adcurate respondeamus, distinguendum inter ius naturae ipsum,

sum, et eiusdem applicationem; illud est theoria, haec praxis. Quod ad ius naturae ipsum attinet, regularum interpretandi nulla est utilitas; Hoc ita probamus: regulis interpretandi opus est, quoties adsunt signa, quibus quis sensa animi paullo obscurius expressit; id est, quoties adsunt verba et loquutiones paullo obscuriores; atqui in iure naturae non adsunt signa vel verba obscuriora; ergo in iure naturae non opus est interpretatione. Minorem inde probo: ius naturae nobis non verbis reuelatum est, sed inscriptum in cordibus, non verbis, sed ipso sensu, e. g. sic scio, neminem occidendum, quamuis ipsa verba in corde meo non reperiantur, ipsam rem enim scio, cogitationes vero meae nulla indigent interpretatione.

Aliud, si de applicatione loquamur; ius naturae et gentium quaerit, quid iuris sit circa leges, pacta, contractus, foedera, tractatus pacis; haec omnia verbis exprimi, et litteris consignari solent, ergo indigent interpretatione; nec prius de iure respondere possum, quam intelligam sensum loquentium, e. g. foedera esse seruanda probe scio, etiam circa sine verborum interpretatione.

Occurrit casus, Romani et Carthaginenses finito bello Punico primo pacti erant, neutram gentem alterius socios laedere debere; paullo post ad Romanorum societatem accesserat Saguntus, Hannibal Carthaginensis eam obsidebat, quaerebatur, an hoc contra foedus sit? Romani affirmabant, quia Saguntus sit socia ciuitas; negabant Carthaginenses, quia Saguntus loca ciuitas non fuerit eo tempore, quo foedus factum; interpretatione ergo huius foederis opus erit, prius quam circa illud iustum sit, pronunciare ex iure naturae et gentium possis.

Ita et Latini populi foedus fecerant cum Romanis, eorumque Rege Tarquinio Superbo: Tarquinium Romani vrbe expulerant; liberamque constituebant rem publicam; Latini deficiebant a Romanis, caussari, se hoc foedus cum regno Romano fecisse, iam vero tale nullum superesse. Prius quam ex iure naturae et gentium ostendi possit, rectene, an male et iniuste egerint Latini, foedus illud recte erit interpretandum. Ergo ipsum quidem ius naturae non indiget interpretatione, at in applicatione eiusdem ad pacta, foedera, cct. vsus eius est incredibilis.

§. 2.

II. *Interpretatio* est actus intellectus, quo verum loquentium aut scribentium sensum ex certis signis, nempe verbis et litteris, eruo;

Y 2

ergo

ergo distincte hic consideranda verba et sensus loquentis vel scribentis.

Quod ad verba, ea vel sunt *popularia*, quibus quisque etiam ex populo vitur, de quibus §. 2. vel *technica*, seu verba artis, §. 3.

De *popularibus* auctor commendat *regulam* hermeneuticam I.

Verba tamdiu accipienda sunt in significato famoso, donec necessitas nos ab eo duellat.

Ratio huius regulae est; qui loquitur, vult, intelligi, ergo debet uti signis ad indicanda animi sentia semel receptis; non autem videretur signis semel receptis, si significationem verbis plane aliam subiceret; ergo praesumitur merito, eum verba in sensu nativo et recepto recepisse, usque proinde merito inhaerendum, quoad licet; e. g. promiserant Turcae militibus praesidiariis capita salva fore, et putabant demde, satisfactum esse promisso, si eos pedibus manibusque truncarent; absurde; hic enim verba in sensu vulgari recipienda, vulgus vero intelligit per haec verba, vitam retinere.

Addimus vero, *donec nos necessitas inde depellat*, id est, quamdiu nihil absurdi inde sequitur; absurdi autem quid sequitur, quoties vel contradictorium quid, vel fini loquentium, contrarium inde fluat; hinc ad litteram non poterat intelligi responsum oraculi Delphici Atheniensibus datum, ut in renibus ligneis se mouerent.

Sed quaeritur, *quaenam sit significatio nativa ac recepta vocum?* Recte respondet auctor, non esse hic respiciendum

1. ad etymologiam, ea enim a) saepe a significatione maxime discrepat, e. g. schola, a σχολή otio dicitur; montem a mouendo dictum volunt; b) maxime saepe incerta, et plerumque ignota, e. g. aediles curules aliqui dictos putant a curru, alii a curia, alii a sella curuli; c) aliquando nugae agunt viri docti in studio etymologico; MENAGIVS deducit vocabulum *Laqueis* a verna; *mutuum* IUSTINIANVS a meum et tuum; *testamentum* a testatione mentis; *loquax* Scholastici dictam putabant ab hasta et longus.

2. Nec ad proprietatem, id est, primaeuam significationem; nam ea saepius degenerat cum tempore, e. g. tyrannus olim rex; sophista olim sapiens; fur olim seruus; idemque Germanicum *Schalek*, olim *Knecht*; *Magd* olim virgo.

3. Nec ad analogiam seu similitudinem formationis, nam et haec saepe fallit, e. g. conuicium, ubi plures simul clamant; quasi conuocium est, ergo conuiuium *non analogias* erit, ubi homines plures simul viuunt; comitium, ubi plures simul eunt, et tamen

con-

convivium significat epulum, comitium locum in foro.

4. Nec ad similitudinem linguarum vicinarum, e. g. *Seigneur* manifesto est a senior, uti *Italicum Signore*, et tamen nihil minus, quam seniore[m] significat.

5. Ergo ad solum usum est respiciendum; verba valent sicut numeri; ad usum, inquam, quem penes arbitrium, et vis, et norma loquendi, ut ait HORATIVS; ergo caput servare significat vitam retinere ob usum, fur significat *eimen Dieb* ex usu; ita et tyrannus, gymnasium, cet. significationes habent ex usu, quom quoad originem plane aliud quid significant.

§. 3.

Jam ad terminos vel vocabula technica: singuli artifices habent sua vocabula propria, vel saltem suas significationes proprias. Icti e. g. plane alia significatione utuntur in verbis innumeris, e. g. flumen, tignum, telum; pauperies, noxa, pecus, quadrupes; Mathematicis plane aliud est corpus, quam physicis, quin et venatores, pictores, fabri, sutores, cet. eius modi vocabula habent.

Hinc regula II.

Verba artium ex artificum sensu interpretanda.

Hinc vocabula gemmarum a mercatore gemmarum discenda.

Usum insignem habet haec regula in interpretandis foederibus; legibus, cet. e. g. *Alsatia*, quae sit, discendum erit a Geographis, quom Galli cum Germanis post pacem Westphalicam contenderent, de provinciae istius regionibus; quid sit *die Land-Forstrey*; ex iure publico; feudum masculinum, feudum ligium, feudum soldatae, camerae cet. ex iure feudali discendum; quid classis sit? discendum a collegiis nauticis, quae vocant *Admiralitäts-Collegia*.

Patitur tamen regula exceptionem, si praesumptio sit, loquentem tales terminos technicos non potuisse intelligere; sic tutor filio praelegauerat quatuor elementa; hic frustra quaesivisses a physico, quid legatum hoc contineat; intelligebat enim tutor ille libellum scholasticum.

§. 4.

Aliquando verba siue simplicia, siue complexa tam obscura sunt; ut coniecturis sit opus, de quibus regula III.

Coniecturae debent esse consentaneae circumstantiis orationis.

Y 3

Tales

Tales circumstantiae potissimum sunt 1. *persona scribentis vel loquentis*, e. g. in *L. 1. §. 3. D. de extraord. cognit.*, agitur de Medicis, negaturque eos esse Medicos, qui incantauerint, vel imprecati sint, vel qui vulgari impostorum verbo exorcisauerint; non esse haec medicinae genera, tametsi sint, qui has sibi profuisse cum praedicatione adfirmant. Verba haec sunt obscura, nec expressit VLPIANVS, quos ita perstringat; sed non vlla probabilior est coniectura, quam notari hac lege Christianos, qui tunc temporis adhuc miraculose curabant homines, vti testatur scriptor eorundem temporum TERTVLLIANVS. Conuenit sane haec coniectura personae scribenti, VLPIANO, hosti Christianorum acerrimo, vti testatur LACTANTIUS, *Instit. diuin. V, 15.*

2. *Verba ipsa*; nam et ista coniecturae non repugnare debent; in superiore exemplo vocabula *impostorum* occurrunt; eo vero nomine vel praecipue notabant Christianos pagani, ceu id demonstrauit KORTHOLDVS, in *Pagano obrectatore*; *exorcizare*, eo quoque vocabulo tum vel maxime ac pene soli utebantur Christiani, vti GVIL. CAVE in *Christianismo primitiuo* docuit; conuenit ergo et his verbis coniectura nostra.

3. *Tempus*; vixit VLPIANVS seculo tertio, quo feruebat, odium aduersus Christianos, quo hi miraculose curabant, adeo vt in ipso Seueri Imperatoris palatio Christianus Euodii procuratorem curaret, TERTVLL. *Apologet. cap. 4.* Eo procul dubio pertinent verba vltima huius *L. 1. tametsi sint, qui hos sibi profuisse cum praedicatione adfirmant.*

4. *Locus*; VLPIANVS scripsit Romae, vbi magna Christianorum multitudo, eaque exola, adeo vt Seuerus Christianos fieri vetaret, SPARTIAN. *vit. Seuer. cap. 17.*

5. *Causa*; scripsit haec VLPIANVS in libro *de omnibus tribunalibus*, vti legis inscriptio indicat; omnia vero tribunalia tum potissimum Christianorum causis occupabantur.

6. *Modus*; stilus est magis satyricus, quam alias solet; Ita omnes circumstantiae nostrae, nec ideo dubitare possumus, quin illa solida sit.

§. 5.

Haecenus de verbis: iam III. de sensu totius orationis eruendo. Hic quoque coniecturis nonnumquam est opus, maxime vero

1. in aenigmatibus, parabolis, hieroglyphicis, similibusque orationibus; e. g. Exstat vetus epitaphium Bononiae;

D. M. S.

D. M. S.

AELIA. LAELIA. CRISPIS.

NEC VIR NEC MULIER NEC ANDROGYNA.

NEC PVELLA NEC IUVENIS NEC ANVS.

NEC CASTA NEC MERETRIX NEC PVDICA.

SED OMNIA.

SVBLATA NEQVE FAME NEQVE FERRO.

NEQVE VENENO SED OMNIBVS.

NEC COELO NEC AQVIS NEC TERRIS.

SED VBIQVE IACET.

LVCIVS AGATHO PRICVS.

NEC MARITVS NEC AMATOR NEC NECESSARIVS.

NEQVE MOERENS NEQVE GAVDENS NEQVE FLENS.

HANC NEC MOLEM NEC PYRAMIDEM NEC SEPVLCHRVM.

SED OMNIA SCIT ET NESCIT CUI POSVERIT.

HOC EST SEPVLCHRVM INTVS CADAVER NON HABENS

HOC EST CADAVER SEPVLCHRVM EXTRA NON HABENS

CADAVER IDEM EST ET SEPVLCHRVM SIBI

Hoc tam aenigmaticum est, vt erui non possit sensus, nisi per coniecturas.

2. Obscuris propter abbreviaturas, verba antiqua, noua, peregrina, inusitata, non plene scripta vel truncata, e. g. Fridericus III. Imp. symbolo gaudebat. A. E. I. O. V. *Legate synthesus*, L. 38. §. 1. *D. de aur. argent. mund. leg.*

Sic vos non vobis.

3. Antiquis; *morari inter homines desit*; omnibus his similibusque casibus coniecturarum tres fontes ostendit auctor, 1. substratam materiam, id est, obiectum, de quo auctor loquitur; 2. effectus; 3. coniuncta; de singulis seorsim.

De materia commendat regulam IIII.

Verba regulariter sunt accipienda secundum substratam materiam. Talia enim sunt subiecta, qualia permittuntur esse a suis praedicatis, et vice versa.

Hinc e. g. epitaphium Aeliae Laeliae Crispidis necessario explicandum videretur de abortu, si vltima quadrent, est enim epitaphium alicuius, quae *nec vir, nec mulier, nec androgyna*; nondum enim ille perfectus fuit homo, *sed omnia*; fieri enim haec omnia; hinc *nec casta, nec pudica, cet. sed omnia*, scilicet potentia; *sub-*
lata

lata neque fame; cet. periit enim nullo horum, et tamen incertum; an non mater aliquid venenati adsumserit, an nutrimentum suffecerit, adeoque an non fame perierit, an non vis adhibita; *nec coelo, nec aquis, nec terris, sed ubique iacet*; videtur urnae inditus cuius, qui sic nec coelo, nec terra, nec aquis, sed in aëre, qui ubique est, tenebatur. *Agatbo ille omnino nec maritus, nec amator, nec necessarius erat, sed omnia esse potuisset, cet.*

Legare synthefin significat alicui velles, quae necessario coniunctae sunt, legare; addo ego vero regulam *V.*

Coniectura manet incerta, nisi accedat probatio, quae eam reddat probabilem,

e. g. in epitaphio Aeliae Laeliae Crispidis nihil probavi, ergo coniectura incerta. Contra symbolum illud Friderici III. imp. probabiliter interpretantur;

Austriae Est Imperare Orbi Vniuerso.

Probari enim potest, Imperatorem illum siue prophetia aliqua, siue fomnio monitum certo sibi persuasisse, Austriam vniuerso orbi imperataram; Hinc in sigillo maiori expressit vericulos:

Aquila Ezechielis

Sponsae missa est de coelis

Volat ipsa sine meta

Quo nec ales nec propheta

Euolauit alius.

§. 6.

2. De effectu notanda regula VI.

Verba ita interpretanda, ut effectum habeant;

nemo enim ideo loquuntur, ut nihil significet, vel verbis suis nihil euincat, si sanus est; hinc 1. omnia pacta ita interpretanda, ut effectum habeant; hinc cauillator fuit Brasidas, qui magna accepta pecuniae summa Thebanis obsessis promisit, se eorum terra excellurum, ac deinde caussatus est, suam esse terram, quam exercitu suo infederit.

2. Omnia testamenta; Titius et Sempronius heredes sunt; quod Titius habebit, Sempronius accipito; quod Sempronius habebit, Titius accipito. Hic nullum effectum haberet heredis institutio, si quod non accipias pro quantum.

3. Foedera; hinc absurda erat interpretatio Romanorum, qui stipulati ab Antiocho Syriae Rege dimidiam classem, naues singulas

las secabant; sic enim nullum effectum habebat stipulatio Antiochi, qui pro defensione regni alteram dimidiam sibi reseruauit.

§. 7.

3. Coniecturae etiam desumuntur ex coniunctis. *Coniuncta* sunt vel *loco*, illa vocantur loca parallela; vel tantum *origine*, et vocantur antecedentia et consequentia.

De coniunctis loco obseruanda regula VII.

Locus obscurior explicandus ex loco clariore.

Sic saepe scriptura explicanda ex scriptura; sic saepe testamentum ex codicillo; phrasis apud MATTH. III. II. *igne baptizari*, alibi effectur, *sacro baptizari spiritu*.

De coniunctis origine regula VIII.

Attendendum est ad antecedentia et consequentia.

Extra contextum enim saepe nullum idoneum sensum fundit oratio, e. g. sic *te diua potens Cypri*; nullum sensum fundit, *iunge* sequentia, et statim de sensu patebit.

Sic in §. 2. *Inst. de act.* casus memoratur, quo possessor in rem agat; disputant, quis ille sit? sed antecedentia id planum faciunt; si quis nempe intendat ius non esse aduersario vtendi, fruendi, cundi, agendi, aquam ducendi; est ergo actio negatoria, non interdictum, *vii possidetis*, ob L. 3. §. 3. *D. de interd.*

In L. 5. §. 2. *D. qui et a quib. manumiss.* libertas in fraudem creditorum data dicitur rescindi; in L. 45. §. 3. *D. de iur. fisc.* dicitur retrahi; in L. 1. *C. qui manumitt. non poss.* dicitur reuocari; sed confer locum parallelum. *pr. Instit. qui et ex quib. caus. manumiss.* ibi manumissio talis nulla esse dicitur.

Ita L. 10. *D. de instit. act.* ita se habet: *eatenus tamen dabitur in eum actio, quatenus ex ea re locupletior est*; hic non exprimitur persona rei, nec qualis sit actio, quisque casus sit, de quo agatur. Sed antecedentia haec omnia illustrant: agitur de pupillo, qui tabernae praeposuit institorem; agitur de actione infortoria, et quaeritur, an illa aduersus pupillum locum habeat? idque adfirmatur eatenus, quatenus factus sit locupletior.

In L. 12. §. 42. *D. de instrum. et instrum. legat.* mentio fit ostiariorum, topiariorum, diaetariorum, aquariorum, et dicitur, eos omnes ad legatum fundi instructi pertinere: hic antecedentia statim docent, eos esse seruos, et ostiarios quidem ianitores, qui in

Heineccii Prael. Puffendorff.

Z

cate-

catenis ad fores excubabant in cellula ; topiarios hortulanos ; diaetarios, qui diaetis seu cubiculis praeerant ; aquarios, qui aquam portabant.

§. 8.

4. Ad interpretationem legum praecipue multum facit ratio legis, quae eiusdem veluti anima est.

Equidem PAGANINVS GAVDENTIVS, *Exposit. iurid. libr. I. cap. 3.* negat, hanc regulam veram esse, quin ne posse quidem omnium, quae a maioribus constituta sunt, rationem reddi, *L. 20. D. de legib.* Sed satis haec argumenta refutauimus in praefatione nostra *Elem. iur. ciuil. secund. ordin. Digestor. adornat.* praefixa. Id quidem verum est, si de obligatione legis quaeratur, nihil ad rem facere rationem legis ; at in interpretatione legis ea est quam maxime necessaria ; hinc auctor ponit regulam VIII.

Illā interpretatio est sequenda, quae rationi congruit : illā reicienda, quae ei repugnat.

Ratio in promptu est : legislatori cuius certus finis ob oculos versatur, ei fini accommodat media, id est, leges suas. Ergo legem non intelligo, nisi intelligam finem, e. g. de domo sua nemo in ius vocandus, *L. 18. D. de in ius vocan.* sed e vinea, balneo, theatro in ius vocari potest, *L. 20. D. eod.* Rationem reddere nemo poterit, nisi rationem legis sciat, quae est religio deorum Penatium.

In *L. 15. §. 27. D. de iureiur.* pro iniuria habetur, ad alterius inuidiam veste lugubri uti, barbam demittere, capillum submittere ; lex haec clara, si scio rationem, puta, quia cognati talem habitum sumebant, si cognatorum aliquis capitis damnaretur, vel de capite periclitaretur.

L. 20. C. de poen. Si Imperator supplicium grauius, quam alias soleret, deceuerit, exsequutionem 30. dies differendam iubet. Legem non intelligimus, nisi rationem ex historia Theodosii sciamus. Vid. IAC. GOTHOFRED, *ad Cod. Theod. tom. III. tit. de poen. pag. 305.*

§. 9.

5. Sequens regula X. notissima quidem, et vetus admodum est ; sed parum adcurata :

Favorabilia late, odiosa stricte interpretanda sunt,

Orta

Orta super ea controuersia inter THOMASIVM et VINC. PLACCIVM; ille hanc regulam reiecit, hic defendere voluit: scripta inserta THOMASII *Iuris prudentiae diuinae*.

Postulauit THOMASIVS suo iure, vt PLACCIVS fauorabilia et odiosa definiret; sed hic haesit aqua.

Supplere hunc defectum voluit PYENDORFFIVS, sed 1. res ipsa docet, eum non definitiones dedisse, sed exempla; 2. ne exempla quidem omnia adduxisse, quia subiecit, cet. 3. experiundo quis dicet, impossibile esse genuinas definitiones fauorabilium et odiosorum reperire.

Nimirum intellectu quidem et abstrahendo possum distinguere fauorabilia et odiosa, sed re ipsa eadem res diuerso respectu simul odiosae et fauorabiles sunt; quod enim vni accedit, alteri decedit, quod vni prodest, alteri incommodum est. Hinc auctor addidit res mixtas, sed reuera omnes mixtae sunt, e. g. dos est fauorabilis genero, odiosa ratione soceri; priuilegium beneficium fauorabile est priuilegiato, odiosum ratione conciuum; legatum, fideicommissum, donatio sunt fauorabilia ratione legatarii, sed odiosa respectu heredis; tributa sunt fauorabilia ratione fisci et rei publicae, odiosa ratione subditorum.

Iam facile patet falsitas regulae, argumentamur enim: si fauorabilia late, odiosa stricte interpretanda sunt, sequitur, vt eadem res et late, et stricte interpretanda sit; at posterius est absurdum; ergo et prius. Consequentia vera est, quia easdem res et odiosas, et fauorabiles esse demonstrauimus. Posterius absurdum esse inde probamus, quia ne exitum quidem reperire potest eius modi interpretatio, e. g. si litigarent de dote gener, et socer, ille vsuras peteret, hic negaret, se vsuras debere, absurdissime iudex pronuntiaret, reum et dotem, et vsuras debere, actori vero vsuras accipere ius non esse, et tamen ita pronuntiandum esset, si vera esset regula, fauorabilia late, odiosa stricte esse interpretanda.

Potius ergo dicimus, humanitatem et misericordiam potius in omni interpretatione merito praeualere debere, quam rigorem et ius strictum: item maiorem semper rationem habendam eius, qui de damno certat, quam eius, qui lucrum captat.

§. 10.

6. Progreditur auctor ad species interpretationis, quae in legibus potissimum et in pactis locum habent. Alia est EXTENSIVA, vbi

Z 2

ratio

ratio legis vel pacti latius patet quam verba; alia *RESTRICTIVA*; ubi verba latius patent, quam ratio; alia *DECLARATIVA*, ubi verba et ratio pari passu ambulant, adeoque illa tantum considerata sunt.

Haec postrema non requirit singulares regulas. De *extensiva* vero tenenda regula XI.

Quoties ratio legis latius patet, quam verba, toties opus est interpretatione extensiva.

Ita quamvis XII. tabulae tantum agnatis et gentilibus innoxissent tutelam legitimam: tamen ICI et patronos esse voluerunt tutores legitimos libertorum, liberorumque ab iis relictorum, non quod nominatim in lege de hac tutela caueatur, sed quia perinde accepta est per interpretationem, ac si verbis legis introducta esset, §. *vn. Inst. de legit. patron. tutel.* Ratio enim legis erat, ubi successionis emolumentum est, ibi et onus tutelae esse debet.

Regula XII. *Quoties aliquid fit in fraudem legis, toties extensiva interpretatione opus est.*

Quid sit in fraudem legis et adversus leges agere, docet L. 29. D. de legib. Ratio huius regulae manifesta est: Legislator vult leges suas valere, ergo vult etiam, ut omnia prohibita sint, quae impediunt, quo minus lex valere possit; at impediunt valorem legum, quae fiunt in fraudem earum; ergo ea omnia simul prohibita voluit.

Exemplum elegans est in §. *vn. Inst. de leg. Fuf. Canin. toll.* itemque in L. 1. pr. L. 13. §. 1. L. 40. D. de iur. fise. ubi quod per tacitum fideicommissum relictum est, omne a fisco vindicatur, quia tacita fideicommissa plerumque inhabilibus in fraudem legum relinquebantur.

§. 11.

Interpretationi restrictivae locus est, quoties ratio legis non tam late patet, quam verba. Id colligi posse putat auctor, vel 1. ex defectu voluntatis originario, si statim ab initio hunc casum lege comprehendi noluit, vel 2. ex casus emergentis cum voluntate repugnantia, si postea pateat, hunc casum in mente non habuisse legislatorem. Sed reuera haec eadem sunt et coincidunt, ut recte observavit TITIVS, *Obseru.* 433.

Sufficit regula XIII.

Quoties latius patent verba, quam ratio legis, toties opus est interpretatione restrictiva.

Sane

Sane enim non verba legis obligant, sed voluntas legislatoris, hæc vero ex ratione legis elucet.

Id colligitur, 1. si absurdum sequeretur ex interpretatione latiore; sic peccabant in interpretatione tertii præcepti Iudæi, dum negabant, defensionem sabbatho esse licitam, sic enim sequebatur absurdum, Deum sabbathum instituisse in perniciem hominis; 2. ex defectu rationis, quæ legislatorem movit, e. g. prohibuerant leges, aperiri testamentum, si testator esset domi occisus, *L. 1. D. de Sc. Syllan.* Ratio erat, ne forte servi manumissi testamento liberarentur, et sic immunes essent a testura. Quid si seruos non habuisset domi occisus? deficit ratio, ergo et prohibitio; 3. ex defectu materiae, id est, si non adsit obiectum, de quo cogitatum, e. g. suscepit in se quis casum in contractu locationis conductionis, dubium non est, quin ferre teneatur sterilitatem. At quid, si vermes plane ignoti omnia depascantur? de eo non videtur cogitatum; hinc regula: *Ad non cogitata et non cognita renuntiatio non porrigitur.* Vid. EV. OTTONIS *Diss. de casibus insolitis, insolentioribus, et insolentissimis.*

§. 12.

At alia quoque signa recenset auctor, ex quibus colligi possit, legem et pactum restringi debere.

1. Si ab æquitate esset discedendum, si litteræ inhaerere vellemus, e. g. qui feram occiderit intra bannum ferinum, capitis plectitur; iniquissimum esset, si hoc supplicio afficeretur, qui feram suæ defensionis causa occidisset.

2. Si humanitati repugnaret interpretatio latior; huc pertinet lex Saulis: qui quidquam gustauerit, moriatur; Jonathan vero legibus ignarus et esuriens quidquam mellis gustauerat.

3. Si effectus non sic sperandus tanti momenti, quantum esset damnum ex observatione legis stricta proveniens, e. g. lex est: transfugæ capite plectantur; ex Agesilai exercitu 10000. occupauerant cliuium ad hostem transituri; Agesilaus callido consilio id vertebat in usum, et victoriam reportabat; iam 10000. essent mandandi maximo patriæ detrimento; exclamavit itaque: dormiant hodie leges, teste PLVTARCHO in *Vita Agesilai.*

§. 13.

Ultimo loco auctor agit de conflictu vel collisione legum : Haec duplex ; oritur enim

1. Vel ex diuersitate legum in diuersis territoriis latarum, e. g. in Saxonia recepta est gerada, alibi non est recepta ; alibi prohibita sunt testamenta, apud nos permessa. Itaque si quis in Russia testetur moribus Russicis de bonis in Germania sitis, quaeritur, an testamentum in Germania valeat ?

2. Vel ex legibus vnius legislatoris, si casus occurrat, vt alterutra legum violanda sit, e. g. lex est : *conserua te* ; sed lex quoque est ; *sanctifica sabbathum* ; vtraque est a Deo, et contingere tamen potest, vt vtraque seruari nequeat ; de illa hic non est quaestio, de qua scripserunt RODENBURGIUS, SANDIVS, HVBERVS, et alii ; nos de posteriori tantum loquimur, de qua auctor sequentes dedit regulas.

Reg. I. *Lex permissiua cedit praeceptiuae.*

Illa indulget enim quid in mei fauorem, cui possum renuntiare ; huic renuntiare nequeo ; e. g. Permittit lex alienare nostra, at prohibet eadem, ne pupillus alienet ; posterior procul dubio praefenda.

Reg. II. *Quae lex tempori certo alligata, ea praesferenda illi, quae nullum praescribit tempus.*

Tunc enim vtrique legi satis fieri potest, e. g. iubet lex, amicum consilio iuuare ; hoc quouis tempore fieri potest ; iubet lex etiam officio certis diebus et horis fungi, hoc ergo officium alteri praefendum.

Reg. III. *Lex negatiua praesferenda affirmatiuae.*

Negatiua enim semper obligat, affirmatiua data dumtaxat occasione ; e. g. Negatiua lex est : *Neminem in extrema necessitate desere* ; affirmatiua : *Sabbathum sanctifica* ; illud potius faciendum, quam hoc.

Reg. IIII. *Lex specialis praesertur generali.*

Illa enim quasi exceptio est a regula, adeoque regulam tollit, e. g. *Nemo noctu armatus prodeambulet*, est lex generalis ; specialis : *Quoties Hannibal est ante portas, ciues armati se in foro sistant* ; haec, tamquam exceptio, regulam tollit.

Reg. V. *Inter duas leges concurrentes, quae vtraeque seruari non possunt, eligenda est, quae causam habet honestiorem.*

Ê. g.

E. g. lex est, succurrere periclitantibus; duo in aqua periclitantor, alter frater, alter extraneus, honestius erit procul dubio fratri succurrere.

Regula VI. falsa est; nam iuratum pactum, si iniustum in se sit, non ideo fit iustum; iusiurandum non prodit nouam obligationem, sed obligationem confirmat.

Reg. VII. *Obligationi perfectae cedit imperfecta;*

Quia illa habet praestationem necessariam, haec magis voluntaria est, e. g. lex est: *date pauperibus*; lex etiam ait: *solve, quod debes*; si utrumque non possum, rationi magis consentaneum est, ut exsoluam, quae debeo, quam ut beneficia praestem pauperibus.

Reg. VIII. *Lex beneficentiae cedit legi gratitudinis.*

Beneficentia est, extraneo dare alimenta; officium gratitudinis est, parentes alere, ceteris paribus; ergo et si utrique satis facere nequeo, ultimum officium merito praeualeat.



LIBER II.

CAPVT I.

DE STATV HOMINVM NATVRALI.

§. I.

CONNEXIO libri II. cum priore in eo consistit, 1. quod in priore egimus de officiis hominis considerati tamquam hominis. Omnia enim officia, quae hactenus descripsimus, omnibus hominibus incumbunt sine discrimine, in quocumque statu vivant: iam vero agemus de officio ciuis, in certo aliquo statu viuientis, adeoque iam sequentur officia, ad quae non unusquisque obstrictus est.

2. Quod hactenus vidimus tria instituta humana, ex quibus certa officia hypothetica fluebant, sermonem, dominium, et rerum pretium: iam ergo sequitur quartum, imperium, vel ciuitas, vel res publica, de qua toto libro II. agitur.

Et placuit quidem auctori is ordo, vt agat 1. de statu ante rem publicam seu naturali, cap. 1. 2. de statibus seu societatibus simplicioribus, ex quibus res publica coaluit, veluti coniugali, paterna, herili, de quibus agitur cap. 2-4. 3. de ipsa re publica, et officiis imperantium et subditorum, cap. 5. ad finem.

Hoc ergo caput describit statum naturalem, vbi quaeritur 1. quid sit status in genere? §. 1. 2. quid status naturalis? §. 2-7. 3. eius status quatenam iura? §. 8. 4. quatenam incommoda? §. 9-11.

1. Statum in genere ipse definit auctor, sed parum accurate; nos dicimus, esse qualitatem moralem, secundum quam homo ad certa officia obstringitur, certisque iuribus fruitur. Ita pater, filius, maritus, vxor, imperans, subditus, dominus, seruus viuunt in certo statu, quia et ad certa officia obstringuntur, ad quae non obstringerentur, nisi eo in statu viuerent, et certis iuribus fruerentur: quibus itidem non fruerentur, si extra hunc statum viuerent.

Dicimus autem 1. qualitatem moralem, quia cum statum homo non

non habet physice, ita vt eius natura mutetur, sed vel per impositionem hominum, vel per spontaneam electionem.

2. quumque in iure ad effectum rerum potissimum respiciamus; addidimus duplicem effectum, ex quo natura statuum perspicitur, 1. *certa officia*, quemadmodum patris est filios alere, educare, ad disciplinam perducere, cet. 2. *certa iura*, e. g. quod pater potestate in liberos utatur; quod per eos adquirat.

Ceterum hic status est vel *naturalis*, in quo omnes a natura constituti, e. g. quod homines sumus ratione praediti, quod libere nati, natura omnes pares, cet. vel *aduentitius*, quem ex post facto adoptamus, e. g. coniugalis, herilis, cet.

§. 2.

II. Iam de *naturali* quaeritur, *quid sit*? Observat auctor, vocabulum esse quam maxime aequiuocum, tres tamen esse potissimum eius acceptiones: aut enim statum naturalem considerari 1. *in ordine ad Deum creatorem*. 2. *in ordine ad se ipsos*, 3. *in ordine ad alios homines*.

Sed haec quidem numeris Platoniciis obscuriora. Sensus auctoris est, considerari hominem, vel qualis a Deo creatus, vel qualiter erga se ipsum affectus sit, vel prout ad alios homines se se habeat. Si primo sensu accipiamus, tunc status noster naturalis diuersus est a statu brutorum; si secundo sensu, status noster naturalis opponitur statui sociali; si tertio, opponitur rei publicae, vel imperio et subiectioni.

§. 3.

In primo sensu status naturalis opponitur statui brutorum, et tunc in eo consistit, quod a Deo recta ratione, eiusque usu sumus instructi.

Experimur enim, nobis prae brutis inesse eximium quid, facultatem nempe intelligentem, quid verum, falsum bonum, malum sit, et volentem bonum, auerfantem malum; itaque non modo corporeum, sed et incorporeum; Id vocamus *rationem*; nec solum eam facultatem in nobis latitare deprehendimus, sed quidquid cognoscimus, scimus, volumus, auersamur, cum aliis per vocem communicare distincte possumus, id quod vocamus *orationem*; his solis rebus a brutis distinguimur, quae et ratione, et oratione destituuntur.

Iam hic status nobis dat certa iura; nam praerogatiua gaude-

Heineccii Prael. Pufendorf.

A a

mus

mus prae aliis creaturis, adeo ut eas nostris visibus adhibere possimus, ceu supra demonstrauimus, sed etiam certas nobis imponit obligationes, nempe 1. quia rationem habemus, quae etiam res incorporeas cognoscere potest, ut ergo et inuisibilia scrutemur, Deum cognoscamus, in eius voluntatem et leges inquiramus.

2. Quia ratione ea praediti sumus, quae discernere potest bonum et malum, ut inquiramus in verum, immo in summum et perfectissimum bonum, operamque deimus, ut illo fruamur.

3. Quia ratione pollemus, ut non viuamus secundum impetum passionum, multo minus secundum brutum appetitum, sed secundum rationem, nosque virtute distinguamus ab aliis creaturis.

4. Quia sermonis facilitate instructi sumus, ut eo utamur ad Deum celebrandum, alios ad virtutem inflammandos, consilia aliiis danda, instruendos denique alios. Videmus itaque hunc statum vere suas obligationes, suaeque iura habere, adeoque vere statum dici posse per definitionem §. 1. datam.

§. 4.

Secundo modo consideratus status naturalis est oppositus statui sociali, adeoque tunc est ille status, quo homo extra societatem aliorum hominum viuit; Hunc in maiori opere auctor describit per fictionem; fingit enim, hominem solum, egenum, nudum in hoc orbis theatrum proiectum, atque colligit, tunc futurum fuisse animal miserrimum. Quum vero plures ea fictione offenderentur, hic illud mutauit, et ad miseriam huius status demonstrandam describit hominem, qualis nascatur nudus, egenus, omnium rerum indigus, qui nec edere per se possit, nec frigus pellere, nec vitam conseruare, intra paucas horas periturus, si aliorum ope destitueretur.

Enimvero quamuis haec vera sint, potest tamen hic status extra socialis melius cognosci, si sistamus nobis

1. Adamum, dum solus in hoc mundo vixit; erat is conditus ad imaginem Dei, et tamen Deus eius statum solitarium non perfectum esse fatetur, dum *Genes. II. 18.* dicit, *non conuenit, Adamum esse solum.*

2. Hominem naufragio in insulam incultam, vel locum desertum proiectum, qui tunc miserrimus futurus esset in ea solitudine, indigus, ad omnia expauescens, tuta omnia timens.

Luz.

Ius huius status confisteret in libertate plena; neminem enim haberet superiore, praeter Deum, et neminem quoque subditum praeter creaturas.

Obligationes futurae essent, 1. vt, quia solum Deum superiorem agnosceret, etiam ad Dei voluntatem se totum componeret, 2. vt, quia extra societatem aliorum hominum viuunt, suam conseruationem vnice intendat, adeoque se conseruet pro virili, se alat, se non occidat, cet.

§. 5.

Tertia acceptio est, quando *status naturalis* opponitur rei publicae, imperio, ciuitati.

Si homines in hoc statu viuunt, omnes inter se sunt aequales, vnde a quibusdam vocatur status aequalitatis; ac definiri potest, quod sit status, quo homines non habent vel proprium vel communem imperantem, adeoque inter se per omnia aequales sunt. Auctor tantum posuit communem imperantem, sed id falsum; ita enim Hispaniae et Galliae ciues viverent inter se in statu naturali, quum tamen vterque viuat in re publica: potius ergo dicendum, nec suum proprium, nec communem imperantem eos habere debere, qui in statu naturali viuunt; sic e. g. rex Hispaniae et Galliae inter se viuunt in statu naturali, quia neuter vel proprium, vel communem imperantem habet.

§. 6.

Iam quaerit auctor, *quotuplici modo concipi possit hic status*? Resp. vel per fictionem, vel prout vere existit. Per fictionem si concipiamus, multitudinem insignem existere simul sine vlla dependentia et connexione; haec est vera fictio; fingunt tale quid poëtae de centauris, Lapithis, Thracibus, cet: sed numquam tales gentes extra omnem statum ciuilem vixerunt.

Prout vere existit, si consideremus 1. diuersos imperantes; hi enim in mundo nullum superiorem agnoscunt, adeoque viuunt in statu naturali, 2. diuersos populos liberos; hi inter se non habent communem dominum, adeoque in statu naturali viuunt; dico: *populos liberos*, id est, independentes; nam in Germania plures quidem sunt populi, veluti Saxones, Sueui, et Francones, sed non viuunt in statu naturali, quia habent communem imperantem, puta Imperatorem et Imperium.

§. 7.

At quaeritur, *an umquam genus humanum in statu naturali vixerit?* vel, ut dilucidius quaestionem proponamus, *an umquam fuerit seculum, quo extra rem publicam vixerint homines?* Id recte negatur; Nam:

1. Non potuisset eius modi multitudo subsistere; vbi enim est status naturalis, ibi nihil impedit, quo minus vita piscium viuatur, vbi maior deuorat minorem. Hinc et stupidissimas gentes tamen videmus superiores suos habere, e. g. Samogetae, Americani, Afri.

2. Multitudo hominum concipi non potest sine statu coniugali et paterno; vbi status coniugalis et paternus, ibi superior, adeoque cessat status naturalis. Hinc recte animadvertit auctor, primum inter homines imperium fuisse domesticum; paterfamilias simul erat princeps et imperans familiae suae; quin eam independetiam sibi antiquissimis temporibus saepe reseruabant per foedera, etiamsi tamquam hospites in aliena re publica vivebant; e. g. Aethiopes vivebant inter Cananaeos, et tamen omnia iura principis exercebat, foedera pangebant, bellum gerebat, filium erat mactaturus; hereditatem diuidebat suo lubitu; reseruabat enim sibi independentiam, quamuis in re publica viueret.

Simile quid de familia Otanis refert HERODOTVS III. 83. Quum enim omnes Persae regi parerent, ipseque Otanes subiectus esset, is tamen in electione Darii sibi et posteris stipulatus est independentiam; hinc haec familia sub capite suo vivebat, nulla in re regi Persarum subiecta, quamuis in media Persia viueret.

3. Historia docet, in ipsis statim mundi primordiis natas esse res publicas, simul ac magna esse coepit hominum multitudo; Cain enim Adami filius Hanochem gignebat, qui primam aedificauit urbem, cui nomen suum indidit: urbs vero concipi nequit sine aliquo quocumque regimine; fuit ergo statim initio mundi ciuile aliquod regimen; ita et inter causas diluuii referuntur homines potentes et tyranni, quos sine subiectis concipere non possumus.

§. 8.

III. Iam quaeritur, *in quo IVRA huius status naturalis in tertio sensu accepti consistant?* Resp.

1. In libertate; vbi enim nemo est imperans, ibi nemo cogit ad aliquid

aliquid faciendum vel omittendum; vbi nemo cogit, ibi sumus liberi. Sed posset quis obicere, nos tamen nobis etiam videri homines liberos, quamvis viuamus in ciuitate vel re publica? Resp. recte; sed tunc alia est libertas illa, quam de qua loquimur.

Libertas est vel *naturalis*, quae idem ac spontaneitas, quae a natura instructi sumus, vt non agamus ex necessitate mechanica, sed libere; hac omnes homines gaudent; vel *iuris gentium*, quae quis nullius domestico dominio subiectus est, et huic opponitur seruitus; hac quoque nos omnes gaudemus, quia in nullius domestico dominio sumus, nullius mancipia; denique tertio datur etiam libertas *ciuilis* vel *politica*, quae quis nullum superiorem vel imperantem agnoscit. Hac libertate nemo nostrum gaudet; gaudent vero ea, qui in statu naturali viuunt, veluti summi Imperantes, adeoque statui naturali hoc ius est proprium.

2. In aequalitate; vbi enim non est imperans, nec subditus; nec superior, nec inferior, ibi est aequalitas inter omnes: in statu naturali non est quis imperans et subditus, superior, et inferior, secundum definitionem; in statu ergo naturali est aequalitas.

3. In iure belli gerendi; vbi enim non est superior, ibi cessat ius definiendi controuersius et lites per modum iudicii; vbi cessant iudicia, ibi quisque sibi ipsi dicit ius gladio; in statu ergo naturali est ius gladii vel belli.

Attamen obicitur, in statu etiam naturali locum habere posse iudicia; historiam enim docere, Romanos inter Masinissam Numidiae Regem, et Carthaginenses ius dixisse, quum tamen vterque populus fuerit liber, adeoque inter se vixerint in statu naturali? Resp. 1. id factum per modum compromissi vel arbitrii; 2. Carthaginenses et Masinissa foedere inaequali iuncti erant Romanis, adeoque Romanam maiestatem comiter venerari, eorumque arbitrio stare tenebantur.

§. 9.

III. Iam de incommodis status naturalis: diximus quidem supra, iura huius status consistere in libertate, aequalitate, iure belli, quae mirifice hominibus blandiuntur. Sed non maiora sunt incommoda, vt si ea compares cum illis, quae in statu imperii vel ciuitatis homines premunt, illa haec multum superant. Videbimus argumenta auctoris, quae omnino non omnia eiusdem ponderis sunt.

1. Miseriam huius status ostendit per solitudinem, quae omnino

A a 3

magna

magna miseria a) infantibus, quippe quibus pereundum esset; b) adultis, qui in solitudine perpetua tristitia affligerentur, nullius ope subleuantur, nullis vitae commodis, quibus iam fruimur, fruuntur. Quid opus est verbis, si homo ad perpetuos carceres damnatus miserimum se putat, quamvis vel maxime honeste habeatur; et ex scientiis nullam voluptatem capereinus, si soli essemus. Archimedes dicebat, si in caelum raperetur, astraque omnia coram spectare posset, nullam se inde voluptatem percepturum, nisi esset in terra, cui reuersus haec, quae viderit, narrare posset.

Ita auctor; sed si dicendum, quod res est, primum hoc argumentum miseriam status naturalis vix probat; confundit enim statum extra ciuitatem cum statu extra societatem: at homines in libertate naturali viuere possunt, vt ideo non viuant in solitudine. Noachus post diluuium vivebat in statu extra ciuitatem, neminem habebat imperantem, sed quis dixerit, eum ideo in solitudine vixisse; quin Adamus et Eua, quando in Paradiso vivebant, nullam constituiebant rem publicam, et tamen neuter vivebat in solitudine.

Deinde non omnis solitudo est miseria; quidam eam optant, et quouis modo affectant; carceri mancipatos non solitudo angit, sed defectus libertatis; quin aliquando praestaret in solitudine viuere, quam in ciuitate, vbi homo homini lupus, homo homini diabolus.

2. Auctor miseriam status naturalis probat ex ruditate vitae extra societatem transigendae; in solitudine omnis vitae elegantia, omne scientiarum incrementum exularet, cet. Enimuero hic de nouo auctor confudit statum extra ciuitatem cum solitudine; non ideo homo solus esset, si in re publica non viueret. Deinde nulum est dubium, quin status ciuilis in se nihil conferat ad vitae elegantiam et studiorum incrementum; multae sunt nationes barbarae, quae in re publica et statu ciuili viuunt, nec tamen ideo vel doctiores, vel elegantiores fiunt, e. g. Calmucci, Tartari, Iberi. Aequae eleganter homines viuere possunt extra ciuilem statum, quam in illo; aequae facile potuissent incrementa capere artes et scientiae, si in statu naturali mansissent.

3. Optimum auctoris argumentum, quo miseriam et incommoda huius status probat, est a defectu securitatis desumptum. In statu naturali nemo esset ab altero securus; hoc probamus 4)

a voluntate et facultate laedendi in omnibus hominibus sese exerente; b) a defectu virium, si quisque per se se defendere deberet; c) a minore ad maius; quum enim ne iam quidem ab aliorum iniuriis, furtis, rapinis, quin periculis plane immunes simus, quum vbique terrorem incutiant patibula, rotae, gladii, ferale flammae, limiliaque supplicia; quid futurum credis, si extra societatem viveremus, nullaque supplicii meta cohiberetur improbitas.

Ostendere hoc voluere Persae, dum mortuo Rege aliquot horas cuius permiserant furta et rapinas facere, id quod et aliae gentes imitatae sunt; ostendere enim ciuibus illam rerum confusionem voluere, quae futura esset, si nullus esset imperans, hominesque in statu naturali extra societatem civilem viverent.

§. 10.

4. Quantum argumentum auctor ducit a defectu iudiciorum; extra rem publicam nulla sunt iudicia; quam hoc miserum! Nam

1. Laesus per neminem adiuvatur; quid si laedens me potentior sit? in re publica ius contra quemvis, etiam potentior, persequi possum; Recte, si de iure quaeritur, nam aliquando de facto res aliter se habet;

2. Si arbitrum eligam, cogere non possum, ut alter etiam eligat, in eumque compromittat; qui alteri placet, forte non mihi placebit; qui mihi arridet, forte alteri displicebit.

3. Si etiam placeret arbiter, qui certus esse possum, alterne staturus sit arbitrio? Arbiter saepe iurisdictione non gaudet, adeoque nec iure exsequendi.

4. Res ergo redibit ad vim; sed a) hoc in se miserum vulnerare et vulnerari, caedibus, rapinis grassari, vel talia incommoda pati, perpetuis insidiis et insultibus hostium expositum esse; b) quatumvis iustam causam habeam, non tamen certo persuasus esse possum, me victoria potiturum; quum in ciuitate iustitia causae magnam spem et fiduciam iniiciat victoriae.

§. 11.

5. Denique vltimum incommodum est, quod in statu naturali nulla firma amicitia.

1. In statu ciuili si semel pro me pronuntiatum est, tuetur me rei iudicatae, transactionis, et iurisiurandi auctoritas; tuetur iudex, qui compescet alterum, qui se turbas daturum vel laesurum minatur.

tur. Haec omnia in statu naturali deficiunt; si alter pacem rumpere audet, nihil est, quod illum impedire possit, praeter gladium meum, quem si non timet aduersarius, fortassis potentior, frustra aliorum opem imploro.

2. Posset quis existimare, foederibus et pactis homines sibi prospicere posse in statu naturali; sed ne id quidem nos securos praestat, nam a) in statu naturali infida amicitia est; b) nemo est, qui perfidiam puniat, si alter foedera violet; c) si etiam nihil contra fidem agat, non tamen certus sum, eum nihil ausurum; hinc dici potest: in statu naturali aut bellum, aut belli praeparatio, aut infida pax est.

Omnia haec se aliter habent in statu civili, 1. pax fida est, quia vis prohibita est; 2. si quis pacem violat, iudex se interponit; 3. ille me etiam de futuro securum praestat per poenae comminationem, cautiones, cet.

CAPVT II.

DE STATV CONIVGALI VEL OFFICIIS CONIVGALIBVS.

§. 1.

SVpra vidimus, hominis statum esse vel naturalem, vel aduentitium. Haftenus de naturali; nam de aduentitio, quorum primus omnium simplicissimus est *conium*, de cuius quaeritur 1. *definitione*, §. 1. 2. *contrariis*, §. 2. 3. *obligatione*, §. 3. 4. *officiis*, §. 4-10.

I. *Conium* iure naturae est pactum personarum diuersi sexus procreandae educandaeque sobolis causa initum.

Pactum initur per consensum, adeoque vt et Romani, quamvis multos ritus nuptiales haberent, veluti confarreationem, coemtionem, vsum, domum deductionem, cet. seruarint principium; Consensum facere nuptias.

Personarum diuersi sexus.) Quia id finis requirit, is vero finis est.

Procreatio et educatio sobolis.) Non procreatio sola, 1. quid enim interellet humani generis, multos procreari liberos, sed hos postea

postea negligi et male educari, vt non sint comoda generis humani membra? 2. Hunc etiam finem ostendit insitus parentibus amor erga liberos, qui etiam in brutis sese exserit, adeo vt haec, foetum non prius deserant, quam postquam educatione non amplius indigent. Vbi curiosa est observatio, in animalibus, quae debilia nascuntur, vtrumque parentem concurrere ad educationem, in reliquis matrem tantum.

Equidem Sacra Scriptura et alterum finem indicat, nempe mutuum adiutorium; sed hic finis tamen est secundarius, quod vel ex eo patet, quod ille etiam alio modo, quam coniugio, posset obtineri, e. g. societate domestica. Itaque ad illum quidem respicitur, quoties de conseruando matrimonio agitur, non quoties de ineundo; e. g. quando quaeritur, an puer et puella possint esse coniuges? respicitur ad finem primum, idque negatur, quia non sunt habiles procreandae educandaeque soboli. Sin quaestio est, an matrimonium subsistere possit inter iuuenes contractum, si postea vterque consensuerit? id affirmatur, quia adhuc finis secundarius potest obtineri.

Haec definitio est iuris naturae; nam iura positia tum diuina, tum humana multa alia addunt et determinant, e. g. vt personae initurae matrimonium sint binae tantum, vt non sint nimis propinquae, vt matrimonium sit indissolubile: quae quidem omnia ius naturae adprobat tamquam rationi consentanea, sed non praecipit, non iubet; adprobat, non praecipit, quia ratio nos obligat ad id, quod optimum est; meliorem enim esse monogamiam polygamia, melius matrimonium indissolubile quam dissolubile, suo loco demonstrabimus. Quo ipso, facile responderi potest ad tot quaestiones, quas de origine polygamiae, similibusque iurum, ex iure naturae mouent.

§. 2.

II. Ex ea itaque definitione consequitur, vt omnes impudici complexus iuri naturae repugnent, adeoque adulteria, stupra, incestus etiam iure naturae prohibita sint.

1. Quod enim fini, quem Deus circa coniunctionem maris et feminae intendit, repugnat, id repugnat iuri naturae: impurae coniunctiones illi fini repugnant; ergo repugnant iuri naturae. Minor clara, nam finis est propagatio et educatio sobolis; eam vero non intendunt adulteri et stupratores, immo vero eam impedire student; nam a) nolunt procreare liberos, sed libidinem suam

Heineccii Prael. Pufendorf.

B b

exple-

explere, b) procreatos educare nolunt, sed negligunt; c) ita mundus impletur hominibus inutilibus, male moratis, et ad quacvis vitia procliuibus, quales plerumque sunt vulgo quaesiti.

2. Deinde repugnat haec vaga Venus principio amoris; cui magis debemus amorem quam proximo? quinam vero nobis propiores, quam a nobis procreati? amare ergo eos debemus, tamquam nos ipsos; at nobis bene esse volumus, nos ad perfectionem adspiramus, ergo et liberis nostris bene esse velle debemus; liberorum quoque promouenda est felicitas. Hoc non faciunt, qui extra matrimonium liberos procreant; nam ne liberos quidem illos pro suis agnoscunt, tantum abest, ut felices esse velint; non educant, sed negligunt, nec hereditatis eos plerumque participes faciunt, sed in paupertate relinquunt, ex quo incredibilis nascitur generis humani confusio. Vid. PLUTARCH. de instit. puer.

§. 3.

Iam quaeritur III. de obligatione ad ineqndum matrimonium; quae duplici sensu potest considerari, vel ratione totius generis humani, vel ratione singulorum.

Ratione totius generis humani obligatio haec est absoluta, id est, tenetur genus humanum matrimonium conseruare, liberos per illud procreare, procreatos educare, nam 1. alias non subsisteret genus humanum, 2. vaga vero Venus, ut antecedente paragrapho demonstrauius, iuri naturae repugnat.

Hinc Romani, licet gentiles, hunc tamen finem matrimonii perfecte agnoscebant, et hinc iuratos apud censores profiteri cogebant ciues, habeantne vxores liberorum quaesundorum, id est, quaerendorum causa.

Quod vero ad singulos attinet, non eadem est omnium sententia; 1. quidam et horum ratione absolutam statuunt obligationem, adeo, ut omnes teneantur ad coniugium, et peccare eos dicant, qui id praeceptum negligant. Ita Iudaei, teste SELDENO, de iure nat. et gent. secund. discipl. Hebr. libr. V. cap. 3. pag. 566. cui sententiae et BYDDEVS in Theologia morali suffragatur; rationes vrgent a) Deum non vni, sed omnibus hominibus hunc ordinem praescripsisse: *crecite et multiplicamini*, b) neminem se subtrahere debere oneri communi; commune autem esse onus supplendi humani generis numeros.

2. Alii, et in his PVFENDORFFIVS, et alii plerique putant, obliga-

obligationem hanc tantum esse respectuam, adeoque Deum permittere omnibus matrimonium, qui illius fini obtinendo sunt habiles, non autem praecipere singulis, vt iis caelibatum praeferre non liceat.

Et id quidem recte, nam 1. procreatio et educatio sobolis est finis; ei proportionata debent esse media; si ergo haec defint, e. g. si vel natura, vel vitio hominum ineptus sit ad procreandam sobolem, si nec vxorem, nec liberos alere possit, si plane ineptus sit ad eos educandos, facile patet, Deum nolle, vt matrimonium ineat, 2. lex est: *matrimonium contrahere*, est officium affirmatiuum, officia affirmatiua obligant tantum data occasione, ergo si nulla adsit occasio, si quis non possit salua felicitate, tranquillitate, innocentia sua vxorem ducere, procul dubio non tenetur.

Ad rationes contrarias facile respondetur: 1. quod omnibus dixit Deus, non statim singulis dixit, e. g. dixit Deus omnibus hominibus, vt opificia. mercaturam, et quasuis artes honestas conseruent inter se; at ideo non singulos iussit opifces, mercatores, artifices esse; 2. onus commune subire singuli debent, si alioquin detrimentum existeret; at detrimentum inde frustra metuitur, si vnus aut alter caelebs manet.

§. 4.

IIII. Proxima sunt *officia ex statu coniugali resultantia*, quae vel *generalia*, ad quae vterque coniugum obstringitur, §. 4. *vsque ad 9. specialia*, ad quae alteruter tantum.

Generalium primum est 1. mutua castitas; haec quoque fuit ex fine matrimonii, procreare et educare volunt liberos; non vero alia de causa parentes hoc educandi onus suscipiunt, quam quia suos credunt; de eo vero certi esse non possent, nisi de castitate vxoris certus esset maritus; vxor ergo debet casta esse. Quum vero quod tibi vis fieri, alteri quoque facere debeas, mariti quoque est, castitati studere, mutua ergo requiritur castitas.

Aliter quidem philosophati sunt Romani; adulterium enim admitti putarunt cum aliena vxore, non vero cum soluta, quia priore casu incerta fiat proles, non posteriore. Sed nullus excogitari potest casus, vbi maritus id faciat sine iniuria; nam si et cum soluta rem habet maritus, fidem coniugalem violat, adeoque peccat contra vxorem, praeterea liberos procreatos tamquam suos non agnoscit, ergo peccat in liberos.

B b 2

2. Alte-

2. Alterum officium generale est, mutua cohabitatio, hanc quoque requirit a) finis, educatio liberorum communium: si non cohabitarent coniuges, liberi aut penes patrem essent, tunc officio non fungeretur mater, aut penes matrem, tunc pater officium negligere cogeretur; b) idem requirit officium generale primum, mutua castitas, de qua neuter coniugum certus esset, si diuersis locis habitarent. Agnouerunt hoc veteres; hinc in matrimonium desiderarunt domum deductionem; hinc formula: vbi tu Caius, ibi ego Caia. Vid. BRISSONIVS, ANTONIVS et FRANCISCVS HOTTOMANI, *de ritu nuptiarum*.

Hinc fluit a) coniuges sine necessitate vel consensu non posse se ratione habitationis separare; b) perfidum esse coniugem, qui coniugem deserit, c) vxorem mariti domicilium merito sequi.

3. Tertium officium generale est mutua relatio inter maritum et vxorem; vt ille hanc cum ratione regat, haec illi omnem obseruantiam praestet.

Quaeritur hic, an imperium mariti in vxorem sit iuris naturae? Affirmant plerique 1. ob sexus praestantiam; 2. ob viri onera in alenda familia; 3. ob societatis, quae directione destituitur, imperfectionem. Sed hae rationes non omni exceptione maiores.

Nam quoad primum saepe vxor viro stolido, Abigail Nabale; prudentior; quoad secundum, vxor non minora fert onera, immo aliquando maritum alit; quoad tertium, societas etiam perfecta est inter duos. Itaque rectius dixerimus, a) imperium maritale esse iuris diuini positum, b) ratione hic non plus videri, quam decorum eiusmodi imperium exigere, c) sexum masculinum plerumque constantiorem prudentioremque esse, nec leges respicere ad id, quod rarum est, sed quod vt plurimum fit; d) imperium hoc non esse despoticum, quale dominium in seruos, sed amicum, quale est foederati in foederatum inaequalem. Excessu ergo peccarunt veteres Romani, dum vxorem in manu et potestate mariti esse voluerunt, marito ius vitae et necis concesserunt.

§. 5.

Sequitur 4. quartum officium coniugale, vt vnus vni coniungatur; quo ipso prolabimur ad quaestionem, an polygamia sit iuris naturae prohibita?

Eam vt accuratè soluamus, ante omnia formandus est status controuersiae.

1. Poly-

1. *Polygamia* est vel *successiva*, quando viduus vel vidua soluto matrimonio, secundo, tertio, vel pluribus vicibus nuptias facit; vel *simultanea*, quando plures, quam duae personae eodem tempore simul in matrimonio viuunt. De priore nulla est dubitatio, quoniam licita sit iure naturae: quum enim morte soluat obligatio erga coniugem, nihil est, quod supersitem possit impedire, quo minus ad alia vota transeat, quod argumentum et Sacra Scriptura probat. Quaestio ergo est de simultanea, quae

2. Vel *polyandria*, vel *polygynia*; Polyandriam vocamus, quando vna mulier pluribus viris nubit; polygyniam, quando vnus vir plures vxores ducit. Illam esse contra ius naturae nemo negat; vbi-
cumque enim est polyandria licita, ibi proles est incerta; vbi incerta proles, ibi cessabit educandi studium; atqui hic est finis primarius coniugii secundum ius naturae, ergo ius naturae polyandriam indulgere non potest. Hinc et gentiles castitatis parum studiosi, quamuis viris multa indulerint, tamen polyandriam pro illicita, immo et pro adulterio habuerunt: immo et Iudaei, apud quos tamen plane licita erat polygamia. Quaestio ergo est de sola polygynia simultanea, de ea porro non quaeritur

1. An iure diuino positio prohibita sit? quamuis et ea quaestio non plane nobis negligenda sit; nec

2. An iure ciuili prohibita? nam et id nemo negat, sed

3. An iure naturae prohibita?

Fuere postremis temporibus, qui et primam et tertiam quaestionem negarunt, et notum est, quanta animorum contentione agitata sit haec controuersia.

1. Tempore reformationis ob Philippi, Landgrauii Hassiae polygamiam; eo tempore prodibat HVLDERICI NEOBVLI *de digamia* liber, qui id factum defendebat, vnde plura scripta.

2. Tempore eodem polygamiam, quia communionem vxorum defendebant Anabaptistae Monasterienses, sed contra hos ferro disputabatur.

3. Paulo post BERNARDINVS OCHINVS Italus defendebat polygamiam, cui sese opposuit THEODORVS BEZA; de quo priore videndus PETR. BAEIVS, *Distion. histor. et critit. voc. Ochinus*.

4. Post bellum tricennale recruduit bellum hoc occasione facti Caroli Ludouici, Electoris Palatini; tunc enim prodibat DAPHNAEI ARCVARII (vero nomine LAVR. BEGERI) libellus Germanice scriptus, *Betrachtung vom heil. Ehestand, Ehebruch, Ehescheidung*, vnde

Vielweibernehmung ; vid. VINC. PLACCIVS *Theatrum Anonym. et Pseudonymor. n. 227-277.*

5. Postremo quidem IO. LYSERVS, qui se modo *Theophilum Aethaeum*, modo *Vincen. Athanasium*, modo *Gottl. Wahrmundum* nominabat, varia pro polygamia edidit scripta, veluti *Polygamiam triumphatricem*, seu *discursum politicum de polygamia*, it. *das königliche Marck aller Lande*; sed hic non modo defendere studebat, polygamiam esse licitam, verum etiam esse praeceptam; qui vero zelus male ipsi cessit: nam non modo calamos expediuerunt IO. MVSÆVS, IO. BRVNSMANNVS in *Monogamia victrice*, DICMANNVS, FELTMANNVS de *polygamia*, IO. MEYERVS in *uxore Christiana*, sed et auctor cum ictu fustium relegabatur ex Suecia.

Obiter notamus, scripta huius hominis magnam inuidiam confasse Pusendorfio, cui ea imputabantur, ac si auctor esset.

Iam argumenta, quae adierunt, sunt sequentia; 1. finem matrimonii esse procreationem sobolis; hunc autem aequè per polygamiam, ac per monogamiam obtineri, immo per illam facilius; Resp. at falsum est, solam procreationem esse finem matrimonii; nam et qui infantes necant, procreant, quis vero dixerit, eos fini matrimonii satisfecisse? addenda ergo est educatio; ea vero non arque facile obtinebitur in polygamia, quam in monogamia; turbabit illam multitudo liberorum, feminarum aemulatio et odium aduersus priuignos.

2. Polygamiam a Deo concessam; Deum autem nihil concedere contra ius naturae; Abrahamum, Iacobum, Dauidem, Salomonem fuisse polygamos; resp. concessio fit dupliciter a) per modum permissionis, et tunc non peccat, qui iure suo utitur; b) per modum coniuuentiae, tunc peccat quidem, qui, quid tale agit, sed Deus hoc poenitentibus remittit; priore sensu Deus numquam permisit, sed posteriore ob peruicaciam Iudaeorum, *Matth. XVIII. 8.*

3. Nullam exsistere prohibitionem nec in Vetere, nec in Nouo Testamento; non in Vetere, quia alias permitti non potuisset polygamia Iudaeis; nec in Nouo, quia Christus non sit nouus legislator? Resp. negando vtrumque; exstat enim primaeua institutio coniugii, inter cuius leges erat, vt duo sint in carnem vnā. Iam quum Christus *Matth. XVIII.* in causa diuortii argumentetur a primaeua institutione, sane eodem modo argumentari licebit in causa polygamiae; negamus etiam, in Nouo Testamento non esse prohibitionem, a) Christus ipse enim nos remittit ad primaeuam institu-

stitu-

stitutionem, et b) 1. *Corinth. VII. 2.* Apostolus vrget : *quaeque uxor suum virum habeat* ; in polygamia vero vir non est proprius, sed communis.

4. Magnum saepe damnum nasci ex monogamia, si vxor sterilis, si incommodis moribus, obstinata, tunc vnam posse solatio esse ? Resp. a) non sunt facienda mala ; vt eueniant bona ; b) non potest quis certo sperare, se eum finem obtenturum, quid si duas vel plures steriles, peruicaces, obstinatas ducat.

Itaque nos ponimus hominem obstrictum esse, vt eligat optimum ; obstrictus enim est ad amorem, amoris obiectum est bonum ; quo maius ergo bonum est, eo magis ad illud amandum tenemur ; ergo optimum maxime amare, id est, eligere tenemur ; atqui in comparatione monogamiae et polygamiae optima est prior, ergo iure naturae ad illam eligendam sumus obstricti.

Optimam vero esse monogamiam, pessimam contra polygamiam, probamus, 1. quia monogamiae satis proportionata multitudo hominum nascitur, minus ergo proportionata futura esset, si polygamia concederetur, 2. impedit educationem, vt supra vidimus ; 3. impedit amorem coniugalem ; acmulationem, lites domesticas, insidias producit ; experiundo hoc didicit Iacobus, qui tamen duas sorores habebat in matrimonio ; adeoque impedit etiam mutuum adiutorium ; 4. oneri est familiis ; obiciunt Turcas ; sed ibi vxores plerumque parum ab ancillis differunt ; 5. quum monogamia finem matrimonii consequamur, non potest polygamiae alius finis esse, quam libido ; 6. moratae gentes eam semper fugiunt, elegerunt tantum gentes libidinosae, inprimis orientales.

Quamuis ergo directe probari nequeat, polygamiam iuri naturae repugnare, repugnat tamen rectae rationi, quae optimum eligere iubet, adeoque et indirecte repugnat iuri naturae.

§. 6.

5. Quintum officium coniugum generale est, vt indissolubile sit inter coniuges vinculum vsque ad mortem ; hic denuo incidit quaestio, *an diuortium iure naturae licitum sit ?*

Hic distinguendum 1. inter nullitatem matrimonii, quando inter certas personas connubium esse non potest ; e. g. si, quae iam maritum habet, alii nubat ; 2. diuortium, si matrimonium iustum est, sed propter incidentem causam soluatur, e. g. propter

propter adulterium ; 3. separationem quoad thorum et mensam ; quando non coniugium soluitur, sed coniuges separantur ob causam temporariam, e. g. ob saeuitiam mariti.

De prima nulla est quaestio, quod enim nullum est coniugium, ne rescissione quidem indiget : tertia est inuentum iuris canonici, adeoque huc non pertinet ; superest ergo solum diuortium.

Notum est, illud permissum fuisse Iudaeis Veteris Testamenti, et Graecos quoque ac Romanos pro lubitu a coniugibus diuortisse, modo bona gratia, modo alterius voluntate ; non opus quoque erat causa fontica, sed apud Romanos sufficiebat qualiscumque ante legem Papiam ; pertinent huc exempla Aemilii Paulli, Iul. Caesaris, Ciceronis ; hinc IUVENAL. *Sat. VI. v. 147. 148.*

*Collige sarcinulas, dicit libertus, et exi,
Iam grauis es nobis, et saepe emungeris, exi
Ocyus, et propera, sicco venit altera naso.*

An tale quid iure naturae ? Affirmant plerique : 1. pacto ineuntur nuptiae, ergo et pacto soluantur ; ergo saltem bona gratia discedere licet ; 2. omne pactum reciprocum inuoluit tacitam conditionem : si tu praestiteris, quod debes, et ego praestabo ; ergo vno non praestante alteri discedere licebit ; 3. vrgent perpetuum eorum coniugum miseriam, qui inuiti in illa societate manere tenentur.

Sed limitanda haec sunt : 1. matrimonium habet finem perpetuum, educationem et mutuum adiutorium, ergo et ipsum quoque sua natura perpetuum est ; 2. nemo altero inuito a pacto discedere potest, nisi ob iustam et grauem causam, ergo et diuortium fieri nequit sine graui et iusta causa ; 3. grauis vero et iusta causa est omnis, quae fini matrimonii repugnat, ergo ob eam quoque fieri potest diuortium, non ob aliam. Multo magis restringere videtur Christus diuortium *Matth. XVIII. 9.* vbi ait, id solum permittere ob *porneiam*, id est, vt vulgo interpretantur, ob adulterium.

Sed egregie conspirat seruatoris sententia cum iure naturae, quod accurate docuere SELDENVS, tum in *Iur. nat. et gent. secund. discipl. Hebr.* tum in libro de *uxore Romana*, itemque LIGHTFOOT in *Horis Hebraicis et Talmudicis ad hunc locum Matthaei.*

Res ita se habet : 1. duae erant sectae vel scholae inter doctores Iudaicos tempore Christi ; schola Hillelis, et schola Schammai

mai, quae in multis doctrinis et interpretationibus legis discrepabant; 2. quod ad diuortia attinet: Hilleliani ea licita putabant ex quacumque causa, etiam leuissima, eaque sententia mirifice placebat plebi: Schammai ea contra admittebat tantum ob grauiores causas, quas vocabat res turpitudinis, quo vocabulo Moses usus est; 3. fama circumferebatur inter Iudaeos, Hillelis sententiam confirmatam esse per filiam vocis, seu vocem caelestem; 4. quum ergo tentare Pharisei vellent Christum, ipsi hanc ipsam quaestionem controuersam inter duas has scholas proponebant: *Insimulne est dinelli ab vxore ob quancumque causam?* (vti Hillel putat); sperabant, si affirmaret, eum apud viros bonos in odium incidere posse; si negaret, apud plebem; 5. respondet Christus v. 8. *Moses vobis permisit libellos repudii ob exasperandam*; at initio non fuit sic. Atque hoc scire, quisquis vxorem suam repudiauerit, praeterquam ab vxore, eum adulterare, et qui repudiatum duxerit, in eam adulterare; 6. manifesto ergo Christus approbat sententiam Schammai, adeoque *vxoria* non potest significare adulterium, sed generatim rem turpitudinis; talis est omnis, quae repugnat fini matrimonii. Possum id etiam alio modo probare: si solum adulterium esset causa diuortii, Apostolus non potuisset diuortium permittere ob maliciosam desertionem: at permisit Apostolus; ergo non potest tantum adulterium diuortii causa esse.

Hinc multae incidunt quaestiones grauissimae, e. g. annon diuortium permittendum ob ipsidias vitae coniugis strudas, quod defendit STRYKIVS. An propter abortum procuratum? An ob morbum contagiosum?

Similes permultae sunt in HIERONYMI BRVCKNERI *Decisionibus matrimonialibus*, ad quas facile respondemus, si SELDENI principia adhaeserimus.

Ceterum recte monent viri docti, 1. restringendam, quoad fieri potest, diuortiorum licentiam, alioquin enim inuria fieret multis; 2. decreto diuortio non perfido dandam esse novarum nuptiarum facultatem, sed parti tantum innocenti; rationem supra reddidimus *libr. I. cap. 16. §. 5.*

§. 7.

6. Sextum officium est, ne vllum inter coniuges sit impedimentum morale; tale vero est inter illos, qui vel alteri matrimonio iuncti, vel saltem desponsati sunt.

Heineccii Prael. Fusenhorff.

C c

In

In quo enim iam alia ius quaesitum habet ex pacto, ille non alii se simili pacto obstringere potest; est hoc vniuersale et commune omnibus pactis et contractibus, e. g. qui Titio vendidit praedium, idem non potest vendere Macuio, idemque dicendum de locatione, aliisque contractibus. Hinc leges non modo polygamiam prohibent, sed et digamiam grauitur puniunt. Ius Romanum infames esse iubet, qui ipsi vel liberorum nomine bina sponsalia, binasue nuptias constituunt.

Haec regula recte se habet, si nobiscum supponas, polygamiam esse illicitam; nam si vulgaria sequaris principia, nihil omnino vitii inerat huic pacto; nam quod supra diximus de contractibus, id locum tantum habet, si conuentio talis cum pluribus iniri nequit; in aliis enim ea regula cessat; sic e. g. in vna re si sufficiat, pluribus possum hypothecam constituere, itemque plures socios adsciscere, quamuis iam vnum vel alterum habeam.

§. 8.

Progreditur 7. ad officium septimum, vel potius prioris extensionem. Inter impedimenta enim moralia etiam est propinquitus sanguinis et affinitas; ob quam non modo diuinae litterae prohibent nuptias, verum etiam ipsi gentiles, veluti Romani. Quaeritur ergo, unde sit ea prohibitio? et an ex iure naturae?

Fuere, qui hanc prohibitionem deriuarunt 1. ex pudore naturali, veluti LAMB. VELLTHYSEN, pag. 59. sequ. ex principis honesti et decori. HERTIVS *ad Pufend. VI.* 1. 28. Sed is pudor naturalis non fuit Persis, qui inter filium et matrem permiscere matrimonium; nec Atheniensibus, apud quos Cimon germanam sororem habuit in matrimonio; 2. ex vtilitate politica, vt plures familiae coniungantur? id quod AVGVSTINO, *de ciuitate Dei, XV.* 16. et PLVTARCHO, *Qu. Rom.* 108. placuit et RICH. CUMBERLANDO, *cap. 8.* 9. 9. Potest vtilitas contrarium suadere, *Nimior. XXXVI.* 3. ex sola reuelatione; quo vero casu videre poteris rationem, cur et gentiles quosdam habuerint gradus prohibitos; 4. ex vnitatem carnis, SELDENVS *V. 1.* Alii nec iure naturae, nec reuelatione eius modi nuptias prohiberi censent; non iure naturae, quia hoc ignorat hanc prohibitionem; nec iure diuino, quia illud ad solos Iudaeos pertinuerit.

Nos dicimus, ius naturae hanc prohibitionem ignorare, nisi inter parentes et liberos; vtrumque ostendo sic: 1. Si ius naturae pro incestis habet nuptias inter cognatos proximos, sequitur vt to-

tum

tum genus humanum ex incestu natum sit et nasci debuerit; nam Adam liberi necessario inter se inire debuerunt matrimonium; at posterius est absonum, ergo et prius; 2. Si pater et filia, filius et mater iungi possunt, sequeretur, ut ius naturae probaret contradictionem; at hoc absurdum, quia nititur ratione, et ratio ab omni contradictione abhorret, ergo et prius. Consequentiam probamus: si pater ducit filiam, ex eaque procreat filium, is erit patris sui nepos et filius, matris vero filius et simul frater; si mater nubat filio, eorum liberi erunt patris sui fratres et sorores, matris vero filii et nepotes; quod et Poeta OVIDIVS absurdum esse vidit, *Metamorph. X. 346. sequ. vbi Myrrha:*

Nec, quod confundas et iura et nomina, sentis?

Tunc eris et matris pellex, et adultera patris?

Tunc soror gnati, genitrixque vocabere fratris?

Vetus epitaphium:

Hersilus hic iaceo, mecum Marulla quiescit:

Quae soror, et genitrix, quae mihi sponsa fuit.

Me pater e nata genuit: mihi iungitur illa:

Sic soror et coniux, sic fuit illa parens.

Obiciunt, sed hanc esse tantum contradictionem in nominibus, nec rationi repugnare, unum hominem diverso respectu fratrem, patrem, filium vocari? Resp. 1. diverso respectu, id est, possum Caiae filius esse, Semproniae frater, Titiae maritus, sed vnius personae fratrem, patrem, maritum esse, id vero absurdum; 2. non sola nomina confunduntur, sed et iura, ut recte vidit OVIDIVS:

Nec quod confundas et iura et nomina sentis?

Nam aliud ius, alia obligatio est inter filium et matrem, filius enim matri debet obsequium; aliud ius maritum inter et uxorem, nam huic vxor debet obsequium; si ergo filius uxorem duxerit matrem, tunc filius matris est superior et inferior, imperat et paret; quae absurda.

At moratiores gentes hoc latius extenderunt: nam quamvis inter fratrem et sororem coniuges non sit contradictio tanta, quanta in linea recta; est tamen aliqua; si enim frater ducit sororem, haec tamquam soror fratri erit aequalis, qua vxor, inferior; qua soror, nullum debet obsequium, qua vxor, debet; ultra hunc gradum non processere gentiles, nisi quod addiderunt personas, quae sibi inui-

cem parentum et liberorum loco essent; vbi tamen arbitriariam adsumere definitionem respectus parentelae, vt iuris non naturalis, sed positiui esse hanc prohibitionem facile appareat.

§. 9.

8. Octauum officium auctor putat, vt seruentur sollemnitates quaedam, 1. eas enim veteres in omni contractu negotioque ciuili obseruasse, 2. nullam fuisse gentem, quae non potissimum in nuptiis quosdam sollemnes ritus obseruarit; de ritu nuptiarum apud Romanos prolixè BARN. BRISSONIVS, ANTONIVS et FRANCISCVS HOTOMANNI, egerunt.

Enimvero omnes ritus sunt ex lege positiua, eosque adeo ius naturae ignorat: si ignorat, non potest nos directe obligare ad illos obseruandos.

At per indirectum obligati sumus iussibus magistratum aequis; haec lex vero de nuptiis sollemniter ineundis est aequissima, 1. vt coniuges distinguantur a concubinariis; 2. vt publicum habeant testimonium, se esse coniuges, 3. ne promiscue se coniungant homines, quibus impedimentum morale obstat.

Ergo omnino recte punitur, qui sine praeuia proclamatione et copulatione ad concubitum ruunt, non quod contra ius naturae commiserint sollemnia, sed quod contra ius naturae violarint leges aequissimas magistratum.

§. 10.

Iam ad officia coniugum SPECIALIA, et quidem MARITORVM: 1. diligere vxorem; hoc enim requirit aetna et perpetua societas; 2. nutrire eandem; est enim caput familiae, nec sexus imbecillitas patitur, vt ipsa se exhibeat; 3. regere ac defendere; hoc ponit superioritatem; non autem intelligitur regimen despoticum, sed amicum, quale esse diximus in foederatum inaequalem.

VXORVM haec sunt: 1. amare maritum; id exigit societas aetissima; 2. honorare; amor enim erga superiorem est semper amor venerationis; 3. adiutorio esse marito in educatione liberorum, (sunt enim liberi communes), itemque in re familiari, quia inde cum liberis elementa capit; 4. vt concedat marito regimen, tamquam superiori.

VRIVSQUE: 1. vt vtramque fortunam communem aequo ferant

rant animo, tamquam socii omnis vitae; 2. vt mores ad concordiam attemperent, tamquam amici. TACITVS in *Agricola*: *vixerunt mira concordia per mutuam caritatem, et inuicem se anteponendo.*

Haec sunt, quae ius naturae praecipit; cetera, quae de capitibus nuptialibus traduntur, veluti de dote, de pactis dotalibus, donatione propter nuptias, communione bonorum, cet. omnia sunt iuris positivi, adeoque de his omnibus nihil plane desinit ius naturae.

C A P V T III.

DE OFFICIIS PARENTVM ET LIBERORVM.

§. 1.

Altera societas vel alter *status* aduentitius est *paternus*, vbi mutua relatio inter parentes et liberos *PATRIA POTESTAS* ab auctore vocatur, vocabulo satis inconcinno; est enim illud ex iure Romano, secundum quod pater solus, non mater, ius in liberos exercebat: at iure naturae potestas illa communis est vtrique parenti, vti mox demonstrabitur; rectius vocatur *POTESTAS PARENTVM* in liberos; de ea quaeritur 1. *unde oritur?* §. 2. 2. *cui competat?* §. 3. 3. *in quo consistat?* §. 4-9. 4. *quomodo finiat?* §. 10. 5. *quae producat officia?* §. 11. 12.

§. 2.

Quaeritur ergo, I. *unde id ius parentum in liberos oritur?*

1. GROTIVS, *libr. II. cap. 5. §. 1.* putat oriri ex generatione; sed eum refellit HOBBSIVS, *de ciue, cap. 9. §. 1.* quia nulla sit connexio inter generare et dominium adquirere; refellit etiam PUFENDORFF, *VI. 2. 4.* sed ex alio fundamento, quia liberi nascantur in libertate naturali, adeoque sint parentibus aequales; sed haec frustra obuerti mox videbimus. Non hic quaeritur de dominio in liberos, sed de potestate actiones dirigendi; nec aequalitas naturalis impedit directionem actionum, adeoque haec GROTII sententiam non infringunt.

2. HOBBSIVS suo more hic prouocat ad occupationem ; quae nullius sunt , inquit *dicto capite* 9. cedunt occupanti , infans natus est nullius , cedit ergo occupanti , adeoque matri , ius ergo in liberos est penes matrem , penes patrem non aliter , quam quia mater dominium cum illo vltro communicat . At haec absfona ; nam *a*) negamus , infantem esse nullius , si de potestate quaeritur , est enim parentum ; *b*) ille confundit dominium et potestatem .

3. PVFENDORFFIVS simplicem caussam assignat , *a*) quia socialitas id requirit , *b*) quia tenerrimum amorem implantarit natura parentibus , qui illos cogat , liberorum curam habere ; addit etiam *c*) consensum parentum et liberorum praesumptum .

Nos his subtilitatibus vti nolumus , sed rem ita concipimus :
 1. Procreatio et educatio sobolis est finis matrimonii ; si fini generationis respondet euentus , ex nobis nascuntur liberi ; 2. Liberos non possumus aliter considerare , quam tamquam bonum aliquod , quorum procreatione genus humanum conseruatur , nobisque paratur senectutis praesidium ac ornamentum ; hinc sterilitatem aegre ferunt homines ; 3. Bonum tenemur amare , ergo et liberos ; vnde et natura nobis incredibilem amorem erga liberos implantauit ; 4. Iam quum liberos videamus nasci in se inopè , rerum indigos , et qui sibi ipsis consulere nequeant ; consequens est , vt nobis sint imperfectiores , adeoque amandi amore benevolentiae ; 5. Amor benevolentiae in eo consistit , vt alterius felicitatem et salutem quouis modo promoueamus , ergo felicitatem et salutem liberorum quouis modo promouere tenemur ; 6. Non possumus autem eam promouere rectius , quam si eos cum cura educemus ; educare ergo tenemur ; 7. Educare non possumus , nisi actiones eorum dirigere possimus ; ergo eorum actiones dirigere tenemur ; 8. Haec directio intelligi non potest , sine potestate , ergo opus est potestate in liberos , adeoque illa vere nascitur ex amore ; amor autem inde , quia liberi vere bonum sunt .

§. 3.

II. *Quis verò hanc potestatem exercent ?* Distinguit auctor inter statum extraconiugalem , et statum coniugalem .

1. Extra coniugium , inquit , potestas procul dubio est penes matrem , quia pater incertus ; sed id cum grano salis accipiendum ; incertus tantum est iuridice , quia l*ic*ti tenent regulam : *pater est , quem*

quem iustae nuptiae demonstrant; at moraliter saepe parens est certissimus etiam extra coniugium; quid enim si fateatur se patrem? tunc sane iure naturae omnino aequae potestate in liberos utetur, ac mater; immo argumentamur: Qui tenentur ad educationem, iis etiam competere debet potestas in liberos: pater etiam extra coniugium tenetur ad educationem; ergo ei etiam competere debet potestas in liberos.

2. In statu coniugali utrique parenti potestas sine dubio competit; nam 1. utriusque est proles, ergo idem utriusque amor naturalis; 2. uterque ergo concurrere debet ad educationem; 3. potestas patria soli patri competens est tantum commentum iuris Romani. Sed addendum tamen, a) in statu naturali pactis aliter conveniri posse; e. g. si Regina nubit principi non regi, ea plus potestatis exercebit in liberos, quam maritus; tale quid in Anna Regina Angliae contigit; b) patris partes in pari causa esse potiores; itaque si dissensus est, patris voluntas merito praefertur; in societate enim matrimoniali ipsa vxor quodam modo subiecta est marito; c) alterutro parente mortuo, eius potestatem adescere supersititi, immo et vitrico vel nouercae, si hi curam eandem educationis suscipiant; d) neutro supersite, eam potestatem deuolui in auos et auias, vel in reliquos cognatos, qui munere parentum funguntur.

§. 4.

III. Iam in quo consistat patria potestas quaeritur? Hic distinguendum inter statum naturalem, et civilem; nam in statu naturali pater simul est imperans, siue sit caput familiae, siue caput rei publicae. Quum ergo in hoc statu concurrat potestas domestica et civilis seu imperium, non dubium est, quin horum parentum potestas maior sit, quam illorum.

Hinc auctor considerat patriam potestatem 1. in statu civili, seu quam quis exercet tantum tamquam pater, §. 4. 6. 2. in statu naturali.

Potestas parentum qua talium fuit, ut diximus, ex educatione, ergo regula tenenda: *Tanta est parentum potestas, quantum requirit officium educationis*; iam educatio requirit 1. directionem actionum; ergo parentum est dirigere actiones, liberis praescribere, quid agendum, quid emittendum sit; 2. eos immorgeros pro re nata castigare et coercere; 3. non esse ex iure naturae ius abortum procu-
raudi;

randi; multo minus 4. ius vitae et necis in liberos, vel 5. ius liberos venumdandi; aut 6. omnia adquirendi per liberos; sine his omnibus enim educari possunt liberi, non ergo haec requirit educatio.

§. 5.

Immo quum tanta sit potestas, quantum requirit educatio, necessario sequitur, ut ea diuersa sit pro diuersa liberorum aetate: ergo in prima aetate omnis directio absolute est penes parentes: itaque hi 1. inuitos etiam cogere possunt, ut aliquid addiscant; 2. inuitis etiam iniungere possunt certum vitae genus; 3. nihil liberi sine eorum consilio et voluntate suscipere possunt, 4. parentes recte vtuntur poenis corporis aliiis, aliisque, quibus liberi coercerantur; addit auctor, 5. liberos hac aetate parentibus relinquere debere vsum fructum rerum suarum, proprietate contenti; sed a) id non tantum obtinet in prima aetate, sed et in adultioribus; b) id manifesto est ex iure Romano, non ex iure naturae.

§. 6.

In adulta aetate quodam modo paulatim decrescit haec potestas, quia paulatim decrescit onus educationis, dum iam liberi ipsi ratione vtuntur: itaque tunc 1. sine parentum consilio nihil quidem suscipere debent liberi, sed parentum quoque est, ipsis inuitis nihil obtrudere, e. g. vitae genus, matrimonium; 2. liberorum est, honorare et venerari parentes, sed parentum quoque, non prostituere liberos; 3. parentes non amplius iisdem modis coercendi vti possunt, quibus vtiebantur aduersus infantes; 4. iubere non solum debent parentes, sed et rationibus conuincere liberos, ut sponte obsequantur.

Vt paucis dicamus, quo magis liberi ad perfectionem adspirant, eo magis parentibus sunt aequales; quo magis aequales sunt, eo magis induit amor beneuolentiae naturam amoris amicitiae.

§. 7.

Iam ad statum naturalem progreditur auctor, in quo necessario maior esse debet patrum familias segregum potestas, quia quisque pater simul est imperans et caput familiae.

Itaque tunc 1. vterque quidem parens exercet eam potestatem in liberos, quam exigit educatio, sed pater solus ea, quae sunt imperii;

perii; quale est 2. ius ipsum vitae et necis in liberos, quo gauisi sunt patres iure antiquissimo.

Sed quaeritur, cur, quum Romani id ius ciuibus suis concesserint, reliquae res publicae id sensim abrogarint? Sane non iniustum in se videri potuit, quia per illud non promiscua occidendi licentia, sed iurisdiclio quaedam domestica intelligitur, et tamen illud abrogare placuit; a) quia non adeo concinnum est imperium in imperio admittere, rem publicam in re publica; b) quia amor parentum ita comparatus est, vt raro praesumi possit, eos iustitiam administraturos; in plerisque conuiebant etiam ad maxima liberorum delicta, quod omnino cum rei publicae detrimento coniunctum foret; c) si iustitiam etiam administrare vellent, nil tristius ac intolerabilius esset illis futurum, quam feralem sententiam aduersus liberos ferre. Nota est legislatoris historia, qui quum legem fecisset, vt adulteri oculis priuarentur, vnum sibi ipsi erui iussit, alterum filio adultero; d) vt amor parentum immodicus est, ita aliquando et odium, et hinc facile contingere posset vt patres eo iure abuterentur, maxime nouercalibus blanditiis et persuasionibus, iuncti, cuius rei exempla satis tristia in historiis occurrunt, maxime inter Reges.

§. 8.

*Qualis porro est parentum potestas, vbi plane familia paterna ex-
cesserunt?* Resp. Potestas proprie sic dicta cessat, quia cessat causa, puta onus educationis; at manet tamen 1. reuerentia, quam parentibus, tamquam auctoribus vitae, si a Deo discesseris, debent; manet etiam 2. grati animi memoria pro tot beneficiis, quae per educationem liberis praestita; 3. spes hereditatis: ex quo sequitur, a) vt tunc quoque parentibus honorem et obseruantiam debeant; b) vt nihil fuscipere debeant, quod alicuius momenti sit, sine eorum consensu ac voluntate, e. g. vxorem ducere: c) vt si indigi sint parentes, eos alere de suo teneantur; d) vt recte contradicant parentes, si quid agere velint eius modi liberi in familiae detrimento et dedecus, e) vt ipsi destituti liberis hereditatem parentibus merito relinquunt.

§. 9.

Sed quaeritur, an potestatem suam et officium parentes aliis ce-
Heineccii Prael. Pufendorf, D d de re

dere possint? Resp. affirmando; quia finis huius potestatis est educatio; aliquando autem fit, ut alius et possit et velit educandi onus pro parentibus subire; immo aliquando ipsi parentes non satis apti sunt ad id onus ferendum, siue ob simplicitatem, siue ob paupertatem; satius ergo tunc est, alios hoc onus subire, quod ipsi parentes facere nequeunt.

Potest ergo 1. pater liberos alii in adoptionem dare; quod paene omnes gentes permisisse novimus, Hebraeos, Graecos, Aegyptios, Romanos; 2. alterius disciplinae et informationi credere; et tunc liberi obligati sunt ad reverentiam et obsequium eius modi paedagogo et educatori; sola enim informatio hoc non exigit, nisi simul in alicuius disciplinam dati sint liberi; 3. potest et moriens liberos aliorum tutelae vel curae committere; quae origo est tutelae testamentariae; quin hoc tam necessarium visum est, ut legis latores et legitimam, et dativam tutelam inveniunt, si parens liberis de tutela non prospexisset.

Quaeritur, *an et vendere parentes possint prolem?* Id merito negamus, nam 1. venditio praesupponit dominium; tale quidem Romani habebant; ius vero naturae id ignorat; secundum illud patria potestas non consistit in dominio, sed in iure dirigendi actiones ad commodam educationem; inde vero ius venundandi nullo modo nullisque fidiculis elici potest; 2. patria potestas pro fine habet felicitatem liberorum, non eorum perniciem; at haec venditio cum manifesta liberorum perniciem coniuncta est; nam venditi in servituti detruduntur; 3. numquam iusta causa supponi potest cur liberi vendendi; si enim infantes sunt, et parentes vendunt liberos, peccant, quia detrectant officium educandi, quod ipsis incumbit; si liberi iam adulti sunt, tanto magis peccant, quia tunc licet eorum operae possent; aut aliis modis iis quaerere liceret victum.

§. 10.

III. Quaeritur *quomodo finiatur parentum potestas?* Nullum est dubium, quin id fiat 1. morte tum parentum, quia tunc potestatem exercere non possunt; tum liberorum, quia hi educatione non indigent; 2. cessante causa, scilicet educatione, ea autem cessat, si mulac se ipsos exhibere possunt liberi, ac proinde excedunt familia paternam; filii, instituta separata oeconomia; filiae, ubi nupserunt.

Quaeritur, *an et emancipatione?* Resp. emancipatio est actus, qui pra-

praesupponit dominium, quāle non habent parentes, iure naturae in liberos: sin quaeras, an non saltem liberos e potestate dimittere possint, ita vt abstrahamus a conceptu iuris Romani? Resp. si educatione non amplius indigent, nullum est dubium; alias id merito negatur: itaque absurda esset iure naturae emancipatio infantis vel pueri, quae saepe fiebat iure Romano; regula potius tenenda: *Parentes tenentur liberos tam diu retinere in potestate, quamdiu durat educatio.* Ex eo vero porro sequitur, nec liberos saluo officio excedere posse potestate parentum, his inuitis, quamdiu adhuc indigent educatione; nam si iustae aetatis sint, absurde agunt parentes, qui inuitis retinere volunt; e. g. si pater nolit filiam nubere, quae paullatim confenscit, vel si filium impediat, quo minus vel officio fungatur, vel alio modo fortunam periclitetur.

§. 11.

V. Superfunt officia tum parentum, tum liberorum, quae ex sine semper fluunt. Et quidem parentum est

1. Alere liberos. Quum enim liberi nascentur rerum omnium indigi, alii eos alere tenentur; at quinam? nisi quibus natura ipsa hanc voluntatem indidit? Indidit autem parentibus; parentes ergo liberos alere tenentur. Hoc officium adeo certum est, vt ideo leges civiles concedant etiam ad alendos liberos actionem.

2. Educare eosdem; educatio autem pertinet non modo a) ad corpus, vt parentes curam valetudinis habeant, vt de integritate membrorum et corporis solliciti sint; sed et b) vt intellectum liberorum reddant perfectiorem, adeoque dent operam, vt liberi aliquid addiscant, quod publico vtile sit, et quo aliquando vitam tolerare possint; itemque c) vt voluntatem eorum aduificent ad virtutem, probitatem, honestatem, decorum.

Qui quum finis sit, non negligenda etiam sunt media, veluti a) vt parentes non temere ex oculo dimittant liberos; b) ne familiaritatem cum iis contrahant; quum illa pareat contemptum; c) ne exempla liberos offendant, vt ipse IUVENALIS monet, *Sat. XIII.*

14 seqq.

*Nil dictu foedum visuque haec limina tangat;
Iura quae puer est, procul hinc, procul inde puellae
Lenonium, et cantus pernoctantis parasiti.*

Maxima debetur puero reverentia. Si quid

D d 2

Turpe

Turpe parat, nec tu pueri contemseris annos:

Sed peccaturo obftet tibi filius infans.

d) vt rationibus conuincant liberos, et ipso exemplo, virtuti studendum esse. Eleganter PLIN. *Paneg. cap. 45.* ait, efficaciora praeceptis esse exempla, quippe quae conuincant omnes, ea quae praecipimus, fieri posse; commendandus hic libellus quantuis pretii PLUTARCHI *de institutione liberorum.*

3. Ad honestum vitae genus perducere; vbi in primis indoles exploranda; an nimirum praeualeat iudicium, tunc enim studiis aptiores sunt; an ingenium, tunc ad artes magis videntur nasci; an memoria, tunc ad opificia sunt facti. Sunt etiam ipsius indolis subdiuisiones: nam si proxima iudicio sit memoria, aptiores sunt liberi ad studium theologicum vel iuridicum; si proximum iudicio ingenium, satius est, vt operam dent medicinae, mathesi, litteris humanioribus. Haec scire deberent parentes: at sciunt tamen paucissimi; interim omnis liberorum felicitas ab hoc pendet; si enim inuita Minerva genus aliquod vitae eligunt, vocationi diuinae refragantur, adeoque omnia male cedunt.

4. Fortunae futurae liberorum prospicere, quod sit a) aliquid honestum docendo; b) opum quid, quantum occasio fert, colligendo; c) amicos parando, quia aliquando plus profunt, quam opes; et quod praestat omnibus aliis, d) famam et exultationem illaefam illis relinquendo.

§. 12.

Ex eo ergo facile intelliguntur liberorum officia; qualia sunt;

1. honorare parentes; nam non possunt eos aliter considerare, quam tamquam perfectiores; qui honor se exferit factis, verbis, gestibus; 2. obsequi; correlata enim sunt directio actionum et obsequium; 3. gratitudo pro tot beneficiis; 4. patientia, si forte paulo morosiores sunt parentes.

CAPVT IIII

DE OFFICIIS DOMINORVM ET SERVORVM.

§. I.

Tertius status aduentitius, seu societas tertia eaque magis composita prioribus, est, *herilis*, de quo hoc capite disquirur: 1. *quae sit seruitutis origo*, §. 1. 2. *qualis dominorum in seruos potestas*, §. 2. *ad finem*.

I. Ad originem quod attinet, a) ARISTOTELES quosdam homines natura seruos putat, idque defendit DAN. HEINSIVS in *epistola ad Georgium Richterum* edita a IAC. RYTGERSIO in *Lecl. var.* quosdam enim esse homines tam ineptos ad omnia, ut ad seruitutem videantur destinati. Sed confundit Aristoteles actum et potentiam; haec omnino adest, ubi tanta stupiditas; non tamen ideo actu ipso serui sunt, nec sequitur, natura producit aliqua ingenia stupida, ergo seruitutem introduxit.

b) IO. GEORG. HORN. *de ciue, libr. I. cap. 3.* ad Deum seruorum originem refert, Deum enim moderari victorias, victores victos rapere in seruitutem: ergo seruitutem esse a Deo.

c) Ratio et historia docent, seruitutem natam e rerum dominio: nam 1. hoc introducto alii fuere diuites, alii pauperes, hi que vel idonei ad alimenta sibi acquirenda, vel minus idonei; ut ergo illi suis laboribus sibi victum quaesuerunt, ita hi alienis, ac proinde sese addixerunt in seruitutem alius. Ita in Aegypto integram gentem ob inopiam Pharaoni se addixisse nouimus; 2. deprehensa semel hac commoditate, et de aliis, acquirendis seruis homines cogitarunt, ac proinde factae leges, ut bello capti serui fiant; nec non 3. ut de seruis nati serui sint, quia ubi principale sit in dominio, ibi et accessorium in dominio esse aequum sit.

Quaeritur ergo, *an seruitus sit constitutio iuris gentium*, uti dicitur §. 2. *Infl. de iur. person. L. 4. D. de iust. et iur. Resp.* si quis putet, iure naturae et gentium seruitutes introductas esse, id negamus; potius hoc iure omnes homines sunt aequales: at si quaerat quis, an consentanea sit seruitus iuri gentium, id facile largimur; quisque enim potest iuribus suis renunciare, ergo et libertati; renunciant

autem tum , qui se sponte addicunt aliis , tum qui bello capti se dedunt. Victor eos poterat occidere , potest ergo et seruare ea lege , vt seruiant ; est ergo *seruitus* in genere status hominum , quo quis alterius arbitrio subiicitur , vt illi , non sibi , adquirit. Ceterum seruitus est duplex , vel *paſſiua* , vel *legalis* : illa ex pacto est , qualem seruiunt , qui se vltro addicunt ; haec ex lege , qualis seruitus captiuorum.

§. 2.

II. Iam de potestate dominorum in seruos : haec quia vel ex pacto , vel ex captiuitate est , necessario sequitur , vt fundamenti loco subſternenda ſint axiomata : 1. *Potestas domini in ſeruum paſſiuium tanta est , quantam inter ſe fore paſſi ſunt* : 2. *Potestas domini in ſeruum bello captum illimitata est , niſi quod legibus humanitatis et miſericordiae non debet aduerſari.*

Primum ergo de ſeruis paſſitiis , qui vel mercenarii , vel perpetui ſeu obnoxii. 1. *Mercenario dominus debet alimenta* ; vult enim ſibi operas acquiri : ſi ergo per ſeruorum operas acquiritur dominis , non ſeruis , huic fame pereundum eſſet , niſi eum aleret dominus ; 2. *dare mercedem debitam* ; ad id enim obligatur ex pacto , praeterea quum ſeruo praeter alimenta et alia neceſſaria ſint ; maxime in ſenectute , aliquid dandum eſt ; 3. *ſeruus debet operas conuenſas* ; dico *conuenſas* , ſic non tenetur coquere , quem tamquam aurigam conduxit ; 4. *item bonorem et obſequium debet domino* ; agnoſcere enim debet tamquam ſuperiorem ; 5. *quaeritur , an et coercere dominus huius modi ſeruum poſſit* ? Negatur , a) quia liber homo eſt ; b) quia id pacto non expreſſum ; c) quia ſi non ſatisfaciat officio , alio modo poteſt damnum ſarcire , vel ex mercede , vel ex diuulſa locatione conductione.

§. 3.

De ſeruis paſſitiis obnoxiiſ vel perpetuiſ tenendae regulae.

1. *Alimenta dominus debet perpetua* , quia ſe ipſum in perpetuum addixit ; ergo nec ceſſant alimenta aegrotante ſeruo , quod ſecus ſe habet in mercenario , qui operas tantum locauit , quibus ceſſantibus et merces , et quae eius pars ſunt , alimenta ceſſant. Hinc quum ſub Claudio domini auari ſeruos aegrotos in inſula Aeſculapii expoſuiſſent , Claudius Imperator , teſte SVETONIO , ſtauit , vt , ſi conualeſcerept , liberi haberentur.

2. *Labores*

2. *Labores imponere, sed viribus proportionatos*; hinc summa crudelitas, seruos sine ratione exhaustire laboribus, quod imputatur Hispanis, qui Americanos anchoras et tormenta portare coegerunt per montes, tantum ut oculos pascere victores.

3. *Servum castigare*, quia a) in dominio est quoad personam, b) quia plerumque stupidus; (quis enim alius in servitutem sese addiceret), homines stupidi sine coercitione non faciunt officium; ius tamen vitae et necis non exigit natura huius servitutis.

4. *Qu. num. vendere possit?* sane utrumque sunt rationes non minimi momenti. Non posse vendere, inde colligi posset, quod servus domini personam et virtutem elegit, adeoque illi non perinde est, quem dominum habeat, et cui serviat? Posse vero, vel ex eo colligeres, 1. quod, qui se addixit, est in dominio; ius vero vendendi cum domino coniunctum est. Responderi etiam potest ad argumentum superius, exinde etiam consequuturum, servum eius modi non transmissum iri ad heredes; accedit 2. quod omnes gentes hoc servorum commercium probarunt, Iudaei, Graeci, Romani, Barbari.

Nos itaque distinguimus, utrum pactus sit servus, ne vendatur; tunc pacto standum; an nihil conventum, tunc vendere licet, modo non in duriores causas.

Servi huius modi est: 1. *domino operas quascumque praestare*; 2. *honorem et obsequium exhibere*, 3. *non fugere*; domini castigationes patienter ferre.

Nec dubium denique servum huius modi ad libertatem provocare iure posse, si dominus eum contra leges conventionis tractet, e.g. alimenta denegando, intolerabiles labores imponendo, cet. nam dominus nullum in eum aliud ius habet, quam ex pacto; si ergo huius leges ipse violat, eius ius expirat, per ea, quae diximus supra, *libr. I. cap. 16. §. 5.*

§. 4.

Sequuntur servi bello capti, quorum duriores esse debere conditionem facile patet: 1. Hostili enim animo adversus nos fuerunt, mortemque intendant,

2. Inuiti serviunt, dominosque odio habent, ac proinde nihil faciunt in eorum utilitatem ultro et lubentes.

3. Fugam semper moliantur; quo obstinatius vero ingenium, eo severiore opus est coercitione. Hinc apud veteres catenati serviebant,

bant, donec venderentur, vel leuiter peccantes in ergastula et pistrina ibant.

At supra tamen diximus, humanitati et misericordiae hic locum esse, idque

1. Ex promisso; dum enim dedit se seruus, stipulatus est sibi remissionem iniuriae et salutem; dominusque dum eum in deditiorem recepit, in hanc conditionem consensit.

2. Etiam si nihil promissum, ipsa tamen humanarum rerum conditio, fortunae lubricum, et naturae communio suadent humanitatem et misericordiam. Hinc durissima ac inhumana regula iuris Romani: seruo non fieri iniuriam; quam philosophiam et ARISTOTELIS, et HOBBSIUS sequuti sunt; sed hoc ex principio, quod ius naturae non agnoscit, seruos personas esse definire, et in classem rerum redigi. Sed homo tamen manet, adeoque et de eo praecipit ius naturae neminem esse laedendum; si vero laedi potest, affici etiam potest iniuria.

Hinc iniuria ipsi fieri potest 1. a domino; si contra pactum deditiōis, contra humanitatem, contra misericordiam tractatur; iniuria etiam fieri potest 2. a tertio; is enim quum nihil iuris habeat in seruum alienum, iniuriam omnino facit, si laedit; absurda ergo est illa quaestio apud IUVENALEM, *Satir. VI. v. 219. seqq.*

*Pone crucem seruo: meruit quo crimine seruus
Supplicium? quis testis adest? quis deuilit? audi,
Nulla umquam de morte hominis cunctatio longa est.
O demens! ita seruus homo est! nil fecerit, esto.
Sic volo, sic iubeo, sit pro ratione voluntas.*

S. 5.

Iam facile iudicari poterit de officiis eius modi dominorum et seruorum mutuis: 1. domini est alere et seruare eius modi seruum; promittit enim, illum se seruaturum; 2. licet domino huius modi seruum vendere; hic enim nullum obstat pactum, quale §. 3. vidimus in seruo pactitio; 3. licet etiam castigare seruum huius modi pro delicti magnitudine.

Qu. an ius vitae et necis habeat dominus? Affirmant plerique; a) quia ius occidendi quum habuerit, antequam se dederit, ergo et postquam se dedit; b) quia plane sit in eius dominio; dominus autem rem suam libere corrumpere et destruere possit.

Non

Nos distinguimus inter statum naturalem et civilem; in statu naturali nullum est dubium, quia hoc ius habet paterfamilias, quia simul est imperans et caput familiae; at in statu civili illud vix indulgendum domino; nili leges civiles id indulgeant, quod a Romanis factum; aut enim peccarunt aduersus dominum priuatim, aut aduersus rem publicam, id est, aut admiserunt delictum priuatum, aut publicum: si priuatum, mortem non meruerunt; sin posterius, vindicabit res publica.

Alia ac diuersa quaestio est, *an hoc ius vitae et necis, quale Romani permiserunt dominis, sit absurdum et iuri naturae contrarium?* quod negamus, 1. quia non permiserunt promiscuum occidendi licentiam, sed iuris dictionem domesticam; 2. quia ab hominibus sanæ mentis non facile metui potuit, fore ut eo iure abuterentur; magnum fuit seruorum pretium, constituiebant illi maximam partem patrimonii; eius modi autem res nemo sanus animi tantum ac voluptatis causa destruere solet.

§. 6.

Vltima quaestio est, *an et proles serui cedant domino?* Nos distincte respondemus; aut seruus est pactitius, aut bello captus; pactitius est vel mercenarius, vel proprius, perpetuus, obnoxius.

1. Mercenarii prolem esse liberam, nemo dubitauerit, quia eius modi seruus tantum operas locat; non personam ipsam addicit.

2. Quod ad proprium pactitium, is aut iam liberos habet, dum se addicit, aut postea demum aliquos procreat; quos iam ante additionem procreauit, si procul dubio sunt liberi homines, si vel pater eos addixisset, nam patrem liberos vendere non posse supra vidimus; si postea procreati sunt, procul dubio cedunt domino, nisi speciatim excepti sint.

3. Denique id multo magis dicendum est de bello capto, idque ex natura a) domini, cuius est principale, eius accessorium; b) quia dominus alit, et seruus huius modi nihil habet proprii, vnde alat. Fatendum tamen 1. id paullo durius esse, quia liberi nascuntur in libertate naturali, et nihil admiserunt, ob quod libertate priuandi sint; 2. moderatiorem merito esse debere horum vernarum conditionem, ac eos tantum ad operas obligari; 3. merito ipsis indulgendum esse, ut redimere se possint, dominusque accepto pretio eos manumittere teneatur.

Heineccii Praef. Pufendorf.

E e

Sed

Sed vna gens altera his in rebus fuit humanior: vnde tanta servorum differentia, vt si in diuersis gentibus eos consideres, vix tibi similes sint; quod adeo verum est, vt Icti superiorum seculorum dubitarint, an Germania habeat seruos. Vid STRYK. *Vf. kod. Pand. tit. de stat. homin.* Praecipua ratio dubitandi fuit, quod ea, quae iure Romano de seruis, eorumque statu et conditione traduntur, seruis vel hominibus propriis Germanorum adplicari nequeant: sed si ita ratiocinari velis, dicere poteris, eodem idre Germanos nec parentes, nec liberos, nec coniuges habere, nam et horum status a statu parentum, liberorum, coniugum Romanorum in Germania maxime differt; argumentum, quod iusto plus probat, nihil probare, satis notum est ac tralatitium.

CAPVT V.

DE CAVSSA IMPVLSIVA CONSTITVENDAE CIVITATIS.

§. I.

Iam demum auctor ad CIVITATEM seu REM PVBLICAM, tamquam societatem maxime compositam progreditur, quae simul quantum institutum humanum est, ex quo fluunt officia hypothetica: et quidem quum omnia reliqua capita de ciuitate agent, is obseruandus est ordo, vt agatur 1. de ciuitatis natura, cap. 5-9. 2. de officiis summorum imperantium, cap. 10-17. 3. de officiis ciuium vel subditorum, cap. 18.

Ad naturam ciuitatis vel maxime pertinet causa impulsiva constituendae ciuitatis; differit enim ius naturae de officiis imperantium et subditorum; officia fluunt ex fine; finis ex causa impulsiva iudicandus, e. g. si scire velim, quae sint officia doctoris scholastici, ob oculos versari debet finis scholarum; si hunc scire velim, disquirendum, quid homines impulerit ad constituendas scholas.

Iam de ciuitate ea quaestio vel maxime est momentosa, quod homines mouerit ad ciuitates vel res publicas constituendas. Nam

1. Prae-

1. Praestantissima fuere iura status ante ciuitates; a) libertas ab omni subiectione; b) aequalitas hominum, c) ius belli et pacis. Quisque ergo paterfamilias eiusdem iuris erat, ac hodie Reges et supremi principes. Quin

2. Deus quum homines primos crearet in statu perfectione, eos non creauit in statu ciuili, sed naturali, adeoque satis docuit; statum naturalem esse perfectionem ciuili. Diximus quidem supra, infelicem esse statum naturalem, sed diximus etiam, intelligendum praecipue esse de statu naturali in secunda significatione, quatenus nempe statui sociali opponitur.

3. Ciuilis status cum multis incommodis est coniunctus; a) ciues oportet libertati et aequalitati renuntiare, et se aliorum uoluntati subicere; b) suscipere tenentur multa onera, a quibus maxime abhorrent, e. g. tributa, uedigalia, militiam; c) periculum est a tyrannide supremarum potestatum, poenis, suppliciis.

Quum ergo haec omnia ita comparata sint, ut non possint non homines illa auerfari; grauem sane et fonticam fuisse oportet causam, quae eos impulit ad statum naturalem cum statu ciuili, statum libertatis cum statu subiectionis, statum imperii cum seruitute quadam politica permittendum; haec uero quae fuerit, iam quaeritur.

§. 2.

Tales causae tres praecipue recensentur ab auctoribus.

I. HORNVS, de ciuitate l. 4. 6. hic iterum ad Deum prouocat; eumque causam ciuitatum vel rerum publicarum putat; quia magisteratus in *Scriptura sacra* uocetur *diuina ordinatio*.

Sed haec sententia nullo modo obtinere potest: nam 1. non quaerimus hic de causa efficiente; quis statum ciuilem primum instituerit? sed de impulsua; quid mouerit homines ad hunc statum eligendum? Id non potest esse Deus; non uidemus in statu ciuili propter Deum, sed propter nos ipsos.

2. Ne causa quidem efficiens dici potest Deus immediate; nam a) Deus primam rem publicam non instituit, sed homines, et quidem non probi, sed Caini posterius; b) potius Deus homines creauit in statu naturali; c) nusquam etiam exstat praeceptum, ut homines res publicas instituerent; at d) diuina ordinatio dicitur hic status, quia institutum illud approbat, conseruat, et officia mutua imperantium et ciuium confirmat; at eadem scriptura hunc statum

E e 2

etiam

etiam vocat *ordinationem humanam*, quia eius origo ab hominibus est.

II. Altera sententia est ARISTOTELIS, qui civilem statum a natura esse contendit, 1. quia homo natura sit animal sociabile; sed aliud est, sociabilem esse, aliud ad civitatem vel rem publicam proclivem esse: prius verum est, sed multae sunt societates praeter civilem, coniugalis, paterna, herilis, quibus contentus esse potuisset homo; itaque inde non fluit posterius, hominem praecise naturae ferri ad societatem civilem.

2. Quia homo extra societatem esset miserrimus, ceu supra docuimus, adducto in exemplum homine, qui solus vivat in locis desertis, et ab omni auxilio humano destitutus sit. Resp. denuo confunditur status extra societatem et extra civitatem; in illo esset miserrimus, in hoc aliquando homines vixerunt suavissime, e.g. temporibus conditi mundi protoplasti cum familia; post diluvium Noachus cum familia.

III. PLATO scripsit libros *de re publica*, quibus ideam rei publicae perfectissimae, et ad votum felices dare voluit; finxit ideo rem publicam, qualis nec fuit umquam, nec futura est. Ut in proverbium abiit: RES PUBLICA PLATONICA pro re chimaeica. Libro II. huius libri quaerit, quid homines moverit ad civitates instituendas? putatque, veram causam quaerendam esse in indigentia hominum; ad eam superandam opus fuisse civitatibus; sed et id falsum, nam 1. maxima indigentia esse coepit introducto statu civili; tunc enim introducta hominum inaequalitate gliscere coepit luxuria, adeoque multo pluribus rebus opus fuit ad splendorem, quam extra rem publicam; 2. indigentia satis commode caueri potuisset in statu naturali a) societate domestica, b) commerciis; quippe quae etiam extra societatem locum habere possunt.

§. 3.

Itaque iam auctor 1. refutat sententiam ARISTOTELIS §. 3-6. et 2. veram causam impulsivam ostendit §. 7. *ad finem*.

Argumentum auctoris generale, quod opponit Aristotelicis, hoc est: si natura homines impulit ad instituendas civitates, sequitur, 1. ut status hic multa habere debeat hominis naturae grata; 2. ut homini insint ea requisita, quae in bono ciue adesse debent; et 3. ut nihil ei insit, quod statui civili repugnet: at posterius falsum; ergo et prius.

Conse-

Consequentia maioris rectissime se habet, cur dico, quaeso, natura hominem adpetere vitam, quietem? cet. a) quia haec res in se sunt gratæ naturæ hominis; b) quia ipse in se habet requisitâ, quæ ad vitam et quietem pertinent; c) quia natura eius vitæ et quieti non repugnat; idem ergo adesse debet, si natura hominem impelleret ad statum civilem; at minorem falsam esse, iam per partes probat auctor.

§. 4.

I. Status civilis multa habet parum grata hominibus: nam a) cuius renuntiare tenetur libertati naturali, quid libertate vero iucundius? b) subiicit se summo periculo; Imperantes non semper boni, quam tristis vero tunc civium conditio? consideret quis statum Romanorum sub Nerone, Domitiano, Commodo, Caracalla, similibusque monstris, an non feliciores dixeris, qui in quavis solitudine vixerunt; c) multa civi incumbunt, a quibus natura abhorret; tributa dare, res suas conferre ad publicam utilitatem, arma capere, legibus parere, etiam aliquando iniquissimis; d) quia non datur regressus ad libertatem priorem; si subditi libertatem pristinam aestant, rebelles sunt; ex rebellionenascuntur bella civilia, supplicia, et tanto intolerabilior tyrannis.

Itaque argumentum primum speciale necesse licet contra Aristotelicos: Quicumque status multa habet naturæ humanæ admodum ingrata, ille non est a natura: status civilis multa habet homini admodum ingrata, ceu hæcenus demonstratum; ergo status civilis non est a natura.

§. 5.

II. Requisita illa non sunt in hominis natura, quibus ad statum civilem tamen opus est: In bono ciue requiritur a) strictum obsequium, homo vero natura nititur in vetitum; b) ut omnia referat ad bonum publicum; Cur Persæ omnes preces conceperint in numero plurali? homo vero *φιλαυτος* omnia refert ad proprium commodum; c) ut proclivis sit ad commodum cum concivibus vivendum; at homo homini lupus, homo homini natura diabolus, videmus, ne in statu quidem civili homines cohiberi posse suppliciis gravissimis a furtis, rapinis, homicidiis, aliisque delictis atrocibus.

Hinc secundum argumentum aduersus Aristotelem: quicumque natura

natura non habet requisita boni ciuis, is natura non fertur ad statum ciuilem : homo natura non habet illa requisita boni ciuis, ceu hactenus demonstratum ; ergo non fertur natura ad statum ciuilem.

§. 6.

III. Multa homini insunt, quae statui ciuili quam maxime aduersantur ; a) homo est animal indomitum ; b) ad omnia scelera, quae rem publicam turbant, natura procliuus ; ea in re deterior bestiis ; c) vindictae cupidus ; d) sui dissimilimus ; quae maxime repugnant statui ciuili ; nam tunc aliis subiectos nos esse decet, ad leges viuere oportet, vindicta omnis relinquenda magistratui, actiones oportet esse aequales et ad legem compositas.

Inde ergo tertium argumentum speciale : Cuicumque permulta insunt, quae plane repugnant statui ciuili, is non fertur natura in statum ciuilem : homini multa talia insunt, uti hactenus demonstratum ; ergo homo non fertur natura ad statum ciuilem, quod erat demonstrandum aduersus Aristotelem.

§. 7.

Iam ergo de vera causa, ob quam homines in ciuitates secesserunt, quae non alia fuit, quam metus hominum ab hominibus, vel securitas, quam sibi parere volebant homines : nam 1. natura hominis praua est ; 2. ergo alter alterius intendit laesionem ; 3. ergo opus praesidio aduersus aliorum iniurias ; 4. idque praesidium adaequatum et proportionatum esse debuit periculo ; 5. non aliud vero adaequatum reperiunt, ac rem publicam vel ciuitatem, itaque impulsus sunt ad ciuitates constituendas.

Periculum vero duplex imminere gentibus se ab inuicem separantibus : 1. externum ab aliis gentibus, ne hae eas opprimerent, sedibus expellerent, spoliarent. Quum enim plane inaequalis fertilitatis ac amoenitatis essent prouinciae, in quas gentes secesserunt, fieri non potuit, quin sibi inuicem inuiderent, et qui prouincias steriores fuerant sortitae, alias et pinguioribus expellere studeant, inde bella ; 2. internum ab ipsis eiusdem gentis hominibus, inter quos, cessante superioris alicuius potestate, non poterant non lites, iurgia, ac internecinae digladiationes oriri.

Opus ergo erat adaequato ac proportionato remedio. Periculo externo opponenda erant arma communia, interno iudicia et poenae ; itaque statu opus erat, in quo et vnio virium, et potestas iudi-

iudicialis, et facultas puniendi esset. Quae quum in nullo alio statu reperirentur, quam in ciuili: de ciuitatibus condendis cogitare debuerunt; probari ergo haec thesis potest,

a) A natura remedii; ex remedio semper iudicare possum; quid mali homines impulerit ad illud inueniendum; e. g. ex natura vestium iudicare possum, eas inuentas propter frigora et pudorem, quia hunc finem vestibus obtinemus, non autem famem et sitim expellunt; medicinam reppererunt homines propter morbos; ergo ciuitates propter metum ab aliis hominibus, nam hoc malum auertunt ciuitates, non vero famem, sitim, aliaque mala.

b) Ex historia sacra; nam non aliam ob causam post diluuium nata imperia, quam quia Nimrodus erat potens venator coram Deo. Ita HERODOTVS, *libr. I.* memorat, Medos ob metum sibi Regem constituisse Deiocem, quum antea vicatim habitarent, et nullo superiore indigèrent ob virtutem; addit, Deiocem circumiisse terras cum securi, vt homines, qui iniurii in alios essent, statim supplicio afficeret.

c) Ex eo quod crescente periculo statim etiam creuerunt imperia; antiquissimis temporibus minora fere imperia, e. g. Palaestina. Reges ad triginta fere occupant; Graecia quot ciuitates, tot regna et res publicas habebat; crescente vicinorum potentia, plures minores res publicae in vnam maiorem coaluesunt. Sic ob Persarum et postea Macedonum potentiam nata est res publica Achaica; Germania ipsa, quae olim tot regna et res publicas habebat, quot praedias, ob Romanorum potentiam paullatim in maiores populos, ac denique in vnum regnum coaluit.

§. 8.

Sed adhuc clarius auctor demonstrat, ciuitates ob metum et imminens periculum conditas hoc argumento: Si praeter statum ciuilem vel res publicas nihil securos praestare potuit homines, sequitur vel statum ciuilem vel res publicas introducere coacti sint: prius est verum; ergo et posterius. Prius esse verum auctor ita probat: praeter ciuilem statum tria sunt, a quibus aliquam sibi securitatem promittere potuissent homines, lex naturae, pacta, conscientia, et reuerentia numinis: atqui nullum horum sufficit; ergo ciuitatibus opus fuit.

Non sufficit 1. LEX NATURAE; a) quia iniurias quidem prohibet.

hibet, at mentem hominum prauam non emendat; latro se scit peccare, et peccat tamen, et qui iniustum gerit bellum, satis nouit, se contra legem naturae agere, an vero ideo minus bellum gerit? b) lex naturae iniurias prohibet, sed poenas speciales et praesentaneas non repraesentat; *speciales* inquam; docet quidem lex naturae eum, qui peccat, poenam mereri, sed non, quae sequutura sit, et quando repraesentanda; homines vero ita comparati sunt, ut praesentibus tantum et proxime eminentibus moveantur, non futuris et longe remotis. Sane in ipsis ciuitatibus hodie improbi vix specialibus suppliciis et praesentissimis deterrentur a criminibus, quid futurum, si nulla supplicia specialia imminerent?

2. Alterum, quod Aliquam securitatem promittere potuisset hominibus, sunt FACTA AMICITIAE, mutuae defensionis, cet. at nec haec sufficiebant; a) quia aliquando, si pauci foedus inierant, vel impotentiores mutuam sibi inuicem promiserant defensionem, potentiores tamen erant hostes, b) quia fluxa et lubrica est pactorum fides, ubi non est superior, qui perfidos coërceat; exemplo esse possunt tot foedera et pactiones ab initio mundi initae inter gentes, quae plerumque non diutius valuerunt, quam foederatis placuit. Opus ergo erat societate et pacto, a quo resilire nemini vel fas esset, vel facultas: tale vero sola est CIVITAS, vel RES PUBLICA; opus ergo erat ciuitate vel re publica; quod erat demonstrandum.

§. 9.

3. Aliquam securitatem promittere potuisse videtur REuerentia Numinis et MORSVS CONSCIENTIAE; at ne id quidem sufficiebat, a) quia scelerati consuetudine peccandi omnem reuerentiam Numinis paulatim mente excutiunt; e.g. Pharaos, b) quia dantur etiam athei theoretici et practici; c) quia metus semper supponit malum imminens, veluti poenas; ea vero, quae non statim repraesentantur, incerta putare homines, iisque parum moueri, iam supra vidimus. Notus locus ex PLVTARCHO de fera Numinis vindicta: violationem maleficio quam proxime adiunctam statim viam intercludere iis, qui quam plurimum malitia bonos habente successus vtuntur; nihil enim aliud perinde, atque dilatio iustae vindictae iniuria adsectorum spem eneruat, animosque eorum deicit; contra, improbos ferocia et audacia auget. Et hoc ipso mali sese ad flagitia capeffenda exhortantur atque excitant, quod malitia fructum statim

maturum et ante oculos situm praebeat, poena autem sero et longe post fruitionem subsequatur; d) quia numquam de Deo cogitant homines etiam improbi, quin sibi eum repraesentant tamquam ens clementissimum, hinc semper sperant meliora, nimirum Deum veniam delictorum daturum. e) Conscientia nonnumquam cauterio veluti inusta est, ita ut gravissima delicta perpetrantes nullis conscientiae angoribus excrucientur; f) morsus conscientiae non praecedunt crimen, sed sequuntur, adeoque non securos nos praestare possunt ab aliorum iniuriis; g) datur conscientia erronea, ut persuasi sint; qui nobis faciunt iniuriam, se iure id facere, uti plerumque et iniustissima bella gerentes iustissimas sibi habere belli causas videantur; hinc male mihi consultum esset, si securitatem meam in aliorum conscientia positam haberem. Firmum itaque manet auctoris argumentum, quod §. 8. proposuit: *Si praeier statum civilem, cet.*

CAPVT VI.

DE INTERNA CIVITATVM STRUCTVRA.

§. 1.

Non hic agimus de urbibus condendis; id enim ad architecturam pertineret, sed de interna rerum publicarum structura; id est, quid fieri oporteat, ut multitudo hominum coalescat in rem publicam.

Agitur itaque 1. de consociatione hominum, qui in rem publicam coalescunt, §. 1-6. 2. de modo, quo coalescunt, §. 7-9. 3. de effectu huius consociationis, seu iure, quod inde nascitur, §. 10. 4. de forma civitatum, §. 11-13. 5. de origine earundem, §. 14.

Quod ad primum attinet, distincte demonstrat auctor, necessariam esse 1. coniunctionem vel consociationem hominum, §. 1. 2. coniunctionem multorum, §. 2. 3. coniunctionem inter se consentientium, §. 3. 4. coniunctionem vinculo quodam inseparabili connexorum, §. 4.

I. Debit esse coniunctio hominum; qualis enim finis, talia media; finis fuit securitas, ergo medium debuit esse ad hunc finem consequendum sufficiens; sufficiens autem nullum fuit, praeter con-

Heineccii Praef. Pufendorff.

F f

iun.

iunctionem hominum, homines ergo coniungi oportuit. *Minorem* probat auctor, comparando hoc medium cum aliis, quae securitatem hominibus singulis et solitariis praestare posse videbantur. *Talia* sunt

1. Loca natura munita, ut in illis habitent; et sane olim homines excauarunt petras et scopulos inaccessos, ut ibi tuti ab hostibus cum rebus suis delitescerent, qualibus caernis tota Iudaea plena est. Sed a) nullus locus tam munitus, qui vi et fraude capi non possit; b) vnus et ibi aduersus multos se defendere nequit; c) si hostes rem pertinaciter gerant, fame et siti ibi erit pereundum; ut taceamus; d) non meliorem esse hominis ibi latitantis conditionem, quam captiui.

2. Arma; a) sed quid arma etiam efficacissima, nisi sint, qui vsuantur; b) vnus arma aduersus multos parum efficiunt; c) quid si arma vsu corrumpantur?

3. Belluae et bruta animantia; fuere sane, qui eorum ope vterentur. Hispani canibus vsi aduersus Americanos; et notum est, Orientales et Africanos et olim et hodie elephantos in bellum tamquam commilitones educere; sed a) bruta regenda sunt ab hominibus; b) coeeco impetu feruntur in hostes sine consilio et prudentia, ac proinde eorum vis facile eluditur; c) anceps est eorum auxilium, ut facile suis plus detrimenti inferant, quam salutis. *Cathaginienfes* id suo malo experti. *LIVIVS, Histor. XXX, 18.*

§. 2.

II. Deinde coniungi oportet multos, nam 1. ciuitates constituuntur aduersus vim; vim multorum pauci repellere nequeunt, ergo multi coniungi debent; 2. non modo opus est communibus viribus; verum etiam neruo rerum gerendarum, adeoque pecunia et comitatu; haec pauci conferre nequeunt, opus est ergo coniunctione multorum; 3. fortuna belli et violentae defensionis lubrica est, adeoque et qui iustissimam causam habet, succumbere potest: si ergo pauci semel succubuerint, nulla spes salutis esset reliqua; ergo multitudine opus est, ut re semel male gesta, nouus exercitus parari queat.

Ita multitudo quidem illa definiri nequit; at recte tamen *PLATO, de legib. libr. V.* tantam esse oportere multitudinem scribit, ut vicinos iniuriam facientes repellere possit, ergo felix res publica, cui

ius vires singulis vicinis, si non superiores, saltem pares sint.

Hinc diximus, aucta vicinorum potentia, augeri solere res publicas, sit tamen aliquando, vt et minores res publicae a vi omni tutae sint et satis potentes, a) ob prouincias; e. g. Heluetia, Belgium: b) ob vicinorum aemulationem; sic Palmyra vrbs libertatem diutissime retinuit ob aemulationem Romanorum et Parthorum. Vid. PLIN. *Hist. nat.* V. 25. Sic et hodie Hamburgum libertatem suam tuetur.

§. 3.

III. Facile patet, eos, qui hoc modo coniunguntur, debere consentire: a) debent enim vnire vires, quod sperari non potest a dissentientibus; b) potius impedimento sibi inuicem foret turba multorum secum ipsa dissentiens; c) vbicumque multi resistere volunt multis, debent vnum eundemque sibi propositum habere finem, iisdemque vti mediis; hoc dum faciunt, inter eos est consensus; inter multos ergo, ex quibus constat res publica, debet esse consensus.

Consensus ergo debet esse in finem, qui non alius est, quam securitas communis; consensus etiam in medium, quod est vnio virium. In haec si multitudo quaedam consentit, vera est res publica, vel ciuitas: hinc facile soluitur quaestio, *an inter apes et formicas sit simulacrum rei publicae?* Edidit Anglus anonymus rem publicam feminam, in quo libello Angliae regnum sub Elisabetha Regina comparauit coetui apum.

Et sane apes habent ducem vel reginam suam, quale quid in formicis non deprehenditur; illa viuua, salua est earum res publica; ea pereunte, societas dissoluitur. Sed tamen ne vmbra quidem rei publicae hic videmus; finis enim, (si etiam propter finem consociari dici possent, quod de brutis omnia ex impetu naturali agentibus dici nequit), non est mutua securitas, sed alimentorum per hyemem sufficientia, nec vires vniunt ad defensionem, sed ad communes operas in congerendis alimentis.

Obseruat quidem VARRO, *de re rustica*, III. 16, aliquando in vno alueario esse regulos trium generum, nigros, rubros, varios, ac inde oriri seditiones maxime a nigris, qui seditiosi sunt, et aut fugant reliquos, aut fugantur.

Hic niger est, hunc tu, Romane, caueo.

Sed haec quidem vis magis domestica est, quam ciuilis: vt paucis dicamus, regina haec est veluti materfamilias, non regina.

§. 4.

IIII. Iam quaeritur, quomodo consensus iste inter tot homines obtineatur? id est, quodnam sit commune illud vinculum, quod multitudinem tam diuersorum ingeniorum contineat?

Hic obseruandum, inter multos consensum esse posse non nisi dupliciter; a) per conspirationem, vt omnes et singuli ex illa multitudine idem velint; per subiectionem vel submissionem, vt omnes se submittant vnius voluntati; eiusque voluntatem pro voluntate totius coetus agnoscant. Prius sperari vix potest, 1. ob diuersitatem ingeniorum, quot enim capita, tot sensus; quod vni placet, alteri displicet; quumque sine subiectione omnes inter se sint aequales, nemo poterit iure praetendere, vt sua sententia praeferatur sententiis aliorum, adeoque non poterit non gliscere discordia; 2. ob hebetudinem; pauci de medijs eligendis iudicandi facultate instructi sunt; 3. ob pertinaciam in sententijs etiam absurdissimis defendendis; 4. ob auersionem naturalem ab iis, quae ad commune commodum pertinent; vitium enim hominis primum est philautia; philautia proprium tantum commodum ob oculos habet. Sane si imminente hoste in singulorum ciuium arbitrio positum esset, an conferenda sint tributa, an iuentus delectui nomen dare debeat, quam pauci in id consensuri essent? Quum itaque prior, modus per conspirationem sperandus non sit, eligendus est posterior, per subiectionem, adeoque non aliter multitudo coalescere in ciuitatem vel rem publicam potest, quam si tota multitudo voluntates suas voluntati vnius vel personae vel collegii submittat.

Ex quo fluit axioma politicum primum: *Non esse rem publicam, vbi non vnus imperet, reliqui omnes pareant*, alias enim non esset coniunctio multorum consentientium.

§. 5. 6.

Ex eo vero facile patet, quodnam sit vinculum illud commune, quo tota ista multitudo continetur: est illud triplex.

1. Vna voluntas, eaque per submissionem; adeo vt quidquid summus imperans agit ac decreuit, tota egisse res publica videatur; hinc etiam fit, vt imperantium facta toti genti in vulgari sermone tribuamus.

2. Vno virum; hinc a) ius indicendi tributa; b) habendi delectus aduersus hostem, dominium eminens in casu necessitatis; omnia

omnia enim haec necessaria sunt, si finis obtineri debet, nempe securitas.

3. Potestas puniendi; quum enim a) et vnio voluntatum seu subiectio minus ad palatum sit hominibus, et vnio virum plerisque molestissima; ea non diuturna futura esset, nisi esset medium coercendi et animaduertendi in eos, qui freua mordent; b) securitatem anhelamus non modo externam, sed internam quoque; interna autem securitas sine potestate puniendi obtineri nequit. Eleganter HORATIVS, *Satir. ll. 7. 73. 74*

-- -- -- tolle periculum
Iam vaga profiliet fraenis natura remotis.

Esse autem haec vincula vnionis inter ciues vnus rei publicae, vel ex eo patet, quod vno ex his sublato statim dissoluitur res publica; e. g. si duo essent Reges vnus rei publicae inter se discordantes ac viribus aequales, ita vt neuter alterius partis subditos immorigeros coercere possit, non res publica vna amplius esset, sed duae res publicae male temperatae; quod in Polonia futurum esset certissime, nisi alteruter Rex succumberet.

Itaque ratiocinamur: Quibus ruptis res publica dissoluitur, illa sunt vincula, quibus res publica continetur: ruptis his tribus nexibus res publica dissoluitur; ergo triplex hic nexus est vinculum rei publicae.

§. 7.

Iam II. de modo, quo homines coalescunt primum in rem publicam: auctor ciuitates constitutas ait per duo pacta et vnum decretum. Proponemus itaque eius sententiam, ac deinde, quid ei alii obuertant, dicemus.

Primum pactum ex auctoris mente in eo consistit, quod multitudo hominum in statu naturali viuens inter se conuenit, se in statu ciuili victuram, adeoque condituram rem publicam.

Quum enim in statu naturali omnes homines sint aequales et liberi, in eorum voluntate ac arbitrio positum iuste oportet, an se subicere velint alterius imperio; opus ergo tunc communi consensu, adeoque pacto de constituenda re publica: ex quo colligitur 1. pactum hoc esse liberrimi arbitrii; adeoque 2. eum, qui non consentit, extra hunc coetum manere; 3. potuisse hoc pactum ab aliis

E f 3

pure

pure iniri, ab aliis sub conditione, e. g. si talis rei publicae forma, e. g. democratia, constituitur.

§. 8.

Postea opus est DECRETO, quo praeuia matura deliberatione ad liquidum perducant noui ciues, quam rei publicae formam prae reliquis eligere velint; an monarchice, an aristocratie, an democratice imperari malint, an aliquas harum formarum commiscere.

Huic decreto 1. subiicere se debuerunt omnes, si maxima pars consenserit: quia qui pure consenserunt in rem publicam, euentualiter etiam consenserunt in formam aliquam rei publicae; 2. quia in deliberationibus huius modi inter pares plurima suffragia valent; 3. qui tamen priori pacto tantum sub conditione acceperunt, si talis rei publicae forma constituitur; ii procul dubio non tenentur, si alia forma, quam quae ipsis placuerit, electa sit.

§. 9.

Denique sequitur *alterum pactum*; quum enim semel conuenit; se coituros in vnam ciuitatem, certa etiam placuerit rei publicae forma, sane et electio fieri debet eorum, quorum se subiiciant voluntati, id est, imperantium, et in monarchia quidem vnius siue Regis, siue Principis; (nomina enim sunt adiaphora), in aristocratia procerum, senatorum, optimatum; in democratia cessare dixeris hanc electionem, quia totus populus imperet; at hic quoque opus est magistratibus, qui secundum leges praesint rei publicae, negotia quotidiana expediant, iudicium administrent, cet.

Inter populum vero eligentem et electos intercedit pactum; nam 1. eligentes se illorum voluntati submitunt, siue pure, siue sub conditione: vnde imperia libera alia, alia adstricta; 2. iidem promittunt vnionem virium, et imperantibus concedunt facultatem puniendi; 3. electi contra se obligant ad id, vt potestate sua ad salutem et securitatem rei publicae externam et internam seruandam vtantur, quod CICERO eleganter hac lege complectitur: *populi salus suprema lex esto*.

His ergo duobus pactis et vno decreto perfectis, perfectam quoque rem publicam esse auctor existimat, cui ea in re alii viri doctissimi suffragantur.

At intercedit hic non modo HOBBSIVS, sed et TITIVS, qui hanc doctrinam auctoris plane exagitant; nam 1. fabulam sapere aiunt hunc

hunc populi liberi conuentum, haecque pacta et decretum, nec ex historia facti veritatem posse demonstrari; 2. res publicas plerisque per vim constitutas; vbi vis dominatur, rem non redire ad oppressorum consensum, sed eos cogi ad subiectionem; 3. quotidie rebus publicis nouos accedere ciues, quibuscum pacta separatim iniri ab imperantibus dici non posse.

Sed quod ad 1. attinet, falsum est, ex historia hoc demonstrari non posse, ita enim constitutam esse Romanam rem publicam, praecclare docuit DIONYS. HALICARN. *libr. II.*: Ad 2. auctor loquitur de rebus publicis, quas populi liberi, non oppressi constituerunt; sed posito per vim plerisque constitutas, et hic pacta eadem et decretum adsunt, quamuis consensus vi et metu extortus sit; e. g. Turcae oppresserunt Graecos; hi demum se subiecerunt, ergo consenserunt in eorum imperium, decreuerunt, se Turcarum Sultano parituros, pacti sibi sunt imperium Turcicum, ipsi fidem et obsequium promiserunt; nam nisi in haec omnia consensissent, non posuissent arma, sed ad extremum usque halitum libertatem defendissent; 3. auctor loquitur de constituenda re publica, non de eius conseruatione; praeterea et qui de nouo accedunt ciues, omnia priora pacta probant, adeoque in illa consentiunt, alias enim non accederent illi rei publicae. Hinc solida est haec PVTFENDORFFII doctrina, nec quidquam est, quod illi cum ratione obueriti possit.

§. 10.

III. Constitutae hoc modo ciuitatis iura in eo consistunt: 1. quod tota res publica consideretur tamquam vna persona moralis; vbi enim vna est voluntas, ibi vna persona, ac proinde tamquam persona contrahit, acquirit, delinquit, punitur, si superiorem habet; 2. quidquid imperans agit, toti imputatur rei publicae; quidquid delirant Reges, plectuntur Achiui; quod tamen limitandum, si tamquam imperans agit; in his enim solis voluntatem suam submiserunt eius voluntati; hinc facta subditorum sunt bella, pax, foedera, quae ab imperante inita: at populo non imputantur facta principis priuata, e. g. homicidia, adulteria, cet. 3. quod ciuitas habet sua iura maiestatis, regalia, bona communia. Qui enim consenserunt in finem, consenserunt in media; populus ergo, qui consensit in id, vt imperans securitatem internam et externam tueretur, consensit etiam, vt habeat ius leges ferendi, iudicandi, bel-

la gerendi, foedera pangendi, legatos mittendi, tributa indicendi. En iura maiestatis. Item si populus consensit in vnionem virium, consensit etiam, vt res publica habeat bona ac aerarium suum.

Iam inde elicere auctor voluit definitionem ciuitatis vel rei publicae, sed quae admodum male ei cecidit.

Ciuitas ei est persona moralis composita, cuius voluntas ex pluriū pactis implicita et vnita pro voluntate omnium habetur, vt singulorum viribus et facultatibus ad pacem et securitatem communem vti possit.

Sed si demis vocabulum vnicum: nempe *moralis*, vere est haec definitio non ciuitatis vel rei publicae; sed imperantis, veluti principis.

Incaute auctor sequutus est HOBBSIVM, cuius tamen principia ipse reiecerat; is enim imperantem putat esse rem publicam, solum illum actiue, hanc passiuē se habere; illum esse personam, hanc veluti equum vel currum, quo persona illa vehatur. Quod principium quum sit pestilentissimum, mirum sane est, auctorem retinuisse definitionem ex illo profectam.

Rectius ergo definias, *rem publicam* vel *ciuitatem* esse societatem multorum hominum, qui omnes voluntatem suam ac vires imperanti submiserunt ad pacem et securitatem communem eo facilius et certius obtinendam.

§. II.

Hinc facile patet, IIII. Quid sit *forma rei publicae vel ciuitatis*? Diximus, in re publica esse debere vnā voluntatem, eamque obtineri tantum per submissionem. Submittit autem multiūdo voluntatem suam vel *vni homini*, vel *pluribus*, vel *omnibus* in eadem re publica; quartum non datur; si vni, emergit monarchia; qualem in populis Orientalibus et Africanis plerisque, item in Hispania, Gallia, Dania animaduertimus; si pluribus, nascitur aristocratia, qualis Venetiis, Genuae; sin omnibus in ea re publica; tunc prodit democratia, qualis olim Athenis, et hodie in quibusdam ciuitatibus liberis. Plures dari formae simplices non possunt, quamuis hae formae simplices diuersimode misceri possint, et tunc variae prodeant formae rerum publicarum mixtae, quas et irregulares vocant.

Sic si principi iungitur senatus, cuius arbitrato omnia agenda;
res

res publica ex monarchia et aristocratia composita est, qualem in Germania et Polonia animaduertimus. Sin princeps et senatum ex optimatibus, et comitia ex plebe collecta consulere tenetur, mixta est ex omnibus formis, qualis Anglicana, et hodie Suecica.

Penes quoscumque ergo est totius illius magni corporis voluntas, ii, siue vnus, siue plures, siue omnes, vocantur imperantes vel suprema potestas.

§. 12.

Iam quum vnā esse oporteat totius rei publicae voluntatem; illam quidem facile obseruamus in monarchia, paullo difficilius in aristocratia; difficillime in democratia. In aristocratia enim totum collegium imperat, in democratia totus populus; tanta multitudo raro conspirat in vnum; et quum in collegio aut comitiis omnes sint aequales, vix sperari poterit consensus, adeoque vna voluntas; sed res publica vtrobiue consensum obtinet per pluralitatem suffragiorum, plurium sententiae vincunt sententias pauciorum; necessarium hoc est; vbicumque enim omnes suffragantes sunt aequales, ibi nemo de alterius sententia potest iudicare, sitne melior, an deterior; vbi nemo iudicare potest, numerandae sunt sententiae, non ponderandae.

Hoc etiam vbique obtinet in rebus publicis bene constitutis, vbi vel viua voce dantur suffragia, e. g. in Germania, Anglia; vel tacite, e. g. Venetiis per globulos aureos et argenteos; ac proinde hoc imperfectionem arguit rei publicae, si nihil potest concludi sine omnium consensu, veluti in Polonia.

De democratia adhuc obijci posset, in ea non esse discrimen inter imperantes et subditos, quia imperantes simul sint subditi; subditi simul imperantes? Sed Resp. id verum tantum esse diuerso respectu, in sensu diuiso, non coniuncto; nam omnes ciues Athenienses coniunctim sumti erant imperans; totus enim populus ferebat leges in comitiis, sed singuli Athenienses erant ciues vel subditi, quia se subiicere illis legibus cogeantur.

§. 13.

Reliqui vocantur *ciues*, iique vel *originarii*, qui in hac ciuitate nati, vel *adscriptitii*, qui illi de nouo accesserunt. An vero
Heineccii Praef. Puffendorff. G g velit

velit nouos adscribere res publica, in eius arbitrio positum est; Hinc in Polonia ius indigenatus, in Gallia et Britannia ius nationis nemini extraneo competit, nisi illud a re publica impetrarit.

Recte etiam obseruauit GROTIUS, ciues esse vel *perpetuos*, qui sedem fixam habent in re publica aliqua; vel *temporarios*, qui sine consilio domicilium ibi constituendi in aliqua re publica ad tempus viuunt; e. g. qui studiorum vel peregrinationis vel mercaturae causa alicubi morantur; hi quidem non fruuntur privilegiis ciuium, (nisi specialiter concessis, e. g. studiosi), sed subiiciuntur tamen legibus, quia dum in aliena re publica viuere non dubitant, illius legibus et institutis sponte se subiecisse censentur, ac proinde etiam puniuntur ex iis legibus, si ibi peccent.

§. 14.

Superest V. vltima quaestio, *an maiestas sit a Deo?* de ea enim maxima semper fuit controuersia ob usum huius doctrinae; quia nimirum ideo magna fuit nata discordia inter imperium et sacerdotium. Hoc enim inde colligebant: Pontificis Romani, tamquam Dei et Christi in his terris vicarii, esse, praeficere imperantes, eosdem certis pactis obstringere, deponere, subditos a sacramento fidelitatis absolvere.

Hinc in multis regnis publico comitiorum decreto cautum est, vt statuatur quidem maiestas a Deo esse, sed inde concludatur ab omnibus, nemini, praeter Deum, in imperantes quidquam iuris esse. Plura eam in rem ex historia collegit THOMASIVS in libello elegantissimo, cuius scopum non omnes perspiciunt, *de historia contentionum inter sacerdotium et imperium, Halae 1722.*

Res ipsa facilis est; in *Scriptura sacra* vtrumque dicitur; vocantur imperantes *ὡς τὸ θεὸν* *Rom. XIII. 1.* contra *ἀνθρώπων* vocat Petrus *1. Ep. II. 13.* qui in exemplum adducit non modo magistratus, verum etiam ipsum imperatorem tunc regnantem.

Vtrumque verum est; maiestas est humana ordinatio, ratione primae originis; homines introducere imperia, pacta ipsa iniungere homines, ii et hodiernum imperantes eligunt et creant, vbi populo ius creandi est eligendi est, adeoque eatenus recte vocatur ordinatio humana.

At idem imperium est a Deo, quia Deus hypothetice vult, vt imper-

imperio pareamus, adeoque imperia approbat, conseruat, speciali providentia quosdam ad ea prouehit, rebelles odio habet, punit. Corruptum enim genus humanum quum subsistere sine imperio et rebus publicis non posuisset, Deus omnino providentia sua ita disposuit omnia, vt homines oporteret de rebus publicis et ciuitatibus constituendis cogitare, et eatenus recte vocatur *diuina*. Vid. FRAVENDORFFII Diss. de diuina maiestatis origine, Lips. 1687. *

* In Comitiis Gallicanis. Grammondus Lib. I. In Germania Constituit. 1338.

Diuersae sententiae. 1. Deum esse causam immediatam, quocunque quis titulo regnet. OSLANDER in not. ad Grotium 2. Deum non esse causam immediate, sed antecedenter: esse auctorem maiestatis in genere; quod vero in specie hic vel ille exerceat imperium, id esse ab omnibus. 3. GROTIUS: Imperia esse ingenerata ab hominibus. Deum autem probare hoc institutum.

CAPVT VII.

DE PARTIBVS SVMMI IMPERII.

S. I.

PER partes hic non intelligimus integrantes, eas enim iam vidimus esse imperantes et subditos, sed iura maiestatis, quibus sese exserit summum imperium vel maiestas, de quibus ZIEGLERI opus pulcherrimum de iuribus maiestatis. Vulgo etiam vocantur *regalia*, sed hoc vocabulum magis feudale est. Quemadmodum ergo *maiestas* est complexus omnium iurium supremae potestati in re publica et extra eam competentium: ita iura illa, quae complectitur maiestas, iura maiestatis vocantur.

Diuidebant vulgo illa *regalia*, (nam haec promiscue accipiebant pro iuribus maiestatis) in *Maiora*, quae ad imperium pertinebant, ac proinde essent incommunicabilia, e. g. ius belli, pacis, foederum; et *Minora*, quae tantum ad quaestum et sesei vtilitatem comparata, ac proinde communicabilia essent, e. g. ius metallifodinarum, piscandi, venandi, cet.

Rectius diuiduntur a THOMASIO in *Iuris prud. diuin. III. 6. 142.* in *immanentia* et *transientia*: illa summus imperans exercet erga ciues,

ciues, e. g. ius leges ferendi, iudicandi, tributa imponendi; his vtitur erga externos, e. g. ius legatos mittendi, foederum, belli ac pacis; et hoc ordine etiam tractanda fuisset haec materia ab auctore.

Iam vero 1. promiscue enumerat iura maiestatis praecipua §. 2-8. 2. eadem inseparabiliter inter se connexa esse demonstrat §. 9.

Antequam vero videamus illa iura, de principio cogitandum est; quod facile e fine ciuitatum vel rerum publicarum eruimus: is est securitas interna et externa, cu supra demonstrauimus; hinc principium: *Sine quibuscumque iuribus imperantes hunc finem obtinere non possunt, ea omnia illis competunt*; qui enim vult finem, vult etiam media. Quemadmodum ergo supra ex fine societatum coniugalis, paternae, herilis ostendimus, quanta sit parentum, maritorum, dominorum potestas: ita et hic quanta sit imperantium potestas, ex fine imperiorum iudicandum est.

§. 2.

Iam ergo ad priorem capitis partem, in qua auctor praecipua iura maiestatis recenset: in his primum occupat locum

IUS LEGES FERENDI, id est, ius summi imperantis praescribendi subditis praecepta generalia, ad quorum normam actiones suas componant.

Competere vero hoc ius imperantibus, adeoque vere esse ius maiestatis, et quidem praecipuum, inde demonstratur

1. Quod in re publica vnam voluntatem esse oporteat, et quidem per subiectionem: si ergo ciuitates se subiecerunt voluntati imperantium, huius est, illam declarare, adeoque leges ferre;

2. Inter affectiones summi imperii est, quod ciues deserint in libertate naturali viuere, non tamen vt serui et mancipia essent, sed vt hanc seruitutem a se auerruncarent; ergo interest ciuium scire, in quantum libertas sua, vel salua vel restricta sit; id illos leges docere debent.

Falsum itaque esse apparet, quod de priscis populis narrant **TACIT. Annal. III. 26. DION. HALIC. X.** initio illos nullas leges habuisse; quo sine prouocant ad Homerum, qui nusquam legem meminert: nam 1. ne per momentum quidem subsistere posset res publica sine legibus; et 2. ludunt terminis. Leges non habebant, quales postea habebant Graeci et Romani populi suffragiis latas, habebant tamen imperantium edicta, quibus regerentur; quid vero haec aliud quam leges? Eleganter **IUSTINVS I. 1.** *populus nullis legibus*

gibus tenebatur, arbitria principum pro legibus erant; quibus fere similia sunt, quae de Romanis memoriae prodidit POMPONIVS L. 2. §. 2. D. de orig. iur.

Ceterum, quum supra viderimus, pactum intercedere inter imperantes et ciues, quousque omnia vel suo arbitrio agere debeat, vel aliorum consilio: facile animaduertimus, cur non in omnibus rebus publicis imperans leges priuatiue et solus ferat, sed suffragiis populi vel ordinum, et cur lex in L. 1. et 2. D. de legib. dicatur communis rei publicae sponsio.

§. 3.

Proximum ius maiestatis est *poteslas poenas infligendi inuorigeris*. Hoc ius 1. ex superiore iure fuit; pars enim legum est sanctio poenalis; 2. ipsa natura hominis id exigit, quippe quae nititur in vetitum, nisi malo quodam imminente cohibeatur. HORTATIUS, *Satir. II. 7. 73. 74.*

--- --- --- *tolle periculum,*

Et vaga prosiliet frenis natura remotis;

3. finis rei publicae est securitas interna, quae sine poenis non obtineretur.

Quid vero *poena*? GROTIUS definiuit, esse malum passionis, quod infligitur ob malum actionis.

Sed falsa est haec definitio: nam ea 1. etiam cadit in vindictam priuatam; quis vero eam poenam dixerit? 2. inde sequitur, aequalem ab aequali, quin superiorem ab inferioribus puniri posse, e. g. Regem malum a subditis, id quod absurdum; addendum ergo definitioni, *poenam* esse malum passionis, quod infligitur ob malum actionis a superiore. Hinc regula: 1. tantam debere poenam, vt homines absterreantur a male agendo, adeoque 2. crescentibus delictis poenas etiam crescere. Id quod obseruandum contra eos, qui e. g. poenam furti capitalem iniquam statuunt, quia nec proportio sit inter delictum et poenam, nec Deus hanc poenam sanxerit.

§. 4.

Tertium ius maiestatis est *poteslas iudiciaria*; quae denuo ex superioribus fuit: nam homines quum teneantur actiones ad leges

G g 3

insti-

instituire, quaestio semper incidit, an ciuium actiones legibus sint conformes, nec ne? id iudiciis institutis definiendum est. Hinc VELLEIUS PATERCVLVS. II. 80. rex iustitiae fruendae causa constitutos testatur, vt data legibus vi, iudiciis auctoritate, cultus agris, sacris honos, securitas hominibus, certa rerum suarum possessio cuique constaret. Hinc imperantes Hebraeorum ante reges dicti Iudices, ceu patet ex libro *Iudicum*.

Est ergo *iudicium* actus superioris, quo comparata lege et actione ciuium definit, quem effectum actio habere debeat. Quum vero leges ferantur vel de rebus priuatis, e. g. de meo et tuo, vel de publica securitate: consequens est, vt et iudicia sint vel *priuata*, vel *publica*. In illis tantum agitur de meo et tuo, et effectus est restituere, dare, facere, vel non restituere, non dare, non facere; in his agitur de violata securitate publica, adeoque effectus est poena vel absolutio a poena.

Hinc iudicare olim praecipua fuit summorum imperantium occupatio, quum adhuc minora essent imperia; crescentibus his, alijs quidem deleganda fuit iudiciaria potestas, sed ita, vt princeps vel imperans sibi referuaret supremam appellationem; hinc alla nata iudiciorum differentia in *primae* et *secundae instantiae iudicia*, quorum illa coram inferiore iudice, haec coram principe tractantur.

§. 5.

Proximum est *ius belli ac foederum*; bellum vel ideo multis visum est iuri naturae repugnare; quod 1. Deus velit pacem, ergo velle non possit bellum; 2. quod illud cum clade ac strage humani generis coniunctum sit; 3. quod Christianae caritati, patientiae, mansuetudini plane repugnet. ERASMVVS in *militie Christiano*.

Sed non posse non hoc ius maiestatis principi competere, facile patet, 1. quia hoc requirit finis rei publicae, securitas; ea in statu naturali non potest obtineri iudiciis, ergo armis; 2. quia vbi offensio iniusta dari potest, ibi et concedendum est, iustam esse defensionem; 3. quia ipse Deus rem publicam suam sanctissimam non carere posse bello vidit, ac proinde leges de bello praescripsit, bella geri iussit, bellantibus auxilio adfuit; 4. Christus nihil mutauit circa politias; Ioannes Baptista milites admisit ad baptismum; Christus ipse laudauit centurionem a fide, quemadmodum

modum et centurio sub cruce, et Cornelius centurio Christo derunt nomen, nec ideo militiae nuntium mittere iussi sunt; 5: quia primi Christiani, qui se ab omni, quod vel speciem improbitatis prae se ferret, sedulo abstinerunt, tamen militarunt, adeo, ut legiones paene totae essent Christiani. TERTVLL. *Apolog.* et *ad nationes*.

Ad obiectiones respondetur. 1. Deum velle pacem absolute; velle tamen et bellum hypothetice, si nempe aliter salutem habere non liceat, ita vult et hominum salutem, at damnari etiam vult impios; 2. bellum est omnino medium imperfectum, ut omnes res humanae, at necessarium tamen; quodnam est institutum humanum ab eius modi imperfectionibus immune? ipsa saepe iudicia cum clade innocentium coniuncta, et quis tamen iudicia reiceret? 3. Christianae caritati, patientiae, et mansuetudini repugnat, bello iniusto alios opprimere; sed non, oppressuris aliis armis resistere, quia proximis amandus tamquam nos ipsi.

Iam quum ius belli habeat princeps: sequitur a) ut possit milites cogere, quod vocant *ius delectus habendi*; b) ut possit vrbes et loca opportuna munire, quod vocant *ius armantiae et praesidii*; c) ut possit militibus assignare aestiua et hyberna, quod vocant *ius hospitandi*; d) ut habeat ius commeatus, arma, aerarium militare, et quaevis bello necessaria parandi.

Ius foederum procul dubio itidem principi competit; *foedus* enim est pactum summorum imperantium vel societatum liberarum de mutua securitate. Hoc iustum esse nemo negaverit, 1. quia res publica consideratur tamquam persona; persona potest pactis sibi prospicere, ergo et res publica; 2. quia hoc requirit securitas publica, tamquam finis rerum publicarum; vires omnium civitatum non sunt aequales, supplendum itaque, quod deest, per foedera, sed de his infra suo loco plura.

§. 6.

Ius constituendi ministros et magistratus quintum est ius maiestatis.

Magistratus sunt proprie, qui ex ipso imperantium numero negotia publica administrant, e. g. Romae Consules, Praetores, cet. Venetiis Dux; Procuratores sancti Marci, cet. in Monarchiis ipse princeps solus magistratus est.

Ministri sunt, qui illis consilio et auxilio sunt, e. g. Consilarii, Syndici, cet.

Tales

Tales esse oportere in re publica, facile patet; 1. quia res publica constat e societate multorum hominum; tantam multitudinem vix curare non potest, ergo alii in partes curarum venire debent; 2. quia ne amplior quidem oeconomia recte administrari potest, nisi singulis sua officia assignentur; quanto minus res publica?

Ceterum in re publica opus est trium generum ministris; alii enim curant 1. negotia publica, quo pertinet collegium consilii interioris, et qui apud externos agunt legati; 2. administrationem iustitiae, quales sunt Cancellarii; 3. redditus publicos.

Ex eo vero, quod ministri imperantium loco administrant, sequitur, a) illos constituendos esse a summo imperante; b) ab eo dependere. Hinc res publica in re publica emergit, ubi ministri independentiam affectant, e. g. Maiores domus in Francorum regno; c) rationes reddere debere principi; d) ab iisdem honoribus priuari, puniri, coerceri posse, si contra fidem, ob quam constituti sunt, agant.

§. 7.

Ius vestigialia et tributa imperandi est sextum ius maiestatis.

Hoc denuo exigit 1. finis rei publicae, securitas; ob hanc vixerunt non modo animos, sed et vires; ad vires etiam pertinet pecunia, nervus rerum gerendarum, pecunia ergo conferenda; 2. id et aequitas suadet, quod pace fruimur, quod tutus bos rura perambulat, quod ex praediis et aliis honestis negotiationibus lucrum facimus, id rei publicae debemus; qui vero commodum et lucrum percipit, qua aequitate onera detrectet? Sunt vero tributa variorum generum: si enim imponuntur personis, vocantur census capitationis, *Kopf-Steuern*; si praediis et facultatibus, *Steuern, Contributionen, Schofs-Gelder, Vermögen-Steuer, Guth-Schatzungen*; si negotiationibus, *Zoll, Geleits, Lizens*; si rebus consumptibilibus, *Accise, Tranck-Steuer*, cet.

Ne tamen nimia imperantium cupiditas ad incitas redigeret subditos, (veluti apud Romanos, ubi et pro aëre, vento, umbra vestigal solvendum erat; *CVIACIVS Obseru. X, 7.*) plerisque locis sibi prospexit res publica, ut tributa non nisi consensu ordinum indicerentur; hinc vocata olim *Gaben, Beden*, cet.

Principi vero ad sustinendam aulam adsignatae res fiscales et domaniales; *Cammer-Güter*, quorum fructibus pro lubitu vitur; hinc omnino aliud est 1. aerarium, quod publicis necessitatibus destinatum,

finatum; in quo princeps tantum habet administrationem; 2. aliud fiscus, principis sustentationi destinatus, in quo ususfructus imperanti competit; alia denique 3. bona patrimonialia principis, quae tamquam priuatus habet, in quo ipsi plenum dominium competit.

§. 8.

Ius circa sacra et doctrinās est septimum ius maiestatis; idque e praecipuis, de quo agendum paullo adcuratius.

Per sacra hic non intelligimus ipsas de Deo sententias; vel principia intellectus; nam in hunc imperanti nullum imperium est, partim quod cogitationis poenam in foro humano nemo patitur, *L. 18. D. de poen.* partim quod intellectus potentia non minus necessaria est, quam potentia videndi; neutri vero leges praescribi ab ullo mortalium possunt: itaque 1. imperans subditis praescribere nequit; quid credere debeant; 2. religionem cogere non potest.

Sed per *sacra* hic intelligimus externas actiones, quae ad religionem pertinent, e. g. cultum, doctrinas in ecclesiis et scholis proponendas; in haec imperanti esse potestatem probamus, a) quia indigent legibus; leges vero in re publica nemo ferre potest praeter imperantem; de clericis dixit Seruator *Matth. XX. 25. 26. gentium principes regnant, inter vos vero non sic agetur*; b) quia principi omnia incumbunt, quae ad securitatem publicam pertinent; atqui vel maxime pertinet religio ob turbas, quae inde nasci possunt; c) quia ecclesia est collegium in re publica: si ergo independens esset ab imperante, res publica esset in re publica, quod absurdum.

Hinc principis est, a) religionem tueri; b) cultui diuino intendere, ut omnia fiant *κατὰ τὸν καὶ δόξαν*; c) doctrinas prohibere prauas et rei publicae noxias; d) lites plus scandali, quam utilitatis habituras prohibere; e) scholas, academias, seminaria instituire, tueri, easque ita temperare legibus, ut utiles sint ecclesiae et rei publicae; f) clero inuigilare, ut officio rite fungantur; g) persecutiones dissentientium in religione inhibere.

Vti enim initio eius est dispicere, an dissentientes ferre velit in re publica: ita ubi eos semel passus est esse in re publica, tueri debet, et omnem ab iis iniuriam auertere 1. ob pactum tacitum; 2. quia persecutiones neminem ad veram religionem pertrahunt;

Hennecii Praef. Fufendorff.

H h

3. quia

3. quia et dissentientes bonos ciues agere possunt, ceu Bataui experiundo didicerunt. Aliud si dissentientes dant turbas; tunc enim poenas merito ferunt, non quod dissentiant, (actus enim intellectus non sunt obiectum legis, adeoque nec poenae obnoxii), sed quod turbant rem publicam.

§. 9.

II. Quod connexae sint omnes illae rei publicae partes, ita probat auctor: quae nec separari possunt, nec diuidi, ea connexa sunt indissolubili vinculo: atqui iura maiestatis nec separari possunt, nec diuidi; sunt ergo indissolubiliter connexa. Maior est ipsa definitio, *connexa* enim sunt, quae nec separata, nec diuisa sunt; minor probatur, 1. separari non possunt, nam vtrum sine altero consistere nequit; quin vno deficiente, plane non amplius est imperium. Tolle ius leges ferendi, cessabunt poenae, iudicia, adeoque securitas interna; tolle iudicia, frustra erunt leges et poenae; tolle ius pacis, bella erunt perpetua; tolle ius belli, ius foederum, ius tributa indicendi, cessabit securitas externa; tolle ius circa sacra, res publica erit in re publica, adeoque non vna voluntas.

Ex quo patet, 2. diuidi etiam non posse iura maiestatis; si enim vnus haec, alter illa exerceret iura maiestatis, non erit vna voluntas, ergo nec res publica.

Obiici posset; attamen e.g. in Imperio nostro, in Anglia, in Polonia diuisa esse iura maiestatis inter imperantes et status? Resp. negando; aliud enim est, si communicata sint quaedam iura, vt communiter exercentur, nec alter sine altero quid possit; tunc enim manet vna voluntas; aliud si sunt diuisa, vt vnus hoc, alter aliud exercent, tunc sunt plures in re publica voluntates; id est, monstrum horrendum, ingens, cui lumen ademptum.

CAPVT VIII

DE FORMIS RERVM PVBLICARVM.

§. 1.

DElibauiamus quaedam huc pertinentia supra; iam de iis ex instituto; et quidem 1. *de rebus publicis regularibus* §. 1-11. 2. *irregularibus* §. 12.

Regulares nōdem sunt vel *sanæ et rectæ* §. 1-4. vel *morbidae et corruptæ* §. 5-11.

Forma est dispositio de nexu inter imperantes et subditos vel ciues; eaque pactis nititur, quæ tunc legum fundamentalium nomine veniunt.

Nimirum ratione materiae omnes res publicæ sunt eadem: constant enim ex imperantibus et ciuib; ita se res vbique habet; at videmus non vbique imperantes et ciues iisdem iuribus uti. In Gallia omnia rex agit pro lubitu; in Anglia consensu Parlamenti; in Polonia consensu ordinum in plerisque opus est; id est, a diuersa dispositione esse nexum inter imperantes et subditos, id est, a diuersa forma.

§. 2.

Forma illa rei publicæ vel est REGVLARIS, vbi nulla est communicatio iurium maiestatis, sed ea ab vna persona siue moraliter; siue physice tali exercentur, e. g. in Francia a Rege; Venetiis a Senatu; Athenis a Populo; vel IRREGVLARIS, vbi exercitium iurium maiestatis communicatum est cum ciuib; vel omnib; vel quib;dam; e. g. in Anglia, Romæ quum adhuc esset regnum. Itaque non putandum, contumelia affici rem publicam quæ irregularis vocatur, alia enim est res publica irregularis, alia vitiosa. Ridiculus ergo fuit SCHARSCHMIDVS, quod PFENDORFFIO exprobrauit, iniuriam illum facere imperio Romano-Germanico, quod illud irregulare vocare non dubitaret; quasi ideo iniuria fieret munimento, si irregulare dicatur; quasi illud ideo non possit fortissimum et optimum esse.

H h 2

§. 3:

§. 3.

Iam regularium non possunt nisi tres esse: aut enim omne imperium est penes vnum, aut penes plures, aut penes omnes: primo casu oritur monarchia, altero aristocratia, tertio democratia.

Monarchia est, quando maiestas vel imperium vni homini competit; eaque vel *successiva* est, quando res publica vni cum omnibus posteris, vel masculis saltem descendentibus imperium detulit; vel *electitia*, quando vni tantum personae credidit, ita vt ius hoc cum persona extinguatur, et tunc noua fiat electio; vocari etiam solet *regnum*, idque ARISTOTELI, *Politica* III. 10. 11. est vel 1. HEROICVM, quando imperans vnus est, qui tamen omnia agit consilio ciuium; ita vocatur, quia HOMERVS sic fertio describit regna Graecorum, qui Troiam oppugnatam venerant; 2. BARBARICVM, vbi Rex non modo omnia suo agit arbitrio, sed et subditis vtitur tamquam mancipiis; tale enim regnum Persicum, Turcicum, et omnia Orientalia; 3. AESYMNETICVM, vbi Rex vel monarcha eligitur tantum extra ordinem, quoties res trepida maiorem auctoritatem postulat; huc praecipue pertinet dictatura Romanorum; 4. LACONICVM, quando Rex tempore pacis tantum est primarius ciuis et senator; tempore belli autem omnia iura maiestatis exercet vel solus, vel cum senatu; tales olim reges Spartanorum, et Patrum memoria gubernatores supremi Belgii foederati; 5. ΠΑΜΒΑΣΙΛΕΙΑ, regnum perfectum, vbi omnis potestas est penes regem, ita tamen, vt ciuibus, non mancipiis imperet; veluti olim Macedonicum; hodie pleraque Europae regna, quamuis ea pro diuersitate imperantium, nunc magis ad barbarica inclinent, nunc intra *πολυβασιλικας* fines consistant.

Aristocratia est, quando plures imperant, qui in collegio confident, et in commune consulunt, vocanturque Senatores, Proceres, Optimates, Ordines, vti in Belgio: Ea quoque, vti recte obseruat HERTIVS, *Polit.* I, 10, 14. vel est *electitia*, quando existunt senatoribus per electionem vel cooptationem surrogantur alii; vti olim Romae, hodie in quibusdam Helvetiae ciuitatibus; vel *successiva*, quando senatores non eliguntur, sed nascuntur, et certis tantum familiis ius in senatu dicendi sententiam competit, vti hodie Venetiis, Genuae, et in Germania Norimbergae, (ibi die *Geschelechter*, *Rathsfabige Geschlechter*) hac praerogatiua gaudent.

Democratia est, vbi imperium est penes totum populum, in comitiis

mitis congregatum, vnde et *πολιτια* vocatur. Vt vero suffragia tanta multitudo sine confusione ferat, opus est distributione populi in certa systemata, veluti Athenis in tribus, Romae in classes, curias, tribus; Hamburgi in *Casseln* vel *Kirchspiele*. Duae ultimae formae diuiduntur in *urbicas*, vbi aristocratia vel democratia in vna tantum vrbe consistit, vti Venetiis et Athenis; et *provinciales*, vbi tota prouincia vel proceres e populo conueniunt, vt in Belgio foederato, Vraniae, Suitzae, Vnterwaldae, apud Grifones, item Valisios, Glaronenses, Appenzellenfes, cet.

§. 4.

De his variae nasci solent quaestiones: 1. *Quaenam ex his formis antiquissima?* Resp. a) quae vel maxime libertatem conseruant; non enim est verosimile, homines statim ab vno extremo prolapsos ad alterum, ex libertate naturali in seruitutem; b) quae minimum artis habent; antiquiora enim semper, quae simpliciora; et natura ita comparatum est, vt res initio rudes sint, et paulatim postea magis magisque veluti perpoliantur. Iam et libertatis plurimum habet democratia, et eadem est omnium simplicissima, ergo hanc esse antiquissimam probabile est. Libertatis minimum habet monarchia et aristocratia, ergo has postea demum inuentas esse oportet; et quum denique aristocratia plurimum artis habet, ea necessario reliquis recentior est.

Hinc 1. Democratiae institutae; 2. eae monarchice temperari coeperunt, vnde regna heroica; 3. Monarchae paulatim ad maiorem potentiam adspirarunt, vnde nata regna pambasileia et barbarica; 4. in quibusdam ciuitatibus aristocratically temperatae democratiae; ex iis, oppresso populi suffragio, natae aristocratiae; 5. Hae monarchice temperatae dederunt regna; Aesymneticum et Laconicum.

2. Quae solet, *quae ex his sit optima?* Haec quaestio plerumque vana, vti eleganter docuit THOMASIVS in *Notis ad MELCHIORIS ab OSSA Testamentum*. Nam

a) Boni ciuis est, non mutatam velle rem publicam, in qua viuut, sed formam tueri, ornare, et veluti personam decore agere in theatro illo, in quo eum collocauit prouidentia diuina.

b) Omnes formae habent et sua commoda et incommoda, e. g. *Monarchia* habet commoda; 1. quod finis alter, puta securitas

externa facilius obtineatur; 2. quod consilia et secretiora habeantur, et celerius capiantur exsequutionique mandentur; 3. quod virtuti et meritis maior honor habeatur; 4. quod elegantior in monarchia sit viuendi ratio: sed habet etiam sua incommoda, a) periculum a malo principe; b) libertatis iacturam; c) crebras rerum omnium mutationes.

Aristocratia habet sua commoda, a) consiliorum prudentiam; b) imperium mollius, ac proinde c) ciuium opulentiam: sed habet etiam incommoda maxima, 1. factiones; 2. consiliorum tarditatem; 3. plebis ab omni honore exclusionem; 4. sumtum magnitudinem, atque hinc onera insignia.

Democratia commoda sua habet, nam insigni libertatis nomine blanditur; sed incommoda multo maxima; a) consiliorum temeritatem, tarditatem, diuulgationem; b) factiones et seditiones, si demagogi accedant, (quales oratores Attici); c) odium non modo nobilitatis et potentiae, sed et virtutis eminentioris; vnde ostracismus Atheniensium, Ephesiorum, exilium Hermodori, de quo diximus in *Historia iuris*.

§. 5.

Haftenus de rebus publicis sanis et rectis; iam de morbidis et corruptis: vti enim persona physica vel sana est, vel aegrotat, ita idem contingit rei publicae, tamquam personae morali.

In persona physica morbus adesse censetur, a) vbi partes corporis corruptae, e. g. viscera; sanguis, cet. b) vbi dispositio et modus earum partium turbatus, e. g. si sanguinis circulatio turbata; si neutrum obseruatur, saluus et sanus est homo.

Ita et in re publica vel ciuitate modo homines, ex quibus res publica constat, corrupti sunt, modo ipsa forma turbata est; et proinde recte auctor morbos rerum publicarum distinguit in vitia hominum, si vel imperantes, vel ciues male satis faciant officio; et in vitia status, quando ipsa rei publicae forma vel dispositio turbata; e. g. sub Nerone male se habebat res publica Romana; hoc vitium erat hominis; male etiam sese habebat sub triumuiris, Caesare, Pompeio, et Crasso; hoc vitium status; iam de vtrisque seorsim agitur.

§. 6.

§. 6.

Vitia hominum sunt vel specialia, quae singulis rerum publicarum formis competunt, de quibus §. 6-8. vel generalia, quae omnibus formis communiter competunt, §. 9.

Inter specialia quaedam vexant monarchiam; 1. si imperans regnandi arte desituitur; difficillimum est imperare animali multicipi, quale est ciuitas. Totā ars consistit in temperamento libertatis et imperii; *libertatis*, ne ciues taedium capiant imperii, et obsequium exuant; et *imperii*, ne nimia libertate ferociant.

Temperamentum hoc difficillimum; in alterutram vero partem peccare facillimum; est ergo ars, et tamen ea paucis imperantibus traditur.

SOCRATES apud XENOPHONTEM in *Memorabilibus* eleganter quaerit, an quisquam ausurus sit equorum regimen profiteri, qui artem equitandi numquam didicerit?

2. Si imperans nulla rei publicae cura tangatur; tunc enim princeps nihil agendo male agere discit, adeoque saeuit in ciues, voluptatibus indulget, exhaurit aerarium, amittit ciuium amorem; docet hoc exemplum Neronis.

3. Si ministrorum malorum imperio se ipsum permittat; hi suae vtilitati consulunt; opes rei publicae in suam deriuant arcem; quae omnia deinde ipsi principi imputantur: pertinent eo ministri familiares, (*les favoris*), qui Carolum I. Regem Angliae perdidērunt.

4. Crudelitas principis; ita enim animaduertunt ciues, se finem rei publicae, securitatem internam non assequi, ac proinde fre-na mordent.

5. Temeritas, (Sebastiani, regis Lusitaniae vltimi); voluptas, luxuria, (Neronis); iniustitia (Tiberii et Domitiani), quae eo peruenerat, ut maximum crimen esset eorum, qui crimine vacabant, modo diuites essent.

§. 7.

Aristocratiae quam maxime exitium minantur vitia sequentia:

1. Ambitus; quum enim prudentiores regnare oporteat; per ambitum via patet in senatum imprudentissimis. Tempore Caesaris iam incandita turba viam sibi in senatum muniuit, ut ioculum proponeretur edi-

edictum; ne quis nouis senatoribus viam in curiam ostendere velit; Exemplum Claudii Imperatoris apud SVETON. Hinc Romae tot leges de crimine ambitus, quum in rebus publicis monarchicis hoc vix crimen habeatur.

2. Factiones; sic enim non est vna voluntas, hae necessario euertunt rem publicam; e. g. factio Pompeii et Caesaris, Mediceorum et Soderinorum Florentiae; altera enim alteram opprimit; vna oppressa pars victrix vel monarchiam, vel oligarchiam constituet.

3. Immodestia optimatum; in aristocratia leniter tractandus populus, vt hic aequo animo ferat optimatum imperium. Si in hanc partem peccetur, necessario oriuntur seditiones, quae non possunt non vel euertere, vel mutare statum rei publicae. Hinc Romani aere alieno et foenebri malo pressi a patribus secessionem faciebant in montem sacrum, nec prius redibant, quam impetrassent tribunos plebis; Ita actum erat de aristocratia.

§. 8.

Democratiam euertunt vitia: 1. Plebs imprudens, temeraria et potens tamen; Quum Athenis rei nauticae dabatur opera, plebs nautica abundabat; haec suffragia ferebat turbulenta, temeraria, quod exitum accelerabat vrbi pulcherrimae.

2. Odium eminentiorum virtutum, ita enim oculi effodjuntur rei publicae: exilium Themistoclis, Aristidis, Alcibiadis, plus Athenis nocuit, quam Persarum exercitus.

3. Legum frequens mutatio; legum debet esse nexus, vt vna alteram adiuuet, ergo semel et simul scribendae, a sapiente viro, qualis Athenis erat Solon: si ergo pro libidine mutantur, vacillat systema vniuersum; Athenae numquam infeliciores, quam cum literis implerentur porticus; et prudenter Pythagoras monuerat, coronam non vellicandam; prudenter Charondas legislator statuerat, vt qui abrogationem legis suafurus esset, laqueo indutus in concionem prodiret.

4. Demagogorum potentia; his enim facile obsequitur plebs aurem popularem captantibus et eloquentia fretis. Tales plerique oratores, Demosthenes in primis. Ancilla Themistoclis gloriabatur, sibi totam ciuitatem obnoxiam esse: aliquando concionatores his partibus funguntur, e. g. Hamburgi Krumholz, et socii.

§. 9.

Generalia omnibusque formis communia vitia sunt; 1. Imperantes ad rem publicam administrandam inepti; imperantes sunt, ob quos floret et perit res publica; quod nullo luculentiore exemplo probatur, quam Thebarum; quum antea numquam lacertos mouisset haec ciuitas, excelsae satis florere coepit sub Epaminonda; eo sublato, numquam iterum alicuius nominis et famae esse coepit.

2. Ciuium vitia, in primis luxus; otium, voluptas. Elegans ratio, cur Scipio Nasica Carthaginiis euersionem prudenter dissuaserit; vbi conf. VELLEI. PATERC. II. 1.

§. 10. II.

Vitia status totidem sunt, quot formae rei publicae. Vitium monarchiae est *Tyrannis*, quae duplex, 1. titulo talis; si quis praeter ius et fas imperium usurpat in ciuitate libera, e. g. Caesar, Cromwellus; 2. administratione; si iusto titulo regnet, sed crudeliter, e. g. Nero, Domitianus, Commodus.

Vitium Aristocratiae est *Oligarchia*, si exclusis reliquis optimatibus pauci rerum potiuntur; qualis triumuiratus Caesaris, Pompeii, Crassi, et postea Augusti, Antonii, et Lepidi; inde non potest non vel monarchia, vel tyrannis existere.

Vitium Democratiae vocatur *Ochlocratia*; si loco totius populi factio quaedam, reliquis exclusis, imperat, e. g. turba nautica; inde seditio, ac proinde vel mutatio, vel interitus rei publicae.

Vitium status commune est *Anarchia*, si res publica nullo amplius communi vinculo connectitur; qualis status fuit in Anglia, antequam Cromwellus regnaret; nec melior fuit Germanorum status tempore interregni.

PVFENDORFFIVS equidem solidam hanc doctrinam non magni facit, quia ciues ea facile abuti possent, sed abusus non tollit usum. Ceterum vitia haec esse nemo negauerit: *Tyrannis* titulo et *ochlocratia* conuellit fundamenta rei publicae; tyrannis administratione fini rei publicae repugnat.

In *oligarchia* non est vna voluntas, quia inter triumuiros, e. g. non valent plurima suffragia, sed aut diuisio territorii instituitur, aut omnium requiritur conspiratio; priore casu ex vna re publica fiunt tres; posteriore non possunt non bella ciuilia nasci, adeoque subuerti res publica.

Heineceii Prael. Pufendorff.

Ii

Atta-

Attamen et quaedam sunt vitia status generalia, et omnibus rerum publicarum formis communia, quorum vnum iam vidimus, nempe *anarchiam*; talia vero etiam sunt, 1. vbi forma non adtemperata genio populi; e. g. pura democratia non erat conueniens genio populi Anglicani, vnde et consistere non potuisset, nisi Cromwellus eam mutasset in tyrannidem; 2. vbi leges fundamentales disponunt ciues ad turbas internas; e. g. lex fundamentalis, vt omnes promiscue eligant imperantem; vt nihil concludi possit per maiora; 3. vbi eadem odia omnium vicinorum prouocant, e. g. piratica Algiriensium, Tunetanorum, Tripolitanorum; 4. vbi non possant non homines ad voluptates et otia disponi; sic Athenis perpetua erant fessa, ludi, epulae, de quo ipse conqueritur XENOPH *de Atheniensium re public.* §. consiliorum tarditas ob nimias sollempnitates in conuocandis comitiis, ob libertatem contradicendi et protestandi vni vel alteri permissam; quod in Polonia videmus permissum.

§. 12.

Iam ad alteram partem capitis, de *rebus publicis irregularibus*, vbi communia sunt iura maiestatis imperanti et ordinibus, ita vt nec priuatiue sint penes vnum, nec penes plures, nec penes omnes.

Iam quidem auctor negat earum species posse enumerari, quia aberrationum a rectitudine infiniti sint modi. Sed nullum est dubium, quin saltem ad certa summa capita possint reuocari.

Nos dicimus, res publicas irregulares fieri aut per leges rei publicae fundamentales, aut per vnionem rerum publicarum plurium; posteriores vocantur *systemata ciuitatum*, de quibus §. 13. seqq. In prioribus aut miscentur omnes formae simplices, aut binae tantum.

Si omnes, ab eminentiore parte sit enumeratio, e. g. in Britannia iura maiestatis exercent Rex, procures, populus, adeoque mixtura est monarchiae, aristocratiae, et democratiae, attamen a parte eminentiore vocatur regnum Britanniae; tale etiam fuit regnum Romanorum.

Sin binae formae, aut miscentur 1. Monarchia et Aristocratia, vt Rex sine senatu, et hic sine Rege nihil possit; tale olim regnum Hebraeorum, vbi Regem sine synedrio nihil potuisse aiunt; aliquando princeps tantum ordinis et decoris causa constituitur, qui vero nihil potest constituere, sed omnia senatui permittere tenetur.

netur, tunc manet aristocratia pura, e. g. Venetiis et Genuae; 2. Monarchia et Democratia; Talia olim erant omnia regna heroica; hodie eius modi res publica est Cosacorum, ubi est princeps Hetmann dictus, sed qui nihil potest nisi conuocato populo, qui tunc suffragia fert per proiectionem pileorum; 3. Aristocratia et Democratia; qualis Laconum tempore pacis; nam ibi Senatus Ephorum, sed qui in rebus maioris momenti ad comitia omnia referre tenebatur. Habebant quidem etiam Reges, sed qui tempore pacis tantum senatores erant primarii, uti dux Venetorum.

§. 13.

Per vnionem plurium rerum publicarum emergunt res publicae irregulares, quae vocantur *systemata ciuitatum*, per quae intelligimus rem publicam magnam ex vnione plurium minorum constatam; e. g. Heluetiorum res publica coaluit ex XIII. ciuitatibus, quarum singulae singularem constituunt rem publicam. Bataurorum res publica constat VII. prouinciis vnitis, quarum vnaquaeque sua libertate fruitur; sunt ergo rerum publicarum *systemata*. Auctor ea diuidit in duas classes: alia, inquit, vniuntur per communem Regem, e. g. Hungaria, Bohemia, Germania, Sicilia, item Dania et Norwegia; alia per foedus, uti ciuitates Helueticae et Belgicae.

§. 14.

De priore genere ait, fieri eius modi *systemata* 1. *per conuentionem*, e. g. si plura regna vnum regem eligant, uti olim Dania et Suecia, Polonia et Hungaria; 2. *per matrimonium aut hereditatem*; ita coaluerunt Hungaria, Bohemia, Sicilia; Scotia et Anglia; 3. *per victoriam*, ita coaluerunt Anglia et Hibernia; Russia, Casanum et Astracania.

Sed minus adcurata est haec auctoris philosophia; non enim quadrant hae species definitioni; nam his casibus omnibus aut manent plura regna, ita ut alterum cum altero nihil commune habeat, e. g. Hungaria, Bohemia, Sicilia, tunc non est vna res publica, ergo nec *systema*; aut vnum regnum alteri ita subiectum est, ut per omnia leges ab eo accipiat, e. g. Norwegia Daniae, tunc itidem non est *systema*, sed regnum subiectum; aut denique plura regna commune habent consilium, commune regimen, tunc est *systema*, e. g. Anglia et Scotia a temporibus Annae reginae.

Alterum systematis genus per commune foedus coalescit, et Achaicae quoque rei publicae nomine venit, quia Graecae ciuitates olim tale systema constituerunt.

Hic 1. singulae res publicae speciales omnia iura immanentia exercent, e. g. ius leges ferendi, iudicandi, poenarum, tributorum, cet. 2. iura maiestatis transeuntia exercent communiter, e. g. belli, pacis, foederum, legatorum.

Hinc opus est 1. Senatu delegatorum vel perpetuo vel statis temporibus conueniente; talis in Heluetia *die Tage-Satzungen der Herren Gesandten*; in Belgio foederato *die General-Staaten*; 2. valere debent plura suffragia, quae tamen non semper aequaliter sunt distributa inter foederatos; e. g. in Belgio prouinciae, quae plus conferunt, etiam plura habent suffragia, e. g. Hollandia, Frisia, Zeelandia; 3. commune debent habere aerarium, communem apparatus, e. g. commeatus, tormentorum, classium; quamuis, ubi maior bellorum externorum metus, id non obseruetur, veluti in Heluetia.

Quaestio est, *an foederati excedere ex hoc systemate possint*? Resp. aut foedus in perpetuum coaluit, et tunc quaestio negatur; aut ad tempus vel cum facultate discedendi, tunc quaestio affirmatur. Obiiciunt, societatem esse matrem discordiarum; ac proinde semper liberum esse ex illa excedere? Resp. hoc ex iure civili esse; ius naturae dicit, pacta esse seruanda, adeoque et in perpetuum inita. Deinde quaeritur, *si inter ipsos foederatos lis oriaur, quis tunc iudex sit*? Resp. totum systema; quod in Belgio expressum est in foedere. Idem olim in Graecia obseruatum, ubi ideo constitutus erat Amphictionum Senatus; vid. BOECLERI *Diff. de Concilio Amphictionico*. At ubi facile in factiones abit systema, e. g. in Heluetia ob diuersitatem religionum, ibi plerumque armis deciduntur hae controuersiae: cuius rei exemplum nostra aetas vidit in bello Tigurinorum et Bernatensium cum ciuitatibus Catholicis ob turbas Toggenburgenses.

CAPVT VIII.

DE ADFECTIONIBVS IMPERII CIVILIS.

§. 1.

PER *adfectiones* intelligimus attributa summo imperio competentia; vti enim nulla est persona, quae non insignia quaedam iura habeat, ita idem verum est de persona morali, qualis est imperium vel res publica.

Adfectiones illae vel sunt *communes*, §. 1-4. vel *propriae* quibusdam, §. 5. *ad finem*.

Communes sunt 1. *summitas*, §. 1. 2. *immunitas a legibus civilibus*, §. 3. 3. *sanctimonia*, §. 4.

Summitas, quae et *supremitas* (*la Souveraineté*) est ista *adfectio* imperii, quae neminem agnoscit superiorem. *Adfectionem* illam necessario adesse oportet, quia opposita sunt imperium et subiectio, adeoque se mutuo tollunt; vbi imperium est, cessare oportet subiectionem, vbi subiectio est, cessare imperium.

Sunt equidem res publicae clientelares, quae alium populum tamquam patronum comiter venerari coguntur, quales res publicae Tartarorum, Ragusinae, Cosacorum, et reges Indici sub Belgis in insulis Ceylon et reliquis; sunt res publicae tributariae, quae potentiori populo ad annuum vestigal tenentur, e. g. Moldaui, Walachi, et Arabes; sunt res publicae feudales, quae extraneo principi vel populo certo nexu feudali obstringuntur, veluti regnum Neapolitanum.

Sed vti duo priora proprie non sunt imperia, si superiorem agnoscunt, ita nexus feudalus non semper inuoluit subiectionem. Feudi enim essentiale est fides, adeoque dominus et vassallus considerantur tamquam foederati inaequales, non tamquam superior et subditus. Hinc saepe contingit, vt superiores et potentiores feuda ab inferioribus recognoscant; e. g. Rex Daniae terrae quendam tractum recognoscit tamquam feudum Brunswicense; Rex Borussiae quaedam ab Abbatissis Quedlimburgensi et Gandersheimensi; ergo summitas cum nexu feudali probe consistere potest; nam quidquid imperium non impedit in exercitio iurium maiestatis, id non

impedit summitatem imperii, nexus feudalís imperium non semper impedit in exercitio iurium maiestatis, ergo non impedit semper maiestatem imperii.

Quaeritur, *qui regna facta sint feudalía?* potest id quidem factum esse per victorias et pacta, sed plerumque ex donatione, unde feudi inprimis oblata ecclesiis et episcopis. Vid. HERT. et THOMAS. *de feudis oblatis.*

§. 2.

Inde sequitur altera adfectio, ut imperium sit *ἀντισθουν*, id est, ut nemini ad reddendas gestorum suorum rationes teneatur. Hoc fuit ex adfectione prima; rationes reddendae sunt superiori, imperium non agnoscit superiorem, ergo imperium non tenetur reddere rationes.

Et tamen videmus 1. rationes exigere alias res publicas, si una quid egit contra ius et aequum; videmus etiam 2. res publicas ipsas rationes reddere actorum suorum per manifesta publice edita. Vid. BOECLERVS *de clarigatione et manifestis.*

Sed 1. distingue inter actus immanentes et transeuntes; 2. inter actus indifferentes et pactis definitos; 3. inter rationes, quas sponte reddunt, ad improbitatis suspicionem amoliendam, et ad quas reddendas obstricti sunt et cogi possunt.

Rationes nemo exigere potest actuum indifferentium, et immanentium: at possunt ii, quorum interest, exigere rationes actuum transeuntium et pactis definitorum; e. g. si quis foedera pacemque violet, rationes exigere solent sponsores pacis; quin et horum reliquorumque actuum rationes sponte reddere solent imperantes, ne exilimationis adeant periculum.

§. 3.

Praeterea legibus superius est imperium civile, puta legibus civilibus humanis; nam 1. leges supponunt superioritatem et subiectionem; imperium vero nec superiorem habet, nec alteri subiectum est; 2. ipsum imperium fert leges, itaque non se his legibus obstringit, sed ciues; quin 3. posito, legibus obligari imperantes, iidem etiam dispensare poterunt circa leges, adeoque impune easdem violare.

Hinc quaeritur, quid sentiendum de quaestione, *an Princeps sit solutus legibus?* Resp. negando: quia solui praesupponit obligationem;

aem; Princeps vero, quum obligatus non sit legibus, nec iisdem solui potest. Romani ita loquebantur, quia Imperatores initio sinegebant, se non affectare monarchiam, sed tantum primarios ciues et principes senatus esse. Itaque impetrabant a Senatu, vt legibus soluerentur; huius modi vero simulacris libertatis non indigent veri principes; itaque non de iis dicendum, quod legibus soluti sint, sed quod immunes sint a legibus.

Alia quaestio est, an prudenter agant principes, si legum a se latarum obsequium exuant? quod merito negandum; nam 1. legibus eo ipso magna conciliatur auctoritas, si ipse princeps illis vivat; 2. subditis hoc exemplo et incitamento est; 3. saepe violatio legum ciuiliu posset dubium relinquere, an actus sit validus; e. g. si Princeps sine sollemnitatibus omnibus duxerit uxorem, an verum sit matrimonium, an non potius concubinatus, an liberi legitimi?

§. 4.

Sed et *sanctimonia* attribuitur imperio; per eam vero non intelligimus sanctitatem, de qua theologi; qualem e. g. tribuimus Deo, angelis, sacris actionibus, sed sanctum est inuiolabile, adeoque imperia et imperantes eodem sensu sunt sacrosancti, quo olim tribuni plebis, hodiernum legati, id est, sanctione poenali muniti.

Sanctimonia illa est ex pacto primaeuo inter ciues et imperantes; voluntates enim suas subiecerunt voluntati imperantis, ergo ad obsequium sese obligarunt. Huic vero obsequio quam maxime repugnat, si quis imperanti resistere, facta sua laedere, quin plane supplicio capitis eum adficere auderet, id quod ausi aliquando sunt Angli.

Hinc sequitur, 1. vt omne bellum ciuile sit iniustum et rectae rationi aduersum; 2. vt idem dicendum sit de tumultibus et seditionibus; 3. vt imperantes etiam peccantes patienter ferendi sint, nisi plane induerint hostilem animum, adeoque in tyrannos degenerarint; tunc enim ipsi imperantes pacta rumpunt, adeoque nec subditos amplius habent obligatos.

Media haec sententia est inter Monarchomachorum et Machiauellistarum doctrinam: 1. Hi principem etiam tyrannum non peccare, subditisque et sic gloriam in obsequio esse relictam statuunt; 2. Illi populum principe putant superiorem, et maiestate reali, (quum principis maiestas tantum personalis sit), gaudere existimant.

mant. Hinc colligunt, Principem posse a subditis supplicio adfici, et ea maxime ratione vtuntur: Qui cui imperium detulit, is est superior; populus principi imperium detulit, populus ergo principe est superior. Sed egregium sophisma; eodem modo colligere possum: Qui domino potestatem dominicam detulit, is est dominus et superior: seruus, qui se sponte addixit, hero detulit potestatem dominicam in se, ergo est heri dominus, eoque superior. Distingue populum in statu naturali et ciuili: in illo non quidem superior quisquam est, sed omnes aequales; posteaquam vero in ciuitates secesserunt homines, omnes voluntates suas submiserunt voluntati imperantis, adeoque facti sunt inferiores. Hinc inuertimus potius argumentum: Qui alteri detulit imperium, is voluntatem illius voluntati submisit, adeoque factus est subditus: atqui populus, cet. ergo, cet. Regnat haec monarchomachorum doctrina in FRANCISCI HOTOMANI *Franco-Gallia*, ALTHVSII *Politica*; STEPH. Ivnii BRVTI *Vindictis aduersus tyrannos*, MILTONI *Vindictis populi Anglicani*, SCHEL. *de iure imperii*.

§. 5.

Haecenus de affectioibus communibus: sequuntur iam quibusdam rebus publicis propriae; quae quibusdam tantum propriae sunt, eae inculcari aliter non possunt, quam per diuisiones vel distinctiones. Tales sunt, quod imperia 1. quaedam *absoluta*, quaedam *limitata*, §. 5, 6. 2. quaedam *patrimonialia*, quaedam *usufructuaria*, §. 7.

1. *Absoluta* vocamus; vbi exercitium iurium maiestatis a nemine alio, quam imperantibus dependet; id est, vbi iura maiestatis nec omnia, nec quaedam cum populo vel ordinibus communicata, e. g. in Gallia, Venetiis, in Russia. Itaque non confundenda 1. cum licentia; si princeps, quidquid libet, licere sibi putat; de his recte SENECA: *ex magno imperio non nisi sibi magnam licentiam retinent*; nec 2. cum imperio herili vel despotico, quando imperans ciuibus tanquam mancipiis vitur, per eos omnia acquirit, et in vitam, famam, bona eorum imperium sine restrictione exercet.

Differentia satis manifesta est; absolutum enim imperium rectum, sanum, et legitimum esse potest; reliqua fini rerum publicarum repugnant, ac proinde vitiosa ac morbida sunt.

§. 6.

§. 6.

Iam facile patet, quid nobis sit 2. imperium *limitatum*? vbi nempe ita communicata sunt iura maiestatis, vt eorum exercitium non absolute et priuatiue ab imperante dependeat, sed ille teneatur populum vel ordines in consilium adhibere.

Dico: iurium maiestatis exercitium esse limitatum; nam possunt alia esse limitata, vt tamen maneat imperium absolutum; e. g. in Gallia Rex omnia iura maiestatis liberrime exercet, et tamen limitata est successio, vt regnum capessere nequeat femina; limitata est alienatio partium regni, vt Rex semper minorennis habeatur, et nihil alienare de regno possit, et tamen imperium absolutissimum est.

Limitatio illa sit per pacta inter imperantes et ciues inita, quae improprie vocantur leges fundamentales; sic e. g. leges fundamentales in imperio Rom. Germanico sunt *Aurea Bulla*, *capitulatio*, *pax Westphalica*, et ea tamen mera pacta sunt. Vnde absurda est sententia HOBBSII, negantis existentiam regnorum limitatorum, eaque iniusta habentis: quasi vero iniusta sint quae pactis definita.

§. 7.

Supereft altera diuisio imperii in *patrimoniale* et *usufructuarium*. Auctor huius diuisionis est GROTIUS, quem deinde alii sequuti sunt.

Patrimoniale est, quod ita in imperantium est potestate, vt illud alienare, diuidere, testamento relinquere pro lubitu possint. Sic ex testamento Romani adquisiuerunt regnum Asiae; Notum quoque est, Russiae monarcham ita pro lubitu disposuisse de imperio Russo, vt ne primogenito quidem praerogatiuam reliquerit.

Usufructuarium est, quod princeps alienare nequit, quamuis alioquin liberissime imperet; e. g. Gallia, vbi Rex ne partem quidem regni, nedum totum alienare potest. Ita et in Anglia de successione non disponit vltimus possessor, sed populus in comitiis.

Res quidem vera est, vsus quoque huius distinctionis egregius; quemadmodum vidimus in controuersia de successione Hispanica, rem omnem rediisse ad hanc distinctionem, disceptatumque esse inter Austriacos et Bourbonios, sitne Hispania regnum patrimoniale, an usufructuarium.

At iam pridem observatum est, periculo non carere hanc diuisionem ob sola verba, quibus GROTIUS vsus est; si enim in re-

Hrincecii Prael. Pufendorf.

Kk

gnis

gnis usufructuariis imperans usufructum tantum habet; non male sane colligunt Monarchomachi, proprietatem esse penes populum, adeoque populo plus iuris in imperio, quam imperanti esse. Quin si longius progredi velis, ulterius argumentari posses; In imperio usufructuario successionem non posse esse hereditariam, quia usus fructus ad heredes non transeat.

Iam respondent quidem, simile ultra suum tertium non esse extendendam, nec per omnia eius modi regem equiparandum esse usufructuario, sed in hoc tantum, quod alienare regnum non possit: sed eo ipso fatentur, incommoda esse vocabula. Quid vero opus est vocabulis incommodioribus et abusui obnoxiiis, quum dentur commodiora? Dicas potius, *regna* esse vel *alienabilia*, vel *inalienabilia*, nemque illa semper esse *successiva*, haec vel *electitia*, vel *successiva* esse posse.

Iam si quaeras, *quatenam regna sint patrimonialia, quatenam usufructuaria, vel rectius alienabilia vel inalienabilia*? Resp. Patrimonialia sunt 1. omnia bello acquisita, nisi subsequuta pace aliud placuerit, e. g. regnum Turcicum, Siculum, Neapolitanum; 2. omnia, quae ea lege a populo data sunt, ut imperantes de iis libere disponant; sic Russi, exstincti vetere imperantium familia hodiernae Imperatricis proavum elegere Imperatorem; et ea quidem lege, ut imperium eo iure haberet ac antecessores. Quum ergo antecessores illud haberent tamquam alienabile, ipsi quoque successores ex nova familia ius alienandi sibi vindicarunt.

Vsufuctuaria sunt omnia reliqua; et de electitiis indistincte dici potest, ea esse usufructuaria.

CAPVT X.

DE MODIS ADQVIRENDI IMPERIVM,
IN PRIMIS MONARCHICVM.

§. I.

OMne imperium adquiri pacto inter imperantes et ciues inito ; iam supra vidimus : omne pactum requirit *consensum* ; ergo omne imperium requirit consensum ; sic imperat Rex Suecis , quia Sueci consenserunt in eius imperium ; Sultanus Graecis , quia Graeci consenserunt in eius imperium. Mallent quidem non subesse , sed quum videant , id fieri non posse , consentiunt , quod inde patet , quia non rebellant.

Ex eo patet , *consensum* illum esse vel *vltroneum* , vel *vi extortum* , vel *mixtum* , quod postremum recte adiecit *LITIVS*.

Vltroneus , quando sine coactione et vi populus alicui desert imperium , e. g. Georgio Regi Britanniae , Friderico Regi Sueciae.

Vi extortus , quando accedit vis et coactio , siue iusta , vti occupavit Imperator Neapolim et Siciliam , quod ex titulo iudicandum ; siue iniusta , vti occupavit Turca imperium Constantinopolitanum , qui nullum habuit iustum titulum.

Mixtus , quando prius imperium vi mutatur , posterius *vltroneo* consensu constituitur ; e. g. Iacobi II. Regis Angliae imperium vi euersum , Guilielmi Arausionensis vltro admissum. Ea vero distinctio non modo locum habet in Monarchia , sed et in aristocratia , vel democratia. Sic aristocratia acquiritur *vltroneo consensu* , si optimates eligantur , iisque deferatur imperium ; *violento* , si optimates veteres expellant re publica , et sibi vi vindicent imperium ; *mixto* , si populus optimates expellat , nouosque electione constituat.

Democratia acquiritur *consensu vltroneo* , si monarcha vltimus pereat , vel resignet imperium , e. g. Codrus rex Atheniensium ; *violento* , si populus expulsis optimatibus , vel Monarcha imperium sibi vindicet , e. g. Syracusae ; *mixto* , si primum vi expellatur Monarcha vel optimates , et deinde transactione populo resignetur imperium.

Mixti auctor nullam habet rationem, adeoque agit *de modis acquirendi regnum per consensum vi extortum*, §. 2. *per consensum ultironeum*, §. 3. *ad fin.*

§. 2.

Modus violentus vocatur *occupatio*, quae ab ea, quam supra *libr. I. cap. 12. §. 6.* expendimus, plane diuersa est; nam illa est rerum nullius, haec imperii, quod iam imperantem habet; illa fit sine vi, haec cum violentia.

Est itaque *occupatio* imperii per vim siue iustam siue iniustam acquisitio: adeoque est vel *iusta*, quando occupationem bellicam praecedit iustus titulus, e. g. occupatio Siciliae et Neapolis; vel *iniusta*, quando quis nullo praecio iusto titulo imperia opprimit et subiugat, quo nomine Scytharum legatus apud CURIUM Alexandrum M. latronem totius orbis adpellat.

Quaeritur de posteriore, (de priore enim nulla dubitatio est), *an quis imperium statim adquirat, simulac illud eius armis cessit?* Negamus: nam 1. sola vis, quamvis ei fortuna faueat, non tribuit iustum titulum; 2. infausus belli exitus nemini ius exstinguere potest; 3. quum semper victo idem ius sit expellendi victorem, quod hic sibi arrogauit; non potest dici, victorem firmo et indubitato iure habere imperium. Potius argumentamur: In quacumque re alteri ius est, illud victor pleno iure non adquisiuit: in imperio occupato alteri ius est; ergo illud victor pleno iure non adquisiuit.

Itaque in Monarchia et Aristocratia victori, qui imperium iniusto titulo occupauit, ius nasci potest: 1. imperantibus, quibus ius erat, exstinctis, e. g. Turca iniuste oppressit Constantinopolitanum imperium; ei demum ius natum, quum Constantinus Palaeologus et reliqui ex imperatrice familia bello vel fato perierant; ubi enim nemini ius vindicandi est, ibi possessor rem acquirit; 2. pace facta et victis iuri suo renuntiantibus: ita e. g. iam iusto titulo Russi possident Liuioniam, Ingriam, et Finnoniae partem, quia Sueci renuntiarunt iuri suo.

In Democratia contra vnus modus est; consensus populi, vel expressus, quando populus pacem facit, vel tacitus, quando in victoris imperio adquiescit; ita priore modo Lacedaemonii imperium in Athenienses, posteriore Philippus et Alexander M. in plebasque minores Graeciae res publicas adquisuerunt.

§. 3.

Modus vltroneo consensu populi adquirendi imperium vocatur *electio*, per quam intelligimus constitutionem voluntariam imperantis ab ipso imperio factam. Hic nulla vis est, quia et penes populum est liberissimum arbitrium, quem velit eligere, et penes electum, velitne sibi delatum imperium suscipere.

Ea electio est duplex: eligitur enim 1. vel persona regnatric, tunc regnum est electuum, et toties nova electione opus est, quoties imperans deficit, §. 3. 4. 2. vel familia regnatric, tunc regnum est successuum, et non instituitur nova electio, quamdiu quis superest ex illa familia, §. 5. *seqq.*

Electio primi generis requirit, 1. vt eligentes sint habiles, vsue ius sit eligendi; tales in Polonia sunt totus populus, quamuis nobiles tantum eo nomine veniant; in Germania Electores; hinc si in Polonia factio, in Germania reliqui principes imperantem eligerent, illegitima foret haec electio; 2. vt plura suffragia tulerit candidatus; si enim duo electi sint vel paribus suffragiis, vel a duabus factionibus, nihil esset actum, idque vocatur schisma vel diuisio regni. Tunc armis plerumque res geritur, quum neuter sit iustus imperans; talis status in Germania fuit simul electo Philippo Sueuo et Ottone III. 3. vt verum sit interregnum; hinc iniusta electio viuo adhuc principe eum in finem facta, vt ei ius quaesitum auferatur: iniuste; talis electio Rudolphi Sueui et Hermanni Lutzelburg. viuo Henrico III; Friderici II. viuo Ottone III; Caroli III. viuo Ludouico Bauaro; 4. vt electus denunciatam sibi electionem acceptet; haec si concurrant, ex electione ius nascitur, quod autem deinde non potest, nisi imperans contra conuentiones dolo malo egerit.

§. 4.

Electionem praecedit *interregnum*, quod est status, quo imperium sine ordinario imperante est; dico: *ordinario*, quod enim vulgo dicant: *sine legitimo imperante*, id absolum, 1. quia sic anarchia esset, adeoque nulla res publica, 2. quia tempore interregni vere est imperans, sed extraordinarius, e. g. in Germania Vicarii imperii, in Polonia Primas regni, Romae Interreges.

Ergo frustra auctor quaerit, qualis sit tempore interregni status rei publicae? frustra putat, rem publicam ad imperfectum statum

relabi; frustra denique primum tantum pactum inter ciues superesse contendit; sed status est aequè perfectus, ac tempore regni. In eo tantum est differentia, quod qui rei publicae praesunt, sunt magistratus vel imperantes extraordinarii.

Ceterum *interregnum* est vel *speciale* seu *ordinarium*, quod in regnis electiuis contingit, quoties legitimus imperans deficit, quale est in Germania, Polonia; vel *generale* seu *extraordinarium*, quod contingit in regnis successiuis, quoties familia regnatricis exstinguitur, et de futura successione nihil constitutum est euentualiter. Tale quid contigit in Gallia exstincta familia Carolingica; in Russia exstincta familia Io. Basilowicz.

Sed posterioris generis interregna rarò contingunt, 1. quia plerumque in antecessum de rege futuro deliberatur, et certi quid constituitur, quod in Anglia factum; 2. quia plerumque super sunt cognati proximi, qui sibi imperium iure successionis vindicant, armisque rem decidere laborant. Exemplum vidit Lusitania, mortuo Sebastianiano Rege; 3. quia hic status est miserrimus ob incertitudinem, qui interrex futurus sit; quis eligendus, ut praetermittamus factiones, procerum fraudes, candidatorum ambitum, cet.

§. 5.

Haftenus de vltroneo consensu, qui se exserit in electione: sequitur de consensu in successionem.

Regnum aliquod esse successiuum, non adeo conuenit principii rationis; 1. regnum enim ac magistratus sunt officia personalia, adeoque non transeunt in heredes; 2. eligitur personae industria, fortitudo, prudentia, quae non erunt semper in heredibus.

Quandoque tamen animaduertunt homines, quam periculosa sit electio, quantisque cum turbis coniuncta, maluerunt pro persona eligere totam familiam regnatricem, ac inde nata sunt regna successiua.

Hinc factum, ut Reges veteres nomen primi regis adquirentis pro nomine regis usurparent, et hinc Reges apud Aegyptios dicebantur Pharaones, apud Parthos Arsacidae, apud Edessenos Abgari, cet.

Est ergo *regnum successiuum*, ubi non persona, sed tota familia ad imperium euehitur, ita ut, quamdiu illa superest, nouae electioni non sit locus. *Aristocratia successiua*, in qua certae familiae ad imperium euehantur; et extra illas nemo ad consilium publicum admit-

tatur,

titur, vti Venetiis. *Democratiâ successiva*, in qua soli ciues originarii comitiis interesse possunt, adscitum plane excluduntur. Illa successio vero dependet vel 1. *ab arbitrio ipsius imperantis*, §. 5. 6. 7. vel 2. *ab arbitrio populi*, §. 8. *seqq.*

§. 6.

Ab arbitrio solius imperantis pendet in regnis patrimonialibus: quum enim hæc regna Rex possit pro lubitu alienare, (*cap. 9. §. ult.*) poterit etiam de iis inter vivos et mortis causa disponere.

Hinc 1. potest condere testamentum, et heredem regem scribere, quemcumque placet; id quodd factum novimus nuper a Petro, Russiæ Imperatore; quumque ita, qui testatur, sit senex imperans, is vero legibus civilibus non teneatur, (*cap. 9. §. 3.*): sequitur, quod eius modi testamentum nullis indigeat sollemnitatibus, sed sufficiat, si de voluntate constet testatoris.

Plerumque tamen aut testes quidam adhibentur, aut ordinum subscriptio vel iusiurandum, ne deinde ministri in suspiciem veniant, eorum artibus huius modi testamenta elicta esse.

2. Potest regnum dividere inter plures heredes. quod et n. fecisse novimus Maximissimam, Romanorum Regem; (vid. SALVST. *de bello Iugurth.*) Ludovicum Pium Imperatorem, Ludovicum Germanicum Regem, Arnolphum Imperatorem.

3. Potest et filiam in partem vocare, cuius tamen exempla sunt rarissima, si filii superfuerunt; Ita in Aegypto Cleopatra cum patre Ptolemaeo regnare iussa est.

4. Potest et successorem adoptare, veluti factum ab Augusto, Claudio, Nerua, Traiano, Hadriano, Antonino Pio.

5. Potest et naturali filio regnum delatere, quod Maximissa fecit, Iugurtham in partem vocans.

6. Potest et extraneum regem nominare, veluti Petrus I. Imperator viduam.

Immo vni ex pluribus filiis regnum assignare, etiam non primogenito, sicuti David Rex regem e filiis designavit Salomonem, quum ille non esset primogenitus.

§. 7.

Quid vero si eius modi Rex nihil disposuit? Tunc procul dubio servantur regulæ maxime naturales successions ab intestato, ita

ita tamen ut quaedam praesumantur, quae in priuatis non veniunt in censum.

Quum enim tota successio ab intestato nitatur praesumpta voluntate defuncti, uti supra demonstratum *libr. I. cap. 12. §. 10.* etiam hic respiciendum ad praesumptam Regis voluntatem; velle autem praesumitur Rex, ut ea forma seruetur, quam ipse in se probauit.

Hinc 1. non in aristocratiam vel democratiam mutandum regnum; monarchicam enim formam ille in se probauit.

2. Itaque conseruandam potius formam monarchicam; adeoque

3. Regnum maneat indiuisum. Diuisio enim a) ex regno facit regna, b) vires dissipat, c) occasionem dat bellis ciuilibus, quod satis experta est familia Ludouici Pii.

4. Itaque inter plures, masculos praefereandos feminis; fini enim rei publicae obtinendo (obtineri enim sine bellis non potest), magis masculus, quam femina sufficit naturaliter.

5. Inter ipsos masculos et feminas obtinere ius primogeniturae; hinc est, quod optimi scriptores ius primogeniturae iuris gentium esse dicunt.

§. 8.

In regnis usufructuariis vel inalienabilibus successio pendet a voluntate populi; hic vero vel imperanti dat arbitrium, successorum sibi surrogandi, id quod Suecos fecisse nouimus, cum Christinae reginae optionem darent successorem nominandi; Simile quid factum in Elizabetha regina Angliae; vel ipse sibi id ius reseruat; is, quem regem dicit, rex erit, ut in Francia populus regem dixit Hugonem Capetum; eiusdem populi tunc est, ordinem succedendi praescribere; et tunc vel ordinarias leges successionis ab intestato seruat §. 9. vel peculiarem instituit §. 10. *seqq.*

§. 9.

Quis sit ordinarius modus succedendi, supra ostendimus *libr. I. cap. 12. §. 10.* amorem nimirum regulariter descendere, si descendere non possit, ascendere; (uti iam exemplum habemus in Hispania, ubi Philippus V. Ludouico filio successit), si nec ascendere possit, in latus diuergere.

At quum tamen singularem finem habeant imperia, successio haec temperanda quodam modo fuit, ita ut 1. regnum maneat indiuiduum; alias enim finis, defensio, non obtineretur, viribus per diuisio-

diuisionem diminutis; Diuisio etiam discordiarum mater. IVSTIN. XXI. 1. Exempla tamen sunt communionis inter fratres, veluti in Russia.

2. Vt succedant tantum posteri primi adquirentis; aliis enim agnatis et cognatis nullum ius quaesitum est; sic e. g. quamuis proximi agnati Regis Angliae sint Duces Brunswicenses Guelpherbytani; his tamen nullum ius succedendi est Angliae.

3. Vt legitime nati succedant, quod et decus exigit, et certitudo prolis. Hinc mos est aulicus, reginas parere adhibitis e consilio publico vel ex ordinibus testibus; singulare exemplum Constantiae, matris Friderici II. Imperatoris, quae filium publice peperit, quia quinquagenaria erat, et populus suspicabatur eam se gravidam simulare; PANDVLPH. COLLENT. *Rer. Neapol. Lib. III.*

4. Vt mares praeferantur feminis, et hae vel plane excludantur, vel in subsidium tantum admittantur; id enim finis exigere videtur. Aliae praerogativae non considerantur, modo primogenitus non plane ineptus sit, e. g. furiosus. De Persis tamen refert PROCOPIVS, *de bello Persic. l. 2.* luscum aut alio quodam vitio notatum nefas esse Persis Regem creare.

5. Vt locus sit iuri primogeniturae.


6. Vt successor id ius agnoscat tamquam beneficium populi; non tanquam beneficium antecessoris; vnde eius modi Rex successor singularis, qui non tenetur praestare facta antecessoris, et aes alienum regis ultimi priuatum soluere.

§. 10.

Iam et de peculiari succedendi ratione in regnis quibusdam recepta. *Successio* illa diuiditur in LINEALEM et GRADVALEM.

LINEALIS est, quando, quamdiu quis ex vna linea superstes est, ex altera nemo admittitur, quamuis gradu prior sit: sic mortuo quarto octauus gradu propior est, quam septimus: quia tamen hic ex prima linea praefertur octauo.

Primus acquirens



GRADUALIS, quando non considerata linea propior gradu indistincte admittitur: sic è. g. mortuo tertio, linea quidem propior esset quartus, sed quia quintus gradu propior est ad hunc devoluitur successio.



Sed gradualis in principatibus quidem quibusdam Germaniae obtinet, quemadmodum hoc iure in successione Altenburgensi Ernestus Gothanus exclusit Vinarienses: sed in regnis vix extat exemplum. Vnde CABOTIUS 1. Disp. 14. hanc successionem linealem vocat legitimam.

§. 11.

Successio linealis porro alia AGNATICA, quae et FRANCICA, vel SALICA, vbi feminae, adeoque et cognati ab illis descendentes in per-

perpetuum excluduntur. Quae adeo placuit tot gentibus, ne in extraneos imperium deuoluatur.

Carolo Pulchro Rege Franciae anno 1327. extincto praeferebatur Philippus: Valesius Eduardo Anglo, licet propiori; vti ex sequente schediasmate videri potest.

Philippus Audax Rex.

Philippus Pulcher Rex Franciae

Carolus Valesiae Comes

Ludouicus Philippus Hutinus R. Longus R. R. Franciae. † Franciae † a. 1318.	Carolus Pulch. Isabella R. Franciae. Regi An- † † a. 1317. gliae nupta. Franciae. a. 1320.	Philippus Va- Ioannes lesius Rex Rex
--	---	---

Eduardus III. quarto gradu
R. Angliae, qui Carolo cog nati
et Franciae titu-
lum assumpsit:
tertio gradu
Carolo cognatus

COGNATICA, quae et CASTILIANA vocatur, vbi masculi praefertur feminis eiusdem gradus; hae tamen admittuntur deficientibus eiusdem lineae masculis.

§. 12.

Quaestio superest, si controuersia super successione oriatur, quis sit iudex competens? 1. Nullius est ea in re ordinaria iuris dictio, ob status naturalis indolem; 2. ne ultimi regis quidem, (quia non loquimur de regno patrimoniali), nisi populus ei hanc potestatem fecerit. Exempla tamen sunt apud IUSTINVM, *Histor. XI. 10. XVI. 2. 7. 3.* nec populus ipse, quia non est superior illis, qui de regno disceptant; 4. superest ergo arbitrium, quod deferitur vel ordinibus, vti in Francia, mortuo Carolo Pulchro. POLIDOR. VERGIL. *Hist. Angl. libr. XVIII.* vel ad populum, cuius rei exemplum apud

apud DIONYS. HALIC. *libr. I. vel alicui ex familia, uti in Lusitania Henrico Cardinali.*

Sed plerumque res armis potius, quam iure terminatur, cui ipsa experientia satis superque docet.

CAPVT XI.

DE OFFICIO SVMMORVM IMPERANTIVM.

§. I.

QVae haftenus explicata sunt, ad naturam ciuitatis vel rei publicae pertinent; ex ea vero et fine maxime pendent officia tum *summorum imperantium*, tum *ciuium*; hinc de illis agitur a *cap. 11. usque ad 17. de his cap. 18.* Hic de illis agitur *1. in genere §. 1. 2. in specie §. 2. ad fin.*

Diximus, ea dependere maxime a fine ciuitatum, qui erat securitas tum externa, tum interna. Quum ergo officia sese habeant tamquam media ad obtinendum hunc finem necessaria, inde non potest non fluere axioma primum:

Quidquid ad securitatem rei publicae tum externam, tum internam pertinet, id et ad officium summi imperantis pertinere censetur.

Talia enim oportet esse media, qualis est finis. At quamuis ad finem praecipue respiciendum sit: non minus tamen et ex reliquis quae haftenus praestruimus, principiis similia axiomata fluunt, ex quibus de imperantium officio iudicari possit; nam quia audiuius, ciuitates pactis coaluisse, facile patet, verum esse axioma secundum.

Officium summi imperantis est, quidquid pactis primaueis, per quae res publica coaluit, consentaneum est.

Praeterea quum demonstratum sit, partes imperii esse iura maiestatis immanentia et transeuntia, inde fuit necessario axioma tertium.

Officium summi imperantis est, iura maiestatis omnia exercere ad salutem ciuitatis et rei publicae.

Denique quum affectiones quasdam rei publicae vel ciuitati huic vel

vel illi proprias esse ostenderimus, per se intelligitur axioma quartum.

Summo imperanti ob oculos esse debere leges imperii sui fundamentales, et contra easdem nihil indulgendum.

§. 2.

Primum ergo quod inde fuit officium speciale summi imperantis est *cognitio eorum, quae ad illud officium pertinent*; adeoque principem, eoque, qui imperio destinati sunt, a iuventute instrui oportet, quomodo officio suo fungi debeant; nam 1. officia fluunt ex fine; ergo inculcandum principi, quis finis rei publicae sit; alias facile ea in re aberrabunt exilimabuntque, populum sui, non se populi causa esse.

2. Regenda est res publica: quod regere teneor, id cognitum habere debco, ne equum quidem recte rego, nisi eius indolem compertam habeam; ergo ipsi inculcandum, quomodo in rem publicam coaluerint homines, quibusque pactis teneantur tum imperantes, tum ciues.

3. Exercere debet partes imperii seu iura maiestatis; in quonam ergo illa consistant, accurate scire debet, ne pro iuribus iniuriam ciuibz faciat.

4. Denique quum ignoti nulla cupido, quomodo poterit princeps leges fundamentales seruire velle, quas ipse ignorat? Obiici solet, 1. quae ignorat princeps, scire debere ministros? Resp. at ministros non omnes conscientiae habere rationem; male eos facpe abuti iuribus maiestatis, nisi princeps ipse eorum consilia regat; 2. principes eruditissimos plerosque male praefuisse rei publicae, veluti Alphonsum sapientem Regem Hispaniae, Iacobum I. Regem Angliae? Resp. eruditionem aliam esse principum, aliam privatorum; Alphonsus soli astronomiae et astrologiae studebat, haec nihil ad rem publicam; Iacobus I. studiis grammaticis delectabatur, adeo ut legatus Galliae Regis eum vocaret potentissimum grammaticum; grammatica vero docet quidem, quomodo verbum regat nomen, non autem quomodo imperans regere debeat rem publicam.

Itaque studia principis debent esse 1. pietatis, sine qua nihil recte; quum superiorem non habeat in mundo, scire debet, esse superiorem Deum, qui omnia videat; 2. notitia generalis principiorum iuris naturae, politici, iuris publici et privati; 3. specialis notitia rei publicae, cui praest, inprimis vero iurium domus;

quo praecipue facit 4. historia gentis adcurata, 5. studia militaria. Haec necessaria; reliqua vtilia tantum, veluti mathesis, studium linguarum vſitationum, exercitationes corporis: &c. Vid. XENOPHONTIS iudicium de educatione Cambyſis.

§. 3.

Officium ſpeciale ſecundum: *Populi ſalus ſuprema lex eſt.* CICERONIS hoc dictum eſt *libr. I. de legib.*

Demonſtratio: Quidquid eſt ſummi imperii finis, id ſuprema eiufdem lex eſt: populi ſalus, cet. ergo, cet.

Obicitur ex doctrina politicorum, aliorum imperiorum ſuam eſſe ſalutem populi, aliorum ſummi imperantis, e. g. in rebus publicis herilibus / deſpoticis, regnis barbaricis?

Reſp. 1. Politica non docet, quid iuſtum ſit, quid deceat, quid honeſtum dicendum, ſed qualia de facto ſoleant eſſe imperia, et quomodo illa prudenter conſeruanda emendandaque ſint.

2. Nihil vere vtile eſſe poteſt principi, quod idem vtile non ſit populo; adparens tantum eſt illa ſalus principis, quae ab vtilitate populi ſeiuncta eſt; quidquid enim princeps habet, habet a populo; ſons ille debet eſſe inexhausus. Quam miſer futurus eſſet princeps, qui centum myriadibus mendicorum hominumque inſeliciffimorum imperaret? Ergo peſſimi ſunt miniſtri, principique ſuo maxime noxi, qui vtilitatem populi ab vtilitate principis ſeiungunt, illumque opprimere ſtudent, vt huic proſint; quod perinde eſt, ac ſi quis corpus truncaret membris, vt omnia alimenta accreſcant capiti.

§. 4.

Tertium officium eſt *cura diſciplinæ*, quae diſſert ab officio legiſlatoris; leges enim ſeruantur de iuſto et vtili; diſciplina magis ad ea, quae decora ſunt, pertinet; leges poenis ſeuerioribus moniuntur, cura diſciplinæ aliis mediis; legiſlatoria poteſtas Romae erat penes populum, cura diſciplinæ penes cenſores. In monarchiis vtrumque ad principem pertinet, Principis ergo eſt, curare 1. vt ciues pie ſanctaeque viuant, hinc cura religionis, et praxeos maxime; 2. vt otium, luxus, et comeſſationes impediuntur; 3. vt ciues artibus honeſtis imbuantur; 4. vt decore viuant; 5. vt commercia ſtoreant, nec fides publica laboret; 6. vt politia in re publica bene ſit ordinata; 7. vt artes et ſtudia floſcant; quomodo haec

haec omnia obtineri possint, politica docet. Aliquando id magis principis exemplo, quam legibus obtinetur; permultum quoque huc faciunt praemia, priuilegia, nota infamiae, vel saltem existimationis periculum, excitata aemulatio cum exteris.

Experientia docuit, gentem Russorum olim male moratam his tantum mediis ad humaniorem vitam et disciplinam breue intra tempus traductam; quanto magis sperareliceret, disciplinam in gentibus iam probe excultis conseruatum iri facillime, si eius rei curam suscipere vellent imperantes.

§. 5.

Cura leges ferendi quartum est principis officium; requirit enim hoc pactum, vt vna sit in re publica voluntas; leges ergo praescribere debent, quid velle ciues oporteat.

Iam illa legislatoria potestas maximam requirit prudentiam.

Distinguendum enim inter facta necessaria, quae iure naturae iam sunt definita, et tantum poenis civilibus muniuntur, haec facilis est legislatio; et inter facta in se indifferentia, de his leges prudenter ferre difficillimum; nam in his respiciendum 1. ad vtilitatem rei publicae, 2. ad reliquas leges, 3. aliquando etiam ad vicinos. Hinc vna saepe vel altera lex imprudenter lata rem publicam plane pessum dedit, e. g. lex: *Inter patricos et plebem ius connubii ne esto*, satis concinna est monarchiae et aristocratiae, non vero democratiae.

Ceterum 1. leges oportet esse pocas; a) vbi nimis multae, ibi homines incidunt in leges, tamquam in laqueos; b) nimis multae facile sibi inuicem aduersantur, c) plura iam lex naturae definit, vbi non legibus, sed sanctione opus est; hinc leges XII. tabb. libellus breuissimus; itemque leges Solonis, Lycurgi, et lex diuina Mosaica.

2. Planas ac perspicuas; non quasi casus omnes exprimi debeant, sed vt regulae sint vniuersales, ex iisque casus omnes possint explicari.

3. Vt rei publicae sint conuenientes, id est, fini et formae rei publicae et indoli ciuium; hinc si finis esset commerciorum amplificatio, et leges libertatem negotiandi restringerent, commerciis onera imponerent immodica, peregrinis minime fauerent, non obtineretur finis. Si in democratia nobilitati multae ac eximiae praerogatiuae concederentur, destrueretur forma rei publicae; si vulgus

gus rerum nouarum cupidum in democratia admitteretur ad rem publicam, lex esset indoli populi minus conueniens.

§. 6.

Quintum officium, *legum exsequutio*; alias enim 1. leges euilescerent, quam primum videant homines, eas impune violari; 2. immo frustra essent.

Hinc in rebus publicis, a) legum custodes esse decet, quales apud nos aduocati et procuratores fisci; ciuiles enim actiones facile instituunt homines, quia actorum interest; non autem criminales; b) exsequutio debet esse facilis et breuis; saepe enim breuis iniuria tolerabilior est, quam longa iustitia, hinc diuturni processus quouis modo coercendi; c) exsequutio sit aequalis, ne impetrans

Det veniam coruis, vexet censura columbat.

Hinc non facile dispensandum, nec potentibus aliquid indulgendum contra leges; aut enim aliis nocet imperans, si his ius quaesitum; aut sibi ipsi, dum legibus suis auctoritatem detrabit.

§. 7.

Ex his sextum officium fuit, vt *poenas prudenter infligat* hinc

1. Poenae debent esse necessariae, ne libertas ciuium praeter necessitatem restringatur; absurda lex Persica; vt nemo intra tri-duum quidquam precetur a Diis et hominibus.

2. Eaedem, si vitam non adimunt, ita comparatae sint, ne hominem reddant plane inutilem; itaque non laudandae poenae infames, quibus homines non emendantur.

3. Poenae delictorum non temere ad mortem extendendae; admiranda omnino Augusti prudentia, qui grauissima delicta pleraque deportatione coercuit; ita a) reus plurimum calamitatis ferebat; b) bona eius in fiscum redigebantur; c) nihil ab homine illo metuendum erat, et d) ipse Augustus clementiae laudem ferebat.

4. Crescentibus tamen delictis poenas crescere debere, nullum est dubium; aliquando enim homines lenioribus mediis ad sanitatem reduci non possunt; sic desertio, furta, rapinae vix cessarent, nisi.

nisi poenae capitales homines coercerent; et tamen hae quoque homines vix coercent.

§. 8.

Septimo et *ciuium inter se iniurias prohibere* est summi imperantis, id est, non patiatur quemquam ab alio impune laedi, iniuriis contumeliisque adfici, contemni, cet. nam repugnaret hoc fini rei publicae, securitati internae.

Itaque 1. nulli statui in alterum quidquam indulgere debet, e. g. vt potentiores plebem impune opprimant spolianteque.

2. Nulli denegat iustitiam, etiam vilissimae sortis homini a potentiore laeso.

3. Ordines existimatione et dignitate differant, non iniuriis; hinc in neruum res abiit, quom Romae ius sibi vindicarent optimates, debitores ex plebe in neruo habendi.

4. Nemini vindicta priuata, sed defensio tantum permittatur; nam a) ita vi, non iure res agitur; b) obsequium renunciatur magistratui; c) quisque iniquissimus erit iudex in sua causa.

§. 9.

Octauo et *circa ministros et magistratus talem se gerat, vt nec sibi, nec rei publicae summum adferat detrimentum*. Perquam necessarium est hoc officium, 1. quia hi ministri omnia agunt nomine principis, ac huic proinde omnia solent imputari; sic Tiberio vitio vertebantur, quaecumque egerat Seianus, praefectus praetorio; 2. quia plerumque principis et rei publicae salus pendet a ministrorum prudentia; Augusti summa felicitas, quod haberet adiutores prudentissimos, Agrippam et Maecenatem.

Itaque 1. neminem ad ministerium vocet, nisi muneri suo parem futurum: sane

Principis est virtus maxima, nosse suos.

2. Viros exploratae fidei non temere muneribus moueat, iniuriisque alijs adficiat; quia a) hoc in se iniustum; b) alios deterret a vera laude; c) saepe et incitat ad vindictam; exemplum Natsctis.

3. Neminem temere per saltum trahat ad honores, quia iuuenes, quantumvis rerum periti, experientia destituuntur; elegans veterum sententia: *laborare iuuenum est, consulere virorum iustae aetatis; precari senum.*

Heineccii Prael. Pufendorf,

M m

4. Dili-

4. Diligenter eorum acta inspiciat, et male agentes puniat.

5. Ipse audiat ciuium querelas, interfit consiliis, rationes suffragantium expendat.

§. 10.

Tributorum cura. nonum imperantis est officium; qua in re qualem se gerere debeat, ex ipso fine facile patet, qui est necessitas rei publicae, seu conseruatio securitatis internae et externae; ergo 1. tributa illo fini debent esse proportionata, nec plus exigendum, quam opus est; 2. non temere mouenda bella libidinis et ambitionis causa, ita enim oneribus minus necessariis premuntur ciues; 3. nec ad incitas redigantur ciues; eleganter Asiatici, quum duplum iudiceretur ab Antonio, petierunt vt duas menses quotannis efficiat; 4. det operam, ne tributa interuertantur multitudinis Quae- storum; PRISAEIVS, scriptor Polonus, conqueritur, in Polonia in collatione tributorum idem fieri, quod soleat tempore incendiis, vt quam multi conferant, et pauxillum tamen ad ignem exstinguendum adhibeatur, plurimum effundatur in via; 5. us adiubeat tributa, quibus destinata sunt.

§. 11.

Decimum officium, *habere curam facultatum priuatarum*, vt glifcant et augeantur, ita enim et imperanti non deerit neruus rerum gerendarum. Hoc fit, 1. si glifcant commercia, eaque non nimis oneribus premantur; 2. si artificia (*les manufactures*) promoueantur; 3. si rei monetariae habeatur ratio, ne pro proba moneta adulterina vel onerosa per rem publicam ambulet; 4. si leges sumtuarias ferat, easque stricte obseruandas curet; 5. si otium quopis modo prohibeat; quam in rem insignis vsus ergastulorum, aliarumque operarum publicarum; 6. si furta, rapinae, mendicorum improborum et vagabundorum audacia prudenter coerceatur; denique 7. praecipuum medium est, dispicere, vt semper plus exportetur ad alios, quam importetur.

§. 12.

Vndecimum officium est *conseruatio vnionis ciuium*; vnio consistit in vnitate voluntatum, quae obtinetur per submissionem; omnium ergo ciuium voluntas subesse debet voluntati solius imperantis.

tis. Ergo 1. impediendae factiones, vbi enim hae, ibi scissae sunt voluntates, et quum imperans vtrique factioni fauere nequeat, alterutram sibi aduersam habebit; 2. coitiones ciuium, quae et heteriae, conuenticula, prohibeantur; sunt enim hae medium et caussa factionum; qui effectum non vult, nec causam velle debet; Romanorum curae, ne heteriae fiant, Christianorum persecutiones, PLIN. *Epist.* X. 97. 3. ne sit res publica in re publica, ita enim plane dissoluitur res publica; vbi quaedam membra a re publica non dependent, ibi non amplius est vna res publica: hinc patet ratio, cur licet Dictatores aliquando dixerint Romani in re trepida, non tamen prius adqueuerint, quam et aduersus hos valeret ius extremae prouocationis ad populum.

§. 13.

Duodecimum officium est, *virtutem ciuium armorumque peritiam alere*; Nam

1. Hoc requirit finis rei publicae, securitas externa.

2. Serum nimis est, de ea re cogitare, vbi iam Hannibal ante portas.

3. Infida semper pax in statu naturali est; ergo in promptu semper debent esse arma militesque, qui arma rite gerant; hinc sequitur, a) vt in promptu esse debeat apparatus necessarius, munimenta, arma, commeatus, b) vt aerarium bellicum recte se habeat; c) vt semper iustus sit militum numerus, siue lectorum, siue mercenariorum, siue sociorum, prout rei publicae forma admittit.

4. Vt vicinorum consilia et vires diligenter exploret; quod optime fit per legatos ordinarios; Cyri hoc inuentum apud XENOPHONTEM in *Cyropaedia*.

5. Foedera vt contrahat cum iis, quorum eadem est utilitas; alias parum constans erit foedus, et dissipabitur iusto citius, vel sine fructu erit ob conuentiones de pace particulares.

CAPVT XII.

DE LEGIBVS CIVILIBVS IN SPECIE.

§. 1.

PRædiximus supra, de singulis iuribus maiestatis potioribus aucturum seorsum auctorem; id iam præstat sequentibus capitibus, et quidem hoc capite de legibus et imperantis circa eas officio differit, et quidem 1. quid sit *lex civilis* §. 1. 2. *quodplex* §. 2. 3. *quid principi liceat circa leges naturales*, §. 3-7. 4. *quid legum effectus*? §. 8. 5. *quid iussus imperantis, et quomodo a lege differat*? §. 9.

LEX CIVILIS auctori est decretum summi imperantis civilis, per quod ciuibus iniungitur, quid in vita civili facere, quidue omittere debeant.

Decretum.) Rectius præceptum; decretum enim subditos non obligat; sed promulgatio.

Summi imperantis.) Ergo non magistratus, quorum decreta valent inter partes, non in re publica vniuersa; et quamuis aliquando edant magistratus etiam decreta communia, *gemeine Bescheide*, illa tamen non versantur circa nouum ius, sed tantum circa formalia processualia.

In vita civili.) Haec differentia legis civilis ab aliis legibus; nam *lex naturæ* in specie non supponit vitam civilem, sed humanam; quum vero *lex doceat*, quid facere, quid omittere debeant ciues, consequens est, vt *lex sit vel præceptiua*, quæ quid vetat vel prohibet, e. g. vt rustici operas præstent dominis, vel ne vassalli inconsulto domino prædia vendant; vel *permissiua*, quæ libertatem ciuibus integram relinquit, e. g. vt cuique liceat vsuras legitimas accipere. Hæc quoque veræ sunt leges, quia obligant conciuces, vt conciuem non turbent in exercitio huius legis.

§. 2.

Sed maioris quoque momenti est diuisio altera, quod *lex civilis sit vel respectu AUCTORITATIS*, quæ quidem alterius sunt originis, sed auctoritatem civilem ab Imperante acceperunt; hinc multæ leges

ges origine sunt iuris naturæ, e. g. de homicidiis, furtis, adulteriis, cet. multæ sunt originis peregrinæ, veluti apud nos ius Romanum, ius Wybïense, apud Romanos ius Græcum in XII. tabb. expressum, sed auctoritatem in re publica habent hæc leges a summo Imperante; vel *ratione originis*, quæ originem suam ab ipso summo Imperante habent, e. g. ne liceret de alimentis transigere; vt quarta Falcidia legatis, Trebellianica fideicommissis detrahatur; ne merces quædam vetita inuehatur in rem publicam.

In illis non præceptum, sed sanctio poenalis ab imperante est; in his vtrumque non alium auctorem habet, quam principem; hoc initio statim est lex, illud aliquando initio non est lex, sed sententia priuati, quæ tamen auctoritate summi imperantis vim legis accipit, e. g. Leges Vlpiani, Papiniani, Pauli, cet.

§. 3.

Iam, quid liceat Imperanti circa leges naturales, dispiendum: Multas leges iuris civilis esse ex iure naturæ et gentium, iam VLPIANVS noster *L. 1. de iustit. et iur.* obseruauit; ius nostrum tripartitum est. Compositum enim est ex naturalibus præceptis, gentium et ciuilibus. Ergo statim quaeritur, ad quid opus sit illa repetitio, ne, vt nempe ius naturæ et gentium nouis legibus ciuilibus ab Imperante inculcetur? quidquid enim natura iam cognitum est, id non indiget noua promulgatione?

Sed 1. non omnes homines in re publica actu ratiocinantur; quid iuris naturæ sit; multi, quin plurimi consuetudine peccandi eo perueniunt, vt parum aestiment illa præcepta naturalia; ergo Imperans illa repetere et promulgare tenetur, e. g. nefanda crimina quis pro licitis habet, veluti Venerem nefandam.

2. Quamuis quidam generalia iuris naturæ præcepta teneant; facile tamen in circumstantiis specialibus, et adplicatione illorum præceptorum ad has circumstantias falluntur; opus ergo est explanatione et determinatione eius modi casuum difficiliorum, e. g. quousque se porrigat moderamen inculpatæ tutelæ.

3. Quamuis ius naturæ nil nisi iustum inculcet, illud tamen parum efficaciae et auctoritatis esset habiturum, nisi accederet sanctio poenalis, quæ a solo principe est vel summo imperante; poena ergo addenda. SENeca, *de ira*, II. 27. *Quam angusta res est, ad legem bonum esse? Quanto laxius officiorum patet, quam iuris regula? Quam multa pietas, humanitas, iustitia, fides exigunt? quæ omnia sunt*

sunt extra publicas tabulas. Hae vero leges, quibus tantum iuris naturae leges repetuntur, id habent singulare, α) quod subditi sint inexcusabiles, si violent, nec ignorantiam iuris praetendere possint; β) quod poena remitti, vel princeps dispensare nequeat; quamvis γ) poenam, si iure diuino non statuta sit, minuire possit.

§. 4.

Hoc vt rectius intelligatur, auctor denuo recenset legis partes, docetque quod consent praecepto et sanctione poenali; prius docet, quid faciendum omittendumque sit; posterior, quid mali imminet, si praecepto non pareatur.

Posterior si deficit, lex est imperfecta. Iam ius naturae habet quidem sanctionem poenalem generalem: nisi hoc feceris, Deum offendes, isque ultor et vindex erit, et eum quidem omniscium; et eatenus lex est perfecta, immo omni humana perfectior, quia humanum legislatorem se decepturos sperant improbi, quod de Deo sperare non possunt.

At ius tamen illud specialem poenam non desinit, nec eam delicta statim sequuturam praedicit; potius experientia docet, lentam esse Dei vindictam, quia tanta est eius bonitas, vt spatii plus satis ad resipiscenciam indulgeat; et eatenus hypothetice imperfectum est ius naturae; adeoque supplere hunc defectum debet imperans, et addere sanctionem poenalem, siue 1. vt poenam determinet, quae tunc vocari solet poena ordinaria; siue 2. vt eam arbitrio iudicis definitam relinquat, quae poena arbitraria vocatur; illi locus est in negotiis, quae vniuersales habent circumstantias a legislatore expressas, e.g. qui hominem dolo malo occiderit, gladio percutitur; huic, vbi tam diuersae sunt negotii circumstantiae, vt generale quid statui nequeat, e.g. in crimine falsi.

Aburda HOBBSII doctrina, *de ciue*, cap. 14. §. 10. omnia esse iuris naturae, quae praecipit princeps, et cap. 6. §. 16. principum esse, crimina pro lubitu definire.

§. 5.

Non solum autem poenis ius civile munit leges naturales, sed et actiones iis adcommodat.

§. 5. *Actiones* sunt media persequendi ius suum in iudicio; tales actiones ius naturae nullas prodidit, quia illud et homines extra ciuitatem

uitatem obligat; hinc videmus pacta, quamuis iure naturae seruanda sint, non tamen produxisse apud Romanos actionem, quia leges Romanae ciuiles nullam eis adcommoauerant.

Vbi medium non est persequendi ius suum in iudicio, ibi nec est obligatio perfecta, ergo ius naturae totum, si actiones non essent proditae, in ciuitatibus esset imperfectum. In ciuitatibus dico, nam extra ciuitates alter alterum sine actione per vim bellicam cogere, et ius suum persequi posset.

Imperantis ergo est 1. ex negotiis iure naturae inculcatis dare actiones; 2. iis certa dare requisita; vt, locumne habeant, nec ne, adpareat, e. g. vt hypothecariae in immobilibus non sit in Saxonia locus, nisi ius pignoris publice et iudicialiter constitutum; vt de emto agi non possit, nisi pretio soluto; 3. vt praescribatur, quid ex quouis negotio peti possit, e. g. an accessiones, an fructus, et quinam? percepti, an percipiendi, exstantes, an consumiti, an vsurae? et num eae a tempore litis contestationis adiudicandae? qua in re singularis et admiranda est iuris Romani sapientia.

§. 6.

Practerea id licet summo Imperanti circa leges ciuiles, vt possit negotiis iure naturae praeceptis vel permissis certum tempus, modum, locum et personas assignare, easque circumstantias boni ordinis causa definire, quas non definiuit ius naturae; e. g. ius naturae procul dubio praecipit, vt iustitia administretur; at non praecipit, quando, quomodo, a quibus praecise personis id fieri debeat; itaque has circumstantias determinat Imperans, praecipitque quibus diebus et horis, a quibus personis et magistratibus ius dicendum sit, quo ordine processus instituendus, quae media exsequendi adhibenda, cet.

Haec origo ordinationum processus iudiciarii, in quibus duo extrema cauenda, 1. ne nimis anxie omnia formulis, fatalibus, ac minutis adstringantur, 2. ne nimis multum relinquatur iudicis et litigantium arbitrio. Vti enim prius processum immortalem reddit: ita posterius occasionem dat iustitiam pro adfectu administrandi, lites protrahendi, tumultuarie procedendi.

Nostro saeculo ea de re disceptatum accurate, quomodo breuior fieri debeat processus, sed plerique morbi originem non intellexerunt, num in aduocatis, an in iudicibus, an in iuris incertitudine, an in forma processus quaerenda sit; quod ante omnia expediendum erat.

§. 7.

§. 7.

Principi porro fas est, negotiis iure naturae alias introductis certam formam dare, quam exigere videtur rei publicae salus. Ita 1. nuptiae sunt iuris naturae; quomodo autem et qua forma illae fieri debeant, non praecipit; hinc leges civiles addunt formam et ritum; 2. contractus sunt iuris naturae; at leges civiles addunt contrahendi formam, e. g. stipulationem, magistratus in oppugnationem rerum immobilium consensum; 3. si statuamus, etiam testamenta esse iuris naturae, de quo tamen merito dubites, quot ritus testatoribus praescripsit ius Romanum?

Haec omnia ius civile superaddidit iuri naturae. Cur vero? Rident haec nonnulli, sed ipsi deridendi, nam a) eo ipso discernere voluerunt veteres, serione an perlusorie quid actum sit; e. g. ad promittendum facillime ruunt homines, etiam inter pocula; serione id factum, ex stipulatione iudicabant; b) occurrendum eo ipso fuit falso; quam facile mutarentur, vel plane supponerentur testamenta, nisi tot opus esset sollemnitatibus; c) ea est hominum indoles, ut iis maxime capiantur, quae in sensus incurrunt; itaque nescio quid venerabile inesse censent ritibus et caerimoniis, adeoque et sanctiora putant negotia sollemniter et ex formula contracta, quam quae sine sollemnitate incuntur; e. g. nuptias sollemnes coram facie ecclesiae initas; 4. ritus eius modi publicum testimonium praebent; aliquid rite factum gestumue esse; sic nemo dubitabit, eos in iusto matrimonio viuere, quorum nuptiis accessit benedictio sacerdotalis.

Quare facile intelligitur, cur Romani publice priuatimque omnia egerint ex formula et cum certis ritibus; ita enim sollemniter iurabant, bella indicebant, foedera contrahebant, victos in dedicationem accipiebant, iudicabant. Conf. *Sylog. opusculor. exercit. X. de iuris prudentia veterum Romanorum formularia*, pag. 431. seqq.

§. 8.

Iam de legum effectu, qui ex earum natura facile intelligitur: quum enim ius sit legislatori praecipere, vi relatorum officium subditorum erit obtemperare, adeoque effectus legum est *obsequium*, sine quo etiam frustraneae essent leges.

Obsequium hoc 1. non modo ex iure naturae fluit, quod magistratui obtemperare iubet; verum etiam 2. ex pacto; nam dum

consen-

consensere subditi in alterius imperium, consensisse etiam in obsequium censentur.

Obiici posset, id primos tantum fecisse ciues, qui in rem publicam coaluerunt? Sed 1. pacta etiam heredes obligant, 2. qui in re publica viuunt, et in ea permanent, tacite ea pacta rata habent.

Iam obsequium istud est duplex, a) EXTERNVM, quando quis lege praecepta facit, prohibita omittit, quamuis id non faciat libenter, sed inuitus fortassis ex metu et formidine poenae;

Oderunt peccare mali formidine poenae.

b) INTERNVM, quando quis legibus paret ex virtute, vltro, libenter.

Oderunt peccare boni virtutis amore.

Quale ergo exigitur obsequium? Sufficere plerique putant externum, quia 1. imperans de internis iudicare non potest, 2. eius parum interest, libenter officium faciant subditi, an coacti, modo faciant.

Sed id verum est, si ad Imperantem respicias, qui omnino a subditis nihil aliud exigere potest; quod si vero respicias ad Deum, 1. is et interiora hominis perspicit; 2. semper in lege sua exigit obsequium internum; hinc Apostolus nos iubet parere magistratui conscientiae causa.

Utilitas huius quaestionis in eo se exferit, vt refellere possimus hominum errorem, qui peccando contra leges ciuiles poenae quidem ciuilis reos se esse fatentur, at conscientiam eo ipso se laesisse negant, quali non sit contra conscientiam refragari praecepto iuris naturae, quod iubet, magistratui vt pareamus.

§. 9.

Superfunt iussa summorum imperantium, quae a legibus differunt, quod leges sint praecepta vniuersalia, omnes ciues obligantia; iussa vero specialia, quae vnum tantum vel alterum, ad quos diriguntur, obstringunt; leges sunt praecepta perpetua valitura tam diu, donec a principe ipso abrogentur, iussa vero actum transeuntem spectant, e. g. iubet princeps carnificem, vt sententiam exsequatur.

Leges obligant ciues indistincte, iussa praecipue ministros, adparitores, officiales, cet.

Iam quaeritur, *an et principis iussibus sit obediendum?* procul dubio, quia eadem est ratio, Imperanti parendum, siue omnibus; siue vni quid iniungatur.

Heineccii Prael. Pufendorf.

N n

At

At de iniquis iussibus potissimum quaestio est, an et illis parendum? Distinguit auctor, an factum proprium iniungat, an sui facti exsequutionem: priore casu non parendum esse monet, posteriore autem obsequium omnino deberi; e. g. non parendum erat obstetricibus Aegyptiis, quum iuberentur Israelitarum infantes occidere; parendum autem est carnifici, si iubetur sententiam exsequi.

Enim vero id falsum; si enim princeps iubeat exsequi sententiam, de cuius iniquitate convictus sum, 1. magis obediendum Deo, quam hominibus; 2. nec quisquam agere potest contra conscientiam; immo 3. ne realis quidem est illa distinctio; quid enim iubeat princeps, semper exsequitur subditus principis sententiam, ceu exemplo obstetricum Aegyptiarum patet.

Nos potius respondemus, distinguendum esse inter iussa aequa, et iniqua; illa absolute exsequenda, in his subdistingnuendum, utrum manifesta sit iniquitas, an occulta: illo casu plus obsequii debetur Deo, quam homini; hoc recte obsequium praestatur, maxime ubi is, qui quid facere iubetur, nec tenetur, nec potest de aequitate vel iniquitate iussus iudicare. Sic carnificis iudicii res non est, an sententia iusta sit; exsequatur ergo illam; militum gregiarum captum superat quaestio, bellum iustum sit, nec ne; militet ergo.

At contra conscientiam dubiam nihil agendum? Resp. omittat ergo actionem, si in eius arbitrio sit; sin minus, aut agendum, aut patiendum erit.

CAPVT XIII.

DE IVRE VITAE ET NECIS.

§. 1.

Ius vitae et necis est ius maiestatis, quod summus Imperans exigente rei publicae salute etiam in vitam civium exercet; neque enim hic nobis intellegi promiscuam occidendi licentiam, aliquoties monuimus.

Possit quidem videri, hoc ius imperanti minime adserendum, quia fini et scopo rerum publicarum plane videatur contrarium; finis

finis enim rei publicae est securitas interna et externa ; nihil vero magis in tuto esse cupimus , quam vitam nostram , qua nihil est carius , ergo Imperantis erit , vitam tutam praestare , non eam eripere. Sed distingue inter finem simpliciter , et secundum quid talem , qui saepe sibi contrarii esse possunt , e. g. finis medicinae est conservatio vitae et sanitatis , et tamen aliquando membrum labe vel sphacelo corruptum

Ense recidendum est, ne pars sincera trabatur.

Ita simpliciter finis Imperantis est securitas civium ; si vero ea aliter obtineri nequeat , etiam quorundam mors , ut tota conservetur.

Probari id facile potest : a quo exigitur finis , ei et media concedenda : ab Imperante exigitur finis , securitas interna et externa ; ergo eidem etiam concedenda media ; non alia vero sunt , quam potestas in vitam civium ; ergo haec Imperanti concedenda. Postremum dubio caret ; externa securitas non aliter praestatur conservaturque , quam per bellum ; bellum sine vitae periculo geri non potest , ergo Imperans vitam civium potest periculo exponere.

Deinde securitas interna non aliter paratur , quam e medio sublati iis , qui illam turbant et inemendabiles sunt ; indulgendum ergo principi , ut turbatores rei publicae e medio tollat , suppliciiisque adficiat.

Ex quo simul patet , duplici modo Imperanti competere ius vitae et necis , 1. *indirecte* ; ut eos per bellum possit periculo mortis exponere ; §. 2. 2. *directe* , ut noxios possit supplicio capitali adficere , §. 3. *ad fin.*

§. 2.

Indirecte exercet princeps ius vitae et necis , dum ciues exponit periculo mortis , quod tempore belli fit ; quia enim bellum non geritur sine milite , praeliis , et violentia ; haec omnia autem cum periculo vitae coniuncta sunt , opus est potentia ciues armandi , aduersus hostem ducendi , praelia committendi , vrbes oppugnandi , quae omnia sine periculo non fiunt.

Hinc Imperanti est 1. ius delectum habendi vel conscribendi milites ; et quidem , ubi militia lecta est , promiscue ciues omnes , quod Deum ipsum in re publica Hebraeorum probasse videmus ;

N n 2

vbi

vbi mercenaria, eos, quos militiae aptiores videt, quam aliis officiis; vbi tamen periculi magnitudo id suadet, nemini defugendum est officium defendendi communem rem publicam; studiosorum laus in obsidione Groningana, Hassnienſi. 2. militem semel lectum recte exponit periculo, veluti in stationibus periculosis collocando, in conflictum ducendo, in cuniculos mittendo; et quidem 3. ut pereant potius, quam stationem deserant; sic Leonidas cum copiis suis apud Thermopylas periit; modo id rei publicae salus exigit; 4. ergo et fugam, et timiditatem militum tanto grauius coercere potest, quanto maiore cum periculo rei publicae ea vitia coniuncta sunt.

Sed aliud est periculo exponere militem, si id exigit rei publicae salus; aliud propitium mandare; nam 1. priori casu moritur quis ex officio, quia miles est, vbi hostis; hic moritur extra officium tamquam desperatus manu propria; 2. ibi prouidentiae diuinæ se committit, hic de prouidentia diuina desperat; 3. ibi vere consulit rei publicae ad extremum halitum pugnando, hic non consulit, vnius enim hominis vita pluris est; quem iactura arcis vel navis, 4. principi ius est in vitam, non in animam hominis. Et valde dubium est, immo vix credibile, an salua possit esse anima, quae tale consilium capit.

§. 3.

Directe ius vitae et necis exercet imperans, quoties sceleratos inemendabiles supplicio capitali adficit; hinc agit auctor 1. de natura poenarum, §. 3-5. 2. earum causa et fine, §. 6-10. 3. quanam delicta in ciuitate punienda, §. 11-15. 4. quomodo fieri debeat poenae aestimatio, §. 16-19. 5. an quis et alieni delicti poenam ferre debeat, §. 20.

§. 4.

Quid ergo poena? Retinuit auctor definitionem GROTII: poena est malum passionis, quod infligitur ob malum actionis; sed iam supra monuimus, addendum esse: a superiore, aut definitionem esse falsissimam, quin et multos inde errores nasci; nam 1. inde sequitur, iustam esse vindictam propriam, ciuium rebellionem, tumultus; 2. inde GROTIUS ipse hausit doctrinam absurdissimam, poenam gentis improbae esse causam belli iustificam; adeoque populum posse alterum bello persequi, non ob aliam causam, quam quod

quod delictum admiserit. Ita licere sibi putarunt Hispani, petere Americanos, qui in se nihil admiserant, quia erant idololatrae, *εἰδωλόφθοροι*, barbari, quam belli causam ipsi cordatiores Hispani detestantur; quis Hispanos superiores constituit Americanis? Vid. BVDDEI *Diff. de expeditionibus cruciatis*.

Est ergo *malum*; adeoque in eo consistere debet poena, quod delinquens pro malo reputet; hinc aequè absurda est poena relegationis furibus inflicta, quam suffocatio in aquis cancro a ciuibus, nescio cuius oppiduli, dictata.

Passionis.) Obiicitur, poenam in actione quoque consistere posse, e. g. si quis damnetur ad operas publicas? Resp. tunc non actionem esse poenam, (eadem enim agunt homines innocentissimi pro diurna mercede, quos ideo puniri non dixeris); sed sensationem ingratam, adeoque passionem, quae ex eo immodico labore resultat.

Infligitur.) Inuito itaque poena infligenda, id est, talis, quam reus a se amolitur, si posset; nam alias saepe contingere videmus, ut damnati magna animi alacritate supplicium subeant.

Ob malum actionis.) Ergo correlata sunt delictum et poena, quae se mutuo ponunt et tollunt; ac proinde martyrum cruciatus non fuere poenae, quia nihil deliquerant; multo minus, qui bello occumbunt, poenam subiisse dicendi sunt.

A superiore.) Ergo poena non est, sed iniuria, quae infligitur ab iis, quibus ius non est puniendi, e. g. vindicta priuata, seditio, tumultus.

Itaque facile patet, a poena quam maxime differre reparationem damni; haec enim quidem ex delicto vel mala actione itidem nascitur, sed ex alio fundamento. Ad poenam quis obligatur, quia leges violauit, id quod vocamus *reatum*; ad reparationem damni ob detrimentum alteri illatum, quod *laesionem* vocamus; hinc et vnum alterum non tollit; potius argumentamur: ubi coniunctae sunt causae, ibi et effectus coniunctim adesse oportet: in omni delicto coniunctae sunt causae, reatus et laesio; ergo et effectus coniunctim adfuit necesse est, puta poena et damni reparatio.

§. 5.

Ex quo facile patet, poenis tantum locum esse in statu civili, non in naturali: ubi enim deficit superior, ibi et deficit poena, per definitionem §. 4. datam: in statu naturali deficit superior; ergo et poena deficit, scilicet humana, diuinae enim et in statu naturali

locum esse nemo dubitavit. Vid. GROTI. *de iur. bell. et pac.* II, 2.

Itaque ius poenas insigendi non habet priuatus. Obiiciunt exemplum Zelotarum, cuius exemplum dedit Pineas, *Numer. XX, 7. seqq.* itemque exemplum vindicis sanguinis; adde 1. *Maccab. II, 25.* sed non est quaestio, an magistratus possit ius vindicandi priuatis permittere, quod nemo negat; et notum est, legibus etiam Romanis furem nocturnum licere occidere; sed quaestio est, an priuatus, qua priuatus, ius puniendi habeat? id quod omnino negandum. Conf. BVDDEI *Diff. de iure zelotarum in gente Ebraea* §. 34. sq.

2. Poenae non subiectus est populus liber, nec id ius puniendi sibi quisquam vindicare potest, nisi populus sit pars rei publicae. Sic Israelitae in poenam adgressi sunt Beniaminitas, quia ob nefandam crimen satisfactionem negabant Iudaeis; erant enim Beniaminitae tribus et pars rei publicae Israeliticae.

3. Multo minus Rex siue a populo, siue ab extraneo puniri potest; hinc detestandum faciosus populi Anglicani Carolum I. obtruncantis, multoque magis detestandum supplicium Conradini Hohenstaufii a Carolo Andegauensi inflictum, de quo singularia quaedam habent GVNDELINGIANA, in *Diff. de Conradino*; iure victoriae vii potest victor, non iuris dictione.

Ipsi Romani hac in re absurdi, qui Reges et doctos in triumpho ductos securi percusserunt. Atqui Israelitae reges deuictos suspenderunt, aliisque poenis satis truculentis adfecerunt? Resp. id Deus iusserat ob idololatriam et immania crimina, quae perpetrarent; quod vero Deo, supremo iudici, licet, id non statim hominibus conceditur.

Sic facile intelligitur, cur Cainum ob parricidium nemo puniuerit; vixit enim in statu naturali, adeoque neminem habuit superiorem. Obiici posset, vixisse adhuc Adamum, eum vero tamquam caput et principem familiae suae id crimen iure potuisse vindicare? Sed quis credat, Cainum tantae aetatis virum adhuc in patria potestate vixisse, quae iure naturae cessat, simulac non amplius opus est educatione.

§. 6.

Hactenus de natura poenarum; sequitur earundem *caussa et finis*, quem auctor considerat 1. *negatiue*, qualis non sit, §. 6. 2. *positive*, quis sit, §. 7-10.

Finis ergo poenarum non est 1. voluptas laesi, ut is animus et

et oculos pascat, quemadmodum occiso Cicerone Fulvia, Antonii vxor, linguam eius capto, quod in sinu tenebat, extractam graphiis et acubus pungebat. Princeps ad nihil obstrictus est, quam quod ad salutem rei publicae pertinet: illa laesi voluptas non pertinet ad rei publicae salutem; ergo ad eam laeso excitandam non tenetur: accedit, quod in se inhumanum est, ex alterius miseria et dolore voluptatem capere.

2. Nec satisfactio divinae iustitiae, qui conceptus est theologis frequentissimus. Verum equidem est, Deum velle, ut iustitia administretur, et noxii puniantur; verum etiam, peccare Imperantes, qui id officium negligunt, quin et voluntati Dei satisfacere, qui poenas noxiis pro merito infligunt; at falsum est, poenis satisfacere iustitiae divinae; Nam a) iustitia Dei est infinita, ac proinde satisfactio etiam infinita requiritur, quae non alia est, quam per Christum; b) haec satisfactio iam facta est, adeoque non requiritur ulterior per mortem vel supplicium delinquentis; c) pleraque poenae sunt humanae, non a Deo sancitae; non potuisset autem non Deus poenas singulis delictis iure vniuersali statuere, si his poenis eius iustitiae satisfaceret; d) si hic poenarum finis esset, nulla omnino posset remitti, quod absolum, quum et Deus Caino gratiam fecerit poenae parricidii.

Hinc merito hanc sententiam deseruit BVDDÉVS, in *Theol. moral. part. II. cap. 4. §. 9.* cautiusque loquutus finem poenarum non esse ait satisfactionem, quae fiat iustitiae divinae, sed satisfactionem iustitiae, quam Deus intendat; quamvis et hoc censuram mereatur, nisi id ita intelligas, magistratum, dum punit, iuste agere.

§. 7.

Iam ergo ad genuinos poenarum fines progreditur auctor, quorum 1. est praecautio laesionum et iniuriarum; adque iterum fit trifariam: a) quod emendatur delinquens; qui finis praecipue intenditur poenis iuuenum, ab aliis corruptorum, ex praecipitantia, vel vehementiore adfectu peccantium; b) quod alii eius exemplo deterrentur a similibus facinoribus; homines ita comparati sunt, ut sensimibus maxime moveantur: iam singulae res ita comparatae sunt, ut diuerso respectu se tamquam bonas et malas repraesentent; delinquentes plerumque eas sibi sistunt tamquam bonas, quia vel voluptatem, vel lucrum adferunt; c) malum cum iis coniunctum nec delin-

delinquentes; nec alii sibi ob oculos sistunt; ergo eius modi tristi spectaculo opus est, quo admoneantur alii, quam male sibi consulant, qui extra leges vivunt.

Hinc redditur ratio, 1. cur publice infligantur poenae, et non sine terribili adparatu, 2. cur poena aliquando et in mortuis executioni mandetur, e. g. propricidas publice per plateas trahendo, damnatos, qui poenam morte antevertunt, mortuos in furcam tollendo, comburendo, cet. 3. immo ipsi delinquentes non amplius oneri sunt rei publicae; quod inprimis spectandum in poenis latro- num, furum, sicariorum, cet.

§. 8.

Primus finis pertinet ad vilitatem peccantium; quo fine eius modi poenae 1. recte demandantur ipsis parentibus, dominis, maritis; eo nomine et ergastula rei publicae profunt. At aliquando tamen si haec susque deque habeantur, ipse potius magistratus eas exsequitur; hinc sententia: *dasi der Delinquent, durch den Stock-Meister tapfer mit Rutben zu zuechtigen*; 2. omnes huius poenas carere debere nota infamiae, alias finis non obtinetur; effectus enim eius modi poenarum aut poenitentia est, et tunc finis obtinetur; aut desperatio, tunc eo deteriores fiunt delinquentes; desperatos autem fieri oportet, quibus ob infamiam nulla spes superest anteaectae vitae labem virtute eluendi. Laudanda ergo prudentia militaris, quod poenae pleraeque militares, etiam satis aliquando atroces, sine nota infamiae infliguntur.

§. 9.

Alter finis comparatus ad vilitatem ipsius laesi; prospicitur enim 1. eius futurae securitati, e. g. si reus damnetur ad mortem, si in ergastulis, triremibus, munimentis habeatur, vel si vires nocendi subtrahantur. Ita olim furibus manus truncabantur, quod tamen iisdem crudele; rectius rebelles Ultraiectinos coercuit Fredericus I. Imp. apud GVNTH. in *Ligur. libr. I.* 2. eius satisfactioni, si damnum possit reparari, e. g. si res furtivae apud furem reperiantur, vel si iste fateatur, quem penes latent, cet.

Ergo absurdum, quibusdam locis obtinere paroemiam: *mit dem Tode wetter man dem Richter, und büßet dem Kläger*; multo ini- quius, res furtivas a iudice retineri pro impensis in inquisitionem et executionem factis. Inprimis vero laesi securitati consulendum

3. in delictis, quae ad tempus futurum simul pertinent, e. g. in minimis, ubi non dimittendus est e carcere reus, nisi praestita cautione de non offendendo.

§. 10.

At praecipuus finis est utilitas publica, ut 1. vindicetur contemptus legum, qui vitari non posset, si cuius liceret, eas impune violare; 2. exemplo, moneantur ciues, non esse peccandum in leges; hinc elegans veterum loquutio: exemplum statuere; exempla hic fiunt; facere aliquid insigne; unde etiam cadavera non tolluntur furca et rota, potius ea publicae viae vicina esse solent; quae omnia demum resoluuntur 3. in hunc generalem finem, ut seruetur securitas publica interna, ne ciuis ciuem laedat, ne alter alteri faciat iniuriam; hinc Apostolus orandum ait pro magistratibus: ut tranquillam quietamque vitam agamus, cum omni pietate ac gravitate, 1. *Timoth. II, 2.* Vid. HOCHSTETTERVS, *de iure poenarum, sect. V. pag. 44.*

§. 11.

Quaeritur, quanam delicta in ciuitate punienda sint? Respondent nonnulli: omnia, inprimis eo pertinent paradoxa Stoicorum: omnia delicta esse paria; sapientem non ignorare. HORAT. *Sermon. I, 3. 115. seqq.*

*Nec vincet ratio hoc: tantumdem ut peccet, idemque,
Qui teneros caules alieni fregerit horti,
Et qui nocturnus Diuum sacra legerit: adsit
Regula, peccatis quae poenas irroget aequas;
Ne scutica dignum, horribili sceleris flagello.*

Sed id parum solidum; nam 1. multa sunt delicta, eaque grauissima, quae ne quidem ad Imperantis iuris dictionem pertinent; e. g. quaecumque cogitando admittuntur, L. 18. D. de poen. 2. si indistincte omnia delicta punienda essent, delendum esset vniuersum genus hominum; quis enim non peccat? 3. id non requirit finis, puta rei publicae securitas; sunt enim quaedam delicta, quae ad eam non pertinent, et hinc regula: *Ea demum delicta in re publica punienda, quae eius securitatem turbant.*

Hinc auctor a poenis merito eximit 1. actus mere internos;
Heineccii Praef. Pufendorff. O o veluti

veluti cogitationes pravae, cupiditates, destinationes sine effectu, a) quia latent, et b) si vel maxime per confessionem pateant, non turbant tamen rem publicam. Id tamen exceptionem patitur, si res ad actum proximum pervenerit, e. g. si venenum quis infuderit cibo, fores iam perfringere furti causa voluerit, et impeditus sit.

§. 12.

Merito etiam excipiuntur 2. minutissimi lapsus, quos plerumque homines evitare ex naturae conditione nequeunt; tales sunt omnes a) pravi affectus, ira, invidia, cet. Hos non punit magistratus, nisi in actum externum vitiosum erumpant; a) quia poenae nullum effectum haberent, utpote quae animum non emendant, b) quia securitas civium iis non turbatur; potius itaque tales defectus emendandi virtute, pietate, religione; b) facta civilia contra legem admissa, quae quidem actionibus civilibus emendantur, at non puniuntur; e. g. qui pacta violat, agit contra legem, nec tamen ideo punitur, sed ad servanda pacta adigitur; c) leviores excessus, qui non turbant rem publicam, e. g. ebrietas, verba scurrilia, si in nullius iniuriam vergant, otium, cet.

§. 13.

Porro 3. excipiuntur quaedam delicta, quibus impar est res publica; talia potius dissimulanda, quam frustra tentanda, ne vel magistratus prodant impotentiam, vel salus rei publicae periclitetur. Tale Romae fuit foenebre malum, in Germania olim dissidationes, hodie *das Gesundheit-Trinken*, cet. impar autem aliquando est res publica, a) ob formam, quia Imperans nimis adstrictus, ut olim Imperator; b) ob magistratus participationem; c) ob ipsius delicti naturam, quod variis nominibus palliatur; e. g. non quis vsuras accipit, sed redditus emit; poenam conventionalem sibi stipulatus est.

§. 14.

Exemta porro a poena civili 4. vitia animi ex communi hominum labe resultantia, qualia tria illa primaria, **AMBITIO**, **VOLUPTAS**, **AVARITIA**, nam a) et haec interna sunt, quae ad Imperantis iuris dictionem non pertinent; b) eadem communia sunt hominibus omnibus, nec ulli mortali parcendum esset, si omnia ad vitium essent refecanda; c) in se non turbant tranquillitatem rei publicae.

blicae, e. g. si quis se putet primum omnium hominum, sequo suavi illo somnio vnice oblectet; superbus quidem est, quin stolidissimus, sed sibi desipit, nec villo modo haec pertinent ad rem publicam.

Sed quamvis haec non turbent rem publicam in se, turbare tamen possunt, si erumpunt in actus illicitos civibus reliquis noxios; e. g. si ambitio abeat in iniurias, seditiones; voluptates in stupra, adulteria; avaritia in furta, rapinas, fraudes, stellionatus; tunc omnino puniuntur huius modi delicta, sed non tam punitur causa, quam effectus.

In eo animadvertendum insigne discrimen inter iudicia divina et humana; in illis magis ad animum tamquam radicem peccatorum, in his ad effectum seu actiones earumque effectus respicitur, e. g. qui fratri irascitur, homicida est Deo, *Matth. V.* apud homines solus occidendi animus homicidam non facit, sed ipsam sequutam esse oportet hominis necem.

§. 15.

Aliquando contingit, ut, licet poena dignum sit facinus, princeps tamen gratiam faciat poenae, seu delicti det veniam, id quod vocant *ius aggratiandi*. Vbi quaeritur,

1. *An id fieri possit salvo iure naturae.* Stoici negabant, quia qui suum cuique non tribuit, iniustus sit, adeoque et is, qui non puniat poena dignum. Sed prius verum est, si quis aliquid alteri denegat invito, quod iure praetendit; poena vero nemini invito denegatur, eam quoque nemo praetendit.

Potius argumentamur, 1. Qui poenas statuere potest, easdem potest remittere; 2. si sapiens nemini ignoscit, quod volunt Stoici, plane etiam iniusta esset remissio peccatorum, tum divina, tum humana; atqui posterius absurdum; ergo et prius. At hoc ius omnino non exercendum citra gravissimas causas, quia nec sine gravissimis causis feruntur leges.

Tales causae sunt; 1. si finis poenarum in certo casu non sit necessarius, sed remissio utilior, quam severitas poenarum; e. g. in bello rustico; 2. si eximia sint delinquentis in rem publicam merita, e. g. Cicero vere aduersus leges peccarat, quod coniuratos occidisset sine populi suffragiis, l. 2. §. 16. *D. de orig. iur.* sed quia tamen eo ipso seruarat rem publicam, utilius fuisse ei ignoscere. Hinc mos Romanorum reorum tigatrices ostentandi populo in suffragia iuro; 3. si spes sit emendationis, e. g. si iuuenis peccarit; 4. si

quis ex ignorantia et praecipitantia peccarit, e. g. Jonathan degustando mel; 5. saepe ipsa peccantium multitudo veniam extorquet, uti in tumultibus, seditionibus, bellis civilibus, ubi tamen interest rei publicae, saltem faces et tubas poenas dare.

At quamvis non denegandum sit Imperanti ius aggratiandi; non tamen ei locus est, si poena iuris diuini sit: hinc quaeritur, an et poena homicidii possit remitti? Qui praeceptum diuinum esse censent illud *Genes. VIII. 6. qui hominis sanguinem fuderit, ipsius inuicem sanguis per hominem fundatur*, id merito negant; adfirmant vero, qui id pro praedictione habent; nec improbabilis est haec sententia, 1. quia tum nondum erant res publicae; 2. quia non imperativae dicitur: *eius sanguis effunditur*; sed in futuro: *eius sanguis effundetur*; quia tamen a) saltem patres familias tum erant capita et imperantes familiae, qui et poenam capitalem infligere poterant, b) tota fere lex diuina in futuro concepta: *non habebis Deos alienos coram me*, cet. tutior est sententia vulgaris. Vid. tamen THOMASII *Diff. de iure aggratiandi principis evangelici in causis homicidii*.

§. 16.

Sequitur quarta pars capitis de poenarum aestimatione, quae duplicem usum habet; 1. in prudentia legislatoria; ne Imperans aciores poenas statuatur, quam iustum est, etiam in delicta leuiora; 2. in prudentia iudiciali; quoties poena arbitraria statuta est; tunc enim iudicantium et de iure respondentium est, poenam aequam nec iusto acriorem, nec nimis tamen lenem statuere.

In aestimanda ergo poena respicitur 1. ad obiectum; quo enim illud nobilior est et pretiosius, eo maior poena obtinet; non tamen hoc primum momentum, nam simul semper considerandum, an nobile illud obiectum vere laesum sit, et an laesio illa coniuncta cum detrimento rei publicae, e. g. blasphemia, periurium merito graviter puniuntur, at grauior tamen solet esse poena laesae maiestatis humanae; 2. damnum redundans in rem publicam; sic homicidium simplex capite punitur, furtum laqueo, latrocinium rota, desertio laqueo; 3. prauitas intentionis, e. g. si quis homicidium deliberato animo suscepit, vel proditoris et occultandi delicti causa; 4. si accesserint circumstantiae aggravantes; e. g. quaeritur a) quis? filius occidit patrem, mater infantem, coniux con-

iu-

iugem; b) *quid?* plures occidit grassator; tunc adhibentur forcipes candentes, quasi poenarum superpondium; c) *vbi?* occisus quis in templo, inter sacra; d) *quibus auxiliis?* est homicidium proditorium; e) *cur?* occidit quis voluptatis, rapinae, occultandi delicti causa; f) *quomodo?* veneno, omni adhibita crudelitate; g) *quando?* ad quam circumstantiam praecipue respicitur in procuratio-
ne abortus punienda, an nimirum partus fuerit vitalis, nec ne?

§. 17.

At quaeritur, quomodo intelligendum sit axioma: *poenam debere esse delicto proportionatam?* id non intelligendum 1. de obiecto solo delicti; si enim semper requireretur aequalitas ratione obiecti, sola poena talionis deberet obtinere; at ea obtinere nequit, a) quia saepe talioni locus non est, e. g. fur furatus est 1000. ipsi saepe eripi ne 10. quidem possunt, b) quia saepe non potest in talionis poena observari aequalitas, e. g. sclopeto quis vulneravit Titium, sed ita ut nec de vita, nec de integritate membrorum periclitetur; an simile illi vulnus sclopeto infligi poterit? sic etiam excusari non posset, graviorem esse poenam laedentis maiestatem humanam, quam divinam, furis, quam homicidae; sed 2. de effectu, quem delictum habet in re publica; quo magis enim delictum turbat rei publicae tranquillitatem, eo severius puniendum; inde gravissima poena statuta erat in ruptores aggerum Nili.

Secundum haec principia 1. poena statuenda a summo Imperante vel ordinaria, vel arbitraria; 2. ea exasperanda, si delictum frequentius; abigeatus poena gravius in Iberia vel Hispania puniebatur; scopelismus apud Arabes; 3. iudicis non est poenam vel intendere, vel minuere, vel remittere, sed legum normam eam in rem sequi.

§. 18.

Quin dici potest principem, (non autem iudicem vel magistratum) posse atrociorum vel leniorem poenam duabus personis idem delictum admittentibus statuere. Est enim malum passionis; id iudicatur ex sensu; sensus mali non omnibus idem, ergo nec poena in omnibus eadem esse potest, e. g. multa 10. imperialium poena erit Titio pauperi, non Luctatio Neratio diuiti; fustigatio mediocris poena erit homini infami et nullius existimationis, at maxima vi-

ro honesto vel nobili, vel in dignitate constituto; hinc toto *titulo D. de poen.* diuersae conditionis hominibus diuersae poenae distantur, e. g. honestioribus deportatio, vilioribus mortis supplicium.

Obiici possit, hanc esse personarum acceptionem, quam Deus grauius prohibeat? Resp. negando, ea enim est 1. quando vnus ex duobus, qui in pari reatu sunt, absoluitur, alter condemnatur, si iudex

Dat veniam cornis, vexat censura columbas;

itemque 2. si poena inaequalis diuersis personis infligitur; hic vero neutrum fit; nam et vterque punitur, et aequalis vtriusque poena est quoad sensum, quamuis non sit eadem in specie. Haec vero ratio est, cur tam multae in iure nostro sint poenae arbitrariae, vel iudicantium religioni et arbitrio relictae, quia nimirum sine consideratione personarum vix possunt definiri.

§. 19.

Ea occasione auctor progreditur ad delicta vniuersitatum, quaeritque, *quid iuris sit, si vniuersitas toto imperio ciuili subiecta*, (nam si libera sit, bello, non poenae, locus est), *delictum admiserit?*

1. Posse vniuersitatem peccantem puniri, probatur inde, quod omnia requisita poenae adint; nam a) potest vniuersitas admittere malum actionis, e. g. pagos et oppida incendere, pacem publicam frangere, delinquentibus receptum dare, cet. b) potest sentire malum passionis, e. g. vt deleatur, vt priuilegium priuetur, vt pecuniae summa mulsetur, cet. c) habet superiorem, cuius contemplatione pro persona habetur, ergo potest puniri.

Quia tamen ita facile contingere potest, vt poena vniuersitatis etiam singulos innocentes premat, distinguendum 1. an per tumultum pars plebis deliquerit, nam tunc vniuersitas puniri nequit, sed tumultuantes; magistratus vero est, seuere id vindicare, nisi ipse velit se delicti participem facere; 2. an ciues quid fecerint iussu magistratus? tunc magistratus est causa moralis, et quidem principalis, ac proinde iste puniendus acrius; Vniuersitas vero tamquam causa minus principalis leniore poena adficienda; 3. an denique tota vniuersitas per modum conspirationis delictum admiserit, quod fieri solet in ciuitatibus democratice administratis; tunc vna voluntas, vna persona, adeoque recte vniuersitas tota punitur, obfide-
tur, cet.

In

In omnibus tamen his casibus merito humanitatis eatenus habetur ratio, 1. ut qui duces et faces fuerunt, praecipue puniantur, reliquis ob multitudinem peccantium gratia fiat delicti; 2. ut parcatu feminis, pueris, infantibus, nec ita directe puniantur; 3. ut magis de futura coercitione, quam de praeteriti delicti poena cogitur; hinc prudentissimi principes tumultuantes ciuitates non exhauserunt ciuibus, sed conditis munimentis in officio in posterum retinere studuerunt, cet. e. g. Carolus V. ita puniuit Gandauum; 4. ut horum delictorum poena non exigatur a posteris, nisi quatenus et ipsi delictum continuant, vel damni reparationem denegant.

§. 20.

Superest vltima pars capitis, *an quis alieni delicti poenam ferre debeat?* Vocamus *alienum delictum*, cuius ipsi nec causa moralis sumus, nec physica: hinc ob delictum non alienum, sed proprium puniuntur, 1. qui mandant, compellunt, incitant alios ad delinquendum, 2. qui participant de delicto, 3. qui delinquentibus receptum dant. Ad hos ergo et similes haec quaestio non pertinet, sed de his tantum agitur, qui nullo modo delicti causae fuerunt, nec morales, nec physicae; hos ergo directe puniri non posse, ex doctrina de imputatione patet; non sunt auctores actionis, ergo actio non imputatur; *imputare* est declarare, aliquem effectum actionis ferre debere, ergo hi non debent ferre effectum actionis; effectus actionis est poena, ergo hi non debent puniri, ergo non probanda est *lex illa dura l. 5. C. ad leg. Iul. maiest.*

At id vetum est *directe*: per *indirectum* enim contingere potest; ut poena et in innocentes redundet 1. per imperfectionem rerum humanarum, e. g. si parentes puniantur, fieri non potest, quin incommodum simul sentiant liberi, quamuis id magistratus non intendat; 2. propter obligationem spontaneam, e. g. si quis pro delinquente ad iudicatum solui se obstrinxit, (quod fieri potest in causis non capitalibus), reo aufugiente ipse mulctatur, non quia deliquit, sed quia solutionem mulctae in se suscepit. Illud triste est, quod vno ex familiaposito totius familiae existimatio periclitetur. Sed id neque a lege, neque a magistratu est, sed ex vana opinione hominum, quam coercere deberent Imperantes; fieri enim id posse, Angliae docet exemplum, vbi salua semper est illustrum familiarum existimatio, si vel maxime vnus vel alter ex illa poenas delicti deerit.

CAPUT

CAPVT XIII.

DE EXISTIMATIONE.

§. I.

V Idimus hactenus, quid Imperanti iuris sit in hominum voluntates; quibus leges potest praescribere, (*cap. 12.*); quid illi liceat in vitam ipsam hominis, (*cap. 13.*) Iam de eiusdem potestate in existimationem, famam, et honorem civium, quae cum vita pari passu ambulare videntur, hoc capite agitur; et quidem expenditur 1. *quid sit existimatio?* §. 1. 2. *quotuplex illa?* §. 2. 3. *quid iuris sit circa aestimationem simplicem?* §. 3-10. 4. *quid circa intensivam?* §. 11-16.

I. *Existimatio* quid sit, patet ex definitione: est ea valor personarum in vita communi, secundum quem aliis vel pares, vel digniores, vel viliores iudicantur.

Valor.) Quemadmodum enim res, prout reliquis vtiliores, rariores, praestantiores sunt, ita pretium habere dicuntur: ita et personae, prout moraliter, vel civiliter, vel physice aliquid praerogativae habent, reliquis existimatione antecellunt, e.g. virtute praediti, viri docti et prudentes, ingeniosi. Quod ergo in rebus est pretium, id in hominibus est existimatio, vtrumque est valor quidam.

In vita communi.) Si enim non in societate viveret homo, nulla esset existimatio; quia tunc nec equiparari aliis, nec anteferri, nec postponi posset.

Vel pares, vel digniores, vel viliores.) Est hic effectus existimationis: quum enim omnis valor requirat mensuram, vel comparationem, quae hic est comparatio hominis cum homine, quemadmodum in auro comparatio auri cum pondere, necessario sequitur, ut vel alter dignior, vel vilior, vel aequalis habeatur.

Ceterum supra habuimus caput singulare de agnoscenda hominum aequalitate; si ergo omnes homines sunt aequales, quomodo alter altero dignior, vel vilior haberi potest? Resp. aut hominem considero quoad officia iuris naturae, tunc omnes sunt aequales, e.g. Titium laedere, occidere, expilare, defraudare non possum, qui est vir honestus; at non magis eam iniuriam facere possum Iro, qui est ineq-

dicus,

dicus, nulliusque existimationis; hinc leno apud TERENTIUM, *Adelph. II. 1. 34-35.*

Leno sum, fateor, perniciēs communis adolescentium:

Periurus, pestis: tamen tibi a me nulla orta est iniuria;
aut hominem considero ratione morum et meritorum, tunc omnino alter praestantior, vel vilior, e. g. si comparemus Catonem et Clodium, Ciceronem et Catilinam.

§. 2.

II. *Existimatio* illa vel est *simplex*, vel *intensua*; illa et *fama*; haec etiam *honor* appellatur.

Simplex est, quando quis ob vitam honestam pro idoneo membro humani generis vel civitatis habetur; *intensua*, quando quis ob bene merita aliis in re publica vel societate humana praefertur.

Differentia manifesta est, nam 1. *simplicis* fundamentum est, si quis nihil mali fecit; *intensuae*, si prae reliquis bene fecit, et bene de re publica meritus est; 2. illam habere possunt omnes, hanc pauci tantum

--- quos aequus amavit

Iuppiter, et praestans euexit ad acerbam virtutem;

3. illa opponitur infantiae, haec contemptui vel statui plebeio. Vtraque iterum considerari potest, quatenus est vel in statu naturali, vel quatenus in statu civili reperitur; sic e. g. Imperatori Rom. German. a Regibus praerogativa conceditur, quum alias in statu naturali omnes sint aequales; haec *intensua* est *existimatio*. Tartarorum Regis, ut et Algiriensium, Tunetanorum, Tripolitanorum fama vacillat ob latrocinia et piraticam; haec ad *existimationem simplicem* pertinent. Et tamen hi omnes vivunt inter se in statu naturali; de statu civili ne quidem dubitari potest, in eo diversam esse hominum *existimationem*.

§. 3.

III. Iam primum de simplici agit auctor, et quidem quatenus consideratur 1. *in statu naturali*, §. 3-6. 2. *in statu civili*, §. 7-10.

Quum *simplex* pro fundamento habeat, si quis nihil mali fecerit, (§. 2.) male autem faciat, qui contra leges facit; in statu denique naturali nullae sint leges praeter ius naturae; consequens

Heineccii Prael. Pufendorff.

P p

est,

est, ut in eo consistat existimatio simplex in statu naturali, si quis nihil contra ius naturae faciat. Hinc diximus laborare existimationem Tartarorum, Algerensium, cet. quod latrocinium et piraticam faciant, quae iuri naturae repugnant. Vbi ergo tale nihil populo potest exprobari, salua eius esse censetur existimatio.

Itaque 1. non statim existimatione carere dicitur populus, qui contra consuetudines gentium facit, si illa in iure naturae non habeat fundamentum; solide ergo CICERO in *Orat. pro Flacco* Iudaicam gentem pro infami habet, quod Deos et sacra reliquarum gentium contemnat. Ita dici non poterat Pontifex Innocentius violasse ius gentium, quum legatis concedere nollet ius asyli, id enim ex iure naturae non descendit; 2. non magis existimatio deneganda populis, qui minus elegantiae vitae et doctrinae student; hinc stolidum fuit Graecorum de barbaris iudicium, quasi ideo natio plane omnis existimationis esset experta, quod Graeco more non viuat; quum plures barbari Graecis multo humaniores, castiores, frugatiores fuerint; de hac porro existimatione simplici in statu naturali quaeritur 1. *quando integra sit?* §. 4. 2. *quando deminuat?* §. 5. 3. *quando consumatur?* §. 6.

§. 4.

Integra est, quamdiu quis nullo enormi facinore contra ius naturae et gentium dolo malo admissio alios laesit. Quum enim in statu naturali existimatio simplex pro fundamento habeat ius naturae et gentium: sequitur, ut nullo existente contra illud admissio facinore ea existimatio salua sit.

Dicimus vero 1. *facinus* esse debere enorme et apertum; nam lapsus humano generi communes non statim hanc existimationem laedunt; e. g. Augustus quoque suis vitiis laborabat iuri naturae aduersis, e. g. ambitione et dominandi libidine, adulteriis, cet. quia tamen nullum eius facinus enorme patefcebat, salua ac integra erat eius existimatio.

2. *Dolo malo admissum*; nam si quid ex errore vel praecipitantia fiat, non statim existimatio haec perimitur, modo sequatur poenitentia et satisfactio; sic Abimelech non ideo amittebat existimationem, quod Saram Abrahami uxorem ex ignorantia domum duxerat.

3. *Quo alii laesi*; si ergo eo facto nemo laedatur, non ideo amittit existimationem; e. g. Tiberius tam largiter se inuitabat in coniugiis, ut pro Claudio Tiberio Nerone Caldius Biberius Mero dicere,

diceretur; ideo tamen non excidebat existimatione, quia ebrius neminem laedebat. At laborat fama Alexandri M. quod ebrius Clitum occidit, vrbes incendit, veluti Persepolin. Quum ergo in statu naturali nullo admissio facinore enormi salva sit existimatio simplex, facile patet origo regulae: *Quilibet praesumitur bonus, donec probetur contrarium*; contrarium enim non aliter probari potest, quam probato facinore aliquo enormi. Sed regula haec aequae in statu civili, quam in naturali valet, adeoque ab auctore ad hunc locum non satis commode refertur.

§. 5.

Si scimus, quamdiu salva et integra sit existimatio, non obscurum esse potest, *quomodo deminuat*? si scilicet ab eo, qui in statu naturali viuit, vnum vel alterum factum enorme aduersus ius naturae et gentium admittatur, nam 1. tunc nemo cum eius modi homine tuto in societate viuere potest; semper erit periculum, ne, qui semel malus fuit, semper talis sit; 2. sequitur id ex regula contrariorum, si enim integra est existimatio nullo tali facinore admissio; deminui eam oportet, admissio tali facinore, multoque magis eo frequenter admissio.

Possset quis existimare, plane consumi tunc existimationem: sed non consumitur statim, si sequatur poenitentia et satisfactio; haec enim purgat dolum malum, sine quo existimatio non laeditur; hinc quum Carthaginienles pacem cum Romanis abruptissent, et Saguntum delessent, legatos misere Romani, qui satisfactionem peterent; ea praestita et famam seruassent et rem publicam; sed denegata illa adeo consumta existimatio, vt passim in prouerbum abierint: *Punica fides, Poeni foedifragi*, cet.

§. 6.

Denique in statu naturali plane consumitur existimatio 1. vitae genere et instituto directe spectante ad aliorum detrimentum; quin sic plane fit, vt nemo cum his pacem colere possit. Auctor huc refert in maiore opere *libr. VIII. cap. 4. 5.* lenones, fures; sed hi raro in statu naturali viuunt; potius eo pertinent Arabes, Tartari latrocinantes, Afri piraticam facientes; 2. qui satisfactionem offerunt, sed ita, vt ab illo instituto discedere nolint; sic saepe quidem naues captas restitunt Afri, maxime vbi maiorem vim ti-

ment, sed piraticam tamen nihilominus facere pergunt ; hinc eorum exstimatione eo ipso non reparatur.

Ceterum effectus huius infamiae in statu naturali est , 1. quod tempore pacis in aulis et ab extraneis principibus eo honore non perfruuntur, quo aliae res publicae : hinc legatis Tartarorum et Asrorum parum honoris exhibetur ; 2. quod in bello iura et leges victoriae mitioris vix aduersus illos obseruantur ; 3. quod foedera nulla cum istis pangantur, nisi in odium tertii ; 4. quod fides non habetur, nisi obliques dent, vel alio genere cautionis se obstringant.

§. 7.

Iam de exstimatione simplice intra ciuitatem ; eius fundamentum non est tantum ius naturae, sed et leges ciuiles, quippe quibus ciues aequè obstringuntur, ac iure naturae ; quidquid ergo leges ciuiles prohibent, vel expresse, poenam infamiae comminando, vel tacite, statuendo poenam corporis adstrictam famosam, id infamia notat ; e. g. si vidua intra annum luctus nubat ; si quis ob furtum fustibus caeditur.

Itaque recte definitur *exstimatio in statu ciuili*, quando quis ita secundum mores et leges ciuitatis viuit, vt pro idoneo ciuitatis membro habeatur ; differt ergo a statu naturali, 1. quod ibi respicitur tantum ad ius naturae ; hic tantum ad ius ciuile ; 2. quod eius effectus sit, vt quis pro idoneo membro generis humani habeatur, hic pro idoneo membro ciuitatis ; e. g. qui in scenam prodibant mercede conducti, ideo non desinebant esse membra idonea generis humani, sed non erant amplius idonea membra ciuitatis Romanae.

Haec *infamia* recte diuiditur in *iuris* et *facti* : 1. illa contrahitur per factum legi prohibitiuae aduersum, e. g. per furtum ; haec per facta honestorum virorum iudicio turpia ; e. g. per vitam dissolutam ; 2. illa non reparatur, nisi per restitutionem famae a principe factam ; haec sola emendatione ; exemplum The mistoclis apud COEN. NEPOT. in eius vit. cap. 7. De ea quaeritur 1. quomodo desiciat et consumatur ? §. 8. 9. 2. an inuito eripi possit haec exstimatio ? §. 10.

§. 8.

Descere exstimationem in statu ciuili obseruat auctor vel per statum, vel per delictum.

Per

Per statum siue natura non turpem, e. g. per seruitutem; siue natura turpem, e. g. per latrocinium, cet.

Sed quamuis seruitus contemptum pariat, pro infamibus tamen haberi nequeunt serui; non quidem credebatur eorum testimonio nisi tortura confirmato; sed id durissimum.

Nos generaliter teneamus, vitae genus, quod nihil in se naturaliter turpe habet, contemptum quidem parere posse, non infamiam; ob definitionem existimationis simplicis, quam paullo ante dedimus; hinc frustra infamibus accensentur spurii, castratores suum, lictores, cet.

Aliud de statu in se turpi, is enim nihil est, nisi delictum continuatum, adeoque existimatio cum eo consistere nequit. Neque obstat, quod inter se seruent iustitiam, quod de furibus et latronibus Aegyptiacis testatur HELIODORVS, *libr. V.* Non enim est virtus, ubi non aequalis est actionum omnium cum lege conuenientia.

Sed quaeritur, *an isti homines iure communi priuentur?* Resp. aut leges eos usu iuris communis excludunt, aut non: si prius, ne tolerari quidem in re publica debent; tantum abest, ut iuris communis civilis fauorabilis sint participes, posteriore eius omnino sunt participes. Hinc stulta decisio Metelli, quam tamen laudat VALER. MAXIM. *VII. 7.* qui Vecillo lenoni bonorum possessionem negabat, quod leno esset, quum tamen lenones publice tolerarent Romani. Stolidi decisio Aemilii Consulis, qui ideo rescidit possessionem Genucio Sacerdoti Bonae Deae datam, quod Eunuchus esset, quum tamen alii sacerdotum hoc non conferrent aliis, quam exsecris.

Contra sapientius Praetor negauit, se actionem iniuriarum daturum ei, qui domum colludentibus aleatoribus praeberit, *L. 1. D. de aleator.* Reprehendunt hoc nonnulli, sed parum memores, non impunem fuisse hanc iniuriam, sed tantum satisfactionem priuatam negatam esse huic patrifamilias.

§. 9.

Ob delictum etiam deficit existimatio simplex, sed non tamen ob omne, id enim inhumanum esset, et rei publicae noxium, *L. 1. C. de mod. mult.*

Sed distinguendum, 1. inter leuia et enormia; ob illa enim fama hominum non laetanda, e. g. si quis inuito abstulerit frustum panis; 2. inter ea, quae iuri naturae et communi tranquillitati repugnant; prioris generis infamant, e. g. latrocinia, turba, adultera,

ria, crimen laesae maiestatis; 3. inter dolosa, culposa, et casualia; ista infamant, e. g. homicidium dolosum et proaereticum; illa contemptum pariunt, et levis notae maculam, e. g. si medicus ob homicidium culpосum damnatus sit; haec nec cum infamia, nec cum contemptu coniuncta sunt, e. g. homicidium casuale, moderamen inculpatae tutelae. Prudentiae tamen legislatoriae est famae parcere, quantum fieri potest, nam 1. ita multa sunt inidonea rei publicae membra; 2. ita spes emendationis praeciditur; 3. ita totae familiae, et maxime innocentes coniuges liberique per indirectum puniuntur.

§. 10.

Denique quaeritur. *an simplex existimatio alicui inuito possit eripi?* Id recte negat auctor; nam 1. ea semper nascitur ex factis turpibus, siue iure naturae, siue legibus civilibus prohibitis; deficiente ergo huius modi facto, tamquam causa, cessat effectus; 2. ne Princeps quidem posset, si vel maxime vellet, innocenti et nullius criminis convicto famam eripere; nam fama est, benigna aliorum sententia vel iudicium de nostris actionibus; in opinionem autem hominum et iudicium nihil licet Principi, quia pertinet ad intellectum.

Hinc quum Praetor ob metum, qui cadit in virum constantem; se restitutionem in integrum daturum promiserit, excipit tamen casum; si quis iniecerit metum infamiae; L. 8. §. 2. *D. de his, qui noi. infam.* ex ea ratione, quod has minas exsequi non possit priuatus, ac ne Princeps quidem, si alteri hic murus aheneus est,

Nil conscire sibi, nulla pallescere culpa.

Si tamen dicendum quod res est, merito haec exceptio non debet attendi: quamvis enim nemo possit alterum vere infamem facere, potest tamen eum calumniando maxima adficere ignominia; e. g. minatur quis innocentissimo, se effecturum, ut infamis fiat, quia principis laeserit maiestatem; potest hic sane virtuti suae se inuoluere, et has minas contemnere; sed vereri tamen debet, ne rapiatur in vincula, ne dirae quaestiones de eo habeantur. Quod sane ignominiosum est ex opinione hominum, si vel maxime absoluat.

§. 11.

Progredimur ad alteram partem de *existimatione iniensua*, cuius consideratur 1. *natura*, §. 11. 2. *fundamenta*, §. 12-14. 3. *effectus*, a) *in statu naturali*, §. 15. b) *in statu civili*, §. 16.

Inten-

Intensua existimatio est valor personae, qui secundum merita cuiusque et virtutes, vel alia eximia, quae habet, vel intenditur, vel remittitur.

Valor personae.) Et quidem talis, qui dat praerogativam prae aliis; unde a simplice differt, cuius effectus tantum est, ne quis pro infami habeatur; simplicis ergo effectus est negatiuus, intensivae positivus, qui se exferit in honore, praecedentia, titulis, cet.

Merita et virtutes.) Haec prima causa; sic insigni honore persequimur homines fortes, prudentes, doctos, maxime si bene meriti sint de re publica, speciminaque virtutis insignia ediderint.

Alia eximia.) Nam saepe et merita, et virtutes defunt, et tamen aliis quis praefertur, quia eximii quid habet, e.g. splendorem natalium, opes ultra sortem privati.

Intenditur vel remittitur.) Quamvis enim statum suum quis retinere possit, decrefcentibus etiam meritis, valori tamen eius multum decedit; hinc Nero, quum exacto quinquennio imperii primo in quacvis flagitia et opprobria praeceps rueret, existimationem intensivam paulatim amisit.

Quum itaque effectus huius existimationis intensivae sit HONOR: quaeritur, quid sit? Resp. honor est benignum de alterius virtute et actionibus iudicium. *Venerationem enim habet*, inquit PLINIVS, *quidquid eminet.* Jam vero aut pauci de actionibus nostris benigne iudicant, aut multi, aut omnes: primo casu honor ille vocatur LAVS, altero FAMA, ultimo GLORIA.

Hinc vanum fuit Veterum somnium de honore immortalis; moritur enim gloria quotidie, quoties moritur homo, quia in hominis opinione consistit; vera virtus non quaerit honorem, sed inuenit, cum non adfectatur, sed asseclam et veluti pedisequam habet.

§. 12.

Iam de fundamentis existimationis intensivae, quae sunt duorum generum: alia producant aptitudinem tantum, vel ius imperfectum, alia ius stricte dictum perfectum.

Aptitudinem producant, quaecumque digna sunt honore, eius tamen possessionem vel quasi nobis non tradunt, e.g. vir doctus et prudens dignus est, qui consulatur, vel alia dignitate fungatur, nec tamen illa semper actu fruitur; habet ergo ob prudentiam tantum ius imperfectum; 2. ius producit, e.g. electio, in qua quis om-

no

ne punctum tulit; si quis Consul eligitur, ei erit ius perfectum et stricte dictum.

§. 13.

Fundamenta existimationis intensivae imperfecta sunt omnia, quae excellunt, siue vera bona sint, siue adparentia.

Quum enim honor consistat in opinione hominum; opinio autem hominum non semper rectam rationem, sed etiam saepe adfectus pro norma habeat, potest et ea magni facere, quae non sunt vere bona, immo manifesto mala.

Hinc 1. genuina fundamenta, ob quae quis dignus honore videri potest, sunt perspicacia mentis, ingenium, doctrina, prudentia, magnitudo animi, eloquentia mascula, fortitudo, res gestae, cet. Haec enim omnia merito venerantur homines, quia praeclara et humano generi utilia sunt; 2. ea, quae cum virtute coniuncta profunt, et venerationem merentur, seiuncta potius contemptum pariant. Sic laude digna nobilitas, forma egregia, opum amplitudo, itinera in terras longinquas facta; at haec omnia nihili, si virtus desit; et tamen haec pro fundamento honoris et existimationis intensivae habentur; immo aliquando honorantur 3. quaedam vitia; tam male aliquando homines ponunt calculum, e. g. Auctor est CARPZOV. in *Praxi crimin.* sua aetate in quibusdam aulis maximi fieri solitos esse homines bibaces, quos venerationis causa politicos vocarint; et quis ignoret, fuisse tempora, quibus magno honore fruerentur homines pugnaces.

§. 14.

Haec omnia tantum ius imperfectum tribuunt; nam ideo non semper quis fruitur honoribus, quia iis dignus est prae aliis, sed ob alias causas, de quibus hic quaeritur.

Dicimus non ideo honoribus aliquem frui, quod iis dignus sit; nam 1. anceps est difficile est iudicium, quis omnibus dignior; Ferunt Alexandrum M. morientem interrogatum, quem successorem designet? respondisse, dignissimum; id ad liquidum numquam perductum, sed gladio decisum est; 2. quamvis etiam quis una re emineat, potest tamen alteri competitori inesse aliud, quod aequae praeclarum, immo praeclarior habetur; e. g. Scipione temporibus belli Punici permulti fuere seniores in rebus civilibus experientissimi, fortes, et doctiores; sed quia non opus erat senerum civilium pe-

rito

rito; erudito, sed forti et magnanimo Imperatore, is competitoribus omnibus a Romanis praeferebatur.

Contra ius perfectum ad honorem seu existimationem intensivam tribuunt non nisi tria: 1. Imperium; naturaliter enim superior est, qui imperat, inferior, qui paret; 2. Pactum, quo et electio pertinet; hinc superior omnibus Polonis est Rex Poloniae, quia electus; sufficit vero et pactum tacitum, quod ex diuturno usu et patientia praesumitur; e. g. Imperator fruitur praerogativa, quamvis nullum forte pactum proprie dictum vel expressum intercesserit; 3. Lex in statu civili: quo pertinent leges de praecedentia latae, quae suum cuique locum assignant.

Ex his, si quis aliquid pro se allegare potest, ius imperfectum habet honorem quemdam sibi vindicandi.

§. 15.

Sed iam quoque de effectu existimationis intensivae; tum in statu naturali, tam in statu civili.

Quod ad naturalem statum attinet, notum est, quanta animorum contentione de *weydeia* certent maximi Principes et Res publicae, adeo ut saepe res ad vim et iurgia redierit. Notum est, quid ea de re inter Hispanos et Gallos actum sit in Anglia, ubi legatus Gallicus locum ante Hispanum adfectans ab hoc ita cohibitus est, ut lora eorum inciderebantur. Conf. ZWANTZIG. in *Theatro praecedentiae*.

Quaeritur ergo, quae *weydeiae* fundamenta pro se allegare soleant? Recensuit illa auctor; sunt illa 1. Antiquitas regni; sed a) non sequitur; id antiquius est, ergo praestantius; b) plerumque, quae de antiquitate nimia adferuntur, fabulas sapiunt, veluti quae Historici Scoti et SAXO GRAMMATICVS de antiquissimis Scotiae et Daniae Regibus adferunt;

2. Amplitudo et potentia regni; sed a) hic quoque deficit consequentia, hoc amplum, ergo reliquis praefereendum; b) saepe et modicum regnum ob rectum regimen amplissimo quovis potentius est; sic Macedonicum Persarum Imperium destruxit; c) ita barbari reliquis omnibus praeferendi erunt.

3. Qualitas potestatis, e. g. quod quis sine limitatione et restrictione imperat; sed a) forma rerum publicarum est arbitraria; b) supra docuimus, nullam alteri praefereendam, quia omnes et commoda sua et incommoda habeant; c) ita quoque barbari iure

Heineccii *Pract. Puffendorff.*

Q q

prae

prae reliquis omnibus praerogatiuam sibi vindicabunt.

4. Splendor titulorum ; at saepe a) tituli admodum vani , e. g. Cosrois Persarum Regis , qui se fratrem solis appellauit ; hodie Turcae Sultanum salutant dominum mundi , omniumque populorum , cet. b) hi sunt arbitrarii , et pro imperantium adiectu saepe mutantur ; e. g. Russi principem suum olim vocabant Czaar , id est , Regem ; nam in bibliis Russiis et Dauid Rex Israelitarum vocatur Czaar Dauid ; fuit tempus , quom ab exteris reciperet titulum : *Gros-Fürst der Reussen* ; hodie Imperatoris axioma gerunt ; quisque Imperans potest in regno suo quemcumque titulum adsumere , quamuis non semper cogere possit exteros , vt eundem illi honorem tribuant.

Quom ergo haec omnia vana sint , *quaeritur an dentur fundamenta magis solida* ? Resp. 1. in statu naturali omnes aequae sunt liberi , omnes independentes , ergo omnes aequales , ergo nemo alteri praefereendus.

2. Potest tamen ex post facto contingere , vt cui praerogatiua competat ratione alterius : quom enim praerogatiua vel existimatio intensiua , ceu ad superiorem paragraphum notauimus , vel nascatur ex imperio , vel ex lege , vel ex pacto : satis patet , duos priores modos huc non quadrare ; imperans enim in imperantem nullum habet imperium ; nec in statu naturali communis est legislator , qui singulis imperantibus locum adsignare possit ergo superest.

3. Pactum ; si ita conuenit inter principes , vt vnus alteri praefratur , standum est ista conuentione.

Tale pactum potest esse vel expressum , vt vnus loco alteri cessurum expressis verbis promittat , quamuis haec fortassis sint rarissima ; vel tacita , quae ex diuturno vsu et patientia colliguntur . Ita Imperatori Romano-Germanico per tot saecula praerogatiuam nemo dubiam reddidit , adeoque recte colligitur , pacto et consensu tacito ei a reliquis concessam esse *apud eos*.

§. 16.

In statu civili res minus est dubia , ibi enim omnia fundamenta existimationis intensiuae , quae ius perfectum tribuunt , locum habent.

Est in re publica 1. Imperium ; ergo quicumque alteri quouis modo praestit , imperium in eum exercet , ille gaudet *apud eos* ; e. g. magistratus et ministri prae ciuibz reliquis ; duces et officiales bellici

bellici prae militibus; pater prae filio; maritus prae vxore, cet.

2. Lex; Imperans enim potest et solet cuius locum pro lubitu assignare; vbi quidem a) principis est, merita cuiusque status considerare, et prout utilis ille est rei publicae, ita ei assignare locum; sed b) cuius quoque est, adquiescere in loco sibi a principe assignato, eumque prudenter ornare.

3. Pactum; quaeritur vero, *an et pacto quis locum priorem sibi stipulari possit in re publica?* distingue inter casus, vbi ~~quidem~~ lege certa est definita, et vbi lex deficit, vel dubia est, et princeps rem decidere nolit; priore casu pacto ciuium non est locus, a) quia contra legem non licet pacisci, et b) res cum magno praecudio successorum esset coniuncta; posteriore casu nulla est ratio, cur pacto res decidi nequeat, et huius modi exempla passim exstant.

CAPVT XV.

DE POTESTATE SVMMI IMPERII IN
BONA CIVITATE CONTENTA

§. I.

Vidimus, quid summo imperanti in VOLVNTATEM, quid in VITAM, ac porro quid in EXISTIMATIONEM ciuium liceat; iam dispiciendum, quid liceat in eorum BONA.

Ius vero Imperanti in bona ciuitate contenta esse, patet 1. ex natura ciuitatis; in re publica debet esse vnio virium; ad vires vel maxime pertinent bona seu pecunia, rerum gerendarum neruus, ergo ea vnienda, et Imperanti in eam est ius; 2. a maiori ad minus argumentando; quum enim et in vitam et famam imperanti ius sit, si id exigat rei publicae salus, quidni in opes.

Id quale sit, ostensurus auctor distinguit ciuitates, vbi bona abs summis imperantibus in ciues profecta sunt, et vbi ea ciues sibi propria industria quaesierunt; priore casu ius hoc imperantis absolutum esse putat, posteriore restrictum.

Sed prior 1. casus fingi nequit. Errat ergo HOBBESTVS, *de ciue; cap. 16. §. 15.* dum statuit, ciuium priuatorum dominium excludere quidem conciuies, non autem Imperantes; exemplo filii fa-

Q q 2

milias;

miliis; 2. proprietatem omnium bonorum penes solum imperantem esse non requirit rei publicae finis; 3. regna despotica, vbi Rex dominus omnium bonorum ciuitate contentorum, vel in calamitate publica exstiterunt, veluti in Aegypto sub Iosepho in summa annonae caritate, vel per vim apertam, aut ob seruire subditorum ingenium nata sunt. Iure autem gentium Imperanti soli rerum omnium dominum tribui nequit.

Itaque dicendum, bona quaedam esse I.) *privata*, et quemque ciuem posse rerum suarum dominum esse, at principi tamen in bona illa, cuiuscumque in dominio sint, ius triplex competere: 1. *ut possit de usu bonorum illorum leges praescribere ciuibus*, §. 2. 2. *ut illis possit tributa et vectigalia imponere*, §. 3. 3. *ut possit in casu necessitatis exercere dominium eminens*, §. 4. 4. *quaedam e contrario bona ciuitate contenta esse*; II.) *publica*, de quibus, §. 5. 6.

§. 2.

Primum ius summi Imperantis consistit in potestate leges ferendi circa bonorum usum; quum enim vniio virium necessaria sit in re publica, vires autem iuri non possint, si prodigantur turpiter, consequens est, vt Imperantis sit prohibere, ne prodigantur, quod sit per leges. Hinc Imperator §. 2. *last. de his, qui sunt sui vel alieni. iur.* dicit: *expedit rei publicae, ne quis re sua male utatur.* Huc vero pertinent.

1. Leges, quae prohibent, ne bona ad extraneos perueniant, e. g. prohibita importatio mercium exportatio pecuniae, itemque, rerum, quae manufacturis nostris inferuire possunt.

2. Leges, quae ad conseruationem familiarum pertinent; e. g. ne quis de bonis auitis testetur, vt Hamburgi, Gröningae; vt cognatis sit ius retractus.

3. Leges sumtuariae; prohibita mutatio formae vestium.

4. Leges lusibus oppositae.

5. Leges oppositae prodigis, inque, qui foro cedant.

6. Leges de restricta alienatione, oppignoratione, cet.

7. De modo possessionum, quibus legibus opus est, a) quoties magistratus pleraque ad se trahunt; Lex Thoria. b) quoties bona ecclesiis donantur immodice; ius amortizationis. Hinc et in Catholicorum prouinciis eius modi leges exstant, vt ecclesiae et monasteria non amplius adquirere possint bona immobilia.

Sunt

Sunt etiam quaedam leges, quae indirecte faciunt ad bona ciuium conseruanda amplificandaque, nempe 1. quaecumque ad florem commerciorum et artium opificiorumque aliquid conferunt; 2. quaecumque inhihent res sumtuosas et parum necessarias, veluti itinera et peregrinationes in terras exteras, 3. quaecumque lites et iurgia ciuium cohibent, cet.

§. 3.

Alterum est ius imponendi vectigalia et tributa. LIV. XXX. 44. *Tantum ex publicis malis sentimus, quantum ad priuatas res pertinet, nec in eis quidquam acrius, quam pecuniae damnum stimulat.* Huc ius 1. in se iustissimum est: α) viuendae enim in re publica sunt vires, β) bonis quiete fruuntur subditi beneficio rei publicae et Imperantis; ergo et aliquid ad Imperantium et rei publicae conseruationem contribuere tenentur.

2. Non abutendum est hoc iure; abutitur autem Imperans, si α) proportionem non seruet in quantitate et qualitate bonorum, e. g. agrorum; β) onera imponat rebus non fructuosis, vti supra habuimus exempla vectigalium vmbrae, aëri, vrinae, et latrinis impositorum; γ) oneret res immodice, vt subditi nullum fructum ex rebus suis capiant.

3. Hinc in plerisque rebus publicis olim id ius indicendi tributa non absolute relinquebatur principis arbitrio; sed de vectigalibus et tributis consultabatur in Comitibus: hinc vocabantur *Gaben*, *Beten*, quasi tamquam dona et precario darentur. Quin ne administratio quidem aerarii soli principi relinquebatur, sed ea simul erat penes Ordines rei publicae, quod et hodiernum in multis regnis et principatibus obseruatur. In Anglia administratio quidem relinquitur Regi, sed ita, vt rationes reddat Ordinibus.

§. 4.

Tertium ius est *dominium eminens*; inuidiosum vocabulum. Est autem ius summi Imperantis, quo ei licet bonis priuatorum vti, quoties id exigit rei publicae necessitas.

Primus hoc inculcauit GROTIUS, sed ita, vt sufficere putaret utilitatem rei publicae, quamuis necessitas non vrgeret; ex eo principio Zeelandi Marchionatum Veram et Vlissingam sibi vindicant; quia hoc vile futurum sit rei publicae. At BOECLERVS, cuius ea-

de re exstat singularis dissertatio, hoc merito refellit, idque ius eleganter comparat factō Achabi, qui Nabothis vineam concupiscēbat, ut inde sibi hortum adornaret.

Potius ergo dominium emineus his limitibus circumscribendum, 1. ut necessitas hoc exigat; ea non habet legem; et quum imperanti tunc ius sit in ipsam ciuium vitam, multo magis ius erit in eorum bona; 2. ut ei, qui inde detrimentum pāssus est, satisfiat a reliquis ciuibus. Quum enim alter prae altero praegrāuari non debeat, facile patet, ei, qui praegrāuatur, deberi satisfactionem et iudemnitatem, nisi omnes eadem necessitas stringat.

Hinc locus, est huius dominiū eminentis exercitio, 1. si fundus occupandus, et castra ibi ac munimenta construantur; 2. si res subditorum deuastandae, ne hostibus cedant; 3. si naues auferuntur, ad milites transportandos; 4. si pabulatum exeunt milites in agros priuatorum; 5. si in obsidionibus priuatorum agri occupantur, arbores caeduntur; 6. si urgente fame granaria priuatorum recluduntur.

§. 5.

II. Iam ad *bona publica*. Res publica est persona moralis; est ergo veluti persona, adeoque possidet bona, quae vocantur populi, vel publica, quasi populica.

Ea diuiduntur ab auctore in *aerarium* et *fiscum*, rectius in *aerarium*, *fiscum*, et *patrimonium principis*.

Differunt 1. ratione finis; aerarium destinatum est vñibus rei publicae; fiscus sustentationi principis; patrimonium familiae principis, e. g. ut et appanagiati in posterum aliquid accipiant bonorum immobilium; 2. ratione iurium; in aerario princeps habet administrationem, non tamen semper priuatiue et solitarie; in fisco vñstructum; in patrimonio dominium. Hinc olim Romae aerario praerant Praefecti aerarii, fisco Procuratores Caesarum, patrimonio Comites rerum priuatarum, quorum saepe mentio sit in iure nostro; 3. ratione attributorum; res immobiles aerarii et fisci sunt inalienabiles, patrimonium alienabile. Hinc semper damnatae leges agrariae, seu de agro publico diuidendo, de quibus celeberrimus BYRMANNVS in *Dissert. de uectigalibus populi Rom.* Semper vñsum, reuocari posse domanialia ab antecessoribus alienata: ius in se non iniustum, quamuis in hypothesi saepe accenseantur bonis domanialibus, quae talia non sunt.

§. 6.

§. 6.

Subiungit auctor quaestionem, *an ipsum regnum possit alienari*? Distinguendum, an regnum sit patrimoniale, an usufructuarium: illud alienari potest, hoc non potest nisi consensu populi; 1. quia princeps in eius modi regnis non habet plus iuris, quam ipsi a populo concessum; id ius autem ei non concessum; 2. electa est personae vel familiae qualitas; ergo alius imperans inuitis civibus non obtrudendus.

Nec interest, totum regnum, an eius pars alienetur, nam et tunc onus in reliquis incumbit: sed posterius habet exceptionem, si ex necessitate pacis ineundae causa fiat alienatio partis regni; tunc enim quum finem velint subditi, nempe pacem, velle etiam debent media; hinc non iniusta fuit alienatio Minorcae, Gibraltaris, facta ab Hispanis in Anglos; prouinciarum quarundam et vrbium Suecicarum in Russos, Danos, cet.

Denique vti Imperans alienare nequit regnum vel regni partem: ita nec abrumperе se debet pars altera inuita; id enim pro rebellionе esset habendum, e. g. Corsi subducere se volebant iniustissime rei publicae Genuensium.

Attamen nec hic necessitatem habere legem facile patet: hinc si hostis partem auellit, etiam haec iure praestat homagium.

CAPVT XVI.

DE BELLO ET PACE.

§. 1.

INter iura maiestatis, de quibus adhuc ex instituto actum, est etiam IUS BELLI ET PACIS, idque adeo magni momenti, vt GROTIUS ideo totum ius gentium publicum vniuersale ius belli et pacis vocarit, atque ita inscripserit opus suum incomparabile.

Agitur hoc capite 1. *de iustitia belli*, §. 1-4. 2. *de modo bellum gerendi*, §. 5-11. 3. *de acquisitionibus per bellum*, §. 12-14. 4. *de contrario belli, id est, de pace*, §. 15. *ad fin.*

De iustitia belli duo quaeri possunt: 1. *an in genere bellum geri*

geri liceat ? §. 1. 2. *quaenam in specie sint causae belli specificae ?*
§. 2-4.

1. Quinam in genere bellum pro illicito, aut saltem pro indigno Christianis certandi genere habeant, supra vidimus *b. l. cap. 8. §. 5.* vbi et ERASMI argumenta profligauimus, quae iam repetere nihil attinet.

At quia hic ita dissentit HOBBSIVS, vt in alterum extremum ruat, et bellum pro statu hominis maxime naturali venditet, etiam huic satisfaciendum erit.

Naturale dicitur, quod aut a Deo inditum est creaturis, adeoque ex Dei intentione omnibus inest, quo sensu viuere, edere, bibere, dormire homini naturale esse diximus; aut *naturale* vocamus, quod rationis dictamini congruit, quo sensu conseruationem sui, procreationem et educationem sobolis, immo totum ius, quod ratio constituit, naturale vocamus.

Neutro sensu bellum pro statu maxime naturali hominis haberi potest, quia nec ad id nos Deus creauit, vt bella gereremus; nec rationi hoc consentaneum est, vt populus populum laedat, sed vt pacem colant.

Quemadmodum vero multa in se non sunt naturalia, quae tamen in statu extraordinario necessaria et rationi consentanea sunt, veluti venae sectio, resecatio membri putridi, vlsulatio, cauterium: ita et bellum in statu hominis extraordinario est iustum. Pax colenda, (hic est status naturalis et ordinarius hominis): at si pacem colere non licet per aliorum iniurias, bellum gerendum.

Quid vero est *bellum*? est status societatum liberarum de iure controuerso inter se vi certantium, et propositum certandi retinendum.

Status.) Non actus; nam saepe actus non inter se certant bellicgerantes, e. g. hyeme; vel si mari bellum geritur, et classes in portum subducuntur, et tamen manet bellum.

Societatum liberarum.) Nam quae aliorum imperio subsunt, belligerandi ius non habent, quia habent iudicem suum; hinc detestanda bella ciuilia, bella priuata, rebelliones seu bella inter imperantem et ciues.

De iure controuerso.) Est enim bellum modus litigandi in statu naturali, ergo plus, quam barbarum est, bellum honoris et gloriae, aut latrociniorum, aut amplificandi territorii causa gerere; hinc Alexander vocatus latro totius orbis,

Vl.) Nondum ergo est bellum, vbi tantum calamis digladiantur inter se principes, vel legati inter se disputant.

Proposium certandi retinentium.) Pertinet haec clausula ad tempus induciarum; saepe enim suspenditur vis armorum ad tempus, vel breue, vel longum: vbi quaeritur, *utrum illae induciae ad belli, an ad pacis tempus et statum pertineant?* Resp. ad bellum, 1. quia adhuc certandi propositum remanet; 2. quia ius controuersum nondum ad liquidum perductum est.

§. 2.

At quanam in specie causae belli iustificae? Hic ante omnia distinguendum inter causas *iustificas*, *politicas*, et *praetextus*: 1. causae iustificae sunt, ob quas bellum dicitur iustum, e. g. vim vi repellere; 2. causae politicae, ob quas bellum habetur rei publicae vtile, e. g. Cato decernebat Carthaginem delendam; 3. praetextus sunt causae iustae, sed in facto falsae; e. g. lupo conquerebatur, ouem sibi aquam turbidam reddidisse.

Nos loquimur de primi generis causis, quarum tres statuit GROTIUS, de iur. bell. et pac. lib. 1. 2. a) vindicationem iuris ab altero nobis iniuste interuersi; talis erat causa, ob quam gerebatur bellum Hispanicum; eo etiam pertinet laesio, ob quam satisfactio denegatur; hinc Sagunto exciso Romani bellum inferebant Carthaginensibus; b) propulsationem vis iniustae; e. g. si quis armis nos adgrediatur, quem nulla iniuria laesimus; c) poenam; si gens enormi facinore contra ius naturae admissio se polluerit; quale bellum ab Israelitis gestum Iud. XVIII. Sed causam postremam falsam esse, iam supra demonstraui, quia gens gente non est superior; poena autem semper a superiore intelligenda. Vid. quae diximus supra libr. II. cap. 13. §. 5.

Remanent ergo duae causae priores; si ergo vindicamus ius nobis per iniuriam interuersum, bellum erit OFFENSIVVM; sin propulsamus vim iniustam, DEFENSIVVM.

Itaque facile deciditur quaestio, *an omne bellum defensuum sit iustum?* Negatur, quemadmodum nec omne offensuum iniustum est; culpa non redit in auctorem pugnae, sed in eum, qui alteri fecit iniuriam, siue adgressus sit, siue non.

Quaeritur etiam, *an laesionem, quae bello gerendo sufficiat, magnam esse oporteat, et quantam?* Resp. quantacumque sit, vel quantacumque, perinde est, nam 1. laedens etiam nos in re minima

Heineccii Prael. Pufendorf.

R r

et

et satisfactionem denegans, hostilem animum declarat; 2. qui in minimo laesit, plura et maiora adfectabit, simulac fuerit occasio; 3. quemadmodum in statu civili ne minimam quidem iniuriam pati timeor, sed semper mihi integrum est, actionem eo nomine institueret, ita et de bello idem sentiendum, quippe quod loco actionis civilis est in statu naturali.

Alia vero quaestio est, *an prudenter agat, qui ob causas nullius momenti ad arma ruit?* iustum est, ob rem minimam actionem instituire, sed non ideo prudenter agit, qui id facit, sumptibusque duplo maioribus rem minimi pretii vindicat; ita et de bello statuentum.

§. 3.

Hinc recte suadet auctor, antequam belli aleae res committatur, experiunda esse quaevis, ut de controuersia amice transigatur.

Eleganter CICERO, *de offic. l. 11. Quum duo sint genera decernendi, unum per disputationem, alterum per vim: quumque illud proprium sit hominis, hoc belluarum: confugiendum est ad posterius, si vii non licet priore.*

Habet hoc iustus causas, nam 1. omne bellum etiam iustum cum clade subditorum coniunctum est; 2. sumtus immeusi requiruntur; 3. res aleae plena est, et tam qui iustum bellum gessit, quam adgressor succumbere potest.

Hunc in finem prodita 1. colloquia, deductiones, legatorum conuentus; 2. prouocatio ad arbitros, sponsores; sic Athenienses et Megarenses de Salamine compromiserunt in Iacedaemonios; 3. addit auctor in maiore opere *libr. VIII. cap. 6. §. 3. sortem*; Commendant quidem hoc medium CHRYSOSTOMVS, *Orat. de fortuna*, AVGVSTINVS, *de doctrina Christiana, libr. 1. c. 28.* GROTIUS, *de iur. bell. et pac. II. 23. 9.* sed id parum prudens consilium.

Hinc facile apparet, quid sentiendum de bello repraesentatiuo, si causa per duellum decidatur; tale quid factum inter Aeneam et Turnum, inter Horatios et Curiatios, de quibus Metius Suffetius apud LIVIUM *libr. III. Ineamus aliquam viam, qua vter vteri imparet, sine magna clade, sine multo sanguine viri,que populi decerni possit.*

Certamen eius modi singulare in se non iniustum est: 1. si enim licet in statu naturali integros committere exercitus, quidam
etiam

etiam pauciores? 2. ita res reuera in compendium mittitur, partiturque sanguini.

Sed consultum id numquam est, quia incertus sum, an alter sit fidem habiturus viribus integris; 3. quia sic nullum superest remedium emendandi cladem, quum contra iam iusto bello raro res vno praelio transigatur.

§. 4.

Vidimus iustas bellorum causas: iam de iniustis; quibus plerumque illae iustificae praetexuntur; eae vel

1. Apertae, quarum iniquitas et iniustitia in oculos veluti occurrit; quales a) auaritia et cupiditas fines proferendi, qua inprimis laborabant Romani, quidquid pro iis differat ALBERICVS GEN-
TILIS in libello *de iustitia armorum Romanorum*, b) Gloriam studium, quo laborabat Alexander M. Absurda ergo sententia Rabino-
rum, qui Israëlitas existimant bella gerere, et populos subiugare potuisse ex decreto synedrui sine alia iusta causa, modo id fecerit ad augmentum gloriae Israël. Vid. SELDENVS *de iur. natur. et gent. secundum disciplin. Hebraeor. VI. 3. et 12.*

2. Subtiliores, quae facilius pallio iustitiae velantur; quales a) metus ex vicini potentia; haec iniusta causa, nisi potentia illa iniuste quaesita; b) metus ex vicini apparatu; haec quoque causa iniusta, nisi certis argumentis constet, alterum arma aduersus nos parare; c) utilitas iure destituta; e. g. Turca iam sollicitatur a Gallis ad arma contra Imperatorem, quia commodissima sit occasio amissa recuperandi; d) cupiditas sedes nouas quaerendi; inde notum bellum Cimbrorum cum Romanis; non possunt enim nouae sedes occupari, vbi non est vacua possessio, aliisque iam est ius quaesitum.

§. 5.

Haec de prima parte; iam II. *de modo gerendi bella*; vbi primo quaeritur, *virum bella vi tantum aperta gerenda sint, an et dolis et stratagematibus vi liceat?*

Adfirmant hoc plerique; Cleandrites apud POLIAEN. *Stratagemat. libr. II. qua leonina non pertingit, vulpina adsuenda est.* Et quidem non male; Nam

1. Hosti licet nocere; id quum et stratagematibus fiat, quidni his vtendum?

R r 2

2. Ita

2. Ita parcitur multo sanguini, et sic finis facilius attingitur.

3. Saepe id necessarium est ob virium inaequalitatem.

4. Ipse Deus heroibus veteris testamenti stratagemata praescripsit, veluti Iosuae in capienda vrbe Ai.

Enim vero quum hac in re facile quis possit a iustitiae regulis desistere, distinctione opus est. Aut hostis cum hoste agit, tamquam cum hoste, aut tamquam cum pacifcente: priore casu circumuenire potest hostem, non posteriore; hinc turpe, hosti quoque fidem non seruare.

Recte Agcsilaus apud PLVTARCH. in eius *vita*: *fidem in foedere fallere nihil aliud est, quam Deos contemnere, hostium vero circumuentio non modo cum iustitia, sed et cum magna laude et iucundo coniuncta est compendio.*

Praeterea etiam cauendum, ne stratagemata in se sint contra honestum et decorum, qualia sunt omnia 1. quae dolo malo innocentum cladem intendunt; quamuis enim haec plane cauere non possit: tamen etiam non adsestenda est studio. Hinc ad stratagemata non pertinet infectio aquarum per venena; 2. quae decoro bellico aduersantur, e. g. vti armis vetitis, percussores, immittere capiti hostis, cet.

§. 6.

Haftenus de dolo: iam 2. de vi, de qua ius naturae et gentium commendat regulam: *Hosti in hostem in infinitum omnia licent.* Haec regula recte intelligenda; sensus non est, licere omnia in infinitum, quod ad qualitatem, vt possit quis omni scelerum genere aduersus hostem impune vti, vti VIRGILIUS existimasse videtur, dum cecinit *Aen. II. 390.*

- *dolus, an virius, quis in hoste requirat?*

nec sensus est, laedendi animum non habere debere finem; potius enim bellum debet geri propter pacem; alias homo brutis ipsis esset deterior; sed sensus est, posse quis aduersus hostem vi vti, non donec reparata sit iniuria, sed donec ille ad satisfactionem paratus sit, quamuis inter damna, quae nobis intulit et ipse passus est, nulla sit proportio.

Ratio est 1. quia, qui bellum nobiscum iniustum gerit, hostili est animo, eumque retinet, quamdiu non paratus est ad satisfactionem, ergo et laedi potest tamdiu, donec satisfaciatur, quamuis plus detrimenti patiatur.

2. Quia

2. Quia ea proportio seruari nequit in bello, ut in iudiciis, ubi auctoritas omnia moderatur, quum in bello per hostem ipsum stet, quamdiu laedi velit.

Sed tamen hunc rigorem temperat merito 1. humanitas, quae et humani generis, innocentum et posterorum rationem haberi iubet; hinc non probandum a) si praeter necessitatem omnia ferro flammisque depauperentur; b) arbores et siluae excendantur; c) victi populi in seruitutem perpetuam abripiantur, d) in victis occidendis crudelitate, stupris, similibusque sceleribus delectentur.

2. Ratio belli: est decorum in bellis ex iudicio humaniorum gentium obseruandum; hinc non probantur a) arma vetita, e. g. falces, sagittae veneno infectae; b) seruitus bello captiuorum; c) supplicium dedititiorum.

§. 7.

Ad modum bella gerendi pertinet etiam diuisio belli in *SOLLEMNE*, et minus *SOLLEMNE*, quae dupliciter potest intelligi; vel 1. de personis bellum suscipientibus; tunc sollemne est inter liberas gentes, minus sollemne inter eas, qui superiorem habent, adeoque eius generis sunt omnia bella ciuilia, priuata, diffidationes; vel 2. de ritu bellum suscipiendi, tunc bellum sollemne est, quod sollemniter indictum, minus sollemne, quod minus sollemniter. Talis ritus apud Persas erat postulatio terrae et aquae, de qua saepe *HERODOTVS*; apud Romanos indictio per faeciales, sacerdotes, qui sagminibus et armis instructi in hostium fines ibant et res repetebant, non auditi hastam in fines hostium proiciebant, cum certa imprecationis formula, de qua *BRISSON. de formul. et sollemnib. popul. Rom. verb.*

Inter Europaeos saeculo adhuc XVI. bellum indici solebat per cyrices, *Herolde*, qui certo induti vestium genere litteras diffidationis ipsi hostili Regi tradebant; quale exemplum historia refert de Carolo V. Imperatore, qui hoc ritu Francisco I. bellum indixit. Hodie id fieri solet per clarigationem, et manifesta, de quibus L. H. *BOECLERVS*, eorumque publicationem ad sonitum tubarum et tympanorum.

Quaeritur vero, an hoc *discremen agnoscat ius naturae et gentium*? Resp. priore sensu hanc diuisionem omnino esse realem, nam bellum liberarum gentium est iustum, ciuile et priuatum iniustum.

In illo capti tractantur tamquam hostes, in civili tamquam ciues; (hinc seruituti in bellis hisce non erat locus), GROTIUS, *de iur. bell. et pac. III. 3. 23.* in priuato tamquam rebelles.

At posteriore sensu res redit ad arbitrium gentium; ritus enim sunt arbitrarii, hinc et ratione populorum, et ratione temporum variant.

Illud modo obseruandum, 1. denunciationem belli non debere fieri per ritus impios, et regulis iusti, honesti, decori contrarios; sic Turcae bellum denunciant, legatos illius nationis in diros carceres abripiendo; 2. ritibus his semel receptis vtendum esse, ne alter deinde conquatur, bellum iustum secum gestum non esse; latrocinia et dissidationes in se sunt turpia, ab iis ergo vt distinguantur bella iusta, aliquo ritu opus est; 3. non violandos esse hostes conuiitiis et iniuriis scurrilibus; nam a) res agitur inter Reges magnosque principes; b) eo ipso alteri populo ius damus par pari referendi; c) litterae eius modi semel scriptae manent etiam pace inita, et perpetuo impediunt amicitiam gentium.

§. 8.

Quom ergo et personae bellum gerentes discrimen inter bella faciant; quaestio est, *quis bellum gerere possit?* Resp. gentes liberae; hinc status imperii habent quidem ius belli et pacis ratione exterorum, non autem inter se; tractae pacis rei sunt, qui arma aduersus constatum accipiunt.

Nam bellum est ob defectum iudiciorum; defectus hic tantum est in statu naturali, ubi nullus superior, non in civili et ubi superior est, ergo et in illo bellum iustum est, in hoc iniustum.

Hinc pendet solutio quaestionis, *an magistratus, e. g. praefes provinciae possit bellum indicare et gerere iniussu principis vel populi?* Neg. 1. quia habet superiorem, cuius auspiciis provinciae praeesit; 2. quia res cum periculo totius rei publicae coniuncta est. Talia inter ipsos priuatos speciale requirunt mandatum. Legatorum Fabiorum audacia apud Liv. V. 36.

Excipiuntur tamen casus, 1. si hostis provinciam adgrediatur; defensio enim semper commissa censetur praesidi provinciae; 2. si provincia sit admodum remota, vt non possit speciale mandatum expectari; hinc Batauorum praefes Indiae bella cum barbaris prius aliquando conficit, quam de eo illato nuncii aduenerunt.

Sed id fit 1. ex mandato cum libera; 2. quia bella ista Indica breui

Breui tempore confici solent, Indis artis bella gerendi et armorum admodum imperitis, et nec terra marique satis validis aduersus tot classes et munimenta, quae Bataui ibi habent.

§. 9.

Sed quaeritur, *an et ob facta non ciuitatis, sed aliena, e. g. priuatorum, bellum iuste geratur?* Resp. in se hoc fieri non potest, quia bellum est status gentium liberarum de iure controuerso inter se cessantium: ubi ergo non est ius controuersum, ibi nec bellum esse potest. Ius vero controuersum hic non inter duas ciuitates, sed inter vnā ciuitatem et priuatum, quocum bellum non geritur.

Sed quemadmodum supra in doctrina de imputatione demonstrauimus, multis modis contingere posse, ut cui alienum factum imputetur: ita id hoc casu ita contingit, 1. si Inperans vel res publica denegat satisfactionem, et potius factum defendit; hinc Galli Romam debebant, quod legati Fabii adiuuerant Clusinos, eorumque deditio denegaretur, Liv. V. 36. Corinthus funditus excindebatur, quia ciues quidam legatos Romanorum violant; ita Carthaginenses negabant suo iussu excisam Siguntum, et tamen iure bello potebantur, quia hoc Hannibalis factum probabant defendebantque, et Hannibalem poena eximebant; 2. si quis hosti receptum dat, eumque ope et consilio adiuuat; vtrumque coniungi debet: hinc ob solum profugum bellum non mouetur iure; sic e. g. ideo numquam iniuriam sibi fieri dixerunt Angli, quod Papa Iacobum Stuartum, Hispani Ducem Ormondiae receperunt. At perpetuum fere bellum erat inter Regem Angliae Guilielmum III. et Ludouicum XIII. Regem Franciae, quia hic non modo receperat Iacobum II. Regem ex Anglia profugum, verum etiam pecunia, nauibus, militibus iuuabat ad inuadendam Hiberniam.

Quid vero si profugi petatur deditio? Ha non semper iure petitur, si nimirum paratus sit princeps, ad quem alter profugit, ad iustitiam administrandam, et sane, si innocens est, cur dederetur? sin nocens, cur non aequè puniri posset a iudice deprehensionis, quam in foro delicti?

Enim vero circa huius modi priuatos raro solet oriri contouersia; nam vix vnus priuati causa bellum sibi arcesset Princeps, si aliae desint; nec deditioem admodum urgebat natio, si periculum

fit, ne inde bellum nascatur. GROT. *de iur. bell. et pac.* II. 21; 3. *seqq.*

Attamen si Princeps imperii priuatum proscriptum ex Imperii decreto recipiat, ipse quoque in proscriptionem potest incidere, Exemplum Io. Friderici, Ducis Saxoniae, Grumbachium recipiens Gothae notissimum est.

§. 10.

Quum vero casu, qui superiore paragrapho explicatus est, magis plerumque repressaliis vtantur gentes, quam bello: quaeritur, quid sint repressaliae?

Repressaliae sunt ius, quo Imperans vtitur, quum sibi vel subditis iustitia denegatur, vt gentis istius bona tam diu arresto constringantur, donec sibi suisque satisfactum sit; e. g. Fridericus Guilielmus frustra a Rege Hispaniae exegerat aes alienum, ergo ar-mabat nauem, et Hispanicam nauem interceptabat.

Differunt hae ab arresto; a) arresto enim constringuntur bona debitoris, repressaliae etiam ad bona non debitoris pertinent, modo eiusdem sit nationis; b) arrestum forum fundat, non repressaliae.

Officia circa repressalias sunt: 1. non vtendum repressaliis, nisi iussu magistratus; contra sentiunt GROT. III. 2. 7. BODIN. *de re publ.* I. 10. a) quia vis prohibita priuatis; b) quia saepe sunt belli praeludium: at solide eos refellit ZIEGLERVS;

2. Non plus retinendum ex rebus interceptis, quam ad exsoluendum debitum requiritur; sic enim non esset satisfactio, sed laesio, si e. g. pro debito 10000. imperialium retineretur nauis 100000. imperialium.

3. Is, qui bona amisit, regressum habet aduersus debitorem; et hinc etiam iure potest petere, vt iura sibi a creditore cedantur, quo ex iure etiam cesso aduersus debitorem agere possit.

§. 11.

Denique quum repressaliis vi vtamur contra alium, quam qui nobis debet, quaeritur, *an et vis adhiberi possit pro aliis*, id est, *an pro aliis bellum geri queas?*

Id

Id procul dubio adfirmandum; saepe enim non minus ad nos pertinet vicini periculum, quam ad illos ipsos:

Tunc tua res agitur, paries quum proximus ardet.

Sed facile patet, requiri 1. iustam causam, sine qua ne pro nobis quidem bellum iure gerimus, nedum pro aliis.

2. Vinculum aliquod, quale dat a) subiectio; ita Mithridati bellum illatum a Romanis, qui ciues Romanos et publicanos in Asia occiderat; b) foedus; ita Carthaginiensibus bellum indixere Romani, quod Saguntum, sociam ciuitatem, inuaserant; c) cognatio; hanc causam hodierno bello praetexere videmus Kegem Galliae: adfinitatem cum Stanislao; d) communis causa; ita saepe mouente arma Turcarum Imperatore, reliqui Christiani principes socios se praebuere ad communem hostem coercendum.

Sed quaeritur, an tunc, quum bellum pro aliis suscipitur, et lucrari quid ex bello possimus? Adfirm. ideo, 1. quia non solum id agitur, vt iniuria vindicetur, sed et vt in posterum securiores fiamus; quod obtinetur, si ad mediocritatem redigatur nimia potentia; 2. quia multae impensae impendendae fuerunt ob alterius iniustitiam, quae refundantur. Hinc vitio verti non potest Anglis, quod Gibraltar, Minoricam sibi retinuerint in pace.

§. 12.

Hac paragrapho agitur *de decoro belli*: sed hanc materiam iam paullo ante occupauimus; nihil ergo attinet, eam hic repetere.

§. 13.

III. Sequitur tertia pars capitis, *de acquisitionibus in bello.*

Quemadmodum iusto titulo habemus, quod nobis adiudicatum a iudice: ita et quod bello, modo legitimo, acquisiuimus. Prouocat ad hunc titulum ipse Iacobus moriens, *Genes. XXXVIII. 23. Hanc terram gladio et arcu meo comparauit*; id praelegebat Iosepho.

Titulum hunc vel modum acquirendi veteres vocabant OCCUPATIONEM; quum vero occupatio sit rerum nullius, fingeant et res hostium ratione hostium esse nullius, adeoque cedere occupanti. Sed hoc iam refutauimus supra *libr. I. cap. 12. §. 14.* si enim esset

Heineccii Prael. Pufendorf.

S s

res

res nullius ratione hostium, eas possessores ne defendere quidem possent; multo minus eas recuperandi ius esset hosti.

Non opus est illis ambagibus; ius acquirendi est ex ipso iure belli, quod hosti in hostem omnia in infinitum permittit, adeoque etiam, ut ipsi omnia eripiat, immobilia et mobilia.

Ratione domini distinguitur 1. inter res mobiles, quae statim nostrae sunt, simul ac eas praesidiis nostris intulimus; et 2. immobiles, quae etiam statim nostrae sunt ratione tertii, ratione hostis tum demum, ubi in pace iuri suo cedit: antequam enim id fiat, hosti victo et ius et animus est recuperandi. Quemadmodum vero in statu civili nostrum dicere non possumus, in quo alteri est ius vindicandi: ita nec in statu naturali, ubi alteri est ius et animus recuperandi.

Sed quaeritur, 1. cui praeda adquiratur? de immobilibus enim nemo dubitat, quin adquirantur rei publicae; res mobiles vero saltem iure communi adquiri putant singulis; quod tamen falsum esse docet *L. penult. D. ad leg. lul. pecul.*

Iure naturae et gentium haec quoque adquiruntur rei publicae, 1. quia eius auspiciis et sumtibus geritur bellum, 2. quia milites tantum ministerium praestant rei publicae; quidquid vero aliorum ministerio et operis adquiritur, id nobis adquiritur.

Concedi tamen privatis potest praeda 1. ad acuendam fortitudinem, 2. si suo sumtu et periculo aliquis in hostes arma parat.

An vero et res incorporeales adquiruntur victori? Resp. aut rebus inhaerent, et tunc tamquam accessoria adquiruntur cum ipsis rebus; aut inhaerent personae victi principis, ita ut ob personae qualitatem competant, et illa in victorem non transeunt; hinc e. g. occupata provincia transeunt tituli, praetensiones, vectigalia, aliaque iura: non autem victo principe transeunt ad victorem iura in uxorem, liberos, cet.

§. 14.

Hinc facile patet, quomodo in victorem transeat ipsum imperium in victos? Regnum enim est vel

PATRIMONIALE, tunc imperium acquirit victor vel per expressam cessionem, quoties in conditionibus pacis iuri suo renunciat, vel

vel per tacitam, quoties animum recuperandi deponit. Cyrus Croe-
si regnum hoc modo adquisuit; Quum enim regnum patrimoniale sit in dominio principis, nullum dubium est, quin hic et expresse cedere, et tacite derelinquere illud possit.

VSVFRVCTVARIVM seu legitimum, tunc acquirit illud victor, 1. per pactum expressum inter gentem victam et victorem; si victi sponte se subiiciunt, homagium praestant; e.g. Iustinianus ita adquisuit regnum Vandalicum in Africa; 2. per tacitam patientiam, si coacti quidem se subiiciunt, at deinde in victoris imperio adquiescunt, animum recuperandi deponunt; sic Romani adquisuerunt regnum Macedonicum, Aegyptiacum.

§. 15. 16.

Progredimur ad IIII. partem, vbi agitur de pace, et quidem de praeparamento pacis, *induciis*, §. 15. de pace ipsa, §. 16. 17.

Induciae sunt pactum belligerantium, quo saluo statu belli, actus tantum belli in certum tempus suspenduntur.

Pactum.) Ergo sancte seruandum ex eo principio, quod inculeauimus §. 5. Agimus enim cum hoste tamquam cum pacifice.

Saluo statu belli.) Ergo induciae pertinent ad bellum, quia ius controuersum manet.

Actus belli.) Siue omnes, siue quidam; vnde sine ratione Hispani absurdum putabant Hollandorum postulatam, vt induciae fierent in Europa, non in India, GROT. *Histor. Belgic. ad annum 1608.* praeterea id intelligitur tantum de actibus belli offensiuis, non de defensiuis.

Ad certum tempus suspenduntur.) Siue breue illud sit, siue longum. Ceterum quamuis utroque casu induciae pertineant ad bellum, tamen pro spatio illo longioris temporis, vel breuioris, induciae diuiduntur 1. in bellicas, quando hostes manent in prociectu; 2. pacificas, vbi per plures annos nulla sit expeditio.

Hinc facile deciditur quaestio, *an etiam pax detur ad certos annos?* Lacedaemonii pacem inierunt in annos 50. IUSTIN. III. 7. Gustaus itidem ad annos 50. LOCCENIVS *Histor. Suec. libr. VI. a 1541.* Reuera eius modi pax non est pax, quia propositum certandi retinent, sed induciae tantum.

Induciae porro sunt 1. vel *expressae*, quae expresso pacto in-
euntur; 2. *tacitae*, quando necessitas ipsa inducias facit, e. g.
hiems vehementior, maris intemperies.

Differentia in eo consistit, quod ad arma posteriore casu redi-
re licet, quandocumque placet; non casu priore; induciae inci-
piunt a die sequente diem pacti, et durant ita, ut ultimus dies
adhuc ad inducias pertineat.

§. 17.

Pax est pactum omnem hostilitatem plane tollens. 1. Non pa-
titur exceptionem metus, nisi iniuste extorta pax per vim captiuo-
rum Principi illatam; exceptio Francisci I. Regis Franciae. Vid. DAN-
CKELMANNVS *de captiuorum principum pactis*; 2. quaestio, an cum
rebellibus iniri possit? Adfirmat GROT. III. 14. 6. aut enim victi
sunt, aut victores: si victi; Princeps ignouit, dum cum iis pactus
est pacem; sin vicerunt, transigit cum iis.

Officia circa pacem sunt: 1. *pacis leges sancte seruandae*, pacta
enim seruanda sunt, 2. *abstinendum ab omni cauillatoria interpreta-
tione*, 3. *sponsores succurrere tenentur parti aduersus pacis leges laesae*.
Aliud si ex noua causa bellum sit motum.

CAPVT XVII.

DE FOEDERIBVS.

§. 1.

Ultimum ius maiestatis, quod auctor expendit, in specie est
ius foederum; quorum considerantur *definitio et diuisiones*, §.
1-7. adiuncta, §. 8.

Foedus est pactum societatum liberarum ad alterutrum aut vtrius-
que vtilitatem initum; vere ergo natura non differunt foedus et
pactum, sed subiecto tantum, quemadmodum ius gentium et ius
naturae.

Pactum.) Hinc pax etiam est foedus; ab eo tamen distinguitur,
quia pax est conuentio necessaria, foedus conuentio voluntaria.

Societ-

Societatum liberarum.) Earumque imperantium; hinc foedera non sunt, quae inveniuntur inter Imperantem et ciues, sed compacta, capitulationes, cet.

Ad alterius seu vtriusque utilitatem.) Sunt enim alia foedera, seu infra docerimus, aequalia, alia inaequalia.

Hinc admodum absens est, quod scribit PLINIVS Thesea inuenisse foedera: sunt enim iuris gentium, nec inuentore opus habent, sed forsitan inuenit aliquis ritus in foederibus adhibitos, quales praecipue apud Orientales sectio victimae, apud Romanos percussio suis, addita formula: *Si sciens fallo, tum me Iupiter salua urbe et re publica eiciat, quemadmodum ego hunc lapidem*; hinc loquem lapidem iurare.

Ceterum foederum diuisio prima haec est: alia iuri naturae nihil superaddunt, quae vocantur *foedera generalia*; alia quid superaddunt et disponunt, quod iure naturae non debetur, quae vocantur *specialia*; e. g. foedera de pace inuicem colenda sunt generalia; foedera de certo subsidio sibi inuicem praestando, specialia.

§. 2.

Generalia varia sunt, veluti 1. Foedera amicitiae inter Abrahamum et Abimelechum, *Genes. XXI. 23.* 2. Foedera de hospitii iure; hoc ius olim inter priuatos et integras ciuitates obtinebat, vt aduenis praeberentur hospitia et lautia, vid. SCHILTER. *Diss. de iure hospitii*, sed haec hodie extra usum. Eodem GROTIUS. *de iur. bell. et pac. II. 15.* refert foedera commerciorum causa inita; sed hoc ex principio, quod commercia terra marique libera esse debeant; quod manifesto falsum: quum enim quaedam commercia ciuibz et rei publicae noxia esse possint, quis negat, ea prohiberi posse? atqui si prohiberi possunt, possunt etiam permitti, et si permittuntur, permittitur quid, quod iure naturae non debetur.

Quaeritur, an eius modi foedera aliquam utilitatem habeant? Dubitari posset, quia iam tum iure naturae debentur, quae nobis illis stipulamur; sed 1. potest contingere, vt amicitia rupta sit; 2. potest etiam alter sibi persuadere, se nobis iure denegare officia amicitiae; opus est ergo eius modi foederibus; exemplo esse potest transactio Passauiensis. Conf. OBRECHT. *de sponsore pacis*, I. §. 3.

§. 6.

Sequitur noua diuisio foederum : alia enim sunt, quod ad finem attinet, **BELLI** caussa inita, alia ad **PACEM** conseruandam compa-
rata.

Belli caussa foedera ineuntur vel cum hoste, vel cum amicis et sociis, foedera systematica, de quibus iam supra actum *libr. II. cap. 8. §. 10. seqq.*

Dicenda ergo quaedam de foederibus, quibus conuenit, vt populus in certo bello sit neutrarum partium. Ita hodie neutrarum partium volunt esse Hollandi, Veneti, Heluetii; de hoc praecipue quaeritur, *an gens cogi possit, vel vt sit neutrarum partium, vel ut ab ista impartialitate (neutralité) discedat?* Vtroque casu distinguendum, vtrum iam foedere nexus sit populus alteri, tunc nulla coactio locum habet, vt sit neutrarum partium; contra cogi potest, vt arma corripiat. Ita superiore bello Galli cogere non potuerunt Circulos superiores ad neutralitatem, et hodie Imperator iniuriam sibi ab Hollandis fieri conqueritur, quod neutrarum partium esse velint, quum ex foedere teneantur ad auxilium.

Vbi foedus eius modi non adest, nec coactioni locus est ad arma corripienda, e. g. hodie apud Venetos. Cogit vero quis potest, vt sit neutrarum partium; sic superiore bello Imperator coegabat Pontificem, vt sit neutrarum partium.

§. 7.

Foederum tertia diuisio ab effectu est, quod alia sint **REALIA**; quae cum re publica ineuntur, et successores omnes, vniuersales et singulares obligant; **PERSONALIA**, quae cum Imperante, non cum re publica ineuntur; e. g. Rex Poloniae foedera potest inire, quae ad conseruationem dignitatis suae pertinent, vel ad Electoratum; quae ad rem publicam plane non pertinent, ac proinde successores singulares plane non obligabunt in Polonia.

Realia praesumuntur omnia 1. cum liberis populis inita; populus enim semper idem censetur, licet forma mutetur: hinc frustra cauillabantur Latini, se non obligari foederibus cum Romanis initis sub Tarquinio Superbo Rege, quia non amplius Regem haberent; 2. quae intuitu imperii ineuntur pro imperantibus et successoribus; hinc pacis tractatus et successores obligant etiam singulares; 3. quae
cum

cum consensu Statuum vel Ordinum inita: e. g. Badensis pax; Osiensis.

§. 8.

Adinia foederibus sunt SPONSIONES, per quas intelligimus foedera a magistratu vel ministro sine iussu et mandato imperantis vel rei publicae inita.

Distinguendum tamen, an minister generali, an speciali mandato destituatur; posterius enim non nocet, si adsit prius: deinde distinguendum, utrum minister profiteatur, se mandato destitui, et hinc tantum aliquid concedat sub spe rati; an vero dolo malo dissimulet, se mandatum non habere: priori casu nihil ei imputari potest, posteriore potest ob dolum.

Iam iure gentium certum est, 1. rem publicam non obligari foedere suo iniussu et sine mandato a ministris inito, quia nemo potest obligare tertium, nisi mandantem; 2. ministrum, qui in dolo versatur, populo decepto et laeso teneri ad satisfactionem; hanc satisfactionem iure feciali Rom. in eo constituisse novimus, ut minister nudus reuinctis in tergum manibus per feciales dederetur hostibus, eoque pertinent celeberrimae sponsiones, Caudina apud LIVIUM VIII. 8. *seqq.* et Numantina, cuius etiam in iure nostro fit mentio, L. 17. *D. de legation.* Ob priorem Spurius Postumius Consul; ob posteriore Hostilius Mancinus deditus; neuter vero ab hostibus receptus est.

Hodie tamen non praecise ignominiosa requiritur deditio, sed sufficit vel deditio, vel alia satisfactio, prout eam sibi stipulatur gens laesa.

CAPVT XVIII

DE OFFICIIS CIVIVM.

§. 1.

Quae hactenus fufius dicta funt, ad officia imperantium pertinuerunt: fequuntur vltimo hoc capite officia ciuivm, vbi quaeritur 1. quotuplicia illa funt? §. 1. 2. quatenam funt generalia? §. 2-5. 3. quatenam fpecialia? §. 6-14. 4. quandocumque vtraque ceffent? §. 15.

Ciues duplicem repraefentant perfonam; confiderari enim poffunt tamquam membra vnius eiuſdemque corporis, vel rei publicae; id eſt, tamquam ciues; et tunc omnes inter fe funt aequales, cuiuſcumque ſint dignitatis; omnes enim ciuivm commodis fruuntur, et onera ſubeunt, niſi ſint privilegio exemptionis muniti.

Deinde etiam confiderantur tamquam officiales, qui certam dignitatem, certumque officium in re publica adminiſtrant, et hactenus non funt aequales, ceu ſupra in cap. de exiſtimatione demonſtrauimus.

Secundum hoc duplicem reſpectum officia ciuivm diuiduntur in GENERALIA, ad quae omnes indiſtincte tenentur tamquam ciues; SPECIALIA, ad quae quiſque contemplatione officii vel ſtatus ſui obſtrictus eſt; ſic miles debet rei publicae certa officia, ad quae non tenetur legatus, cet. In illis poſſumus plus praeflare, quam debemus, in his id in vitio ponitur.

§. 2.

Iam de generalibus; quae pertinent vel 1. ad Imperantem; e. g. vt eum dignis honoribus perſequamur, §. 3. 2. ad rem publicam vel patriam, e. g. vt eam defendamus, §. 4. 3. ad conciuies ſingulos, e. g. vt cum iis iuſte et ciuiliterviuamus, §. 5.

Addunt aliqui Deum, ſed ei non debemus officia tamquam ciues, ſed tamquam homines, eadem debitori, ſi vel maxime extra ciuitatem in ſtatu naturali viueremus; quod exemplo officiorum eroga ſe ipſum illuſtrari poteſt, ad quae ciues itidem obſtricti ſunt, ſed non tamquam ciues, ſed tamquam homines.

Heineccii Prael. Puſendorff.

T t

Po:

Potest quidem et cuius specialis obligatio nasci ex legibus ecclesiasticis; sed hae non versantur circa ipsum cultum Dei, sed circa ritus, id est, res in se indifferentes. Vir prudens tamen et illas obseruabit, partim quia ciuis est, partim ne exemplo aliis noceat: at haec officia proprie non praestat Deo, sed superiori qui hos ritus praescripsit.

§. 3.

Imperanti debemus REVERENTIAM, FIDELITATEM, OBSEQUIVM; istam, quia est superior, et talis quidem, qui pro nostra et publica salute excubat, qui salutem nostram promouet; ei debemus amorem, amor erga superiorem vocatur veneratio vel reuerentia, ceu supra demonstrauius, ergo imperanti debemus venerationem et reuerentiam. Illam quoque, nempe fidelitatem debemus, quia principi obstricti sumus ex pacto; si praestamus, quod ex pacto debemus, fidem praestamus, adeoque sumus fideles, ergo principi obstricti sumus ad fidelitatem. Hoc nempe obsequium debemus, quia rei publicae vna est voluntas, et quidem per submissionem voluntatum nostrarum; qui submittit alteri voluntatem, obsequitur, ergo debemus principi obsequium.

REVERENTIA se exerit in eo, vt imperantem quouis modo discernamus a reliquis conciuibus; hinc erga illos vtendum a) titulis consuetis et honoribus, b) gestibus in re publica receptis; sic Angli Regi seruiunt genu subnixi, c) sermone modesto, ne de imperante scabiose loquamur.

FIDELITAS a) ne exteris plus deditus sit; quam Imperanti; hinc supplicio quouis dignae coniurationes, proditiones, corruptiones; b) vt imperantis et rei publicae salus suprema lex sit, salua tamen humanitate erga externos; stolidum ergo consilium Hippocratis negantis, se Persis peste laborantibus subuenturum; eas epistolas edidit THOMASIVS in *Histor. sapient. et stultit.*

OBSEQUIVM tum erga leges, tum erga iussa specialia principis.

§. 4.

2. Officia erga patriam in dubium vocauit IO. CLERICVS in *Arte critica*, II, 2, §, 16. existimans, si idea patriae resoluatur; per eam vel intelligi prouinciam, agros, vrbes, pagos, aedificia; vel homines in illa prouincia degentes, qui plerique stulti et mali sunt;

sunt; ridet ergo vetus illud distichum Horatianum: *dulce est pro patria mori.*

Sed per patriam intelligimus ipsam rei publicae structuram, quatenus illa per pacta coaluit; ea destructa et nos peribimus: quum ergo aliter seruari non possit, quam si illam tueamur et defendamus, patriae debemus hoc officium, vt saluam quouis modo praestemus; ergo patriae obstricti sumus 1. ad CARITATEM, tum ob beneficia, quibus salua illa perfruimur, tum ob naturalem instinctum; Patriae fumus igne alieno luculentior. Vlysses Ithacae suae scopulos omnibus Calypso et Antinoi deliciis praetulit: 2. ad FIDELITATEM, quia officia haec nascuntur ex rei publicae structura; haec autem in pactis consistit; pacta requirunt, vt fides seruetur; 3. ad DEFENSIONEM; hoc exigit finis rerum publicarum.

§. 5.

3. Officia generalia erga conciuēs denuo ex fine et structura rei publicae deriuantur. Finis rei publicae est securitas, non modo externa aduersus hostes insidiantes, verum etiam interna aduersus conciuēs. Ex eo sequitur, 1. vt cum conciuibus pacifice sit viuendum; adeoque 2. turbae, tumultus non dandi; 3. a factionibus abstinendum; 4. honori et vtilitati ciuium non inuidendum sit.

§. 6.

Officia specialia diuiduntur in LATIORA, quae se per totam rem publicam diffundunt, §. 6. STRICTIORA, quae ad cuiusvis officium pertinent, §. 7-14.

Latius officium est vnicum, idque permagni momenti: ne quis adflectet in re publica officium vel statum, cui impar sit; nam si id facit, 1. refragatur vocationi Dei, 2. non adsequetur finem desicientibus mediis, 3. prodit eo ipso ambitionem et avaritiam.

Ex eo vero fuit, nec artibus vetitis vtendum esse ad obtinenda officia; quas artes vetitas Romani vno et communi nomine vocarunt AMBITVM, cui varias saepe leges admodum seueras, et in his quoque legem Iuliam de ambitu opposuerunt. His artibus permixtis fieri non potest, quin vel indigni admoueantur clauo rei publicae, vel nimis potentes libertatem opprimant; quod in primis in aristocratiis et democratiis metuendum.

§. 7.

Strictiora officia CONSILIARIORVM ex fine patent, 1. nosse rem publicam, eiusque formam; 2. consilia adtemperare utilitati rei publicae: utilitas autem est vel adparens, vbi sciunguntur iustum; honestum; et vtile verum, vbi semper honesto iungitur utilitas; 3. nec principi, nec populo adulari; 4. abesse a factionibus.

Quaeritur, *an malum consilium puniri possit?* et quidem ob solam infelicitatem euentus? Ita facere solent Turcae, ita olim Carthaginienfes; sed absurdum, nam 1. nihil contra fidem actum; 2. consilium non est obligatorium; 3. euentum nemo praestare potest, et optima consilia saepe male cedunt; 4. deerunt Consiliani coramati, si periculosum fuerit, consilia dare.

§. 8.

Ministrorum ecclesiasticorum officium partim in DOCENDO; partim in EXEMPLO consistit; quae officia ex fine huius status ecclesiastici fluunt, qui est, vt se aliosque beatos reddant. Quum tamen hic finis non pertineat ad ciuitatem vel rem publicam: alia hic quaerenda sunt officia ministrorum, quae tamquam boni ciues rei publicae debent. Talia sunt, 1. nullas proponere doctrinas rei publicae noxias; 2. non agere demagogos, et ciues concionibus seditiosis concitare aduersus rem publicam; 3. non subtrahere se magistratum imperio, et formare rem publicam in re publica.

§. 9.

DOCENTIVM finis est, inuentutem reddere doctiorem melioremque; hinc 1. eorum doctrinae sint verae et utiles; hinc Cato censuit, vt sophistae vrbe submouerentur; hinc non ferendae artes noxiae, astrologia, chiromantia; 2. verae sint doctrinae; addantur probationes et demonstrationes; aliud est praecipere, aliud docere; Non satisfacit illud *ἀντιφασ*, 3. auditores ad virtutem perducant, a) quia homo improbus et dissolutus nihil prodest rei publicae, si vel Salomone esset sapientior; b) praeterea non potest ad veram sapientiam et eruditionem peruenire, qui vitiis indulget; nam et socors erit ad quaevis bona, et necessaria negliget,

get, et perpetuo ideis stolidis et pravis mens occupabitur, nec ordinem in studiis observabit.

Quaeritur, *an libertas philosophandi permittenda sit docentibus?* Distinguendum inter doctrinas indifferentes, et cum rei publicae damno coniunctas: posteriorum ratione nulla potest permitti libertas, e. g. atheismus, magistratum non esse necessarium, iudicia esse iniusta, bellum non geri posse a Christiano, cet. Hinc Hegesiae *μυθισάμηναι* libertatem non indulserunt Reges Aegyptii doctrinas suas propagandi. In indifferentibus permittenda libertas, quia 1. veritas in apicem protrahitur; 2. multa nova reperiuntur; 3. si falsa simul in lucem prodeunt, ea mox profligabuntur a viris doctis. Hinc vidimus eo tempore, quo adhuc sectaria obtinebat philosophia, nihil novi inuentum; si quid enim inveniatur, superprimebantur ingenia. Exemplum Rogerii Baconis.

§. 10.

IUDICVM; Eorum finis est iustitiam administrare, 1. facilem accessum praebere; non cuius domi. Id enim frustraneum est, et cum periculo corruptionis coniunctum, nisi periculum urgeat; sicuti tribuni plebis noctu quoque ianuas apertas habere tenebantur; sed in iudicio; 2. non respicere personas; leges sunt caecae, iudices autem vivae leges, 3. lites reddere breviores; corruptiones fugere, si vel maxime proficiantur ab eo, cuius iusta causa est; nam cur praemiis adduci se patitur ad litem pro eo dandam, qui et praemio non dato id iure exigere poterat; 5. iudicare secundum acta; quam enim periculosum sit, rem committere iudicis conscientiae, iam supra dictum; 6. nihil habere notorium nisi ex actis.

§. 11.

MILITVM alii praesunt; alii parent; illorum fidei est, militibus recte uti ad conservationem rei publicae; ergo 1. eos exercere debent, ut arma expedire, iussibus parere, in aciem disponi discant, ut taceamus, hoc et ad valetudinem facere; 2. disciplinam severam habere, ne cui vim faciant, ne voluptatibus disfluant, ne frena mordeant; 3. militibus parcere, rem publicam aleae non committere; 4. commeatus curam gerere; parum ardoris in aciem

T t 3.

adse-

adferent milites ferias agentes esuriales ; §. militibus pro re publica, non contra illam uti ; hinc insigne facinus admiserunt Marius ; Sulla, Caesar, Pompeius, qui rem publicam viribus suis euerterunt.

§. 12.

Gregariorum militum finis, ut vi hostium opponantur, eamque sustineant ; ergo ab iis iure exigitur a) fortitudo, quae sane toto caelo differt a temeritate ; b) stationes non deferendae, ergo fuga delictum ; Romani infames habebant, qui vulnus in tergo acceperant ; c) obsequium strictum, sine quo bellum non geritur ; d) officium a IOANNE BAPTISTA praescriptum : *Nemini vim inferre, neque facere iniuriam.*

§. 13.

Legatorum finis est, principis personam repraesentare apud externos, et sic eius utilitatem promouere, ac si ipse princeps adesset ; ergo 1. decet eos esse graues, cautos, circumspectos ; 2. nec securos nimis, nec iusto suspicaciores ; 3. mandatorum tenaces, 4. aduersus corruptiones inuictos ; 5. taciturnos.

§. 14.

Quaestorum finis, recte dispensare opes rei publicae ; ergo 1. exigere debent sine acerbitate ; Caroli V. iudicium erat de Belgis, nullum populum libentius conferre tributa, si humaniter tractetur, nullum esse magis pertinacem, si vi utaris ; 2. ad rei publicae necessitates expendere pecuniam, non in suam rem conuertere ; 3. rationes reddere adcuratas.

§. 15.

Supereft IV. vltima pars, *quamdiu ciuium officia durent ? et quando cessent ?* Specialia, quamdiu durat officium ; generalia, quamdiu quis ciuis est.

Ciues

Cives esse desinunt 1. per migrationem voluntariam : si relinquitur obieruntur, e. g. si homines proprii sunt, non nisi cum contentu domini ; si liberi, soluti gabellis ; 2. per exilium, per quod tamen non ius accipiunt, aliquid machinandi contra rem publicam ; 3. per occupationem a hoste factam, quo imperium in victores transit ; 4. aliquando per colonias ; aliquando dico ; nam, ut recte obseruat GELLIVS, coloniae quaedam sunt liberae, veluti Romae Albanorum ; sociae, quae comiter tantum venerantur maiorem patriam, et cum ea perpetuum foedus colunt, e. g. Carthago Tyriorum ; subditae, quae ita ducuntur, vt constanter metropoli subiectae maneant, hodie Hispanorum, Gallorum, Anglorum, Batauorum in Indiam et Americam ductae.

Solae ergo liberae coloniae officiis generalibus erga metropolim vel maiorem patriam plane liberantur, non reliquae.



INDEX CAPITVM.

* * * * *

LIBER I.

CAP. I. de actione humana.	pag. 1
II. de norma actionum humanarum, seu de lege in genere.	24
III. de lege naturali.	37
IIII. de officio hominis erga Deum seu de religione naturali.	49
V. de officio hominis erga se ipsum.	58
VI. de officio quorumlibet erga quolibet, et de non laedendis aliis.	74
VII. de agnoscenda naturali hominum aequalitate.	83
VIII. de promiscuis officiis humanitatis.	86
IIIIII. de officio paciscentium.	92
X. de officio sermocinantium.	108
XI. de officio iurantium.	115
XII. de officio circa acquirendum rerum dominium.	123
XIII. de officiis, quae ex dominio rerum per se resultant.	140

CAP. XIII.

CAP. XIII. de pretio.	pag. 144
XV. de contrahibus, qui pretia rerum supponunt, et fluentsibus inde officiis.	151
XVI. quibus modis solvantur obligationes, quae ex pactis oriuntur.	165
XVII. de interpretatione.	170

LIBER II.

CAP. I. de statu hominum naturali.	pag. 184
II. de statu coniugali, vel officiis coniugalibus.	192
III. de officiis parentum et liberorum.	205
III. de officiis dominorum et seruatorum.	213
V. de causa impulsiva constituendae ciuitatis.	216
VI. de interna ciuitatum structura.	225
VII. de partibus summi imperii.	235
VIII. de formis rerum publicarum.	243
VIII. de affectionibus imperii ciuilibus.	253
X. de modis acquirendi imperium, imprimis monarchicum.	259
XI. de officio summorum imperantium.	268
XII. de legibus ciuilibus in specie.	276
XIII. de iure vitae ac necis.	282
XIII. de existimatione.	296
XV. de potestate summi imperii in bona ciuitate contenta.	307
XVI. de bello et pace.	311
XVII. de foederibus.	324
XVIII. de officiis ciuium.	329

FINIS.



523513



525513



